

44128





514 132-16/497

Horned

Le
DIONYSIAQUES
DE NONNVS
ou
Les Conquestes de Baccus
Aux Indes



31158



L E S

344128


DIONYSIAQVES

O V

LES VOYAGES,

LES AMOVRS, ET LES
conquestes de Bacchus aux Indes.

TRADVITES DV GREC DE
NONNVS PANOPOLITAIN.



A P A R I S ;

Chez ROBERT FOÛET, rue saint Iac ques
à l'Occasion, deuant les Mathurins.

M. D. C. X X V.

Avec Privilege du Roy.

344158





A MONSIEVR

LE BARON DV PONT,
DE L'ILLVSTRE ET
ANCIENNE MAISON DE
Marconay en Mirebalais, Gentil-
homme ordinaire de la Chambre du
Roy.



MONSIEVR,

*Scachant depuis que
i'ay l'honneur de vous
cognoistre, que vous
estiez curieux de la Philosophie naturel-
le, que les Egyptiës ont caché sous le voi-
des fables, pour la garantir du mespris de
ceux qui la profanent. I'ay pensé que ie*

à ij

EPISTRE.

deuois recognoistre les obligations que ie
vous ay , & vostre merite , comme
autrefois le feu Roy HENRY LE
GRAND d'heureuse memoire , l'a
reconneu , & vous offrir cet ouura-
ge , où vous remarquerez toute la
Physique descrite au naif , avec tant
d'artifice , que vous admirerez com-
ment les Sages ont esté si subtils à
couvrir leurs sciences , ou si jaloux ,
ne desirant pas les communiquer au
peuple , de peur qu'il ne ressentist les
mesmes peines qu'Acteon , pour auoir
veu ceste belle Diane toute nuë. Le
vulgaire qui n'a pas les yeux assez
forts pour penetrer dans les mysteres , &
qui ne peut goustier que l'escorce , se con-
tentera de voir les amours de Bacchus ,
ses conquestes aux Indes , & toutes ses
aduëtures , qui sont à la verité dignes de
remarque , tant à cause de la diuersité des
inuentions , que pour les belles pointes , &
les allusions que Nonnus rapporte

ÉPISTRE.

en les descriuant. Mais vous qui
auez l'ame teinte d'une solide con-
gnoissance de ces mysteres, vous ver-
rez iusques dans le centre où repose
la verité, esperant qu'elle contente-
ra vostre curiosité par sa beauté qui
reluit comme le Soleil, & de telle
façon que les hibouts ne peuuent souf-
frir l'esclat de ses rayons, à cause
de la foiblesse de leurs yeux. Je me
suis assuré, Monsieur, que vous
receurez ceste traduction avec autant
de bonne volonté, que ie vous l'offre
avec affection, vous suppliant d'em-
ployer vostre autorité à la deffense de
cet ouurage pour la garantir du tom-
beau, de peur qu'une lunon jalouse
& enuieuse, n'estouffe ce petit Bac-
chus en sa naissance. Vous le mettrez
donc, s'il vous plaist, entre les mains de
l'immortalité, pour l'affranchir de la
mort, comme autrefois Mercure le

ÉPISTRE.


*donna aux filles de Lamus, & vous
m'obligerez à ne respirer que l'honneur
de vous servir, & de me dire*

MONSIEUR,

Vostre tres-humble serviteur;
BOITET.



ADVIS AV LECTEUR.

E n'est pas icy vne traductiō periphra-
see (amy Lecteur)
comme le vice du
temps le permet & le desire:
mais c'est vne Traduction sim-
ple & fidele, qui rapporte au
mieux que i'ay peu la grace,
l'air, & le stile de l'Auteur. Ie ne
me suis pas efforcé d'adoucir le
discours à la mode, pour plai-
re à l'oreille, au prejudice de ce-
luy que ie veux imiter: mais à le
bien représenter, comme vn
Peintre qui emprunte tous les
efforts de l'art pour faire vn
pourtraict, auquel on puiffere-

marquer toutes les differences
qu'il y a avec les autres hōmes,
Or tout ainsi que les pourtraits
quel'art a rendus à telle perfe-
ction que l'on n'y desire que la
vie & la parole, sont plus re-
commandables que les crotel-
ques, où autres fantaisies où il
n'y a ny imitation, ny naïfueté:
aussi i'ay pensé que l'on rece-
uroit l'ouurage en meilleure
part, qui auroit des conuenan-
ces & des rapports avec l'origi-
nal, que celuy qui en seroit du
tout different par quelques
considerations. A la verité l'on
peut remarquer que mon stile
est rude, descousu & desagrea-
ble: mais aussi il est selon l'air de
l'Auth eur, comme les curieux
pourront le recognoistre, s'ils
prennent la peine de lire No-
nus en Grec, & le conferer avec

'au Lecteur.

celuy-cy: En quoy ils m'obligeront grandement, & verront le grand trauail & la grāde difficulté que i'ay eu à traduire cet Autheur si difficile à entēdre & si descoufū. Il me fuffit feullement pour me garantir de reproche, que Nonnus me defende de son auctorit . I'eusse bien periphras , comme autrefois i'ay faict   l'Odyss e: mais ie n'ay pas os ,   ceste heure que ie recognois ma foiblesse, me confier en mon propre jugement, pource que i'ay remarqu  en ses inuentions l'air & la grace d'un discours (qui exprime vne passion) de telle energie, & si conuenable au sujet qu'il representoit, que ie croirois luy faire tort, &   son intention, que d'y adiouster pour faire les liaisons des periodes.

Aduis

Et il faut cōfesser que les Grecs ont tant eu d'aduantage à bien descrire les passions de l'ame par des paroles animees, que les curieux de nostre temps n'ayās peu paruenir à ceste perfection, se sont estudieza adoucir leur stile, craignant de blesser la langue & les aureilles, tellement que vous les verrez représenter les menasses, & les boutades d'un Capitaine, par des paroles douces, & un stil uni & lié; comme si la passion qui trouble l'ame permettoit que la cholere fit un discours plein de douceur, d'une façon égale & polie, sās faillies. Mais l'on me pourra reprocher que la traduction est un peu obscure & difficile à entendre: il faut considerer que ce liure sera beaucoup plus agreable à

an Lecteur.

ceux qui ont de l'erudition, & la cognoissance de la fable (à cause que Nonnus est tant rempli d'inuentions, & de tant de rapports d'exemples, & des anciennes Metamorphoses,) qu'à ceux qui sont sans lettres, qui ne pourront gouster que l'histoire de Bacchus, & de ses conquestes aux Indes: Mais aussi, ie ne pouuois pas faire des commentaires en traduisant. Ceux qui auront leu autrefois Noel le Comte, qui a faict la Mythologie des Dieux, y auront de grandes lumieres, & receuront vn grand contentement à la lecture de cet Auteur: Et ie confesse librement, qu'il est d'vn tel merite, qu'il falloit vn Homere François pour le tirer de son Cahos, & pour le mettre en sa perfection. De for-

Avis au Lecteur.

té, que recognoissant ma foiblesse, i'en'ay pas osé adjoûster, ny diminuer, & me suis contraint à le suiure pas à pas, sans me donner la liberté de la campagne, de peur de l'alterer. Que si l'on y remarque des fautes, ie seray excusable pour le peu de temps, que i'ay eu, & la grande difficulté de l'Auteur, qui n'a iamais esté commenté, en iugeant que nos defauts sont autant de tributs & d'hommages que nous rendons à la fragilité humaine.







I
L E S
DIONISIAQVES
D E N O N N V S.

O V
L E S C O N Q V E S T E S
de Bachus aux Indes.

LIVRE PREMIER.



Iupiter changé en Taureau ravit Europe. Typhon fait la guerre aux Dieux, renverse le Zodiaque.



M V S E fauorable, racontez moy les estranges accidens de Semele, lors qu'elle receut Iupiter en ses amoureux embrassements, esclattant de foudre & d'esclairs : & me

A

dites la prodigieuse naissance de Bacchus deux fois nay : comme d'une façon admirable il veid le iour, & comme n'estant pas arriué au degré de perfection, au defaut d'une mere il fut coufu en la cuisse de Iupiter: de sorte que le pere accoucha contre les loix du sexe. Ce prodige ne fut pas trouué estrange de la mere, car elle auoit encore la ressouvenance d'un pareil accident arriué en la personne de Iupiter qui enfanta Minerue de son cerueau au secours de Vulcan. C'est pourquoy donc ô Muse, apportez-moy la ferule, & remuez vos Cymbales: donnez-moy le Thyrses de Bacchus, & me representez en l'Isle de Phare, les dances des Nereïdes, afin que comme ie chante ses loüanges, Protee qui se metamorphose en tant de façons & de figures nous apparaisse comme un bon presage: car s'il prend la forme d'un serpent, qui se contourne en sa queue, & qui se glisse sur la terre. Ie chanteray des merueilles de Bacchus, comme par la grandeur de son courage, il dompta l'insolence & l'audace des Geans, que s'il se metamorphose en un Lyon espouventable, ie luy chanteray un Hymne, favori-

faict l'accouchement de Rhea avec la troupe de ses bestes farrouches. Que s'il prend la figure d'un Leopard, ie diray comment avec ses Elephans il reduisit les Indiens sous son obeissance: s'il paroist comme vne Truye, ie raconteray comment il en fit tuer grande quantite aux Noces de la belle Aure: Mais si prenait plaisir à la diuersite de ses metamorphoses, il s'escoule comme vne eauë, ie raconteray ses diuers voyages & ses auentures en la mer, & le peril qu'il courut en combattant Lycurgue: s'il s'esleue comme vn arbre, ie deduiray la façon de pressurer, le raisin aux pressoirs de Bacchus pour en tirer le vin delicieux, & la mort d'Icarie. Donnez donc, ô Mimallonides, cette herbe, & au lieu des vestemens ordinaires, accommoder-moy de la nappe d'un Cerf, emplissez-la moy du vin tres-excellent de Maronee, & laissez chez Homere & Idothee la Conqueste des peaux puantes de veaux marins à Menelas, pour tromper Protee. Apportez-moy des Cymballes & des instruments propres aux Sacrifices & aux Festes de Bacchus, & des flutes à cet effect: non pour deffier Apollon au combat: car il

n'a pas pour agreable le son rude de nos instruments: ainsi que fit Marsias qui fut si outrecuidé, que d'entrer en deffy avec Apollon, qui le fit escorcher tout vif, pour punir vne si grande insolence.

Sus donc, belle Deesse de grace en cōmenceant à Cadmus, racontez-moy la metamorphose de Iupiter en Taureau, comment du riuage de Sidon, pour favoriser la passion amoureuse qui le pressoit; il mugit comme vn Bœuf, imitant le mugissement de ces animaux pour enleuer la belle Europe qui frequentoit en ces lieux: Comment il la ravit, la portant sur son dos à nâge au milieu de la mer. Ces orages troubloient grandement l'esprit de cette nymphe: neantmoins elle se tenoit fermement, & les vagues ne la moüilloient en aucune façon. Elle flotloit ainsi au gré des vents, avec tant de grace, que si vous l'eussiez cōsiderée en cet estat, vous eussiez pensé voir Thetis ou Galathee, ou l'amoureuse de Neptune voguer au calme de la mer: ou voir la beauté de Venus flottante sur vn Triton marin. Neptune admira la façon de mugir en cet animal: mais Triton qui recongneut le mugissement de Iupi-

ter metamorphosé en cette sorte, pour luy respondre, chante comme en mugissant, vn Epitalame en la faueur de cet amant: cette merueille ne fut pas seulement apperceuë de luy, mais aussi de Neree. Et voyāt vn nouueau Pilote, portant des cornes voguer ainsi, esmeu de crainte & d'admiration monstra ce prodige à Doris. Ainsi Europe flotoit ayant les Cornes de son Taureau pour gouuernail, & l'Amour pour conduite, les haleines de Boree le fauorisoient, & s'entonnant dans les vestemens de cette Nymphe, donnoit occasion à Iupiter d'accroistre ses vœux amoureux. Or tout ainsi que les Nereides quand elles desirent voir ce qui se passe sur la mer, s'esleuēt portez sur des Daufins qui fendent les flots, & font paroistre dans l'eau, l'image de celuy qui nage: ainsi Boree enleue le Taureau sur la superficie de la mer, & alors qu'il se roidit contre ces efforts, Cupidon comme vn Berger le fouette & y employe son baston: l'on peut dire à bonne raison, que Venus a reduit la puissance de Iupiter sous le joug de l'Amour. Minerue voyant que Iupiter si puissant en ses foudres estoit

conduit par vne simple fille rougit de de honte.

Or comme ces Amoureux trauerfoiēt la mer, les bourrasques ne peurent esteindre le feu de cette passion, ny mesme Venus le gratifier d'un mespri de la beauté, qu'il auoit rauie sous le desguisement de cete forme estrangere, & esloignee de l'honneur d'une Diuinité, à caule, qu'autrefois elle auoit pris sa naissance del'escume de la mer. Cependant Europe estoit la gouuernante du Taureau, ou du vaisseau, & la charge mesme. Ce prodige donna de l'estonnement au Pilote Achaique, & luy fit dire.

O merueille que mes yeux voyent, mais ô mes yeux, n'estes-vous point trōpez? Comment se peut faire qu'un Bœuf qui a de coustume de se jouer dans les prairies, nage & flotte au gré des vents? Quoy, Iupiter n'a-t-il pas rendu la terre propre pour ces animaux, sans leur donner la mer, où les vestiges de la cour, se ne peuuent estre remarquez? I'apperçois bien, que ce n'est pas là vne navigation ordinaire: mais n'est-ce point la Lune qui quite le Ciel, & qui se porte sur les flots?

Non : C'est plustost Thetis, qui prend
ses esbats : mais ce Bœuf marin n'est pas
du tout semblable à vn terrestre : car il a
la partie inferieure d'un poisson. Ce
pourroit bien estre Nerée qui préd plai-
siranager, où Ceres qui cherche la Pro-
serpine. N'est-ce point toy. O Neptune
qui te bannis de ton sejour ordinaire,
prenant le dessein de te pourmener
sur l'empire de Cerés, comme si tu na-
uigeois sur la terre, sous le desguise-
ment d'un Taureau : mais les rapports de
l'Agriculture, ne se rencōtrent pas en la
mer. Nerée n'est pas Berger, ny Protee
laboureur, Glaucque ne sème point le
grain, & ne se retrouvent pas des prez,
& des Bocages : Mais des Pilotes qui
fendent la Marine, non avec la char-
rue : mais avec le gouvernail, & mesme
ceux qui sont experts à la nauigation, ne
sèment point : Car la mer n'a point
d'autre fruit que la mousse, & d'autre
semence que l'eau. Le Nautonnier est
le laboureur, le vaisseau est la char-
rue : mais contente ma curiosité, & dis-
moy où tu as rauy la beauté de ceste
Nymphé. N'est-ce point que les Tau-
reaus desrogeans aux loix de leur espee

passionnés d'amour, ravissent les Nymphes: N'est-ce point Neptune, qui a commis ce rapt sous la forme de ce Taureau, continuant la pratique de ses ruses amoureuses, qu'il exerça sur la simplicité de Tyro, en prenant la ressemblance du fleuve Enipee.

C'est ce que proposoit Achaique, sur l'incertitude des opinions qu'il concevoit, à l'admiration de cet objet, & cependant Europe qui ne pouvoit préjuger que la violence, que l'on devoit faire à sa chasteté, en deschirant ses cheveux de deuil, profera ces paroles pleines de tristesses.

O riuages perfides, vous n'avez point de honte de voir pratiquer un attentat insolent à ma beauté. Et vous Eaux sourdes, si vous estes capables d'escouter mes plaintes, Dites à ce Taureau (s'il se peut rendre susceptible de raison) O cruel pardonne à la chasteté de cette Nymphé. Et vous riuages, qui retentissez au chocq des flots, rapportez à mes parens, l'accident arrivé à Europe, dittes leur qu'elle est en hazard de recevoir les efforts, d'une sollicitation impudique, & vous, O tour

billons de la Mer , emportez mes cheveux ; & les donnez à ma mere , comme des reliques de celle , qu'elle ne peut esperer de reuoir ; Et toy Boree de courtoisie , si ie puis auoir par mon merite quelque pouuoir sur ton ame : autant où plus que la belle Nymphé Oritie , enleue moy ; & me deliure de ce peril , & me porte sur les aisles des vens : mais que dis-je , ma passion me desrobe le iugement. N'exprime point ces plaintes de peur qu'apres auoir succombé aux efforts amoureux de ce Taureau : le ne subisse la mesme violence de Boree.

Telles estoient les plaintes d'Europe , & cependant elle aduançoit tousiours. Cadmus ayant eu aduis de ce rapt , cherche sa sœur en toutes les Contrées circonuoisines ; & ne peut remarquer les vestiges de cet amoureux. Apres auoir couru par tout , il arriue en la grotte des Arimes ; dont les montagnes sont si hautes , qu'elles semblent menacer le grand Olimpe , où les Dieux aislez , comme des oyseaux , volent & s'esgayent en l'ait.

Ainsi Iupiter passionné d'Amour vient rechercher les embrassemens de Plota ,

pour engendrer Tantale, & pour cet effect: il cache ses foudres, & son Trifurque dans le profond de cette roche. Mais comme les foudres estoient eslanchez, en produisans vn feu meslé de fumee, la roche commençoit à se noircir, & faire reluire quelque estincelles de feu qui eschauffoient les fontaines circonuoisines par la vehemente ardeur, & les vapeurs chaudes faisoient burire l'eau des fleuves, & des torrens. Typhon par le Conseil de sa mere; la terre desroba à Jupiter ses foudres & ses esclairs, en sa forme espouventable, sa voix est semblable aux hurlemens des bestes les plus cruelles; avec vn grand nombre de serpens qui l'accompagnent, & les Leopards qui luy laichent les cheveux. En ceste façon horrible; il estend ses mains en forme d'une moisson de bled iusques au Ciel, il trouble l'ordre, & la belle disposition qui s'y rencontre. Car d'une main, il presse la Cynosure, & tourne la teste de l'Ourse de l'autre costé du Pole, & change la situation du chariot. Ce changement rendoit les heures du iour inegales, & mesme donnoit occasion à la Lune de se leuer dans le cours du So-

leil en plein midy, & non content de cela : il change les vens & les Poles, & le signe de Capricorne. Il tire du Ciel le signe des Poissons ; il donne vn autre ordre, & vne autre disposition au Belier : il fit paroistre l'Equinoxe .au Printemps, contre les loix de la nature: Ainsi il estoit enleué au Ciel, estendans les mains avec ce pouuoir, d'obscursir la lumiere du Soleil, avec son regiment de Serpens, il fautoit sur le Pole & quelquesfois sur la queue du Dragon : il faisoit des nazarzardes à Mars le Belliqueux. Et pour rendre telmoignage de la puissance qu'il auoit sur le Ciel, il donnoit tantost mouvement au Cercle où est attachee Andromede fille d'Cephee, & tantost l'empeschoit : mais cette tyrannie se rendoit insupportable au courage des plus forts, qui s'opposoient, non sans estre tournez & virez par sa rage. Les Hyades avec l'Enseigne de la Lune, ne faisoient pas moins de resistance. Les serpens qu'il dardoit entouroient Bootes : mais luy se confiant à la resistance que pouuoit faire le Dragon du Ciel, produit vn effort plus violent, le combat ne fut pas seulement au Ciel : mais aussi en la Terre, il

changea les vents à sa volonté : il emmena avec luy l'Estoille du Matin & du soir, il exerça vne insolence sur le chariot de Neptune, & le traina iusques en la terre : il enleua ses Cheuaux du profond de la mer, & les conduisit iusques au Ciel : Mais comme il fouettoit ses cheuaux, ceux du Soleil s'irritoient, craignant la mesme peine. Sur la chaleur de ces allarmes il print le Taureau qui estoit attaché, & le lança à la Lune, & arresta son cours, & rompit les coliers de ces animaux. Il jetta vn venin semblable à celuy du serpent Echidna. Mais, la Lune ne manqua pas de courage, à combattre ce monstrueux Geant, & fit armer toutes les Puissances Celestes. Les bœufs de la Lune mugissoient horriblement, craignant le gouffre de son gosier : les Heures invincibles, ne manquèrent de prendre les armes pour les secourir, & d'y conuier toutes les Vertus du Ciel. Cependant le tumulte estoit grand, le feu & les flammes esclattoient, du chocq de ces armes : tous les Vents & les quatre parties du monde. conspiroient sa ruine : toute la Nature s'accorloit en ce sujet, tous les Astres & les.

Estoilles prindrent le mesme dessein,
de marcher en champ de bataille. Le Po-
le à ce grand bruit & à ce tumulte raison-
na. Orion voyant les monstres & les be-
stes feroces, que ce Geant conduisoit,
tira son espee, & donna courage au
Chien Celeste, à cet exemple il arma
sa gueulle de feu & de chaleur, abbayant
horriblement, & donna aux serpens
de ce Geant, vn desir enragé de mordre,
Les sept Zones n'auoient pas moins de
ferueur en ces allarmes, & s'armerent
avec les Plyades, qui faisoient en leurs
combats vn bruit qui raisonnoit dedans
le Ciel, comme si c'eust esté vn Echo:
les Planettes aussi se deffendoient, &
particulierement Mars armé de toutes
pieces, commandoit à la troupe. Il dō-
noit du courage, autant qu'il auoit
moyen de le faire, estant le Dieu des
armees. Mais Ophiufque voyant le
grand nombre de serpens les charge, &
lance des jaelots fort rudement, qui
estoient enuenuimez du sang de vipere.
Celuy qui conduit le Capricorne, ne
manqua pas de darder son jaelot: le
Dragon se met en pareil deuoir, avec
tant d'effort qu'il troubla la lumiere

du Ciel, & celuy qui conduit le Chariot ne luy debuoit rien en vertu & en generosité. Pendant ces furieuses atteintes la Lyre qui est au Ciel, predoit la victoire aux Puissances Celestes : & à lors Typhon enragé de passion, enleua la Montagne de Corycee & lança le fleuve de Cilix, & conioignit Tarsus & Cydnus si escartez, & décocha cōtre les Mers, les javelots : car ayāt fait rudemēt la guerre au ciel, il en menasse la Terre & la mer ; & pour cet effet, ce Geant passe la mer sans peril, sans mesme se mouiller, le bruit qui vient des eaux qu'il esmeut, estoit grand, & les Dragons qui nageoient sur l'eau, rangeoient les bataillons, & eschauffans par leur siffle le courage de l'armee : ils ietoient vn grād venin qui infectoit Neptune. Et il ne faut pas s'estonner, si la profondeur ne luy peut nuire : car il est de si prodigieuse stature, que les hauteurs des Mers ne luy viennent pas à la cheuille des pieds, & la haute region de l'air au ventre : il ne receuoit point d'autre incommodité que des nuees qui le chargeoient, & le contraignoient de baisser la teste, les animaux marins pouuoient bien secou-

rir Neptune: mais ils furent espouuan-
tez à l'instant, & mesme le Lyon de la
mer, qui deuoit mōstrer quelques effets
de generosité, entendant le rugissement
des Lyons, que ce Geant traînoit avec
luy, se cache honteusement dans l'eau
& n'ose plus paroistre. Et quant à la
mer, si vous l'eussiez considerée, vous
l'eussiez apperceu croistre, & grossir à
veüe d'œil. Les veaux marins mugis-
soient avec vn horreur espouuentable,
de la frayeur qu'ils auoient. A ce trou-
ble inesperé, les Dauphins n'osoient
plus folastrer sur la mer: mais ils se reti-
roient dans les concauitez de l'eau, le
Poulpe que d'ordinaire s'attache aux
rochers, & qui se plaist à la diuersité de
ses metamorphoses, apparoissoit com-
me vne eau coulante, de peur d'estre ap-
perceu, le Murene ialoux de son pour-
pres'enfuit, bien qu'il soit porté natu-
rellement à ce desir de frayer, avec les
serpens: car la consideration qu'il auoit
que ceste malheureuse vengeance, pre-
stoit secours pour faire la guerre aux
deitez, luy deffendit l'acointance, par
le seul respect des Dieux. La mer s'en-
flloit tellement qu'elle sembloit toucher

le Ciel, les flots & les vagues s'esleuoient, iusques à la haute region del' Air, ou le feu elementaire resistant à son contraire, produisoit vn bruit horrible, qui aigrissoit les cœurs des combattans. Typhon sur le commandement qu'il s'attribuoit sur l'Empire de Neptune, lance vne Isle entiere, avec vne grande force, en la tournant, & virant sur le Ciel: comme ce Geant exerçoit sa puissance, sur les regions de l'air, ses mains voisines du ciel s'armerent, contre le Grand Olympe: mais Iupiter sur la consideration de l'insolence commise sur la terre, & l'attentat perfide sur les Puissances Celestes, ne peut supporter cet affront, sans se venger de cette audace, pour cet effect, il commençoit à preparer ses foudres: mais Typhon à peine pouuoit-il supporter la pesanteur du Trisulque de Iupiter: neãtmoins il le lance & manie le mieux qu'il peut assez lachement sans bruit, à faute de force, car la chaleur de l'air & le deffaut d'humidité, le rendoient plus lasche, la soif le debilita tellement, qu'il ne peut roidir la main, pour le lancer pour cette cause les esclairs & les estincelles de feu, meslez de fumée, firent vne lumiere confuse

confuse & brune, car cōme si le foudre eust recogneu la foiblesse de ce Geāt ces esclairs espars çà & là qu'ils estoient, ne pouuoient paroistre en leur lustre: & tout ainsi que celuy qui n'est pas bon Escuyer, ny expert à dompter des cheuaux, quand il monte vn barbe, pour luy donner la carriere, ou le dresser, est secoüé, & jetté par terre comme vn cavalier mal à droit: Ainsi sembloit-il que les foudres que Typhon eslançoit à deux mains avec grāde peine, recognoissoient que ce n'estoit pas Iupiter.

Mais comme Cadmus fut arriué aux Arymes, au mesme temps le bœuf aborda au port assez heureusement, & descarga cette Nymphé sur le riuage: Iunon l'apperceut, non sans produire des effects d'une jalousie furieuse, car en riant elle profera ces paroles.

O Apollon, si tu veux obliger Iupiter ton pere, prends garde que quelque laboureur ne l'atelle à la charruë estāt disguised sous la figure d'un bœuf, Mais quel aduis est-ce que ie donne, au prejudice de la vengeance, que ie desirerois estre exercée sur l'inconstance & sur la perfidie de ses amours, à la mienne vo-

lonté qu'il fust defia à la charruë , afin qu'il teffentist & les pointes d'Amour & des Pastres , & que ie luy peusse dire : O Iupiter, endure volontairement cette peine. Et toy , ô Apollon , garde ton pere, de peur que la Lune ne luy face subir le joug , & que venant visiter la couche amoureuse de son Endymion , elle ne luy face ressentir ses aiguillons. O Iupiter , Io estoit bien mal-heureuse, comme elle fut chāgée en vne vache, n'ayant vn mary qui luy ressemblast en espee, & eust desiré plustost pour lors, que tu luy eusses fait naistre vn Taureau, pour bien accoupler tes Amours: mais prends garde qu'en cet estat Mercure qui se plaist aux larcins des bœufs, en te desrobât cōme vn bœuf , il ne face vn affront à son pere. Mais que feray-je sur ces Amours prodigieuses , Argus avec ses cent yeux deuroit viure , afin qu'il le gardast , & qu'il le conduisist dans les pastis , à l'ordinaire des troupeaux. C'est ce que Iunon profera esmeuë de jalousie, & aussitost Iupiter reprit sa premiere forme , & parut en la façon d'un ieune hōme, il fit mille caresses à Europe , & apres plu-

fleurs sollicitations, il luy donna vn baiser amoureux, & cueillit la fleur de sa virginité : donc apres la iouissance, elle se treuva enceinte, & fut donnee en-garde à Asterion : cependant ce Taureau fut enleué au Ciel, pour y tenir place entre les douze Signes du Ciel.

Comme Iupiter alloit honorer ceste forme estrangere & indigne d'une Deité, il rencontra Cadmus, qui cherchoit Europe. Il prit conseil avec luy, comment il pourroit faire sentir à Typhon la rigueur de son destin : & sur la resolution qu'il prit, il le fit habiller en Berger, Pan ne manqua pas à luy offrir des troupeaux d'aigneaux, & de bœufs, & de cheures, & de luy donner vne flûte afin qu'il fust instrument & organe de la perte de Typhon : & apres auoir pratiqué cette inuention, Iupiter assembla le Conseil, & dit.

O Cadmus, c'est maintenant qu'il faut que tu entonne quelque chanson agreable, afin que le Ciel qui est troublé de tant d'émotions s'appaise, car il est à craindre, que le grand

Olympe reçoive de l'incommodité des assaults de ce Geant, luy qui nous fait la guerre de nos propres armes, & il n'y a que la seule cheure celeste qui resiste, mais que fera-t'elle toute seule, peut-elle seules'opposer aux violences de ce Typhon. Je crains que Saturne ne se moque de la foiblesse de ses deffenses, & que la Grece qui est si copieuse en fables, & si riche en inuentions, ne diminuë l'honneur qui est deu à nos puissances, & qu'elle publie par tout à nostre preiudice, qu'il commande absolument dans le Ciel : Sus donc Cadmus, pour favoriser la deliurance des Deitez, & ruiner sa tyrannie : entonne sur ton flageolet, quelque chanson agreable, afin que par ton harmonie tu trôpes ses oreilles en charmant la raison. N'aprehende point ses foudres, & ses tonnerres, car mon pouuoir est assez grand pour empescher qu'il n'eslance ses feux, si par tes desguisemens & par l'harmonie de ta fluste, tu te rends victorieux de l'insolence de ce monstre, ie te donneray des recompenses dignes de tes labeurs, & non seulement tu seras le conserveur de cet ordre, & de l'har-

monie qui est dans le monde, mais aussi ie te donneray la belle Harmonie en mariage, & toy, ô Amour, qui commande à toutes ces liaisons amoureuses, qui es le pere de tous les mariages, décoche vn de tes dards d'amour & de bienueillance, & en tire vn autre plein de feu sur ce Geant monstrueux, & te fers de mes foudres: & qu'aussi apres auoir produit leur effect ils se reunissent à mon pouuoir, afin que tes flesches remportent la victoire, que Iupiter n'a sceu s'attribuer: que l'harmonie de ton flageolet trompe ses oreilles, & qu'elle luy charme la raison: autant que l'amour m'a possédé à la recherche de la beauté d'Europe.

Il dit ainsi, & Iupiter en la ressemblance d'vn taureau, estoit en la montagne que l'on appelle Taurus, & cependant Cadmus avec ses habits de Berger, appuyé sur le creux d'vn chesne à la friscade, commença d'entonner vne chanson melodieuse qui vint iusqu'aux oreilles de Typhon, & le posséda de telle sorte qu'il s'approcha, se plaissant à la douceur de ce chant, il laissa les foudres qu'il auoit desrobés à Iupiter dans

la grotte, & les donna en garde à sa mere la terre: mais Cadmus voyant les approches qu'il faisoit se cacha sous vn rocher. Ce Geant ayant recogneu que Cadmus fuyoit, il l'appella s'efforçāt de le retenir. Il ne sçauoit pas le malheur qui le tallōnoit, & les charmes que l'on auoit preparés à ses oreilles, pour tromper sa raison. Dans cet auement il profera ces paroles d'un visage inhumain.

Berger, qui te donne subiet de me craindre, & de cacher ta main de ton vestement: ne pense-tu pas qu'il me soit à honneur (apres auoir triomphé de Iupiter) de m'ebatre à la prinse d'un homme mortel comme toy, & d'emporter de force ton flageolet, aussi bien que les foudres de Iupin? n'y a-t'il pas quelque ressemblance entre les flustes & les foudres: neantmoins ne pense pas que ie te le vueille desrober, possede-le d'un esprit tranquille, car croy que Typhon en a vn qui est au Ciel, qui surpasse tout ce qui se peut imaginer de plus rare.

Cependant Cadmus poursuioit son proie, & Typhon luy dit en continuāt,

O Berger, ie croy que Iupiter se plaist à cette harmonie, & que mesme cette musique luy est necessaire: mais qu'il y prenne ses esbats, quant à moy, i'en'en fais pas conte. Mon plaisir est, de ramasser les nuës, & les faire piroüetter, non des chalumeaux: & du chocq des nuages faire entendre aux mortels, vn bruit espouventable d'etonnerre grondant, & non point d'autre Musique. Entõne dõc vn motet agreable, cependant que les quatre vents me seruiront à faire resonner mes foudres. O Berger, tu ne seras point frustré de la recompense que tu merites: car quãd ie possederay le grand Olympe, d'vn pouuoir absolu, ie t'enleueray de la terre au Ciel, & non seulement ta personne, mais aussi ton troupeau, & le logeray en vn lieu recommandable proche de la Cheure celeste, & le signe du Taureau, où leurs estoilles ne reluiront pas moins que les autres: chãte dõc quelque chose d'agreable en terre, & demain tu auras l'honneur de pratiquer la musique au Ciel, & pour t'obliger dauantage, ie joindray ton flageolet à la lyre celeste, & si tu veux te marier, ie te dõneray Minerue, si elle ne te plaist,

tu choisiras entre les Graces, Venus & Artemis, qu'elqu'une qui aura frapé ton cœur de quelque fleche amoureuse, pourueu que tu me promettes d'auoir cette discretion, de n'enuier ou solliciter la couche de Iunon. Si tu desires gouverner le chariot du soleil, tu le peux faire, mesme de darder les jaelots de Iupiter. Cependant ie monteray au Ciel, sans craindre la resistance qu'il fera, ny mesme Minerue, car que peut produire le courage d'une femme? De grace Berger, commence donc à chanter ma victoire, & desduits le pouuoir que ie m'attribueray sur le grand Olympe, & sur le gouvernement de son Trisulque.

Il dit ainsi & alors Cadmus recognoissant que Typhon volontairement s'empestroit dans les lacs, qui luy auoient esté preparez, & que l'harmonie auoit flaté ses oreilles, il profera sans rire, ces paroles pleines de fallace, & de tröperie.

Typhon tu as presté l'oreille à la douceur de ce chant: mais qu'elle recompense me donneroie-tu, si ie chanrois ta victoire sur ce flageolet, qui mesme surpasse en harmonie, le Luth d'Apollon Que si Iupiter irrité de jalousie

la reduisoit encendres, en pardonnant à son fils. Quant cela seroit arriué, & que l'on m'eut fait cet affront, ie ne laisserois pas de m'en acōmoder d'une autre: & i'aurois ce plaisir d'attirer à moy les arbres & fleschir la dureté des rochers, d'appriuoiser les bestes les plus sauua- ges, par la douceur de mes chansons, & faire rebrousser les riuieres, Ie donnerois à l'Ocean, vn mouuement contrai- re, arrestant le cours de la Lune & du Soleil, mais sur la consideration de mon pouuoir, laisse Iupiter & les autres Dei- tez en repos, & ne leurs fais plus la guer- re, afin qu'en la presence de tous les Dieux, & dans les delices d'un ban- quet solemnel, ie face vn deffy de la musique à Apollon, pour honorer tes victoires. Pareillement tu ne feras aucun dommage aux Pierides, afin qu'elles puissent entonner quelque melodieuse chanson, pour endormir Phoebus, & re- creer ton Berger.

C'est ce que Cadmus luy dit. Cette proposition luy pleust grandement, & en tesmoignage il secouë ses cheueux ser- pentins, en sorte que toutes les monta- gnës furent remplies de venin, il se por-

ta dans sa grotte, où il auoit caché les foudres de Iupiter, & les bailla à Cadmus, & incontinent il entonna vne chanson, qui rauit tellement l'esprit de Typhon, qu'il se laissa deceuoir aux desguisemens de ce Berger, Il prestoit l'oreille au flageolet de Cadmus, qui chantoit la victoire de Iupiter, & la mort mal-heureuse de Typhon, & neantmoins il pensoit que ce fussent les chansons de sa victoire, sans les charmes estoient grands. Et tout ainsi qu'un ieune homme passionné de l'amour d'une Dame, se plaît à contempler tantost les beautez de son visage, la douceur de ses yeux, la couleur de ses cheveux blonds, les roses de ses ouës, avec le mélange d'un petit vermeillon, recueillant toute la vertu de ses yeux, pour considerer son sein pommelé, qui va à la cadence, & au mouuement des souspirs amoureux, & ne peut se desprendre de la douceur de ces charmes, & se garantir de la trahyson de ses attraits. Ainsi Typhon a tous ses sens recueillis aux oreilles pour escouter ce que la raison & le iugement despoüillez de l'excès d'une telle passion eussent recogneu luy estre à grand preiudice.



LES
DIONISIAQVES
DE NONNVS.

LIVRE SECOND.

*Iupiter reprend ses armes & son
Trisulque par le moyen de Cadmus. Il
foudroye Typhon, & saict la paix dans
le Ciel.*



ADMVS soubs le des-
guisement d'un Berger,
entonneoit ses chansons
dans le creux de la fo-
rest, & cependant Iupi-
ter reprint ses foudres qui estoient ca-
chez dans la grotte, & de peur que Ty-
phon ne recogneust le larcin, & qu'il n'e-
xerceast sa vengeance sur luy, la

faueur d'une nuée obscure le cachoit: Mais Typhon que la passion possède, donne ses oreilles à l'harmonie de cette musique fallacieuse, & oublia le soin de ce qui luy estoit plus important. Tout ainsi que celui qui flectit par imprudence à l'harmonie des chansons que les Syrenes font entendre aux Pilotes, pour charmer leur raison & triompher de la foiblesse de leurs sens, ne prend plus garde à la conduite de son vaisseau, laissant se guider à la voix charmeresse, & son navire au gré des vents, & tombe dans le peril de la mort d'une façon douce & imperceptible, ayant oublié la consideration du Nort, & la situation de l'Ourse & des Pleiades. Ainsi Typhon par la douceur de ces motets se laisse conduire à la mort. Cependant ce Geant apres tant de charmes & de fallaces, se ressouvient que par imprudence, il avoit laissé ses foudres dans le creux de la grotte. Il prend sa course, & cherche avec fureur, ce qu'il y avoit laissé, mais il n'y trouva rien qui le contentast. Cette perte le tourmentoit grandement, il attribuoit ce mal-heur aux ruzes de Jupiter, & aux frauduleux conseils de Cad-

mus. La fureur conceuë d'un tel affront,
le mit en rage, de sorte que vo⁹ l'eussiez
veu s'esleuer au Ciel, cōbattant avec des
rochers, les Deitez du grand Olympe.
Ce Geāt faisoit couler vne si grosse pluye
de ses cheueux, que vous eussiez dit que
c'estoiēt des fontaines émeues d'un gros
bouillon, & se laissant tomber sur la
montagne de Cilix, il l'estonna ius-
qu'au profond, & à ce grand bruit le
mont Taurus entrembloit, & les riu-
ges Pamphylides en pallissoiēt de crain-
te. Les caernes croullantes, sembloient
abyfmer les riuages par l'agitation des
areines mouuâtes qui tōboient. Tous les
troupeaux, & les bestes feroces, ne re-
ceuoient pas moins d'incommodi-
tez, car il deuoroit tout, & les Dra-
gons & les Lyons mesmes. Il prenoit les
oyseaux vollans à la pipee, & se plaisoit
à dresser des embusches à l'Aigle, pour-
ce qu'il estoit consacré à Iupiter (tant il
prenoit de contētement à faire la guer-
re aux Deitez) Son insolence vint ius-
ques là, qu'il manga tous les bœufs
de Cerēs, sans auoir compassion de voir
ces animaux suans au labeur & au joug
de la charruë, pour le seruice des hom-

mes. Apres auoir tant deuoré de bestes, pour boire, il troubla toutes les fontaines, & les riuieres. Il estoit si cruel aux Nayades, que de les contraindre de se retirer en vn lieu fort estroit, où l'eau manquoit, & mesme où le limon & la vase empeschoient leur liberté, elles qui auoient accoustumé de s'esgayer en grand eauë, & folastrer avec les Tritons, lors que la mer est tranquille.

Cadmus voyant la face horrible de Typhon, tout esmeu de crainte, ietta sa flute au vët. Le laboureur recognoissant le trouble qui estoit en la campagne, ne labouroit plus les terres, ny ne les ensemençoit. Il retiroit ses cheuaux de la charuë & aussi tost il voyoit que les terres s'entrouuroient, d'où sailloient quelques veines d'eauës coulantes dans les valees prochaines. Les rochers voloient en l'air, & tomboient dans la mer. L'ardeur du feu qui resultoit, de l'effort du mouuement, seichoit les eauës. Les isles estoient esbranlees de leur place, les arbres desracinez estoient transportez de lieu en autre, & les fruiçts tomboient de leurs arbrisseaux

auant la maturité. Les jardins esmail-
lez de fleurs , perdoient leur honneur
& leur lustre. Toutes les fleurs des
prez que le Soleil auoit peint de mil-
le & mille couleurs fenoient : & le gra-
tieux Zephyre qui carressoit les arbres
de la douceur de ses haleines , estoit
esmeu par la rencontre & par la resi-
stance des Cyprés , qui portoient en
leurs fueilles les marques du malheur
commun. Phœbus transi de douleur,
entonnoit des chansons lugubres &
tristes en leur faueur : mais son re-
gret luy fut plus sensible , quand
il vit que le Laurier qui luy estoit con-
sacré en faueur des amours de Daph-
né , auoit este couppé malheureuse-
ment : sçachant qu'elle logeoit secre-
tement dans les veines de cet arbris-
seaux , en pleura de tristesse. Pan ne
fut pas exempt de ces injures , bien
estvray qu'il secourut le Pin le redressât.
Minerue se ressouuenant de la ville où
estoit nee Attique la Nymphé, souspira
grandement , voyant le mesme accident
arriue a l'oliuier , Venus supporta avec
impatience , le deshonneur fait au passe-
yelours gasté de poussiere , & pour ce

que ceterminement offenloit les yeux, elle arracha les fueilles où les cheueux de son Anemon, Cerés respandit abondance de larmes, pour les elpics à demy meurs, les Amadriades s'abandonerent aux regrets, & les Nymphes laisserent leurs arbres & leurs ombres, & même Daphné l'Hamadryade compagne de ces malheurs court, sans les couronnes de Laurier. Et cette Vierge qui auoit esté changee en Pin, s'enfuit de compagnie avec elle, & luy dit.

O Daphné tu fuys les sollicitations amoureuses, courons mesme fortune & pareille aduventure. Desgagne-toy des embrassemens de ton Apollon, & moy des poursuittes de Pan. Et vous autres qui coupez les bois pour faire vos ouurages, espargnez le Laurier, car il a desia esprouué l'incision. Et vous qui fabriquez des vaisseaux pour la marine, n'exercez point vostre cruauté sur le Pin, que cet arbre vous soit recommandable: & vous qui coupez les chesnes, ie vous conjure par nostre sein d'employer vos efforts sur mes chastes entrailles, afin que ie meure auant que
de

de perdre la fleur de ma virginité, & que
ie porte aux enfers mon pucelage, sans
cognoistre la douceur de l'Amour, imi-
tant la chasteté de Pytis & de Daphné.

Elle profera ces paroles, & se fit aussi-
tost vne coifure de feuilles, & en couurit
son sein rougissant de hôte & de vergogne.

Daphné voyant la triste contenance
de cette Nymphe luy dit.

I'ay vn particulier soin de ma virgini-
té: & crainte de succomber aux efforts
de l'Amour. Où fuiray-ie? me retireray-
ie dans les rochers, ou dans les monta-
gnes? Non, car les foudres ont tout re-
duit en cendre: & ie crains grandement
les poursuittes amoureuses de ton Pan.
Ie m'en iray habiter les Masures & les
grotes, comme vne autre Echo. Je re-
peteray à sa façon les dernières paro-
les des Amoureux, qui me feront leurs
plainctes. Non, ie veux habiter les
Montagnes apres auoir faict mon se-
jour dans les arbres. Car Diane qui est
curieuse de l'honneur des Nymphes, se
plaist grandement à la chasse. Mais
quoy! Iupiter iouyt autres fois de Cali-
sto dans les Montagnes. Ces lieux sont
trop suspects pour celles qui se veu-

lent conseruer. Je m'en iray habiter la mer? Non, où est-ce que mon esprit me porte. Neprunejadis recueillit les fructs d'amour avec Asterie dans les eaux. A la mienne volonté que i'eusse des aisles, afin que ie puisse m'esgayer dans le vague de l'air : mais l'accomplissement de ce desir est vain & inutile, car Typhon a les mains si grandes, qu'il n'est point empesché de les estendre iusques au Ciel : mais si par malheur il me surpreroit, me voulant forcer à l'Amour, ie changerois ma forme en vne autre, & me meslerois indifferemment avec toutes sortes d'oiseaux : & tantost comme vn Rossignol, ie volerois annonçant le retour de l'Aurore par la douceur de nostre musique. Or comme vne hyrondelle messagere du Printemps: ie voltigeois de maison en maison. Et si toy, ô Progné, tu as deploré les accidens funestes arriuez à ton fils, ie deplorerois le malheur de mes Amours d'un pareil regret. Mais ô Iupiter, ne me change point en cet oiseau, de peur que Terec courroucé, ne me poursuiue aussi bien que luy. Je veux estre cōme vne montaigne inaccessible, & ainsi ie me cacheray uesme dans

les entrailles de la terre. Il est vray que ce
Geāt est d son pouuoir par tout iusqu'au
profond des enfers. A la mienne volonté
que ie fusse vne eauë courante, pour éui-
ter les mauuaises rencōtres. Où fuiray-
je? Si ie m'accoste de luy, ie produiray vn
monstre semblable au pere. Ie desirerois
d'estre en la forme d'un autre arbre,
cōme d'un chesne, car ie me transporte-
rois souuent de l'un en l'autre. Neant-
moins ie ne voudrois pas quitter la repu-
tation d'estre Daphné, pour prendre le
nom de l'incestueuse Myrrhe, & au vray
ie iure par le fleuve d'Eridan, que ie vou-
drois estre vne des Heliades. Car ie m'as-
seure, que souuēt ie ferois distiller l'am-
bre de mes yeux: ie courōneroie ma teste
des tristes rameaux d'un peuplier, en de-
plorāt la perte de ma virginité. Et toy, ô
Apollō, pardōne à ta Daphné, le peu de
ressentiment qu'elle a de ton Amour. Et
apres tāt de métamorphoses, ie prēdrois
la forme du rocher de la miserable Niobe.
Et les passans voyās les larmes cōtinuel-
les que ie respādrois auroient cōpassion
de mō malheur. Mais quels desirs desre-
glez! & dérogeāt au respect que ie dois à
Latone: ie la supplie de m'excuser, si i'ay

desiré de porter le nō de celle qui fut si insolente que de mal parler des Dieux. Elle parla ainsi, & cependant le Soleil commença à se baisser, & Phœbus conduisoit son chariot vers l'Occident. La terre se couuroit cōme d'un voile noir. & le Soleil esclattoit d'un nombre infiny d'estincelles brillantes. Or comme la nuit fut arriuee, les Dieux se pourmenoiēt à l'entour du Nil: mais Iupiter demeura sur le Mont Taurus: & donna ordre que l'on posast les corps de gardes vers les Zones cōme dedans des Tours. Le bruit reisonnoit grandement dans le Ciel, & les sentinelles que l'on auoit mises au cercle de la Lune, estoient en bonne garde. Et les nuees tournoyans faisoient la ronde, & la Lune les receuoit. Les heures immortelles gardiennes du Ciel, faisoient vne haye forte à l'entour, & les estoilles se campoient à toutes les aduenuës, de peur que l'armee de Typhon ne surprist l'empire des Dieux, en leur absence: les vents seruoient de trōpettes & de tambours: toutes les puissances celestes se mirent en deffense: Bootes le gardiē de l'Ourse estoit aux aguets avec vne grande vigilance, pour descou-

uxir les embusches. L'estoille qui est
messager du iour, annonçoit le retour
de l'Aurore, & celle du soir remarquoit
la couche de son Tyton jaloux: Et Ce-
phée gardoit les portes de Boree. Le cō-
bat fut violent, car tout se mit en feu, &
sembloit que tous les astres, & les estoil-
les eussent embrasé l'air, d'un feu qui ne
se pouuoit esteindre. Iupiter s'employoit
avec grāde passion à darder ses foudres.
Vous eussiez veu vne grande lumiere
saillir par le choc, & par l'ouuerture des
nues. Ce feu ne paroissoit pas tousiours,
mais à mesure que les nuages esclat-
toient, il esbloüissoit les yeux des com-
battans. Outre l'horreur de ces foudres,
vne grāde Comete d'une chevelure de
feu espouventable, respandoit vne flā-
me meslee de diuerses figures de dards.
Vn grand nombre de barres de fer,
vint au secours de Iupiter. Iris s'y ren-
contra mesme avec son Arc peint d'un
ne infinité de couleurs. La victoire
sous la forme de Latone arriua, & dō-
na courage à son pere, & luy dit ces mots.

O Iupiter, le plus puissant des Dieux,
la premiere deffense que tu dois entre-
prendre, c'est pour la vie de tes enfans.

18 *Les Dionisiaques*

Ie ne trouueray iamais bon que Miner-
ue souille sa virginité avec ce Geant. Elle
qui ne sçait que c'est des embrasse-
mens impudiques. Il n'est pas raisonna-
ble de faire celle là mere, qui iamais n'en
a eu, tirant sa naissance d'un lieu si hon-
neste. Arme ton bras de ton foudre pour
terrasser cet insolent Geant, & le lance,
& assemble les nuës : car il va bouleuer-
ser toute la terre. Et quand il aura rendu les
quatre elements disproportionnez en
leurs qualitez, la terre ne portera plus
de fromēt pour la necessité des hōmes.
Tous les Dieux prēnent l'espouuēte: He-
be laisse sa couppe, Mars sa picque, &
Mercure son Caducee, Apolon son luth,
& son carquois, & s'enuolle comme vn
cigne: mesme l'Amour que l'on estime
indomptable, fuit en quittant ses fies-
ches. Vulcā qui te doit fournir d'armes,
est grandement tardif en vne occasion si
pressée. I'ay compassion de ton Hebe,
quoy? ton pere, ne sera-t'il pas mis entre
les estoilles par sa desroute. Que ce mal-
heur iamais ne luy arriue: car en verité,
quand ie serois fille de Titan, ie ne desi-
rerois pas que ces Geants insolents pos-

sedassent l'Empire du Ciel azure, mais
tes enfans & toy. Prends donc courage,
& cōbats genereusemēt pour ton Arte-
mis: quāt à moy ie la cōserueray tāt que
ie pourray, & m'asseure que Diane luy
sera fauorable en son accouchement.

Elle dit ainsi: & la douceur du som-
meil assoupit les Dieux, & toute la natu-
re viuante reposoit. Mais Iupiter à qui la
guerre estoit plus importante, ne dor-
moit pas, estant occupé à la resolution
de plusieurs desseins. Typhon fatigué du
trauail, prenoit son repos, & n'auoit
point d'autre liēt que toute la terre, qu'il
remplissoit suffisamment: & crioit apres
Iupiter, avec vn si grand bruit, que l'on
l'entendoit en toutes les parties du mō-
de. Vne infinité d'Echo resonnent à cer-
te voix horrible, de telle sorte que l'on
eust pensé entēdre l'vrlement des loups,
le rugissement des lyons, le siffle des dra-
gōs, & l'aboy des chiēs. Il menassoit Iupie-
ter de cette voix furieuse, & proferoit ces
paroles insolentes: O mes mains si puis-
santes en force, rōuersez l'Empire de Iu-
piter, esbrālez les colōnes qui tiēnent le
Ciel, afin qu'Atlas troublé de ce desor-
dre en quite sa charge, & que les estoiles

du firmament tombent. Je ne veux plus
permettre qu'un fils de la terre le souf-
tiene. I'en donneray la charge aux autres
Dieux : & dorenavant ie feray la guer-
re aux Deitez, & Atlas s'efforcera de rō-
pre le pole qui l'a autrefois porté. Que
les heures seruant du Soleil fuyent : &
quelles meflēt la terre avec l'air, l'eauē
avec le feu ! & le monde elementaire
avec le celeste. Cependant i'asserviray
tous les vents sous ma puissance. Je
troubleray leur repos. Je confondray le
jour avec la nuit. Je feray que l'Ocean
mon frere montera iusques au Ciel pour
noyer les Astres, & qu'il esteindra leurs
feux. L'Ourse se plaindra de ses inon-
dations, & les bœufs qui conduisent
le Chariot mugiront. Que ceux de la Lu-
ne fuyent la rencōtre des eauēs : & qu'ils
craignent le mugissement des animaux
que ie traine avec moy. Et que les lions
que ie meine, surmontent le celeste, &
qu'il se destourne du chemin ordinaire
qu'il prend au Zodiaque. Que le dragon
qui accompagne le chariot resente les
effects de la rage de ceux qui me pen-
dent aux cheveux. Quant à moy, ie ne
veux point me servir d'autres armes,

que des bourasques de la mer & des mō-
taignes. Les valles & les isles me feront
des dards, & les collines des picques: les
rochers me serviront de cuirasse, & les
pierres d'espees; & les riuieres à esteindre
le feu des foudres. Neptune ne pour-
ra s'y opposer: car sur la resistance qu'il
en feroit, il pouroit s'en repentir. Je luy
ay preparé les liens & les entraues de Ia-
pete. Qu'un autre vaultour mange le
cœur de Vulcan, sur le mont de Cauca-
se: quant à Mercure ie le garotteray, &
le mettray dans vn vase d'airin, afin que
l'on dise que celuy qui autrefois rompit
les liens de Mars est maintenant entra-
ué. Je m'attribueray ce pouuoir (apres
auoir triomphé de luy) que de marier
Artemis à Orion, Latone à Titie, &
Minerue à Ephialte. Je prendray autant
de plaisir à voir Mars sous le joug de la
seruitude, que Minerue se plaindre de
la difficulté de son accouchement. Je dô-
neray à Iupiter la charge & le fardeau
que supportoit Atlas. Et quand l'on fe-
ra les balets, & les danfes, lors que i'es-
pouseray Iunon, ie veux qu'il entende
de loin cette musique, & ces allegresses
à luy si preiudiciables: & si ie veux qu'il

en dissimule ses ressentimens. Je ne desire point d'autre lumiere pour esclairer ma couche en la tenāt que celle qui sortira des toudres : ny d'autre flambeau que celuy de Phœbus. Je le contraindray à me rendre vne clairté seruite. Je veux que toutes les estoiles du Ciel esclattent & brillent en fretillant, cōme si elle vouloient imiter nos Amours, que l'Amoureuse d'Endymion prepare ma couche : & que s'il est besoin de me lauer, que les Graces me preparent les baings dans le fleuve d'Eridan. Je desire que Latone, Minerve, Artemis, & toutes les Deesses, dansent toutes nuës pour eschauffer mes affections. Que Venus la lasciuie m'excite à l'Amour par sollicitation, de peur que ie ne rebouche aux premieres allarmes : & que son petit Cupidon me soit vn obiect qui me communique par ses yeux les ardeurs de sa ieunesse. Que mesme, elle qui est si scauante me donne le filtre, & que pour l'esprouuer elle en prenne la premiere, afin que ie sçache si sa chasteté ne succomberoit à l'effort de la passion Amoureuse : que ce luy soit vn grand honneur d'auoir désiré mes embrassemens : & à moy vne

grande courtoisie d'en auouer seulement ses desirs.

Je veux que Flore parfeme mon liect de toutes les fleurs du Printemps: que Diane soit la Messagere de toutes mes amoureuses volontez: & que Minerue l'instruise, & luy en face leçon dans le silence de la nuit, à la clairté de son flambeau. Que toutes les Deesses me rauissent, & que j'aye autant à me garder d'elles que des Dieux: afin que j'apprenne aux mortels à se faire carresser par les femmes.

Après tant de contentements Apollon sera bien heureux de chanter à table mes louanges: & les grands stratagemes de Typhon, plustost que de Jupiter. Je deliureray Saturne des prisons où il est captif, & pareillement mon frere qui est retenu dans l'Empire de Pluton. Je susciteray tous les Titans les Cyclopes & les Geans, ie les armeray contre le Ciel. Je feray forger vne infinité de foudres, sur les enclumes de Vulcan. Je les essanceray en plus grand nombre, & plus fortement que ne fit jamais Jupiter. J'essleueray le Ciel huit fois plus haut qu'il n'est. Car

il n'est pas capable de me recevoir, & de me contenir, & si il sera enrichy d'estoilles plus brillantes. Je feray croistre le nombre des bien-heureux par les mariages qui se pratiqueront. Car ie ne veux pas que le Ciel soit sans Amour.

C'est ce que profera Typhon d'une voix menaçante. Iupiter se mocquoit de ces rodomontades. Le combat estonna les deux ennemis: Typhon auoit la Deesse de Discorde qui l'assistoit, & Iupiter estoit accompagné de la Victoire. Le subiect de leur guerre n'estoit pas pour un troupeau de moutons ou de bœufs: ny pour la beauté de quelque Deesse, ou pour l'vsurpation d'une ville: mais il estoit question de tout l'Empire du Ciel, & du commandement absolu sur la terre. C'est pourquoy Iupiter n'oublioit pas à se bien deffendre. Au commencement du combat il faisoit tournoyer les vents d'un grand effort, il sonna la charge, & se couurant d'un grand amas de nuages, il esuitoit les dards des Geants. Cependant du costé de Typhon les dragons qui siffloient, sonnoient une cruelle chamade. Il ne lançoit que des rochers tous entiers, le

grand nombre esleua vne haute tour qui passoit toutes les regions de l'air. Il n'y auoit qu'un corps qui combattoit : mais il estoit fortifié d'un escadron de membres de Lyons, & de viperes : il desracinoit les arbres, & les dardoit comme des jaelots : mais Iupiter les brusta avec vne petite estincelle de feu. Les ormes, les cypres & les pins luy seruoient de dards : toutes les quatre parties du monde estoient en confusion. Les vents combattoient pour Iupiter, & esleuoient vne poussiere qui offusquoit la lumiere du Soleil esmouuants les bourasques de la mer. Les rochers s'esbranloient, & les riuages trembloient : le coupeau du mont *Æthna* crouloit. La Nympe *Othoias* se ressentoit de l'incômodité qu'aportoit cette guerre en *Thrace*, & l'*Assyrie* abondante en *Liban*, & en *Cedres*, estoit honteuse de voir ses arbres receuoir du changemēt en leurs fueillages. Il dardoit plusieurs jaelots contre les foudres, & le feu marquoit aux taureaux qui tirent le chariot de la lune, le chemin qu'il leur falloit tenir. Aussi d'une autre part, les foudres de Iupiter tomboient dans la mer par im-

petuosité des vents, Neptune les rece-
uoit sans en auoir du ressentiment. Et
Nereeluy arma deux des plus vaillants
hommes, que pouuuoit auoir le Dieu
de la mer, & pour honorer son courage,
la victoire luy donnoit des lauriers.
Toutes les Deitez l'accompagnoient, &
en cet équipage il estoit porté dans son
chariot eclattāt de foudres & d'esclairs:
& parmy ces tempestes il tomboit vne
grosse gresle sur la teste de ce Geant: ces
jauelots de guerre couperent la main de
Typhon, & la pouldre destrampee avec
l'eau la contaminoit, mais pourtant elle
ne quitta point le coupeau de la mon-
tagne, & estant abattuë par la cheute de
la gresle meslee de neige, sembloit en-
cor se battre & enleuer les montaignes
au Ciel. Il se ruoit sur les fleuves & les
torrents, faisans couler de ses mains des
riuieres, pour esteindre le feu que Iupi-
ter auoit esclacé si bien que de la flāme se
mesloit dedās l'eau. Ce Geant auoit des-
sein d'esteindre ce feu par la quantité
d'eauë qu'il faisoit decouler. Mais il ne
sçauoit pas (ignorant qu'il estoit) que
l'eau n'est pas suffisante d'empescher l'a-
ction de cet element si subtil: & que

mesme les foudres sont engendrez des nuees, qui portent les eauës dans leur vêtre. Voyant que ces efforts luy estoient inutiles, il enleua vn rocher qu'il lācea à Iupiter: mais ce Dieu le repoussa d'un petit souffle. Or cōme il recognoissoit la force de Iupiter, il prend la moitié d'une Isle, & luy jette avec grande impetuosité, mais il gauchit tous ces coups. Apres tous ces assaults & ces combats, tant d'une part que d'autre, ils se treuverent auoir forces esgales. Dans l'ardeur de cette guerre, les foudres de Iupiter qui bruloient la terre, faisoient esleuer des vapeurs seiches, qui estans repoussees par le choq de nuës, produisoient des flammes en l'air: & tout ainsi que par le heurt de deux cailloux on fait sortir du feu: les flammes se produisoient du heurt des nuages, & les vents s'engendroient de la plus subtile fumee. Et le Soleil qui esleuoit par ses rayons & par sa vertu attractiue, vne humidité de l'eauë. Apres qu'elle estoit engrossie, il la resoluoit en pluye. Iupiter combattoit courageusement, & le feu brusloit les mains de Typhon, & les foudres luy brisoient la teste, les Com-

metes mettoient le feu à ses cheueux, & ses serpens & dragons sifflaient, iettans de rage vne escume veneneuse. Son visage estoit remply de fumee, & ses iouës de neige & de brouillards. Les vents pareillement luy faisoient la guerre. Car si celui d'Orient le lassoit ettonné de ses regards, celui qui venoit d'Occidēt luy liuroit le combat: Boreas luy faisoit tomber des bruines, des neiges; & le vent chaud du midy, des vehementes ardeurs. Iupiter ramassoit les nuées pour les resoudre en vne grosse pluye, qui tomboiēt sur le corps de Typhon, pour refraichir celui qui auoit esté tourmenté du feu tombé d'en haut: tellement qu'il ne ressentoit que de grandes extremitez. Cependant la Terre sa mere, voyant le grand peril qu'encouroit son fils dans le chaud & le froid qu'il receuoit des impressions de l'air, par les iustes ressentimens de Iupiter: elle adressa ses humbles prieres au Soleil, le conjurant de faire esclater quelques rayons pour fondre & desseicher tant de brouillards humides. Elle supplioit les vents d'esteindre sa soif bruslante, mais ils estoient inexorables, ne voulants fleschir en haine de ce

Geant

Geant qui combattoit le Ciel. Cette pauvre mere pleuroit, en voyant les sueurs & les frissons de son fils qui le debilitoient tellement qu'il sembloit qu'il deust expirer. Les foudres que Jupiter eslançoit chantoient sa victoire, & en mesme temps Typhon tōba du Ciel, & se treuva estendu sur la Terre sa mere, par vn coup de tonnerre. Il l'embrassoit fort estroittement, comme s'il eust voulu luy donner les derniers Adieux. Cependant Jupiter resiouy de sa victoire, se mocqua de luy, & profera ces paroles pleines de gaufferies & de menasses.

N'est-ce pas à cette heure que Jupiter a rencontré vn habile Gouverneur du Ciel. Je croy qu'à peine peut-il se dire fils de la Terre, & de la race de Jupiter: celui qui doit venger l'affront que les Geants receurent. Ne te semble-t'il pas que les foudres de Jupiter sont sans effect? Pourquoi as-tu laissé le sejour du Ciel puis qu'il t'appartient. Et toy Astraon, porte Typhon aux Astres, & que Eurynome & Ophyon y retournent, & les place où tu voudras. Jupiter tiendra compagnie à tous deux, que Promethee exempt de sa peine les suiue

pareillement. Qu'as-tu desiré apres tant de combats, sinon que de voir Jupiter & Neptune te servir à table, sans pouuoir se venger? Estans despoülléz de leurs armes, de te servir des esclairs comme de flambeaux : & de Iunon pour femme. Tenir Neptune esclau, ayant perdu l'Empire de la mer, luy faire porter au lieu de son Trident, vne couppe pleine d'ambrosie pour te presenter. Vse donc de ton pouuoir : car Mars est vouié à ton seruice, & Apollon fera la musique. Enuoye maintenant Mercute aux Titans, luy qui est le mes-sager des Dieux, pour leur faire entendre l'honneur que tu as receu au Ciel. Et la puissance que ton courage s'est attribué. Commande à Vulcan de te forger quelque chef-d'œuvre pour faire present à ta Iunon, on luy dresse vn throsne d'vne structure si admirable, qu'elle en admire l'exellence & la beauté. Que les Cyclopes citoyens du Ciel, forgent des foudres plus puissans que les miens. & sur l'esperance de la victoire, enchaîne le petit Cupidon avec Venus, & le rends maistre du courage de Mars. Mais à grand' peine pourrois-tu manier

tes foudres, que tu n'a pas sceu supporter seulement vne estincelle de feu. t'a donc osté les forces ? Où sont tes dards : les testes de tes chiens : les sifflements des dragons, & des serpens ? Où est le nombre infiny de tes mains ? Tu ne menasseras plus le Ciel maintenant. Les precipices de la Sicile te seruent de retraite à ton grand malheur. Mais bien que tu ayes monstré les effects d'un orgueil insupportable, & indigne de sepulture, neantmoins ie te feray dresser vn tombeau, où ta vanité sera escrite en grosses lettres. I'y mettray cette Epitaphe.

Voicy le tombeau de Typhon, que le foudre de Iupiter brussa, pour auoir commis vne rebellion contre le Ciel.

C'est ce que dit Iupiter à ce Geant, apres l'auoir terrassé. Cependant toutes les puissances celestes se resiouysoient de cette victoire. Et non seulement la ioye parroissoit là, mais aussi en la terre. Car la montaigne de Taurus mugissoit, comme si elle eust voulu chanter la victoire. Le Fleuue de Cydnus ne monstroit pas moins d'aise.

Mais la terre ne pouuant supporter avec patience cette deffaitte : & en tesmoignage de son dueil, elle deschira ses vestemens: & apres auoir coupé sa cheuelure elle la ietta au vent. Elle respendit vne grãde abõdãce de larmes, & fit saillir des fontaines de ses yeux. Cette mort fut regrettée de celle qui y auoit interest: mais elle ne le fut pas de toute la nature: car à lors toutes les choses qui auoient ressenti de l'alteration & de la confusion en leur ordre, furent restablis en leur premier estat, & les Astres depuis suiuirent leur cours naturel.

Iupiter qui ne pouuoit' oublier les seruices que luy auoit rendu Cadmus avec sa flute!, luy dit:

O Cadmus l'harmonie de ton flageolet a donné la victoire aux Deitez: & pour recompense, ie te feray le gendre de Mars & de Venus. I'assisteray à tes nopces: Quel honneur receuras-tu, en voyant vn Dieu immortel & si puissant, honorer de sa presence ton mariage. Ie te donneray cet aduis, que si tu veux viure en tranquillité d'esprit, sans receuoir des disgraces de la Fortune. Garde toy bien d'offencer Mars en quelque façon

que ce soit. Mais au contraire, ie te conseille de luy sacrifier de nuiet vn serpent. Inuocque le Dragon celeste, brusle le bois d'un cerf, afin que tu fuyes la necessité rigoureuse du destin: & mets en oubly la ressouvenance de ton pere Agenor. Quant à tes freres, ne t'en donne point de peine, ils sont tous viuant en grand honneur dans la terre habitable. Cephee commande aux Æthiopiens, Thasus est venuë en Tharse, & Cilix gouerne comme Roy, les Ciliciens. Phinee est arriué en Thrace, ie le feray conduire en Orythie, où il y a abondance d'or & d'argent dans les minieres: quant à toy, les destins t'appellent à bastir vne superbe ville, afin que tu ayes l'honneur de donner vn nom à tes Citoyens. C'est ce que ie te predis pour le reste de tes adventures, ie les laisse à Phœbus. Et de ce pas ie te cōseille d'aller en Delphes pour consulter l'Oracle de la Pythonne.

Il dit ainsi, & ayant donné les derniers Adieux à Cadmus, il monta au Ciel avec son Chariot, & toutes les Deitez luy allerent au deuant. Les heures immortelles luy ouurirent les portes du Ciel. Minerve Monta en diligence & chanta la

victoire donnant à son pere des Lauriers, & des Palmes : & Themis apres auoir mōstré les armes de ce Typhon à la mere des Geās les pendit à la porte du grād Olympe, pour punition exmplaire.

Cadmus cherche sa sœur Europe, & arrive en Thrace. Il est receu au Palais d'Electre. Il luy raconte ses aduentures. Mercure, fait entendre à la Reyne les volontez de Iupiter, sur le mariage d'Harmonie & de Cadmus.

LIVRE TROISIEME.



COMME la victoire & les triumphes de Iupiter eurent finy les combats : & la guerre de Typhon, les rigueurs de l'Hyuer passioient. L'Estoile d'Orion commençoit à promettre vne serenité aggreable de l'air. On ne voyoit plus les vaisseaux de la mer glaciale attachez au port. Les douces haleines des Zephirs carressoient les fleurs & les herbes que le printemps auoit produites. Aurore indigne de l'impuissance de son Tyton,

commençoit à se leuer plustost que de coustume, pour respandre vne douce rosee de larmes, tesnoignage de ses amoureux ressentiments. Et l'hyrondelle messagere du beau Printemps, desroboit au matin par son babil les douceurs du sommeil.

Cadmus iugeoit que la saison l'inuitoit à faire son voyage. Pour cet effect au leuer du Soleil, il fretta son vaisseau. Il leua les mats. L'impetuosité du vêt donnoit dans les voiles, & les bourasques de la mer empeschoient que les Dauphins de folastrer dans le calme. Le heurt des flots resonnoit dedans comme vn Echo, il receuoit le vent en poupe, & s'aduāçoit par la violence. Au dixiesme iour il passa par Hellespond, & dressa la Boussole vers Samos, voisine de Sithonie, où la Nymphe Harmonie estoit gardee pour luy. Neptune le fauorisoit tellement, qu'il sembloit ne respirer que son seruice, & l'accomplissement de ses vœux. Les vents luy estoient propices comme s'ils eussent participé à son bien. Ils le conduisoient droict en Thrace, cōme s'ils eussent sceu par prognostication qu'il auoit

interest en cette region. Les Nautonniers apperceurent de Samos vn flambeau de feu, & iugerent que la terre estoit voisine : ils cogneurent aux rochers qu'ils entroient en la rade. Ils saluèrent le port de resiouyssance, plierent les voilles, abbatirent les cordages : & apres auoir encré voyans que le Soleil se couchoit, ils se preparerent à souper. La fatigue les contraignit au repos. Vn gracieux sommeil les charma de ses delices & Morphee leur assoupit les membres.

Mais apres que la nuit fut passée, & que l'Aurore eut fait voir aux Pilotes la terre où ils estoient abordez. Venus qui auoit commandemēt de Iupiter de gratifier Cadmus de la beauté d'harmonie, pour recompenser les seruices qu'il auoit rendus aux Puissances du Ciel en la deffaite de ce Geant : vint exprés de Cypre pour en faire le mariage. Cette alliance fut agreable à toute la nature. Les Elements donnoient leur consentement par des signes sourds & muets, la terre faisoient exhaller des vapeurs chaudes & onctueuses, & susceptibles du feu. Leauē de la mer s'esmouuoit, comme si elle eust voulu chanter vn Epithalame.

L'air agité par les vents, imitoit la musique, & le feu sembloit par ses mouuements se resiouyr. Les Corybantes habillees à la Bachanale jouïoient de diuers instruments, & tous les arbres tremousoient, les rochers mugissoient comme s'ils eussent esté capables de raison, les forests resonnoient & les Druides aussi. Les lyons à l'enuy l'un de l'autre imitoient par leur rugissement cette Melodie, & la fureur des Prestres Cabeïres.

Cadmus enseuely dans les douceurs d'un gracieux sommeil, s'esueille à ce bruit, & à ces resiouyssances, il ne scauoit à quelle cause attribuer ces allegresses: la resiouyssance des promesses que les Dieux luy auoient faictes, luy ottoit les impressions de la crainte. Les Nautonniers desireux de voir la ville se leuerent pour y aller & pour admirer les antiquitez. Cadmus auoit desseing d'en visiter le Chasteau. Il quitta son vaisseau & ses compagnons. Suade la Damoiselle suiuant d'Harmonie, luy vint au deuant sous la ressemblance d'un homme, portant quelque portion de terre qu'elle détrempoit dans un seau d'eau, dont elle en prit des presages

heureux pour leur alliance, aussi estoit-ce la coustume de lauer ceux qui estoient accordez. Il y auoit dans la ville vn certain puits où on lauoit leurs chemises, & leurs tuniques. Suade le conduisoit dans la ville, à la faueur d'vne nuë qui le cachoit depuis les pieds iusques à la teste. Comme il passoit par les rues vne corneille qui estoit perchee sur les branches d'vn oliuier, à la suscitation de Venus, se prit à parler, reprochant à Cadmus qu'il auoit bien peu d'amour & de passion pour celle qui meritoit bien que l'on souffrist pour elle quelques at- taintes, d'impatience, & exprima ces paroles de censure.

Cadmus fait paroistre qu'il est fort mal instruit aux ruses d'Amour, ou qu'il a le cœur glacé à ces effects. Quoy? ne sçait-il pas que le retardement y est nuisible, & que les coriuaux diuisent & partagent les affections. Que l'Amour qui a des ailes pour marque de sa promptitude, ne peut supporter la stupidité d'vn delay. Il faut que toy, ô Suade accroisse tes fa- veurs pour recompenser sa negligence. Il retarde trop ses vœux, encor qu'il soit poussé par les persuasions de Venus. O

Cadmus, ie te conseille de t'aduancer, la chaleur de l'amour t'appelle, & la viue poursuite teregarde: pourquoy te mōstre-tu auec tant de froideur? toy qui es voisin du bel Adonis & des Belliades. Ie me trompe, tu n'as point veu le fleue où Adonis prend ses esbats, tu ne cognois point le païs où Bellias habite. Mais plutot le sejour des Graces, où la belle Venus pratique ses danſes. Cen'est pas Artemis qui te conduit en tes Amours: mais Suade qui ne māquera point d'affection pour ton seruice. Cesse maintenāt tes labeurs, & jouys à plaisir des embrassemēs d'harmonie. Quite la penible recherche de ta sœur Europe, & la laisse à son Taurau. Elle n'est plus en estat fleurissant, elle ressemble à vne rose espanoüie, que les Bergers des bois ont maniee. Hastetoy, Electra te receura en son Chasteau. Elle prendra le soin de faire les ceremonies nuptiales. Elle te procure vne facile & paisible jouyssance, delaisſant à Venus les particularitez secretes de l'Amour. Tu louieras en moy cette connoissance prognosticque: tu m'appelleras Prophete de ce mariage heureux: Mais ie me trompe, ie ne

merite par cette louange : c'est Venus qui parle : elle m'a inspiré & suggeré cecy, encore que ie sois vn oiseau consacré à Minerve.

Elle dit ainsi & finit par vn silence fort conuenable à sa nature : mais comme Cadmus eust passé au milieu de la ville, il apperceut vn riche bastiment. Elle luy mōstre du doigt le sejour du Roy, & s'enuola au Ciel comme vn oiseau. Il recogneut le secours de cette Diuinité, & l'excellence de la maison luy fit penser que c'estoit l'ouurage admirable de Vulcan. L'on y voyoit des artifices de la plus parfaicte sculpture que l'on peust s'imaginer. Il y auoit vn beau jardin remply de toutes sortes d'arbres & de fleurs. Les palmes masles & femelles, portoient leurs fruiçts en abondance : & sembloit que ces arbres insensibles recogneussent les effects de l'Amour, & de la conjunction des deux sexes. Les poiriers, les oliuiers & les cypres y faisoient vn ombre agreable au Printemps, avec vne esperance de donner vne cueillete fertile en Automne. Les figuiers & les pommiers plantez à la ligne n'en promettoient pas moins

en la saison. Les Zephirs caressôient les hyacintes: Apollon se ressouenant du mal heur arriué à celuy qu'il aymoit tât, deplore l'accident du palet, qui assomma le pauvre Hyacinthe: & semble qu'il le void estendu sur la terre, sans amour & sans vie. Ce jardin estoit entouré d'un petit bois, où il y auoit grande quantité de berceaux, d'allees & de pauillōs pour se reposer à la friscade. Il sortoit de l'eauë d'une fontaine qui se diuisoit en deux ruisseaux, dont l'un seruoit aux commoditez du Chasteau, & l'autre arrosoit tous les parterres: L'eauë couloit si doucement avec un murmure si agreable dans les racines, des lauriers, que vous eussiez dit qu'Apollon entonnoit une chanson melodieuse sur sa lyre. Vous voyez au dedans de la maison & de la salle, un grand chandelier d'or porté par un jeune garçon fait de mesme metal, pour esclairer dans le sombre de la nuit. A l'entree il y auoit des chiens par ordre sur un quay en bosse, si bien representez, qu'il sembloit qu'ils voulussent abbayer, & mesme les naturels eussent peu s'y tromper, grondans à l'entour par enuie. Comme Cadmus passa ils l'

Flatterent doucemēt de la queue, estant
entré dans le Palais, il cōsideroit la stru-
ture admirable, la beauté du marbre &
du porphyre, l'excellēce des Sculteurs,
la naïfueré des peintures, les comparti-
ments des jardins. En ce temps mesme
Emathion le fils d'Electre retourna du
Palais, où il auoit rendu la iustice à ses
subiects. Il regnoit seul en son Royaume
priuatiuement à son frere Dardanus,
qui ne possedoit en partage que la Dar-
danie. Sa mere Electra à la naissance
de ce fils, receut des predictions certai-
nes de sa grandeur, & de la possession
de l'Empire des Romains. Les heures le
nourrirent par le commandement de
Iupiter, & l'esleuerent iusques en l'ado-
lescence: mais incontinent qu'il sentit
en soy la vertu & la force, & les aiguil-
lons de la gloire. Il quitta la maison
de la Reyne sa mere. Au temps du
troisiesme deluge, qui noya toute la
terre. Car il faut que vous scachiez
qu'il y en a eut trois. Le premier du tēps
d'Ogyge. Le second de Deucalion, & de
Pyrrhe: & le troisieme sous Dardanus,
qui fut habiter Ida. Emathion son frere,
admira le port & la grace de Cad-

mus. Il Iugea à sa contenance que la force de son courage estoit capable de produire des effects merueilleux, & d'entreprendre les desseings les plus releuez. Et ce qui le rendoit plus admirable, c'estoit vne grande beauté jointe aux grandeurs de son merite. Cette belle disposition touchoit les yeux d'Emathion, & luy donna des assurances fidelles de sa probité: car le visage est le miroir de l'ame, qui trahit tousiours les plus secrettes pensees. C'est luy qui fait paroistre au dehors, ce qui est plus caché au dedans. Cet aduantage de nature luy seruit grandement, pour concilier la bienueillance à attirer les volontez par les rapports que tous les hommes ont avec le beau: aussi en receust-il les fauorables effects de son hôte, qui le combla de mille courtoisies. La Reyne Electra ne fut pas parresseuse à son debuoir: elle fit preparer vn somptueux bāquet, où les plus belles Nymphes de la contree seruirēt à table. Cadmus d'une façon honteuse, abaissoit ses yeux, & leur en deffendoit l'object. Il māgeoit avec tant de sobriété que l'on eust dit, que ce fust esté par

contrainte , ou par contenance cette somptuosité fut accōpagnée d'une belle musique de diuers instrumens, de flustes & de cymbales qui rendoient dans la salle vn Echo agreable: mais apres ces delices, comme la Reyne Electre l'eut prié de raconter ses aduentures & sa genealogie, il se deliura de tous les soings & de toutes les inquietudes qui pouuoient luy troubler l'ame, & dit en ces mots:

Chere Nymphes , pourquoy vostre Grandeur me demande-telle le recit de mon extraction, ne scauez-vous pas que la vie de l'homme passe comme vn songe, quelle fuit comme l'ombre: & tombe comme les feuilles des arbres en Automne; son cours est si petit, qu'à peine l'on peut se recognoistre, & remarquer l'antiquité des maisons; la mort en esteint le ressouuenir, & en efface les vestiges: le temps qui consomme tout, en mange les reliques, & en destruit les indices enuieux de l'honneur que les familles peuuent s'attribuer aux degrez de leur noblesse. Et tout ainsi qu'une feuille succede à l'autre, selon les diuersitez de la saison, ainsi va le siecle; neantmoins pour contenter vostre curiosité, ie vous
diray

diray au long mon extraction. Il y a vne
 fameuse ville appelee Argos, situee
 dans le centre de l'Isle Tantaride, où
 Inachus print alliance fortable, à l'hon-
 neur de sa maison. Il eut vne lignee qui
 ne degeneroit point de la vertu de ses
 ancestres. Il establit les festes des Or-
 gies en l'honneur de Bacchus. Il estima
 tant ses grandeurs & les tiltres de sa ge-
 nealogie, que mesme il refusa de rece-
 uoir Iupiter pour son gendre sur la con-
 sideration qu'il auoit de la jalousie & de
 la Maiesté de Iunon. Il scauoit bien que
 la belle Io auoit esté metamorphosée en
 vache & que Iunon la jalouse luy auoit
 donné Argus pour Berger avec ces cent
 yeux pour espier toutes les actions de
 cete pauvre Nymphé. Elle alloit dās les
 pastis avec les troupeaux, & n'auoit
 point d'autre aduantage par dessus les
 autres, que sa beauté. Mais apres la me-
 tamorphose d'Argus, elle courut par
 toute la terre habitable. Elle fut en Æ-
 gypte où est le Nil, ainsi appellé à cause
 que tous les ans en vne certaine saison,
 il arrousoit tout le pais par ses innonda-
 tions. Estant en cete region, elle fut a-
 doree comme vne Deesse, sous cette

forme estrangere, elle eut de Iupiter vn
fils nomme Epaphus. De luy sortit Li-
bye, que Neptune ayma tant, qu'il prit
la peine de venir iusques à Memphis,
pour iouyr de ses Amours. En cette al-
liance ils engendrerent Belus, de qui ie
tire mon origine. Belus eut plusieurs en-
fans, & entre autres Phinee, Phœnix
& Agenor qui est mon pere. Agenor
courut en plusieurs endroits de la terre.
Il vint à Memphis, de là à Thebes, & de
là encor en Assirie. Et passant par toute
l'Ægypte. Il apprit la plus occulte Phi-
losophie des Ægyptiens. Il sortit de ce
païs grand nombre d'enfans. Danaus
seul eut cinquante filles qui furent si
meschantes, que d'ensanglanter leurs
mains du sang de leurs maris, & de
souiller leur couche nuptiale d'un cri-
me si horrible. La seule Hypermnestra
ne peut se resoudre à vn tel forfait. Elle
creut que les fauorables liaisons du ma-
riage ne demandoient pas vn si rude
traitement. Elle blasma l'exemple de
ses sœurs, & cōbla son mary de tant de
courtoisies, & de caresses, qu'elle fit
paroistre le regret qu'elle auoit à ces
pernicieux attentats. Quant à moy ie
suis en vne grande peine: vn de ces iours

passiez vn Taureau enleua ma sœur Europe. Si c'est vn taureau naturel, ie ne sçay, mais il me semble que ces animaux n'ont point de mouuement ny d'affection en vn subiect hors de leur espece. Ie ne sçaurois m'imaginer cōme cela se peut faire. Mō pere Agenor m'a enuoyé pour la rechercher en tous les lieux où l'on aura opinion qu'elle soit: C'est le sujet de mon voyage qui m'a conduit icy.

Comme il eut racōte le malheur de ses aduentures, & le rapt d'Europe, la Reine Electre en le consolant luy dit:

Mō hoste, ne vous ressouuenez plus de vostre pere, ny de l'infortune de vostre sœur: tenez tout indiferent par vostre constance & resolution. Soyez capable de receuoir toute sorte de defastre sans troubler le repos de vostre esprit. La condition des hōmes est tributaire à la rigueur des loix du destin. Elle est sujette à cette necessité inuitable: moy-mesme i'en pourrois dire quelque chose ayant ressentý en mon particulier les disgraces du Ciel. Ie suis vne des Pleiades, ma mere a eü sept enfãs de qui ie deurois auoir de la cōsolation: neãtmoins ie suis

esloignée d'eux par le mal-heur de ma naissance. Je n'ay point ce contentement de traiter en bāquet mes sœurs Strophe, Mayes, & Celæne. Je suis frustrée de la douce compagnie d'Alcyone. Meroës ne peut me consoler en mes afflictions. Thaygete ne peut verser dans mon sein ses plus secrettes pensées. L'esloignement des prouinces nous desrobe ces delices. Mon fils Dardane qui deuoit estre mon support & mon esperance, m'a laissé & s'en est allé en Ida, incontinent qu'il a pensé auoir assez de vertu pour establir vn Empire, & a offert au fleuve Simois sa cheuelure pour les pre-mices de sa ieunesse. Mon pere Atlas n'a pas meilleure fortune que moy. Le labeur continuel à supporter le Ciel, l'en-nuye & le fatigue. Neantmoins entre tāt d'encombre l'esperance me nourrit, & me repaist des promesses que i'ay d'estre enleuee au Ciel pour y auoir place entre les estoilles. Cependant console les resentiments de ton affliction, arme toy de constance pour endurer les rigueurs du destin. Si ton extraction vient d'Io: Si tu tire ton origine de Libye & de Neptune, il y a quelque affinité entre toy,

& Byrfas qui se vante aussi d'estre issu de Jupiter & d'Io.

Electre tint ce discours à Cadmus, & cependāt Jupiter pour accōplir ce qu'il luy auoit promis, enuoya Mercure le fils de Maie au Palais de la Reyne, pour luy commander par cet Ambassadeur des Dieux, qu'elle donnast en mariage à Cadmus, la belle Harmonie que Venus & Mars auoient engendrée dans leurs larcins amoureux au preiudice de Vulcan. La mere ne l'auoit peu esleuer: mais elle la conduisit en la maison d'Electre, où elle fut nourrie fort tendrement avec Emathion. La Reyne luy fit ressentir tant de mignardises & les douceurs comme si elle eust esté sa fille. Et tout ainsi qu'une Lyonne qui a deux petits dans le fort d'un bois, leur donne la tette également, & les lesche l'un apres l'autre avec beaucoup de soing: Ainsi la nourrice leur donna les mammelles à tous deux. Elle les coucha ensemble, & les endormit tout doucement à la melodie des chansons qu'elle scauoit.

Cadmus estoit assis à table proche de la Reyne, & à l'instant Mercure arri-


ua au Palais sous la ressemblance d'un jeune homme, à qui le poil follet dore le menton. Il entra dans la salle à la faueur d'un nuage qui le couuroit, & l'Huissier mesme y fut trompé: & les assistans ne le peurent appercevoir ny mesme Emathion, ny la belle Harmonie. Il se rendit seulement visible à la Reyne, qu'il tira dans un cabinet, & luy fait ce discours.

Puissante Reyne, Iupiter vostre mary conserue l'Empire du Ciel pour vos enfans, vous pouuez vous asseurer que vostre posterité en sera heritiere, & qu'elle gouuernerá tout le monde. Vous n'aurez pas ce seul contentement icy bas: mais ie croy que vous serez mise & colloquée au Ciel comme une estoille estincelante. Vous y tiendrez le mesme rang que Maïsa mere. Vous suiurez le cours du Soleil. Vostre mouuement sera de l'Orient à l'Occident, au contraire de celuy de la Lune. Ie suis tres-content de vous voir en cette jouissance: & comme parent que ie suis, i'ay interest à vostre bien. Iupiter m'a enuoyé icy pour vous faire entendre ses volontez sur la recompense qu'il

veut faire à celuy qui a rendu des serui-
ces notables aux Dieux immortels. Il
desire que vous donniez à vostre hôte,
la belle Harmonie en mariage: vous ob-
ligerez toutes les Deitez. Il a empesché
par sa Musique, la ruine totale du
grand Olympe. Il a mis en desroute
celuy qui menaçoit le Ciel, qui vouloit
oster à Iupiter son pouuoir & son com-
mandement, & a donné iour à la paix.
Obeissez aux volonteiz de Iupiter, de
Mars, & de Venus: & que les larmes de
cette ieune Nymphé & les honteux re-
fus n'en retardent pas l'execution.

Electre aduertit Harmonie du dessein qu'elle auoit de la donner à Cadmus, conformément à la volonté des Dieux. Elle n'y veut point entendre: Venus ayant prins la ressemblance de Pissinôé, raconte les merites & les perfectiōs de Cadmus, & feint d'estre amoureuse de luy. En fin Harmonie y consent. Cadmus consulte l'Oracle sur le rauissement de sa sœur. Il luy commanda de bastir vne villē au lieu où il verroit un bœuf arresté.

LIVRE QUATRIESME.



PRES que Mercure eut fait son Ambassade, il disparut & s'enuola au mont Olympe avec vne vîstesse incroyable. Les Ordonnances des Dieux esmeurent Electre. Elle se proposa de faire entendre à la belle Harmonie la volonté de Iupiter. Elle l'appella, & la fit monter en

son cabinet, apres l'auoir fait passer par plusieurs antichambres. Cette jeune fille ne scachant pas le subiet qui les faisoit retirer en vn lieu si secret & extraordinaire, la rougeur luy couurit la face, & son esprit commençoit à se troubler. La Reyne la fit asseoir & luy dit les conseils que les Deitez auoient prins sur son mariage avec Cadmus. Harmonie ne put receuoir cette nouuelle sans tesmoigner que cette proposition luy estoit desagreable: elle dit franchement, qu'elle n'auoit point d'amour pour vn estranger de qui on ne cognoissoit ny la maison ny les possessions: qu'elle se resoudroit plustost d'espouser vn citoyen dont la condition luy seroit cogneuë, & confirmant sa resolution plustost par larmes que par la raison, elle print les mains de sa mere, & luy dit ces paroles interrompuës de sanglots.

Ma mere! Que vous a fait vostre fille? Pourquoi la voulez-vous abandonner à la puissance d'un estranger? quel aduantage en receuray-je de luy? Donnera-il les cordages de son vaisseau pour ostage de mon douaire? l'ay receu de vous toutes les caresses qu'une vraye fille peut espe-

rer de sa mere, & maintenant vous voulez hazarder ma fortune entre les mains d'un Pilote, de nouveau arriué. J'ayme mieux attendre la recherche des Courtisans. Quelle aduance peut-on esperer de celuy qui ne peut asséurer les conuentions matrimoniales? Vous dites qu'il est recommandable à Iupiter, & qu'il luy a rendu de bons seruices: Si cela estoit, ce Dieu l'en eust desia récompensé. S'il eust combatu pour le Ciel, comme vous dites, Iunon l'eut gratifié de quelque beau sujet. Croyez-vous que Iupiter, qui est si puissant, ayt besoin du secours d'un homme? Mercure qui s'est vanté d'estre yssu de luy, montre par son mensonge qu'il n'est pas de sa race. Je ne puis me persuader qu'il ait negligé le secours de Mars, pour celuy d'un homme mortel: cela conteste contre les sens & la raison, que celuy qui commande au Ciel & à la terre, & qui a abyssmé les Titans aux enfers, ayt besoin de Cadmus, pour resister aux efforts d'un Geant. Le pays n'est point si depeuplé de Seigneurs de ma qualité, que l'on soit contraint de se rabaisser, desrogeans aux loix de la Grandeur: Mais.

quand cela feroit, il y auroit plus d'apparence de rechercher dans la consanguinité vne alliance, que de la mandier d'un estranger. Entre les Dieux le sang n'a point de loy: Iupiter a bien espousé sa sœur Iunon: Mars & Venus n'ont point fait de difficulté de se conjoindre: Et faut-il que moy miserable i'esprouue les rigueurs de la deffense, sans exemple, & que i'espouse vn pauvre passant, qui a plus besoin d'assistance pour le conduire au lieu où il veut aller, que de femme pour l'arrester.

Elle respandit en parlant grande quantité de larmes, tesmoignages de ses ressentimens: l'effort de ses bonnes raisons, esbranla la volonté de la Reyne, qui flechit à la commiseration, & se delibera de mespriser les commandemens des Dieux: Mais Venus qui auoit interest au mespris, print les vestemens de Suade, & desguisant sa face, parut sous la ressemblance de Pisinoé, compagne d'Harmonie: Et pour l'eschauffer à l'amour par jalousie, elle tint ce discours plein d'inuention & de ruse, comme si elle en eust esté amoureuse.

O heureuse Harmonie, que vous auez

vn bel Estranger, vous pouuez vous asseurer d'estre aymee du plus braue homme qu'aucune Nymphé puisse desirer. Il est d'Assyrie, la terre la plus fertile du monde, où sont les jardins & les fontaines d'Adonis: & où Venus pratique ses ballets. Je me trompe, ce n'est point vne femme mortelle qui l'a engendré: Il tire son origine des Dieux. Il a desguisé le lieu de sa naissance: Je sçay qu'il est venu du Ciel. N'est-ce point qu'Atlas ait engendré Electre, la cousine de Maie, & que son fils soit venu pour espouser Harmonie. Et ce n'est pas sans raison que l'on l'appelle Cadmus, pource qu'il a changé sa forme. Que si c'est vne autre Diuinité, Emathion peut se vanter d'auoir receu en son Palais le Dieu Apollon: Et ceste belle Nymphé, pour ce sujet sera estimee plus heureuse que sa mere, en tant qu'elle sera mariee à vne Diuinité. Mais c'est vne merueille, Iupiter espousa Electre en secret, & Apollon demande ouuertement Harmonie en mariage. A la mienne volonté qu'il recherchast la pauvre Pisinoe, je ne refuserois point ses embrassemens, cōme Daphné. Je ne suiurois point les froides resolu-

tions d'Harmonie, & quittant mon païs
& mes parës, je luy ferois compagnie en
tous les lieux où l'Amour nous condui-
roit. Je me ressouviës d'auoir veu vostre
hoste en quelque lieu, ie le prenois pour
Phœbus. Vous diriez que la face de ce
Dieu reluit cōme de l'or: aussi Cadmus
rẽd vn esclat qui n'est pas moindre. Que
si vous n'avez point d'inclination pour
luy, prenez tous mes seruiteurs, tout ce
que ie possede d'or & d'argent, je vous
donneray le Palais de mon pere, & mes-
me, s'il est loisible, toute ma parenté, &
me le laissez pour mary. Belle Nymphé,
de quoy vous plaignez-vous? Cadmus
vous veut emmener en ses vaisseaux
pour nauiger en la belle saison du Prin-
temps, & moy ie le suiuray dans les ri-
guez de l'Hyuer. Ie ne craindray point
les tempestes, ny les orages: La jalousie
de Neptune ne me sera point suspecte:
l'impetuosité des vents ne sera pas capa-
ble de m'esmouuoir. La possession d'vn
tel hōme, merite que l'on se hazarde aux
perils de la mer. I'embrasseray la mort
d'vn courage immuable, pourueu qu'il
fust cōpagnon de mes aduantures. Belle
Vierge n'apprehendez point les hazards

de la nauigation, vous estes fille de Venus & d'Amour, elle vous conseruera si vous le possédez: ne desirez plus le séjour du Ciel. Quand ie considere ce beau joyau, ie ne fais plus d'estat des escarboucles d'Orient, ny des autres pierrieres: Je le prefererois à l'Arbre des Hesperides, qui porte les pommes d'or. l'ambre des Heliades, ne me content point. Heureuse seroit la nuit qui couuriroit de son voile les embrassemens de Cadmus & de Pisinoë. Si vous tirez vostre extraction de Mars & de Venus: Vous auez vn homme qui est le symbole de la beauté du Printēps, son front ne distille que les douceurs du miel, les yeux ne respirent qu'amour, sa face est comme vne rose meslee de rougeur, les mains sont plus blanches que les lys, sa bouche plus vermeille que le corail, qui rend les odeurs de la violette. Je ne veux pas louer la couleur de ses cheueux, pour ne faire point honte à Phœbus. Quand il tourne le visage, il semble que ce soit vn rayon de la Lune, quand il a la teste nuë, on pense voir l'Estoile messagere du jour. En fin toutes les Graces luy ont departy de leurs faueurs. Receuez-moy en vostre maison: (ce dit-

elle en luy prenāt les mains:) Je treuueray chez vous les remedes de l'amour: i'y contenteray ma passion, i'esteindray mon feu. Que ie voye de prest vostre per-ruque: que ie baïse vos mains: Je mouray sur vostre sein, lors que ie ressentiray la froideur de vos embrassements. Quand auray-je vne jouïssāce parfaite? Si i'en'ay ce contentement, ie me lairay volōtaire-ment mourir. Je racōteray dans les enfers la triste cause de mon destin, pour es-mouuoir Proserpine à l'amour & à la cō-passion. I'entretiendray les Manes des plaisirs qu'on reçoit des baisers amou-reux: & les infortunes qui trauerſent les Nymphes passionnees du Beau. Je ren-dray les Ombres jalouses, si elles sont ca-pables de passion. Je vous suiuray par tout si vous l'auiez agreable. Je ne me fa-cheray point de courir par toute la ter-re. Et vous belle Harmonie, soyez l'Es-pouse de Cadmus, quāt à moy ie seray sa Damoiselle suiuite. Mais ie crains de vous donner sujet de jalousie. Iunon se vengea des adulteres de Iupiter, & des amourettes d'Europa & d'Io. Mais donnez-le moy, ie vous supplie, pour vne nuit, ce sera vn remede à mon feu. Si vous m'enuiez ce plaisir, enseignez.

moy quelque artifice pour reposer les
nuicts, pour en perdre l'image & le res-
souvenir.

Tout au mesme temps Harmonie
touchée de ces viues persuasions, &
de ces louanges, changea d'aduis. Elle
commença de regarder son hôte d'un
bon œil, & de dire ces paroles.

Helas ! quelle Diuinité m'a touchée,
Adieu ma patrie, Adieu Emathion, &
les grottes des Cabires. Il faut que ie
vous quitte. Ie ne verray plus les Cory-
bantes, ny les flambeaux dont on se sert
aux Sacrifices d'Hecate. Adieu ma vir-
ginité, ie me marie à Cadmus, ie passe-
ray avec luy les mers les plus dangereu-
ses. Vous direz qu'il y a du peril: il n'im-
porte. Que la tēpeste & les orages nous
enseuelissent tous deux, ie le suiuray par
tout. S'il me meine en Orient, ie me res-
souuiendray des Amours d'Orion, & de
l'Aurore. Si nostre chemin s'adresse en
Occident, les langueurs & les traux
de la Lune & d'Endymion me console-
ront.

Elle exprimoit ces plainctes, & les
arrousoit de larmes. Elle baïsa les mains
& les yeux d'Electre & d'Emathion en
tesmoignage

tesmoignage de la resolution qu'elle auoit prise, elle embrassoit les filles de Chambre, & donnoit les adieux à tous ceux du Palais, mesmes aux choses innanimees, aux Cabinets & aux Sculptures. Estant mise entre les mains de Cadmus, les Damoiselles suiuanes d'Electre la conduirent iusques au port. La Lune voyant que l'on menoit ceste Nymphe pour l'abandonner aux tempestes de la Mer, & aux traitemens d'un Estranger fit ces reproches à Venus. Je m'estonne belle Deesse comment vous vous monstrez si cruelle enuers celle qui vous touche de si près. Les flesches de vostre Cupidon ne l'ont point esparnee. Comment traitterez-vous les estrangers, puisque ceux de vostre sang peuuent à bon droict se plaindre de vous. Belle Nymphe, fille de Venus, cours les hazards des Pilotes & dy à ta mere que le Soleil t'a injuriee, & que la Lune ta fait vn affront. Pauvre Harmonie : bannie de ton pays, laisse Endymion à la Lune, sois compagne des aduantures de Cadmus, & te resouds-à souffrir toutes sortes d'encombres.

Cadmuse mena la belle Harmonie

en son Nauire. Il commanda à ses gens de leuer les voiles. Il pressoit son depart: Car la joye qu'il auoit de posseder vne si grande beauté ne luy permettoit pas vn plus long sejour. Il fit asseoir ceste Nym- phe en la poupe, & l'entretenoit de discours amoureux. Cependant vn Pilote pour cōgratuler ceste heureuse alian- ce commença de leur dire:

Cen'est pas Neptune qui conduit nostre flotte, mais c'est l'Amour. Il n'est point hors de raison, que Venus qui est issuë de la Mer ait engendré vn Nautonnier. Il me semble que ie voy vn vaisseau qui vient de Sydon. N'est-ce point Mars qui meine Venus de Thrace en Assyrie? Pour le moins, ô mere d'Amour faite en sorte que nous voguions dans le calme, & que la tempeste ne trouble point les amoureux.

Il dit ainsi jettant les yeux de costé sur la belle Harmonie. Cependant Cadmus arriua en Grece heureusement à la faueur des Vents. Danaus enseigna plusieurs belles inuentions, & entre autres il monstra l'artifice de tirer de l'eau des puits & de les bastir, & accommoda la ville d'Argos de sources & de fontaines

en la grande neceſſité : Cadmus donna aux Grecs l'invention des lettres & des carracteres, & eſcriuit les myſteres d'Oſiris & les Orgies de Dionifius l'Ægyptien, & mit en lumiere les ſecrets de la Magie, & de l'Aſtronomie. Il trouua le mouuement du Soleil, la cauſe de ſon eclipſe, la meſure de la terre, le cours de la Lune & ſes mutations en ſon plein, & en ſon decours: Dès qu'il fut en la Grece il laiffa le ſoin de la Mer. Il ſe mit en carroſſe & ſ'en alla en Delphes pour conſulter l'Oracle qui luy fit ceſte reſponſe.

Cadmus c'eſt en vain que vous courez par tout la terre, vous cherchez vn Taureau qui ne fut iamais engendré. Vous ſuiuez vn Taureau que les hōmes ne peuuent attraper : ſuiuez vn bœuf, qui vous apparoiſtra, & ne cherchez pas celui qui eſt enleué au Ciel que les Bergers ne cognoiſſent point, qui n'a point repeu dans les prairies : qui n'a point eſtriué contre les aiguillons des Paſteurs, mais pluſtoſt de l'Amour. Laiſſez-là le ſoin de ceſte recherche à voſtre pere Agenor, & ne manquez point de vous arreſter au lieu

où vous remarquerez vne Vache.

Ce fut la respōse obscure de Phœbus, le Mont-Parnasse sembloit reſonner à la fureur Prophetique de ce Dieu. Et l'eau de la fontaine Castaliene murmuroit comme si elle euſt reſſenty la violence & l'effort de l'Eſprit, & teſmoignoit par ſes boüillons vne ſecrete agitation.

Cadmus dōc s'en alla aſſez content. Il ne fut pas ſi toſt dans la campagne qu'il aduiſe de loin cet animal, dont l'Oracle luy auoit parlé. Il s'approcha du lieu, & commāda à ſes gens qu'ils veiſſent tout le pays circonuoisin. Ce qu'ils firent, & luy rapporterent qu'ils auoient veu vn Serpent d'une grandeur prodigieuſe: mais de peur qu'il n'ēpeſchaſt le deſſein de Cadmus, Apollon l'endormit. Il ſuiuoit pas à pas ceſte Vache, & paſſa en la Region Daulide, où l'on dit que le cruel Tereē coupa la langue à Philomele. De là il arriua en la ville de Titie où cet insolent fils de la Terre, fit des affronts à Latone. De là il fut dans la Bœotie où cet Orion mal-heureux fut picqué d'un Scorpion qui luy cauſa la mort. Il fut apres en Cheronide où cet anima

tomba tout roide mort, pour luy marquer le lieu où il deuoit bastir la superbe ville que luy auoit predict l'Oracle. Reconnoissant la verité des propheties il le voulut sacrifier à ce Dieu. Et parce que pour faire la ceremonie l'on auoit besoin d'eau, tant pour faire l'ablution des mains, que pour offrir à l'Autel, & que la Vigne n'auoit pas encore produit ses fruiçts. Il fut avec ses hommes à la fontaine de Dirce, où ils rencontrèrent vn Serpent monstrueux qui en empescha les approches. Le plus vaillant, d'abord, entreprit de le combattre, mais il fut enueloppé de la queue de ceste beste, qui sans luy pouuoir resister le deschira miserablement. Vn autre encor se jetta sur sa teste à dessein de l'estouffer, mais il luy reüssit mal. Il receut des viues atteintes de ses crochets, & du venin qui sortoit de sa gueule. Ces tristes objets engagerent Cadmus si auant dans le combat, qu'il eust besoin du secours d'une Diuinité. Minerue ne manqua pas de paroistre avec son *Ægyde*, presage de la victoire qu'elle luy promettoit, & luy donna courage en ces termes.

O Cadmus, toy qui as assisté Iupiter en la deffaitte des Geans , pourquoy crains-tu l'effort d'un Serpent? Tu as contribué à la perte de Typhon , qui portoit en ses cheueux vne armee de Serpens? N'apprehende point les dents de ceste beste. Pallas te secourera , & te donnera la victoire. Mais apres que tu l'auras tué prens ses dents & les seme en terre , & mets à mort tous les Gens d'armes qui en naistront, exceptez cinq que tu reserueras pour peupler la belle ville de Thebes.

Minerue n'eut pas si tost dit qu'elle s'en vola au Ciel , & à l'instant Cadmus poussé d'un nouveau courage approche ce Dragon & luy lance vne grosse pierre qui l'assomma , & puis il luy coupa la teste avec son espee.

Comme il estoit estendu sur la terre , Mars fit lors paroistre le ressentiment qu'il auoit de sa mort. Mais il estoit arresté par les Destins que Cadmus feroit quelque iour metamorphosé en serpent , & qu'il bastiroit vne ville si superbe que la posterité en admireroit la grandeur. Apres ces combats & ceste deffaitte , Cadmus ramassa dans un

heume les dents, & les fena en terre. Il ne l'eut pas si tost labouree, qu'il aperceut vn grand nombre d'hommes armez qui se leuerent, les vns à my-corps commencerēt à chamailler, & les autres encore imparfaits s'apprestoiēt au combat. Il auoit de la peine à se defendre de leur effort, & n'eust esté que Minerue par sa prudence & son conseil, jetta vne pierre sur ces Geans (qui pensoient que leurs compagnons leur faisoient la guerre,) à peine se fut-il guaranty: Mais comme ceste armee estoit enyuree de sang & de la confusion, eux-mesmes se deffirent, & n'eurent point à la fin de plus grands ennemis que leurs propres compagnons.

Cadmus apres auoir emmené la belle Harmonie avec luy, combat les Themiscenses, & bastit la ville de Thebes. Acteon est Metamorphosé en Cerf, & son ombre apparoit à son pere Aristee.

LIVRE CINQVIESME.



PRES que Cadmus eut remporté la victoire sur l'armee des Geants, il voulut faire vn sacrifice à Mars, & offrir sur ses Autels vn bœuf: Il le fit emmener au lieu propre pour accomplir la ceremonie, & apres il le tua, & le fit escorcher: On le coupa en plusieurs morceaux; car il vouloit celebrer la feste, & faire vn solennel banquet: Comme les viandes furent bien cuites & assaisonnees, ils se mirent tous à table, & racompterent leurs exploits, & les dangers qu'ils auoient encourus dans ces combats. Mais il n'estoit pas encore temps de se reposer, & Cadmus n'auoit pas finy ses labeurs par la mort du Serpent & des

Geants, il eut depuis vne cruelle guerre contre les Temmicenses, sur la resistance qu'ils firent à son passage. Ayans prins jour pour dōner la bataille, ces peuples appellerent leurs cōfederez au secours. Cadmus se prepara pour cet effect. Les deux armées se chocquerent rudement avec leurs fleches, & leurs dards: Il fut tué vne grande quantité de Tēmicenses, & comme ils estoient prests de fuir & de laisser le camp, le General de l'armée fut conseillé de demander à parlementer, à telles conditions que le voudroit Cadmus. Ce qui leur octroya à la premiere requeste.

La guerre estāt finie, il jetta les fōdemēs de la ville de Thebes. Il fit prendre l'aliguemēt des ruēs, designa les lieux des Tēples qu'il vouloit bastir, & fit le dessein des sept portes. Il dedia la premiere à la Lune, pource qu'elle represente par son croissant les cornes d'un bœuf: la seconde à Mercure, la troisieme à Venus, la quatrieme au Soleil, la cinquiesme à Mars, la sixiesme à Iupiter, la septiesme à Saturne. La ville estant bastie, on celebra les nopces & le mariage de Cadmus & d'Harmonie. Les Nymphes y assisterent,

& tesmoignerent la joye qu'elles auoiēt a ceste alliance, les Graces y firent des balets & des danſes, & Venus prepara leur couche amoureuse: Elle la parla de fleurs. Les roses y rēdoient vne odeur ſuaue, & les inuitoient à la iouiſſance. Mars qui eſtoit faſché cy-deuant de la mort de celuy qui luy appartenoit, commēça de ſe reioiſir & danſer comme les autres, & s'appuyant ſur la belle Venus, il ſonnoit de la trōpette pour congratuler leurs nopces. Apollon Himenien y aſſiſta avec ſō inſtrumēt: & les neuf Muſes faiſoient le chœur entier de la Muſique: Polymene y preſidoit, & battoit la meſure: La Victoire y arriua, & chanta melodieuſement. Cependant la Nuiēt venoit, les Eſtoilles paroiſſoient, le Dragon, qui eſt voiſin du Chariot, eſclattoit au Ciel, preſage de la Metamorphoſe qui deuoit chāger Cadmus en Serpent. Toutes les Deitez luy firent des eſtreines cōuenables à ſa grādeur. Iupiter ne luy fut pas ingrat, Neptune luy fit preſent de cheuaux, Mercure luy donna ſon caducee, Mars le gratifia de ſa picque, Apollon de ſon arc, Vulcān luy fit vne couronne enrichie de pierreries, & luy donna vn riche pendant d'aureille: Iunon la

recoigneut d'une selle d'or, & Venus d'un beau carquan, que Vulcan luy auoit fait comme un chef-d'œuvre de l'art, afin qu'elle eut deuant ses yeux un bel objet, & que par la force de l'imagination, elle n'engendrast un fils boiteux comme le pere. Ce Forgeron y auoit gravé un Serpent, semblable à l'Amphisbené, qui a deux testes, & qui les contourne. Cet ouvrage auoit un pareil mouuement, & ramport à la mesure de la chaîne, qui le tenoit, & par les efforts de l'artifice, il sifflait cōme s'il eust esté naturel. Aux extremités il y auoit un Aigle, qui sembloit estre prest à voler. Vous y voyez en un costé un liure iaspé, & ceste pierre qui croist & décroist selon la Lune: de l'autre une grosse perle, & dans le milieu une belle Agathe. Les deux testes de ce Serpēt estoient cōjointes par leur cōtour, & l'Aigle les couuroit de ses ailles: & sur le front il portoit un gros Escarboucle, qui reluisoit comme un flābeau dans la nuit. Il y auoit une belle Esmerande, qui representoit la mer au naïf, & comme elle estoit enchassée dans un cristal blanc, elle en figuroit l'escume. On y pensoit voir aussi une grande quantité de

poissons, & entr'autres des Dauphins, qui sembloient fendre l'eau de leur queue. Venus luy fit ce beau present. Les nopces estans celebrees, Cadmus eut la jouissance de la belle Harmonie, & au bout de quatre mois elle parut grosse, & enfanta Authonoé, & puis en cōtinuant leurs amours, la belle Ino, qui fut mariee à Athamante: & la troisieme Agaue, qu'Euchiō espousa. La derniere s'appella Semele, que Iupiter ayma pour sa rare beauté. Harmonie n'eut pas seulement des filles; mais elle eut encor vn garçon, qui fut appellé Polydore, dont le merite fut si recommandable; qu'il se rendit digne de posseder le Royaume de Thebes, & se fust maintenu, n'eust esté la meschanceté de Penthee, qui le luy vsurpa. Comme ces filles furent en aage d'estre mariees, Cadmus leur trouua des partis sortables à leur condition. Il donna Authonoé à Aristee, fils de Phœbus & de Cyrene, & en estima la condition aduantageuse. Leur mariage fut heureux, & remply de toutes sortes de commoditez, comme de troupeaux de Cheures, de Bœufs, avec vne grande quantité d'huiles. Aristee trouua

l'inuention de ranger les mouches dans des panniens, & d'en pressurer le miel.

Ce fut le premier qui descouurit la propriété du chien pour la chasse : & de la force de son odorat, qui donna l'artifice de courir le cerf & les autres bestes fauves : de tendre les rets & les panneaux, de recognoistre les fumées pour les surprendre dans leurs forts, leurs tasnieres ou leurs bauges. Ce fut luy qui recogneut l'artifice de nourrir les abeilles en Hyuer lors que la neige couure les montagnes, & que l'Hyuer a fait mourir les fleurs des prez & des jardins : qui sceut les enfumer pour en tirer le miel. qui retint leur exain avec le son des poisses d'airin. Il pressura le premier les oliues avec des meules, pour en tirer l'huile. Il enseigna le moyen de conduire les taureaux aux campagnes, & leur donner l'herbe selon les saisons & les heures du jour : & les mener aux prez & aux fontaines. Ce fut luy qui recogneut que les chevres & les moutons suiuiuent vn d'entr'eux, comme vn conducteur, & que les Bergers auoient besoin des flagcollets pour s'entretenir & faire resonner leurs amours aux forests & aux mō-

taignes. Il sacrifia vn Taureau , à Jupiter, & remplit quelques vaisseaux de miel pour le luy presenter. Ce sacrifice, estoit pour empescher les sinistres influences de la Canicule. Aussi Jupiter receut cette offrande , & fit naistre vn vent agreable qui rabbattoit la chaleur extrême. Ce mariage fut agreable à tous les Citoyens, qui tesmoignerent la joye par leurs balets & leurs danses. Arifce & Autonoc engendrerent Acteon, avec les inclinations de la chasse: car il passa tout son temps à courir dans les forests, & faire compagnie à Diane. Mais c'est vne chose estrange quand on considere son mal-heur , & l'accident qui luy arriua dans les bois où il auoit poursuiuy tant de bestes , tant d'Ours & tant de Lyons, qui ne luy estoient point eschapez, mesmes les Pantheres, qui ont de l'aduantage à la course. Il auoit acquis tant de reputation & de dexterité en cet exercice, que Pan le Dieu des Bergers l'admira. Mais son agilité, ny son carquois, ny les ruses qu'il y pratiquoit n'empescherent point qu'il ne fust la miserable proye de ses chiens: & lors qu'il pourchassoit vn cerf, la mauuaise

fortune le conduisit en la fontaine où il
vid Diane toute nuë, qui se baignoit. La
chaleur du iour: & la fatigue seulement
qu'il auoit endurée l'appelloit en ce
lieu, n'ayant point de dessein d'y ren-
contrer ces Deesses: & neantmoins il
vid celle qu'il ne falloit point voir. Cet
objet luy fut fatal, car Diane qui sortoit
del'eauë l'aperceuant de loing, Quel im-
pudent amoureux est. celà luy cria-t-el-
le tout haut, qui est si hardy d'aprocher?
Elle print à la haste vn vestement & ca-
cha son sein avec vne honte virginale. O
mal-heureux Acteon à l'instant tu chā-
geas de forme par les disgraces de cette
Deesse, tes pieds s'allongerent, & tes
mains furēt diuisez en vngle. Ton visage
s'accrut & ton front cōmença d'auoir
des cornes. Ton corps deuint tout pelu.
Tu fussēblable à vn cerf & ne te resta
de toutes les parties de l'hōme, que l'es-
prit & la raison quite furent inutiles. Il
couroit par les mōtagnes & par les val-
lees fuyant les rencontres des chasseurs,
& ses chiens ne peurent le recognoistre:
au contraire la rigueur de Diane les
poussoit à la poursuite, de sorte qu'e-
stans trompez de ce faux object, ils

ils se ruerent sur leur maistre, & le déchirerent en mille pieces, non pas à l'instant, à la façon des chiens, mais parfois, pource que la Deesse qui les conduioit à ce desastre, voulut qu'ils luy fissent endurer vne longue peine.

Acteon à qui la cognoissance & la raison estoient restez de son mal-heur, deplore sa mort, & fit ces plainctes:

O heureux Tyrresias, ta fortune n'a point esté semblable à la mienne. Tu as veu Minerue toute nuë : mais la mort n'a pas esté ta peine: tu n'as pas esté changé en cerf comme moy: tu n'as point porté les cornes en ton front. Tu as perdu la veüe, mais cete perte a esté aduantageuse : car tu as esté recompensé en l'esprit, & la force des yeux du corps est passée par vn heureux changement en ceux de l'Ame. Mais les disgraces de Diane sont plus cruelles que celles de Minerue. A la mienne volonté qu'elle m'eust fait endurer vne pareille peine, & que i'eusse perdu la veüe, ou qu'elle m'eust changé l'esprit aussi bien que le corps. Je suis en la forme d'un animal, & neantmoins i'ay encores la raison d'homme. Les bestes auront compassion

passiõ de ma misere. Elles sont plus heureuses , car elles n'apprehendent point la mort , ny ses rigueurs : mais moy seul entre elles , ie me sens , ie pleure d'un ressentiment humain , & respands des larmes de cerf. Vous chiens vous ne me cognoissez plus : iamais vostre rage ne fut pareille contre les lyons. Vous montagnes , qui estes amies du pauvre Acteon , racontez-mon malheur ! Et toy Citheron , dis à ma mere Autonoë , la cause de ma mort. Rapporte à mon pere Aristee, comme en répandant des larmes de pierre , la cruauté de mes chiens qui me deuorent. Faut-il mourir de la dent de ceux que ie nourris ? A la mienne volonté qu'un Lyon m'eust deuoré dant les mōtagnes, qu'un panthere m'eust déchiré , qu'un ours m'eust mangé, ou qu'un cerf m'eust terrassé : la mort me seroit plus agreable, que celle que mes chiens me procurent.

Il exprima ses plainctes, mais ils n'entendoient point les prieres de leur maître. Le bruit de cet accident courut par toute la Prouince. Autonoë receut les nouuelles que son fils Acteon auoit esté mangé par les chiens propres : mais non

pas qu'il est esté changé en Cerf: Ceste pauvre mere ne peut supporter la mort de son fils qu'avec beaucoup d'impatience: Elle deschire ses vestements, & coupe ses cheueux apres les auoir laués de ses larmes. Le retour des chiens qui venoient de la campagne tesmoignera par leur action le delastre, & en confirmera la creance. Cadmus ne fut pas exempt de ce ressentiment, ny la belle Harmonie. Toute la maison fut comblee de tristesse: Autonoé & Aristee cherchoient dans les bois les tristes reliques de leur pauvre Acteon, mais ils ne le recogneurent point. Ils apperceurent seulement quelques vestiges d'un Cerf: Ils passent & repassent sur les os de cet Animal, sans aucune recognoissance: mais quoy! n'auoit-il pas quelque chose qui le fit cognoistre? La pauvre Autonoé est sans blasme: car son fils est changé. Il n'y a point de certaine coniecture en son visage: elle y a prins garde, & n'a point remarqué l'air de sa face. Elle a touché son bois: mais elle n'a pas recogneu son front. Elle a veu ses pieds, mais elle n'a pas remarqué ses souliers. Autonoé n'a point de faute, car elle n'a

point apperceu ses yeux, & la forme d'un homme, ny la barbe qui luy couvroit le menton. Ils couroient dans les montagnes: & comme ils ne virent rien qui leur donnast de marques certaines, ils s'en retournerent en leur maison, où la fatigue les endormit. Leur repos estoit interrompu de sanglots & de ressentimens; quand Acteon, ayant prins la ressemblance d'un Cerf, parut à son Pere, à qui respendant quantité de larmes, il exprima ces plaintes.

Mon Pere dormez-vous? La douleur que vous devez recevoir à mon mal-heur vous permet-elle le sommeil? Je croy que vous n'estes pas aduerty de mon destin: Esueillez-vous & voyez une estrange metamorphose. Embrassez un Cerf qui a la raison humaine qu'Autonoë n'a pas engendré: Neantmoins, vous voyez celuy que vous avez nourry. Vous entendez Acteon, vous voyez Acteon, si vous voulez manier ses mains: Voyez les pieds & vous les reconnoistrez. Si vous regardez sa teste, ce sera celle d'un cerf: Si vous maniez son front vous y trouuerez des cornes. Si vous regardez le poil de son corps ce sont ses vestemens,



Mon pere , recognoissez vostre fils qu'Apollon n'a pas voulu garantir de cet'infortune, & deplorez le malheur de celuy que le Mont Cytheron n'a point voulu garder. Donnez la sepulture à celuy qui a'changé de forme, ne laissez pas ce cerf sans l'honorer d'un tombeau : & que cette metamorphose si estrange ne vous trompe. A la mienne volõté que vous m'eussiez defendu les exercices de la chasse, i'amaïs ie n'eusse importuné les forests, & enuié les contentements de Diane: ainsi ie ne l'eusse point veuë en la fontaine. Ie deuois rechercher l'acointance d'une Nymphe mortelle. Mon ambition auoit laissé aux autres par mespris cette poursuite, & neantmoins l'amour immortelle que ie poursuiuois follement, m'apporte la mort. Diane s'est irritée contre moy, & i'ay esté la malheureuse proye de mes chiens. Les montagnes en sont tesmoins. Si vous ne croyez point les Rochers, demandez-le aux Nymphes. Les Driades en sçauent quelque chose. Enquerez-vous des cerfs qui ont couru avec moy dās ces bois, & des Bergers que i'ay appellé à mon secours. Mon pere,

rendez-moy les derniers deüoirs, & ne tuez point mes chiens qui sont cause de ma mort, ils sont excusables. A-t-on iamaïs veu ces animaux pardonner aux cerfs? Qui s'est iamaïs faiché de les voir aux prises avec les biches, n'est-ce pas leur inclination de les chercher dans leurs forts, & de boire le sang, & lecher ou respirer l'air, qui recelle l'odeur. Il semble qu'ils ont du regret, & qu'ils pleurent ma mort, comme s'ils auoient de la raison. Je vous supplie de les conseruer, ils ont veu mō corps couuert de poil, & le bois d'un cerf. Ils n'ont point escouté mes plaintes, mais aussi ils pensoient que ce fust vne voix estrangere. Et pour tesmoignage de leur innocence, ils parlerent aux rochers, & dirent, Qui est-ce qui nous a rauy Acteon? Nymphes, dites-nous en quelle contree il poursuit les cerfs? Ils respondirent: Qui a iamaïs veu ces animaux pourchasser leur semblables. I'ay veu vn Cerf qui ne l'estoit point à la chasse des cerfs: en vn mot, Acteon en a pris la forme, & n'a point perdu la raison d'un homme. Il a autrefois chassé, & maintenant Diane en fait sa proye. Cette Deesse disoit à mes:

chiens: Cherchez Acteon que vous avez
tué. Mon pere, ie vous diray la cause de
ma mort. Comme ie reuenois de la chas-
se i'apperceus les Deesses pres de la fon-
taine: la curiosité de les voir, m'ayant
fait aprocher, la beauté de cet objet me
desrobe la raison & ie jugemēt. Je mon-
te dans vn Oliuier pour auoir le loisir &
la commodité de les cōsiderer, en quoy
i'ay fait vne faute. I'ay esté si hardy que
de regarder ce qui pouuoit offencer
mes yeux: & ay encore prophané pour
cet effect, l'arbre qui est consacre à Mi-
nerue. Diane apres auoir longuement
chassé vint en ce lieu à dessein de se re-
freschir, & se lauer à loisir en la fontai-
ne, accompagnée des Nymphes, & des
Nayades, où elles follastrerent libre-
ment dans les delices de ce baing, avec
des caresses & des mignardises de fami-
liarité, les rayons de leurs beautez esclat-
toient comme la Lune quand elle darde
en son plein sa lumiere dans l'Ocean, &
l'aueuglement toucha mes yeux, presage
de mon malheur. Incontinēt ie tom-
be de l'arbre & me treuve changé en
Cerf. Je sentis sur mon corps le poil qui
se herissoit. Mes chiens me poursuiuirēt
Je ne vous veux pas dire combien mon

ame fut atteinte de douleur, de peur de vous donner trop d'affliction quād vous me cherchiez. Vous avez souuentesfois passé deuant ce malheureux arbre où sont les miserables reliques du pauvre Acteon. Vous y treuuez mō carquois, mon arc & mes fleches, si Diane ne les a point changés en arbres pour les faire compagnons de ma fortune. I'ay esté trōpé en mes desseins. Je croyois qu'Apollō frere de Diane eust engēdré mon pere avec Syrene, & que cette Deesse respectant les loix de la consanguinité, eust pour agreable la recherche que ie ferois d'elle. Au moins ie pēsois qu'un seul refus deut punir la hardiesse de ma sollicitation, joinct aussi que les Deesses ne sont point si insensibles à l'amour qu'elles n'y flechissent quelquefois. Ne dit-on pas que l'Aurore rait Orion? Que la Lune charma par ses attraits Endymion: & que Cerēs ne fut point cruelle aux seruices de Iason. I'esperois que Diane en deust faire de mesme: Mon pere ie vous supplie de me rendre les derniers deuoirs. Recueillez mes os & ne permettez pas que les chiens & les loups s'en jouient. Apres que vous leurs aurez dōné.

vn tōbeau, mettez dessus mō dard, mon carquois & mes flesches. Diane aura du contentemēt à les voir, & la priez qu'elle face grauer dessus, ma figure en grand volume, afin que l'on voye vn homme en la forme d'un Cerf: N'escruez point la cause de mon destin: car les passans ne peuuent pas deplorer ma metamorphose, & le sujet tout ensemble.

Et aussi tost le Spectre s'esuanoüit en l'air. Aristee s'esueille, & raconta à sa fēme Auronoé le fantosme qui luy estoit apparu, & ce qui estoit arriué au pauvre Acteon. Apres que l'Aurore eust chassé les tenebres, ceste mere s'en alla dās les bois, & chercha les os de son fils. Elle treuua les flesches & l'arc, & le carquois au lieu où il auoit dit, & dessous l'arbre qu'il auoit remarqué. Elle en baïsa les reliques, & les honora d'un tombeau.

Cependant que toute la maison d'Aristee estoit en pleurs, Agaue qu'Euchiō auoit espousé, enfanta Penthee, qui fit la guerre aux Dieux. Ino la femme d'Athamante engēdra Learché & Melicerte: & fut la nourrice de Bacchus & de Palemō: car Semele estoit reseruee pour le nouveau Bacchus qu'elle deuoit produire à

Iupiter qui n'auoit pas esté exēpt des passions amoureuses. Il poursuiuit la belle Proserpine avec beaucoup d'artifice, & fut contrainct de se changer en Serpent, pour en auoir l'accointance, & eut d'elle le miserable Zagree. Ceste Deesse estoit aymee de tous les Dieux, avec vne telle passion, qu'ils firent tous leurs efforts pour la raurir en son printemps, comme vne rose que les Bergeres enuient à leurs arbres. Ils luy firēt tous des presens dignes de sa beauté. Apollon luy donna sa lyre, Mars sa picque & ses armes: Vulcan luy fit present d'un joyau qui n'auoit point encore esté porté: & encore qu'il fust Forgeron, & maladroit à l'amour, neantmoins il esperoit la meilleure part de ses bonnes graces. Son mariage avec Venus ne l'empeschoit point: car desia il l'auoit repudiee pour la punir, à cause des amours illegitimes qu'elle pratiquoit avec Mars: Et auoit rendu les Dieux tesmoins de ceste action honteuse, & juges de son diuorce. Mais Iupiter estoit grandement passionné de la belle Proserpine, ses yeux auoiēt receu ce poison, & ne pouuoient se reprendre de ces impressions. Les inquie-

tudes d'esprit le troubloient, tout ainsi que les foudres & les vents esmeuvent l'air. Ceste Deesse prenoit de l'aduantage de ces charmes & de ces attraicts, & se plaçoit aux souffrances & au martyre de ces amoureux. Elle se regardoit souuent dans vn miroir, comme si elle eut voulu admirer ceste beauté qui offéçoit les Dieux. Et Venus encor qu'elle eust les Graces fauorables, & remporté le prix d'honneur sur les autres Deesses, n'estoit point comparable à celle-cy. Avec ces prerogatiues, elle auoit la main fort industrieuse aux ouurages & à la tapisserie: Elle tira son pourtraict sur sa toile avec tant d'artifice, qu'il n'y auoit rien a desirer que l'amour & la parole, tant cela estoit bien nüé, avec la diuersité des couleurs propres. Et apres qu'elle auoit bien trauaillé, elle s'en alloit baigner, pour prendre le frais de l'eau à la plus grande chaleur du jour. Là elle follaistroit dans ce baing, & se despoüilloit toute nüë. Iupiter, à qui l'amour auoit recueilly les cinq sens dans les yeux, prenoit plaisir à contempler ceste beauté en son naturel: Cet objet luy perçoit l'ame; & luy eschauffoit la

volonté, en telle sorte que jamais il ne receut de pareilles atteintes: mesme quand il caressa Venus avec ceste impuissance que den'en pouuoir iouir, & dont les vains embrassemens engendrèrent les Centaures & tant de monstres. N'est-il pas bien estrange que celuy qui gouuerne le monde, le Ciel & la terre, ayt suby le joug de l'Amour, & que ses foudres & ses éclairs n'en ayent peu empescher l'effort? Il quitta la couche de Iunon, & abandonna la jouissance de Cerés & de Latone, pour se contenter des faueurs de Proserpine.

Tous les Dieux sont amoureux de Proserpine. Cerés sa mere consulte Aristee sur les aduventures de sa fille. Zagree est metamorphosé en plusieurs formes. Iupiter vengeant l'injure qui luy auoit esté faite, brusle la terre, & enuoye un deluge pour esteindre le feu.

LIVRE SIXIESME.

IUPITER n'eut pas seul de l'amour pour la belle Proserpine, mais tous les Dieux la rechercherent de pareille affection. Sa mere Ceres encore qu'elle deust auoir du contentement de ce que le merite de sa fille esmouuoit toutes les Deitez, neantmoins elle en estoit faschee, & pleuroit souuent, craignant que cette grande beauté ne luy fut nuisible, & que ces amoureux ne la rauissent, ou que la jalousie les mist en dissention pour ce sujet. Elle remercia tous ceux qui la demanderent en mariage, pource qu'elle

craignoit les sollicitations importunes de Vulcan : Ceste poursuite la mettoit en peine, & ne sçauoit que resoudre. Elles'aduifa de consulter Astree, sur les aduentures de sa fille. Elle se mit en chemin pour le voir en sa maison : & alloit toute descheuelee, & ses cheueux flottans au gré des Vents, leurs seruoient de jouïets. Hisperus aduertit Aristee de la venuë de Cerés. Il le trouua en son cabinet, qui traçoit avec vn compas vn cercle, & vne autre figure quel'on appelle trigone. Comme il eut cet aduis, il alla au deuant, la receut avec beaucoup de caresses, & la retint à soupper. Il la fit asseoir dans le thrône en la place de son pere. Les enfans d'Aristee luy presentotent la coupe remplie de bonneliqueur : mais elle les remercioit : Elle estoit enyuree des soins qu'elle auoit pour sa fille : comme il arriue aux parents qui n'ont qu'un fils unique. En fin estant importunee, elle goustâ de ceste Ambrosie. Le bon vieillard Astree, qui auoit dessein de luy oster l'ennuy qu'elle auoit, & la resjouïr, commanda à ses enfans de l'inuiter à boire. Les quatre Vents ne man-

querent pas à faire leur deuoir. L'un luy
versoit du vin, l'autre la seruoit de ce
qui estoit sur la table : Boreas l'entre-
tenoit de discours, & Zephire faisoit
vne melodie agreable avec son souffle,
comme si c'eust esté des orgues. Lu-
cifer cueilloit dans les jardins des
fleurs, pour en faire des bouquets. Hes-
perus se mit à danser & à capreoler : &
comme il estoit la guide des Amours,
aussi print-il cet aduantage par dessus
les autres. Apres que Cerés eut ap-
paisé ses soings & ses inquietudes, par
ces passe-temps, & ceste belle Music-
que, elle se ressouuint du sujet de son
voyage, & embrassant le genoüil du
bon vieillard, luy raconta comme sa
fille estoit sollicitée d'un grand nom-
bre d'Amoureux qui la demandoient,
& le pria de luy faire son Horoscope, &
de luy prédire le bien & le mal de ses
aduentures. Il ne voulut pas luy re-
fuser ceste courtoisie : Il aprent d'elle
l'heure, le jour, le mois, & l'an-
née qu'elle auoit prins naissance : Et cō-
manda à vn de ses seruiteurs que l'on
luy apportast sa sphere. Il la tourne &
retourne, regarde le chemin que tenoit

le Soleil au Zodiaque. Il considere l'ascendant de sa naissance, les constellations, les maisons des Planettes & des signes, par les Ephemerides, & apres auoir bien calculé, il trouua que la Lune estoit pleine, & que le Soleil estoit dessous la terre, & en l'autre hemisphere, & qu'il pouuoit estre minuiet. Que la Lune estoit eclypsée par l'interposition du corps opacque de la terre. Et comme il vouloit scauoir ce qui estoit du mariage de Proserpine & de ses amoureux, il chercha où estoit pour lors Mars, & le trouua en la maison de Venus, presage tres-assuré d'un rapt. Et pour ce qui estoit des aduantures de ses parens, il trouua la Vierge sous les espics, & Saturne en la maison de ce signe. Apres qu'il eut supputé & faict les directions, & les reuolutions il dit a Cerés.

Puissante Deesse, ie voy en ceste natiuité vne eclypse de Lune qui demōstre que vostre fille sera rauie. Mars qui est en la maison de Venus en son angle occidental predict que celuy qui en fera le rapt, sera vn perfide & vn adultere : Quant

à vous, ie vous predis que vous serez tres-heureuse: Vous porterez les fruiçts, & donnerez l'inuention de labourer la terre. La Vierge sous les Espics est vn presage asseuré & le signe d'un merueilleux changement en l'Estat, & l'auant-courier d'un establissement estrange.

Astree finit ses Predictions. Cérés ayant entendu la mauuaise aduventure de sa fille, se facha: mais l'esperance qu'elle auoit d'estre la Deesse des fruiçts la consola. Elle sortit de la maison du bon vieillard, & attela ses Dragons à son chariot. Elle court dans le vuide de l'air, comme si le Vent l'eut poussee. Elle precipite sa course, passe par la Lybie, & par la Crete, où elle entendit les ballets & les danses des Nymphes du pays: ces resioüissances ne furent pas capables de l'arrester. Elle arriue en la Sicile, & aduisa vne grotte faicte en facon de maison auprès du riuage de la Mer Adriatique, où les flots battent quand ils sont poussez par les Vents. Elle jugea que Proserpine prendroit ses esbats en ce lieu, & que ce sejour luy seroit agreable. Elle aduisa vne roche semblable à l'autre, que la nature auoit fait,
où

où les Nymphes de la contree frequen-
toient. Elle pensa que sa fille y seroit en
toute seureté : & se delibera de la cacher
là dedans, & luy donner ses Serpens
pour gardes de sa virginité. Elle luy lais-
sa Calligenie sa nourrice, qui estoit fort
ingenieuse aux ouurages de laine. Cérés
abandonna ce séjour, donna son cha-
riot aux Nymphes, & s'enuola dās l'air.
Cependant la bonne vieille trauailloit à
son mestier. Proserpine designoit les
commencements d'une robe, & comme
elle continuoit son dessein, elle profera
ces paroles.

Belle Proserpine, vous n'avez pas en-
core suby les loix du mariage, neant-
moins vous ne pourrez éuiter les ruses &
les artifices de Iupiter, metamorphosé
en Dragon. Il endormira les serpens
qui vous gardent, & penetrera iusques
dans vostre couche.

Iupiter en ceste forme jouit de la belle
Proserpine, & engendra Zagree, qui eut
cet aduantage que de monter dans le
thrône de son pere, & de manier les fou-
dres en sa jeunesse. Cet enfant promet-
toit beaucoup, & fust arriué a vne gran-
de perfection, n'eust esté la jalousie de

Iunon, qui sollicita les Titans à sa perte. Il fut metamorphosé par les disgraces de ceste Deesse & par l'artifice d'un miroir à plusieurs monstres, & n'auoit point de forme certaine & permanente: car tantost il ressembloit à Saturne, & tantost à un enfant qui ne venoit que de naistre: tantost on l'eut prins pour un jeune homme que la folie troubloit: tantost il estoit semblable à un Lyon rugissant, qui contournoit sa queue, en signe de courroux: tantost il hannissoit comme un cheual mordant son frein, & iettoit une grosse escume comme s'il eut longtemps traouillé aux harnois ou à la course: tantost il sifflait comme un serpent rampant sur la terre, tantost il estoit comme un Tigre, ou comme un Taureau, & mugissoit comme un Bœuf, & faisoit la guerre aux Titans avec la corne: Iunon se courrouçoit à la diuersité de tant de formes, & ne peut souffrir tant de changemens, elle le fit tuer par les Titans, cōme il parut en la forme d'un Bœuf. Mais Iupiter se fâcha grandement de sa mort, & sçachant comme l'artifice du miroir auoit esté cause de sa per-

te, il mit le feu par toute la Terre mere des Titans, pour les punir. Il embrasa tous les arbres des forests, & mesme les mers: l'Ocean estoit tout en feu, la mer Caspiene iettoit vne grosse fumee: la glaciale sembloit s'euaporer & boüillir, toutes les montagnes se reduisoient en cendres: Les Vents n'estoient que des chaudes exhalaisons, qui s'enflamoient dans l'air: toute la Nature alloit perir. Mais l'Ocean supplia Iupiter d'apaiser sa colere, & pour l'y inuiter, il luy consacra de l'eau. Iupiter print compassion de la terre, enuoya vne pluye continuelle qui esteignit le feu, & ouurant toutes les bondes du Ciel, espaisfit les nuées: Toutes les Planetes estoient en leurs propres maisons: le Soleil couroit au signe du Lyon: la Lune à l'Escreuice, Venus au Taureau, Mars au Scorpion, Iupiter aux Poissons, Saturne au Capricorne, & Mercure à la Vierge. Toute la terre fut inondee, les estangs. Les riuieres, & les fontaines estoient pesse-messe, & n'y auoit point de recognoissance, les montagnes estoient toutes couuertes

d'eaux, la mer s'esleua si haut que l'on ne voyoit plus les cymes des rochers. Les Nereides deuinrent Oreades. La pauvre Echo nageoit dessus les flots, avec les impressions de son ancienne crainte: Elle apprehendoit en fuyant les sollicitations amoureuses de Pan, & de tomber dans les mains de Neptune. Les Lyons marins sautoient dans la grotte des terrestres. Les bestes feroces nageoient avec les poissons, & quelquefois les Cheureaux rencōtroient les Dauphins, & les Tritōs estoient cachez dans le creux des forests, occupans le sejour de Pan. Ce Dieu fut contraint d'abandonner sa flotte à la mercy des ondes, & Neree prenoit plaisir d'estre au lieu où Echo répetoit les dolentes voix des Amoureux. Les hommes estoient enseuelis dans les eaux, & flottoient les yns sur les autres. Tous les animaux ne peurent resister à ces inondations, & ne trouuoient point de lieu pour se reposer: car tout estoit en confusion, & les Vents esmouuoient la mer en telle sorte, que l'on eust dit que les Elemens reuenoient en leur premier cahos. Neptune ne pouuoit supporter avec patience ce grand changement en

son Empire. Ce trouble l'estõnoit, voyãt qu'il ne pouuoit toucher la terre de son trident, & se venger d'un tel attentat. Les Nereïdes se pourmenoiẽt librement sur les montagnes, Thetis & Triton y prenoient leurs esbats: les Dauphins s'escartoiẽt en des lieux esloignez, cõme s'ils eussent esté bannis de leur sejour ordinaire. La Baleine cherchoit les grottes des Lyõnes: & Pan qui n'estoit pas exẽpt de l'incommodité de ce deluge flottant comme les autres apperceut Galatee, & luy tint ce discours.

Belle Galatee, où est-ce que le courant des eaux vous porte, par les montagnes, comme dans la mer? Cherchez-vous la rencontre de vostre Cyclope? Je vous conjure par la beauté de Venus & les amours de Polypheme, que si vous rencontrez la Nymphe Echo, vous l'assuriez de la fidelité de mon seruice. Si elle ne tient mesme route, au moins elle a vne pareille fortune: Elle flotte, peut-estre, à sõ aise assise sur vn Dauphin, mais ie crains que les flots l'esmeuent, & que les ondes l'engloutissent. O pauvre Echo, que tu es malheureuse! apres auoir habité dans la durezza des rochers, main-

tenant tu subis la tyrannie des eaux. Et vous, belle Galatee, que deviendrez-vous? N'esperez point au secours de Polypheme, me voicy present à vostre service: Je vous porteray sur mon dos: ie ne crains point le naufrage. Je puis me transporter où ie voudray, iusques dans le Ciel mesme.

Galatee luy respondit d'une façon hagarde, & luy dit.

Je ne doute point, ô Pan, de vostre bonne volonté: mais employez-la pour la Nymphe Echo, & ne vous souciez point où i'iray aujourd'huy. Iupiter me fera fauorable en ma nauigation. Les chansons de Polypheme, encore qu'elles soient melodieuses, ne m'agrément plus: ie me suis bannie du riuage de la mer où il chantoit.

Elle profera ces paroles, & passa promptement. Cependant le deluge s'accroissoit de iour en iour, toutes les villes & tous les peuples estoient submergez. on ne voyoit plus les cymes des montagnes d'Osso & de Pelion, & toutes les mers estoient iointes ensemble: Le Soleil dardoit ses rayons, mais leur chaleur estoit refroidie par les vapeurs qui

s'esleuoient des eaux, & qui rendoient l'air plus froid. En fin la mer s'esleua si haut, qu'elle osta la lumiere de la Lune, & rendit par son escume la voye de laict plus blafarde, & moins esclatante: le Nil se desbordant par ses sept bouches rencontra le fleuve Alphee, malheureux en amour, qui vouloit s'escouler pour baiser sa Nymphé. Il trouua Pyramus. Que feray-je, ô Nil, (ce dit-il) mon Arethuse est cachée? Et vous Pyrame, à qui avez-vous laissé vostre chere Thyfbé? O heureux Euphrates, de ce que tu n'as pas senty les aiguillons de l'Amour, tu n'as point de crainte ny de jalousie: peut-estre que Iupiter jouit maintenant des embrassements de la belle Arethuse, & ie crains pour toy, que Pyrame n'ait marié ta Thyfbé aux flots de la mer. Les aduis d'Alphee (respōdirent-il) nous ont plus troublez, que la pluye & le deluge que Iupiter a enuoyee. Que les playes de l'Amour sont cuisantes! Suis-moy dont cōme vn Apollon, & ie chercheray Arethuse. Et toy Pyrame, suy ta Tifbé: mais tu diras que la terre est confuse avec l'eau, & qu'elle touche

le Ciel, & que l'escume ternit le lustre & l'esclat des Estoilles. Quant à moy, ie ne me soucie pas de toutes ces incommoditez: mais c'est vne merueille, Iupiter a esteint le feu qui embrasoit la terre par ses inondatiōs: & la flame d'Amour qui brusloit le pauvre Alphee, n'a peu s'esteindre. Et encore que ces changemēts m'importunent, & que ie frissonne faute de feu, neantmoins i'ay vn bon remede à ma douleur, qui est la consideration de la peine que le bel Adonis fait ressentir à sa Venus.

Il n'eut pas si tost acheué son discours, que Deucalion qui auoit la cognoissance de la nauigation & du deluge qui deuoit arriuer, parut en son vaisseau pour repeupler le monde. Neptune commença de frapper la terre de son trident, & toutes les eaux se retirerent à leur cētre. Le Soleil desseicha toute l'humidité. Les villes furent rebasties, & les Palais restablis: l'air se remplit d'oiseaux, & les montagnes d'arbres & de fleurs, & toute la nature se renouella.

Cupidon restaure la Nature qui auoit esté aneantie par le Deluge, & par l'embrasement de toute la terre. Le Siecle en la façon d'un vieillard, se plaint à Iupiter des incommoditez de la vie humaine. Iupiter promet aux hommes l'inuention de planter la vigne, pour la consolation des mortels. Cupidon rend ce Dieu amoureux de Semelè, dont Bacchus print naissance.

LIVRE SEPTIESME.



A Nature croissoit de plus en plus, & produisoit ses ouurages, precipitant ses generations pour reparer le monde. Les Elemēts agissoient sur la terre, pour l'engrossir de la semence vniuerselle. Archee le feu central euaporoit en toutes les matrices sa substance aërienne, & nourrissoit tous les Vegetaux. L'Amour

faisoit conioindre tous les amoureux pour la propagation, & Cupidon les bleffoit de ses fleches si asprement que la multiplication leur estoit plus agreable que leur conseruation. Les hommes traualloient aux artifices, aux bastimēs: mais ils estoient en cela miserables que leurs labeurs se renouelloient tous les iours, comme s'ils eussent esté infatigables, sans qu'ils peussent se donner vne heure de bon temps & de recreation. Car Iupiter n'auoit pas encore fait naistre Bacchus de sa cuisse, & par consequent on n'auoit point l'vsage du vin qui est la trefue des douleurs, & le pere d'un doux repos. Les malheureuses heures, filles de l'annee s'escouloient sans resiouyssance aux incommoditez de la vieillesse. Les danfes & les banquets estoient iadis importuns par le default de ceste liqueur, voire mesme sās grace, & les baladins ne pouuoient recreer la compagnie, que de gestes ridicules & d'actions froides & ineptes.

Le Siecle sous la forme d'un vieillard se presenta à Iupiter, le genoüil bas & luy fit cette humble requeste pour le bien des Mortels.

Grand Iupiter ayez compassion de la misere du monde. Vous voyez que la terre à receu de grandes incommoditez. La mort à presque enseuely tous les hommes, & ne cesse point de perdre tout depuis que vous auez enuoyé les inondations. Ces eauës ont esté si grandes qu'elles ont esté iusques à la Lune, que maintenant si leur vie est si courte, au moins qu'elle soit plus douce & plus tranquille. Quant à moy si ceste faueur ne leurs est octroyee, ie ne veux plus gouuerner les temps ny le monde, qu'un Dieu meilleur & plus puissant le fasse, ie me descharge de ceste peine. Qu'un autre regisse le cours de mes ans & de mes siecles. I'ay trop trauaillé à la souffrance des homes, & ma vieillesse n'est plus capable d'endurer vn tel effort. Leur fatigue continuelle les rend vieux en leur jeunesse. Elle fait de leur Printemps vne Automne qui decline aux rigueurs de l'Hyuer. Je ne trouue point de remede à leur mal que la mort qui esteint tous les ressentimens & qui donne vn oubly eternal. Je sçay que c'est vn grand contentement que de posseder la beauté d'une Nymphe a

titre de mariage, & d'en celebrer les nopces: pource que ceste cōmune resjouissance plaist, & ces dāces & ces ballets y peuuent inuiter: mais quel plaisir? La musique & les delices ne guarissent pas la jalousie ou l'impuissance. Et il arrive souuentefois qu'une affection estrangere en desrobe les fruiets. Pandore ne deuoit point ouurir la boëste pour nous rēdre plus malheureux. Promethee n'a rien apporté de bon du Ciel, il eut esté plus sage, si au lieu du feu il eust desrobé le Nectar pour assoupir le ressentiment de leur mal. Aduisez donc à les soulager & d'exaucer mes prieres, si ce n'est que vous vous plaisiez a receuoir leurs sacrifices sans leur estre propice.

C'est ce que dit le bon Vieillard. Cependant Iupiter tout pensif meditoit sur ce subiet, & monstroit à sa contenance que les profondes pensees l'occupoient. Or il luy respondit exposant les Oracles de sa volonté en ceste sorte.

Pere des Siecles & des Ans ne vous faschez point, personne ne meurt avant son temps, quand la Lune est venuë en son plein elle decroist tousiours, n'enue point le Nectar de Dieux: Je donne-

ray le vin aux hommes pour remede à leurs mal-heurs, qui est semblable à l'ambrosie. Je sçay que le monde ne respire que la naissance du fils que ie produiray de ma cuisse. Cerés les a desia gratifiés de ses fruits, & la terre commence de porter de bon fourment. Mon fils fera croistre la vigne & le raisin, & enseignera le moyen de le pressurer en la saison. Les Bassarides esprises de la fureur qu'esmeut ceste liqueur criront de joye *Euié* dans les delices de leurs banquets. Et apres qu'il aura reduit les Indiens sous le joug de son obeissance & combattu les Geans, il prendra place au Ciel. Et pour marque de sa grandeur, il aura vne couronne faite de lierre, & s'attribura autant de pouuoir que Mercure, que Mars & qu'Apollon.

Iupiter n'eut pas si tost acheué que les heures se resiouirent de ces promesses. Le Temps se retira en la maison d'Harmonie, & Iupiter chez Iunon. Cupidon le pere du Cahos auoit en son carquois douzes sagettes qui estoient inscrites des amours de Iupiter, avec les noms de celles qu'il deuoit aimer. La premiere s'adrescoit a Io, la secõde Europe, la troi-

siesme à Proserpine , la quatriesme à Danaé , la cinquiesme a Semele , le sixiesme à Ægyne , le septiesme à Antiope , la huietiesme à Lœda , la neufiesme à Dia , la dixiesme à Alcmene , la vnziesme à Laodamie , la douziesme à Olympie. Il tira trois fois la flesche de ceste Deesse , & se trompa au nombre , mais apres les auoir maniées les vnes apres les autres , il print la cinquiesme pour en blesser Iupiter. Il la mit en son arc , & a la pointe il y attacha vn petit bouquet de lierre , afin que l'on peut faire vne couronne a Bacchus , & qu'en recompense il fit venir la saison du printemps. Apres que Cupidon se fust employé au seruice des amours : Iupiter en fut atteint. Et comme Semele reposoit de Nuit , elle eut vn songe prodigieux & estrange. Elle croyoit veoir en ces resueries vne belle plante dans vn jardin , chargee d'vn fruit qui n'estoit pas meur , & que l'abondance de la rosee l'auoit noyee , & qu'il estoit arriué vne flamme du Ciel qui l'auoit bruslee sans faire tort au fruit. Qu'vn oyseau passager l'auoit porté a Iupiter pour le conduire à perfection , & que

Son pere l'auoit receu, & mesme cou-
fu sur la cuisse. Semele estonnee de ce
songe se leue & sort de son liēt pour le
raconter à son pere.

Cadmus consulta Tyrresias pour en
auoir l'explication. Apres auoir receu
son aduis, il commanda a sa fille d'aller
au Temple de Minerue pour y sacrifier a
Iupiter vn Taureau, & vn Bouc particu-
lierement, pource qu'il est ennemy de
la vigne. Elle fut au lieu pour faire ce
sacrifice, & tua ces animaux, le sang
luy gasta tous ses habits, tellement
qu'elle fut contrainte de s'en aller au
fleuve d'Asope voisin de ceste contree
pour les lauer. Elle aduisa dans les prez
vn lieu profond où elle iugea qu'elle y
auroit de la commodité, ce qu'elle ne
pouuoit faire sans le passer. Là elle eut
de la crainte, & la peur qu'elle auoit
eu aux songes fut changee en celle du
passage. Neantmoins elle executa son
dessein avec le secours d'une Diuinité,
& des heures immortelles. Vous l'eus-
siez veuë nager la teste esleuee en la
superficie, elle battoit l'eauë de ses
pieds avec tant de dexterité que

l'on l'eust admiré. Ses cheueux flottoient aussi, & quelquesfois le vent les vouloit esleuer pour s'en seruir de iouet : mais l'humidité qui les auoit appesanty resistoit à l'effort. Iupiter n'estoit pas loin de là, il la regardoit attentiuement, estendu de son long sur le pré. Cupidon qui auoit caché son arc dans les fleurs y estoit, & ayant prins son temps, & miré le but, luy descocha dans le cœur vne sagette amoureuse, & à l'instant ce poison l'enforcela. Il fut tellement passionné qu'il ne respiroit que ceste Deesse. Il craignoit qu'elle n'apperceust Europe sur le riuage, & que la ialousie luy en rendist l'abord difficile: Car il auoit l'image de sa beauté empreinte dans l'Ame. Comme Iupiter veid que ceste Deesse estoit proche du riuage : il se metamorphosa en Aigle, & passa la riuere a traits d'aisles. Il s'approcha du subiect qui le possedoit: car son dessein estoit de la voir de prest: estimant que les eslongnemens n'estoient que des ombres de cognoissance, & vouloit cōsiderer à loisir ce corps blanc comme neige, poly comme vne glace de cristal, son ventre arondy comme vne boule d'yuoire, &
mal

maljoinct par en bas, & son œil qui void tout le monde, ne pense pas estre capable de la veoir seule. Le pré où elle deuoit se reposer reluisoit de son esclat. Vne Naiade à cet object comme rauie d'admiration, en s'escriant dit.

N'est-ce point que Saturne a couppé les parties genitales de son pere avec sa faux, & qu'une nouvelle Venus se soit engendree de l'escume de la mer. N'est-ce point que les flots des riuieres ayent produit ceste Nymphé, & que la mer n'ayt sceu auoir cet aduantage? C'est peut-estre vne des neuf Muses, qui a quitté Helicon & la fontaine de Pegase pour venir en ce lieu. Je voy vne Deesse en ce fleuve qui n'est pas d'une beauté commune: mais ie croy que c'est la Lune qui se laue en ceste eauë, pour se preparer à la couche d'Endymion, & semble qu'elle ayt les yeux tournez vers la montagne de Latmos. Si Diane prend le baing pour ce subject, il n'est pas necessaire de se lauer dans l'Asope, apres l'Ocean. Si elle desire estre aussi belle, & aussi blanche que la Lune qui luit au Ciel, cet aduantage luy seroit inutile, car elle n'a point la vanité d'attirer les

Dieux par ses charmes, mais quelle qu'elle soit i'y recognois vn merite plus qu'humain. Je vois esclatter dans ses yeux vn rayon vif de quelque Diuinite: ce pourroit bien estre Minerue qui se baigne encore apres auoir puny le pauvre Tiresias de son indiscretion. Ceste Nymphe est agreable & proportionnee en tout son corps, elle a la facon & la grace d'une Deesse. Je ne scaurois me persuader qu'elle soit autre. Si ie suis trompee en ma creance, la Nymphe mortelle qui l'a engendree, estoit a la verite digne de la couche de Iupiter.

La Naiade fit ce discours estant presque toute couuerte d'eauë. Cependant Iupiter beuvoit a long traits, l'amour par les yeux: Tantost il consideroit le mouuement de ses mains, tantost ses regards luy sembloient estre vn eschantillon de ses esclairs: Tantost il prenoit plaisir a veoir ses cheueux que le vêt s'efforçoit de partroubler, mais il s'arrestoit particulierement a son sein qui alloit a la cadence des sospirs qui venoient de son travail: comme le flux, & le reflux de la Mer. Cupidon y auoit establi son sejour & son fort, & de là il descochoit a couuert ses fleches amoureu-

ses. Iupiter parcouroit toutes les beautez de son corps, en passant les lasciuues particularitez d'un œil pudique. Son esprit estoit tellement possédé qu'il nageoit avec sa Nymphé, comme s'il eust esté banny de son corps. Cupidon luy donna vne forte attainte, & brussa le cœur à celuy qui menasse tout le monde de son foudre, & si la pluye & l'Ocean mesme ne furent pas capable de l'esteindre, c'est merueille qu'un petit feu ayt englouty un grand, & qu'un enfant ayt vaincu un Dieu. Ses desirs s'accroissoiēt tousiours. Il admiroit cet object, (car l'amour à tousiours l'admiratiō pour compagne,) auoit de l'impatience, & regardoit si la Lune commençoit à paroistre, car il esperoit que la Nuit luy donneroit l'agreable iouyssance de Semele, & se faschoit contre le Soleil, & luy reprochant le retardement de sa course, il dit ces mots à la Nuit.

Dittes-moy ô Nuit quand la lumiere du iour enuieuse de ma fortune s'obscurcira? Fais reluire ton flambeau en la faueur de mes amours. Je pense que le Soleil est ialoux de mon contentement. Dis-moy franchement ô Phœ;

bus n'ayme-tu pas Semele : ne hais point son amoureux ? Tu me porte ombreen mon dessein, encore que tu sçaches fort bien le cruel effort de l'amour ? Pourquoi touche-tu tes cheuaux à la nonchalance. Je puis faire la Nui&t si ie veux. I'assembleray les nuees, & ie cacheray ta face, & les Estoilles brilleront en plain midy pour mon seruice. Ie feray que l'estoile du matin sera compagne de mō bien, la preferant a Vesper : & de son Orient i'en feray son Occident : mais si tu desire ton contentement & le mien. Iouis de ta Clymene toute la Nui&t, & moy de Semele ? Donne-moy ton chariot. Et toy pareillement ô Lune ? esclaire à l'ordinaire & chante avec la Planette de Venus, vn Epithalame honorant la couche de Iupiter qui n'attend que les tenebres.

Il profera ces paroles que l'amour luy auoit dictees. Comme la nui&t fut venuë : Iupiter descendit du Ciel pour la jouissance de Semele, & vint à Thebes avec tant de diligence, que la pensee ne pourroit pas aller plus vifte. Il entra en la maison, & se metamorphosa en plusieurs formes. Premièrement, il print

la figure d'un Bœuf, celle d'un Leopard, & puis il print la ressemblance d'un homme couronné de Pampre & de Lierre, le presage certain de la naissance de son fils. Il parut en la couche de ceste Nymphé un serpent qui luy lechoit la face, & delà il glissa dās son sein. Il n'y respandit point un venin mortel: mais une douceur de miel agreable. Iupiter fut longuement avec Semele, & ne pouuoit se rassasier de ses embrassements. Il trauailloit à engendrer Bacchus, & pressuroit comme l'on faict les raisins en la saison. Les douceurs de l'amour enyuroient ceste Nymphé, & le desir de veoir ce fils, qui fait distiler le Nectar en Automne, la pressoit. Iupiter apres auoir prins ses contentemens, se vestit de la nappe d'un Cerf de diuers pelage. La terre se mocquoit de ces habits, & les jardins entreplantez de vigne coururent à leur couche, & les fleurs des prez s'estonnerent de ce changement si prompt: Voulant en cét estat donner de bonnes esperances à Semele, il luy parla ainsi.

Ne vous estonnez point, ô Semele, ie suis Iupiter vostre mary. Vous pou-

uez vous vanter de posseder vn Dieu. Ne vous abusez point à la recherche des embrassemens humains. L'Amour de Danaé n'est point comparable avec la vostre. Vous avez autrefois par discretion caché les amours desnaturez de sa tante, Europe fut conduite en Crete se glorifiant de l'honneur que ie luy auois fait. Mais ie conduiray Semele au Ciel. Desirez-vous quelque chose qui soit plus que ce seiour? Mais quelqu'un pourra dire que Iupiter en a gratifié Minos, & Bacchus: aussi ce bien ne fut pas parfait: car apres le fils d'Autonoé fut deuoré par ses chiens. Et la miserable Penthee fils d'Agave fut tué par sa mere propre, comme elle eut perdu la raison. & le sens. Prenez donc courage & engendrez vn fils immortel, & ie vous appelleray immortelle, & qu'il soit la consolation du genre humain, & le support de la vieillesse.

Semele se glorifie des embrassemens de Jupiter. La Deesse de l'Envie irrite Junon & Minerue de jalousie ayans pris la ressemblance de Mars. Junon cherche la Deesse de Tromperie luy demande le secours de ses artifices. Elle luy donna sa ceinture. Elle se servit de ces ruses, & paroist au Palais de Semele sous la forme de sa Nourrice, & luy persuade qu'elle supplie Jupiter de venir en sa couche avec ses foudres & ses esclairs, ce qui luy fut octroyé à son grand preiudice: car elle fut reduitte en cendres, & le petit Bacchus fut conserué.

LIVRE HVITIÈSME.



Pres que Jupiter eut fait ce discours à Semele, il monta au Ciel, & la laissa en tres-grande perplexité, car elle auoit plus

d'enuie d'aller à Thebes qu'au Mont Olympe, & sa maison estoit plus desirée de Iupiter, que le Ciel. Les heures immortelles la consoloient. Peu de temps apres elle parut grosse, & en tesmoignage de resiouissance vne des Bassarides luy fit vne couronne de lierre, & luy mit sur la teste. Son ventre s'enflloit tout ainsi que les iouës d'un berger quand il entonne avec son flageolet, les chansons rustiques que la belle Echo fait redire aux rochers. Elle sortit de sa couche toute nuë, comme esprise d'une fureur Bachique, quand elle entendit le son de cet instrument. Elle court dans le creux de la forest sans souliers, avec vne promptitude esgaree. Si elle entendoit les cymbales, elle battoit la terre à certaine mesures & cadences par des contours sinueux, comme si elle en eut voulu imiter la musique. Elle ouït le mugissement d'un Bœuf, & à l'instant elle mugit de mesme. Elle chanta longtemps sous vne colline en l'honneur de Dieu Pan, & la Nymphe Echo luy respondant à reprises, inuitoit toutes les Driades à venir à la danse. Et quoy que Bacchus ne fust pas encore

nay, neantmoins il sautoit au dedans, pour se rendre compaignon de sa joye, & sembloit exprimer quelques voix sourdes, & jnarticulees, que la belle Echo repetoit, comme si elle eust esté cachée dessous le sein de Semele. Elle approchoit tous les iours de son terme. Les heures seruantes de Iupiter luy tenoient compagnie, mais l'enuie ayant prins la ressemblance de Mars, faschee de veoir l'honneur de Semele, & la grandeur de son fils engendré d'une Diuinité, trama des ruses, & des conseils frauduleux pour combattre leur bonne fortune, & parut deuant Minerue & Iunon, cōme Vn Mars bouillant de courage, & tout ensanglanté de carnage de la guerre. Elle auoit fait cet artifice avec du Vermeillon, & en auoit peint ses mains & ses habits, avec vne voix esleuee, comme si c'eust esté vn Capitaine qui eust fait vn commandement de retraite à cinq ou six compagnies, elle irrita ces deux Deesses par ses discours, & leur donna de la jalousie.

O Iunon puissante Deesse (luy dit-elle) vous pouuez bien chercher vn autre mary que Iupiter. Semele vous l'a rauy, elle

se promet de changer heureusement le
sejour de Thebes, où les nopces ont esté
faites, en celuy du Ciel, s'il n'y a quel-
que oposition à sa vanité. Il est mainte-
nant veaultré dans les embrassemens de
ceste Nymphé, qui en est deuenue gros-
se. Pensez-vous que ie n'aye pas du res-
sentiment de l'injure faite à ma mere?
Quoy? la vengeance de Iunon ne punira-
elle point son infidelité? Où s'ont mainte-
nant les aiguillons de vostre jalousie, &
de vostre cholere? Ce n'est plus Io qui
est caressée sur le riuage de la mer: Argus
avec ses cent yeux n'espie plus les nou-
uelles amours de Iupiter. Quel plaisir
peut-on auoir au Ciel avec ces detra-
ctions? Quant à moy i'ayme mieux le
quitter & habiter la terre, pour le moins
quand ie seray en Trace, ie ne verray point
les afflictions de ma mere, ny les adulteres
de son mary. Mais aussi qu'il ne vienne
pas en ce pais pour rechercher la Nym-
phe Bistonie, il cognoistroit, à son grãd
regret, de quel humeur est le Dieu Mars
quand il est en cholere. S'il y vient pour
me faire cet affront, ie le chasseray, & s'il
vouloit la corrompre par ses ruses, ie ne
l'empescherois pas: mais aussi ie l'attra-

perois en la couche, & ie vengerois sur luy mon deshonneur. Il a tant rodé par toute la terre, & tant abusé de femmes, que le Ciel est tout remply de putains. Je luy dis adieu, ce n'est plus la demeure des Dieux, mais des hommes: Toutes ces Apotheoses me déplaisent. Voila Calisto, l'Ourse, les Pleiades, & tāt d'autres, comme Electre. Iem'estonne comment vous pouuez endurer ce regimēt de garces? Vous-vous estes vengée d'Apollon fils de Latone, & vous conseruez Bacchus. Iupiter produira de sa cuisse vn fils, & toy, ô Minerue, tu perdras l'honneur que tu as d'auoir esté engendree de son cerueau, & de n'auoir point de mere. Mais ie crains plustost que l'on dise qu'il a fait la guerre à Mars sans raison, & qu'il fauorise Bacchus sans sujet. Pour moy ie veux abandonner le Ciel à ses bastards: Que le Septentrion reçoie son Roy vagabond & banny du grand Olympe, auāt que ie voye icy Ganimede maistre du gobelet en la Cour de Iupiter, auant que Semele & Bacchus soient citoyens du Ciel, & qu'Ariadné y habite. Je demeureray en terre de peur que ie voye Persee, Andromede & Meduse se presentent à mes yeux.

Elle tint ce discours, & troubla l'esprit de Minerue. Cependant Iunon auoit de grandes inquietudes : La jalousie luy donnoit diuers conseils. Elle se resolut de chercher la Deesse de Tromperie. Elle abandonne le Ciel, & passe de lieu à autre, aussi promptement que si c'estoit vn vent. Comme elle fut arriuee en Crete, sur le rocher Corybante, ceste Deesse se presenta à elle avec sa ceinture, qui recelle toutes les ruses que l'on peut s'imaginer. La fraude, l'artifice, & la perfidie, luy faisoient compagnie : & le parjure sous l'habit & la forme des Vents. Iunon qui meditoit la vengeance, apres plusieurs pensees sur ce sujet, luy dit.

O Deesse pleine de finesse & de subtilitez, je vous saluë : ie sçay que Mercure ne l'entend pas mieux que vous : donnez-moy vostre ceinture, dont Rhea se seruit pour trôper son mary. Ie ne veux point donner à Iupiter vne image de pierre : Ie ne veux point le tromper avec vn caillou. Vne Nymphe qui le possede à mon desauantage, peut-estre sera cause que Mars abandonnera le Ciel. Que me sert d'estre immortel.

le, puisque les femmes des hōmes le captiuent. Luy que Latone ne peut assujettir. Ce n'est point l'amour de Danaë, qui le retient. Il neglige maintenant de se transformer en pluye d'or. Elle a receu pour gage de mon affection l'inconstance de la mer & de ses flots. Il ne cherche point Europe sous la forme d'un Taureau: & ne l'a pas veüe depuis ceste Metamorphose. Il ne poursuit point Ino; ny Latone qui fut si mal-heureuse de ne treüuer point de lieu asseuré, & ferme pour accoucher & se deliurer de ses enfans, tant il luy fut ingrat & peu courtois: mais c'est vne chetive Nymphe qui l'a charmé, & qui luy defend la iouissance de Iunon. Je crains que la violence de l'amour ne luy persuade de me chasser du ciel, & qu'il n'en face Semele la Reyne. Si vous le fauorisez plustost que moy, & que vous me refusiez ce que ie vous demanderay. Je me resouds d'aller aux confins de l'Ocean pour viure avec Titye. De là ie m'en iray en la maison d'Harmonie, & me logeray aupres de son Serpent: mais obligez la femme de Iupiter: Donnez-moy vostre ceinture affin que ie retienne Mars

qui veut s'absenter de ce sejour.

La Deesse de tromperie luy respondit.
O Puissante Deesse Mere de Mars, &
femme de Iupiter, ie vous donneray ce
que vous demandez, tout ce que ie pos-
sede est à vostre seruice : ie croy que
vous commandez apres luy à tous les
Dieux, receuez ce present de ma main.
Assurez-vous qu'en le portant sur vous
Mars sera contraint de vous suiure, & de
s'arrester au Mont Olympe, & si vous
desirez y attirer Iupiter, la ceinture au-
ra la vertu de l'y contraindre avec
la violence de ses charmes, que luy-mes-
me m'a reproché en la personne de Ve-
nus.

Ceste Deesse n'eut pas si tost acheuë
qu'elle quitte le pays de Crete, cepen-
dant Iunon esmeue de ialousie, vint en
la maison de Semele : elle print la res-
semblance d'une vieille Nourrice qu'A-
genor auoit marié, qui en recognoissan-
ce de ce bien-faict nourrit Cadmus
& Europe. Iunon arriue au Palais fas-
chee contre Semele, Venus, & Bac-
chus qui n'estoit pas encore nay. Pithia-
nasse luy donna vn Siege fait d'un tapis
de Tyr. Elle se tourne d'un autre costé,

de peur de recognoistre la couche de Iupiter. Elle veid Semele grosse, qui n'estoit pas encore à terme. Pendant qu'elle estoit assise, elle se courboit pour se desguiser. comme si elle eust esté cassée de vieillesse. Elle iettoit les yeux en terre, & respandoit des larmes de fraude & de tromperie, & luy dict d'une façon douce.

Dittes-moy, belle Nymphé, qui est la cause du changement de vostre teint? où est vostre beauté? qui a faict pâlir la rose de vos jouës, qui l'a changée en la couleur triste d'un passe-velours mourant? Pourquoy vieillissez-vous dans ce soin, sans vous ressentir de ces incommoditez? N'est-ce point que vous estes faschée de ce que l'on dict à la ville à vostre deshonneur? Il ne faut pas s'y arrester, les femmes sont sujettes à la medisance, & à enrichir le conte. Mais dittes-moy en secret: qui vous a deshonorée? quel Dieu a cueilly la fleur de vostre virginité? Si Mars s'est donné cet aduantage au mespris de Venus, qu'il vienne en vostre couche, & qu'il apporte sa pique pour vous faire hommage, & pour

rendre les tributs à vostre merite. Si c'est Mercure qui vous ayt serui de son Caducee en renonçant aux faueurs de Suede, qu'il vous offre ses talonnières d'or, en recognoissance de vostre courtoisie. Si c'est Apollon qui soit descendu du Ciel, oubliant sa Daphné, qu'il vienne par l'air en vn chariot tiré par des Cygnes, & qu'il vous donne son luth pour estreindre. Cadmus le pourra bien recognoistre, il en a entendu le son aux nopces d'Harmonie. Si Neptune vous a visitée sur l'effort de sa passion, vous preferant à sa Menalippe, qu'il vous donne son Trident, qu'il a autrefois octroyé à Dirce, à Amymone, & à Leone, d'où vient que les Nymphes Leoniennes en ont prins leur denomination. Mais ce qui me fait dire que vous n'estes pas l'espouse de Neptune, ie n'en recognoist point de marques, ny de vestiges. Quand il jouït de la belle Tyro, il prist la forme d'un fleuve. Si Iupiter est vostre mary, comme vous dites, qu'il vienne en vostre couche avec ses foudres & avec ses esclairs, afin que vous-vous puissiez vanter de le voir en son esclat. Je croy que Iunon, encore qu'elle

qu'elle soit grandement jalouse, ne vous y nuira point: Mars vostre ayeul mater-
nel ne le permettroit pas. Autrement
l'on dira que la belle Europe a esté plus
aymée de Iupiter que Semele, entant
qu'il a prins la figure d'un bœuf pour
son amour, & qu'il l'a conduite parmi
les orages de la mer sans peril, n'ayant
que son affection pour vaisseau. N'est-
ce pas vne grande merueille de voir vne
Nymphé qui regente vn Dieu gouver-
neur de tout le monde? O que j'estime
Danaé plus heureuse que Semele: car
Iupiter s'est conuerty en pluye d'or
pour jouir d'elle, & si ellen'auoit point
desiré de luy ceste metamorphose: car
Danaé le posseda tout entier, pour ga-
ge de son amour. Mais ne dites rien de
cecy à personne, de peur que vostre pere
Cadmus n'en sçache l'histoire.

Ellen'eut pas si tost acheué, qu'elle la
laissa en confusion, & cependant elle
minutta les moyens de se venger de Ju-
piter. Pour cet effect elle vint au
Ciel, & apperceuant le trisulque,
qui estoit à rien faire, elle luy parla,
comme s'il eust eu de la raison, en
ces termes.

Estes-vous inutile? Quoy! Iupiter vous a-t'il delaisé? Typhon ne vous a pas ray: vous a-t'il negligé? Au moins Iunon vous consolera: Elle a resenty vn pareil mespris, & ce refus vous est commun. La terre n'est plus arrosée de pluye. Les fruiets brulent & seichent faute d'eau. Les Bergers qui souloient appeller Iupiter assembleur de nuées, luy ont osté ce nom. Voyez ses amours, & vengez les ressentimens de Iunon. Visitez la couche de Semele, & approchez vos plus ardentes flames.

Elle parloit ainsi au foudre, & Semele qui auoit conceu de la jalousie, desira de voir les esclairs & le Trisulque de Iupiter, s'imaginant qu'elle y recognoistroit les marques & l'image de la couche de Iunon. Elle le supplia en ces termes.

Iupiter, ie vous conjure par les amours de Danaé, & d'Europe, de m'octroyer vne courtoisie. I'ay crainte que l'on dise que Semelen'ayt jöüy de Iupiter qu'en songe, n'en retenant point de vestiges. Et qu'en cela Acrise, le pere de Danaé, soit estimé plus heureux que Cadmus. Elle eust bien desiré cet aduantage, &

ie croy que vous ne luy eussiez pas des-
nié, si la mere de Persee ne l'eust preue-
nuë. Si vous m'eussiez enleuée comme
Europe, me portant sur vos espaulles, &
que mon frere Polydore m'eust cher-
chee par toute la terre habitable, com-
me Cadmus: Je pourrois me vanter de
l'excez de vostre amour: mais toutes ces
metamorphoses ne m'agréent point. Je
laisse à l'une son Taureau, & à l'autre sa
pluye d'or. Je croy que l'unon ne leur
porte point d'enuie. Je ne desire point
ces faueurs, que les Nymphes mortel-
les ont receu de vous. Je demande que
vous honoriez ma couche des mar-
ques de vostre pouuoir: Que vous y fa-
ciez esclatter ce feu qui reluit dans
vos foudres, & que vous les mon-
striez comme des fideles tesmoigna-
ges de vostre amour, à l'enuieuse
Agaue, qui ne peut croire que i'aye
assez de merite pour vous captiuer.
Afin aussi que ma sœur Autonoe ap-
prehende les approches d'un tel es-
clat. Que i'embrasse ceste flame, & que
ie manie ce feu. Il ne peut estre plus ve-
hemēt que celuy qui preuiant le maria-
ge. Quoy? ne suis-je pas digne ny capable

d'en souffrir l'effort & l'atteinte. Apres auoir resisté à la force de Mars, & aux charmes de Venus, faut-il que la miserable Semele voye son feu s'estindre, & que Iunon en iouïsse d'un immortal? O Jupiter, me refuserez-vous ceste faueur? quand vous voulez entrer en la couche de Iunon, vous y allez en vostre grandeur, avec les marques de vostre diuinité: Et lors que vous visitez Semele, vous prenez la forme d'un Serpent, ou d'un Taureau par mespris.

Comme elle acheuoit la parole, Jupiter se metamorphosa en Taureau: Elle entendit son mugissement, & luy dit en continuant ses plaintes.

Vous venez me visiter en vne façon qui ne me plaist point, Iunon se peut contéter de vous: mais quant à moy, i'ay des plaintes à vous faire. Mon pere ayant entendu nostre mariage clandestin, ne me veut plus voir: Il a ceste alliance si à contre-cœur, qu'il ne sort point de la maison. Il craint les rencontres des citoyens, & les reproches qu'ils luy pourroient faire de nos amours, pratiquées à leur desceu, & sans leur consentement. I'en'ay point receu de vous autre

Bien que le deshonneur de vous auoir octroyé la dernière faueur, qu'un Amant peut esperer. Je ne puis plus viure en ceste ignominie: Le caquet des voisins & de mes compaignes m'importune, & surtout i'apprehende la medifance de nostre Nourrice. Si i'en'ay pas assez de merite pour impetrer cela de vous, faites-le pour l'amour de mon pere, & vous ressouuenez des seruices qu'il vous a rendus à la deffaitte de Typhon, & du Trifuleque qu'il vous mit entre les mains. Rendez-luy ce qu'il vous a donné, il desire d'auoir des gaiges certains de nostre alliance: Et encore que i'aye conuersé avec vous, neantmoins ie ne vous ay point veu en vostre naturel. Je n'ay point veu l'esclat de vos yeux, les rayons de vostre face, le brillant de vostre frôt, & le lustre de vostre barbe. Il ne m'est rien apparu qu'un Lyon, ou un Leopard. Je n'ay point encore approché de la cognoissance de vostre Diuinité. Comment puis-je me promettre que i'enfanteray un Dieu vous voyant mortel? Je croyois que vous deussiez paroistre en vostre nature simple, & sans desguisement, à l'ordinaire des au-

tres Dieux. Apollon jouit autrefois de Clymene, accompagné de la clarté de son Soleil.

Elle finit ainsi sa requeste, desirant ce qu'il luy estoit prejudiciable, & d'estre semblable à Junon, comme si elle eust esté assez forte pour recevoir la violence des foudres. Jupiter eut compassion de sa foiblesse & de sa vanité, & accusa les Parques de ce qu'elles luy auoient suggeré vn si mauuais dessein. Il recogneut aussi-tost les artifices de Junon : Et de peur que son fils ne fust en hazard, il commanda à Mercure de se tenir prest pour le sauuer du feu : & fit ceste response à Semele.

Belle Nymphe, n'est-ce pas la jalousie de Junon qui t'a trompée par ses finesses? Pense-tu (femme que tu es & de sexe & d'esprit) que les foudres n'agissent point, & qu'ils soient sans effect? Attends encore, & ne t' imagine point ces pernicious desseins, encore en l'estat où tu es. Attends que tu ayes enfanté mon fils, & ne demande point deuant à veoir les estincelles de mon feu. Je n'ay point jouy de Danaé sous la faueur de ceste esperance, ce ne sont point les fou-

dres qui m'ont donné les bonnes graces d'Europe, Danaë n'a point desiré de les veoir, & toy, mortelle, tu en fais la demande, que la Deesse Latone n'a pas osé desirer.

Iupiter luy ayant monstré l'importance de sa requeste, ne voulut point luy refuser, & accomplissant son vœu contre sa volonté, il darda ses foudres. Le feu esclattoit en sa couche, & la splendeur paroissoit par toute la ville de Thebes. Semele voyant les aduantages de ceste faueur, dit d'une voix superbe.

Je me mocque des instrumens de Musique, des flustes, des cymbales, & des trompettes, les foudres de Jupiter me seruent de passe-temps, pour faire ressonner nos amours: Le flambeau de mon liect n'est point autre qu'esclairs. Je mesprise les feux extinguiables. Je suis la femme de Iupiter, & Agave du miserable Echion. Autonoe a espousé Aristee, Ino Nephele, & Semele a prins le nom de Iunon. Je ne suis point femme d'Athamanthe, & n'ay point engendré vn mal-heureux Acteon, qui fut mangé par ses chiens.

Elle profera ces paroles de ioye & de vanité, & voulut toucher ce feu fatal: mais il la brusla, & fit de sa couche nuptiale, vn tombeau & vn buscher. La flamme la reduisit en cendres, & l'accoucha du petit Bacchus. Et comme il estoit imparfait, le vent bruslant du foudre l'eust faict mourir, n'eust esté le soin de Mercure qui le sauua.

Iupiter adoucit la colere de Iunon, & logea Semele dans le Ciel, pour fauoriser la lignee d'Harmonie, & de son corps mortel, il en fit vn immortel: Donnant à Autonoé & Agaue, la compagnie de Diane & de Minerue: Et à Semele ceste faueur que de viure au Ciel avec Iupiter, Mercure, Mars, & Venus.

Jupiter apres l'accident arriué à Semele, fit coudre le petit Bacchus en sa cuisse, & l'enfanta au bout de neuf mois. Mercure le porta aux filles de Lamus pour le nourrir. Iunon qui auoit de la jalousie les rendit insensées. Mercure fut contraint de retirer Bacchus, & de le donner en garde à Ino. Iunon trauersâ ceste Nymphé de fureur.

LIVRE NEVFIESME.

JUPITER, apres l'accident arriué à Semele, fit coudre en sa cuisse le petit Bacchus, qui n'estoit pas encore venu en sa perfection. Comme le pere fut accouché contre les loix du sexe, les heures immortelles luy apporterent vne couronne de lierre, & mirent sur sa teste vne figure de deux serpens enlacez l'un dans l'autre. Mercure descendit en terre auant cet accouche-

ment pour le contre-garder du peril où la vanité de sa mere l'auoit mis , & luy donna le nom de *Dionisius* , pource que Iupiter fut boiteux le portât en sa cuisse, & que les Syracusains appellent vn boiteux en leur langue *Nisos*. Ils le receurent en apres avec beaucoup d'honneur, pour la merueille de sa naissance. Mercure le porta aux filles de Lamus pour les nourrir. Ces Nymphes y prirent beaucoup de soin: Ce petit enfant regardoit toujours le Ciel, comme s'il eut sceu le lieu de son origine, & rioit aux Astres si doucemēt que l'on eust dit qu'il y apperceuoit sa mere. Iunon qui n'auoit point encore perdu sa jalousie, troubla l'esprit de ces pauvres filles, & leur enuoya vne furieuse manie qui les tourmenta. Elles battoient leurs seruantes, & tuoient leurs hostes courans parmy les ruës en dansant. Leur visage qui estoit tout esgaré faisoit paroistre leur grande fureur. Et leur contenance tesmoignoit leur folie & leur rage. Et comme elles estoient sans raison elles eussent sans doute mis le petit Bacchus en mille pieces, si ce n'eust esté que la prudence de Mercure y aduisa en leur ostât des mains. Il le porta chez Ino qui estoit nouuelle-

ment accouchee. Ceste femme luy ten-
doit la māmelle : & cēt enfant la prenoit
en la flattant des yeux. Belle Ino (luy dit
alors Mercure) receuez vostre Neveu le
fils de Semele que le foudre n’a sceu de-
struire , quoy qu’il ait reduit sa mere en
cendre. Tenez-le si bien caché que le So-
leil & la Lune ne le voyent point , & que
Iunō ne puisse descouvrir où il est. Iupi-
ter recompensera vostre soin. Vous pos-
sederez tout le pays qui entoure le Nil.
N’estes vous pas la plus heureuse des fil-
les de Cadmus ? Semele a esté foudroyee,
Autonoé suiura son mal-heureux Acteō,
& le Mont Cytheron leur servira à tous
deux de tombeau. Agaue affollée du re-
gret d’auoir tué son fils Penthee mesme
enuiera leur mort, tant elle est misera-
ble. Mais vous serez entre les autres la
bien-heureuse. Vous aurez la mer pour
sejour. On appellera Ino la belle Gala-
the où Thetis , & le Mont Cytheron ne
sera pas si fortuné que de vous recevoir.
Vous serez vne des Nereides , & au lieu
de vostre pere Cadmus, vous aurez Ne-
ree de qui vous pouuez plus esperer.
Vous aurez Leucothoe qui gouvernera
la mer & les Vents succedāt à Æole : & les
marchāds l’inuoquerōt pour impetrer le

calme & la bonnasse, & luy sacrifieront aussi bien, & Neptune qui prendra Palemon pour conduire de son chariot.

Mercuré mit fin à son discours, & à l'instant il s'enuola au Ciel. Ino obeit à ses commandemens & print soin de Bacchus. Elle luy donnoit la mammelle, & à son fils Palemon. La Nymphé Mystic qui auoit seruy Harmonie & Cadmus, le caressa particulièrement, & l'enferma dans vn lieu obscur & fort secret (comme Mercuré en auoit donné l'aduis.) Il parut vne Estoille qui esclaira dans les tenebres. La lumiere en chassa la nuict. Ino estoit toute la nuict apres son petit nourrisson, & quelquefois Melicerte venoit prendre la mammelle à l'enuy de Bacchus. Mystic secouroit sa maistresse en ceste nourriture: elle eut ce nom, non sans cause, car elle apprit tous les mysteres des Bacchanales & des Orgies, & en institua toutes les ceremonies. Ce fut elle qui enseigna à jouer des cymbales, & qui en ordonna les fredons & les accords, & qui fit la premiere les assemblées, & fit practiquer les dances aux flâbeaux, & qui apprit à crier *Euié*. Elle cueillit la premiere les fructs de lierre.

pour en faire des bouquets, & orna le Thyrsé de Bacchus de fueillards, & donna l'invention de faire la musique avec des poësles d'airin, & de se vestir de peaux pour se desguiser & de prendre à son costé vn fouët de viperes & de porter des serpens qui s'entre-mordoient. Iunon qui n'auoit point d'autre dessein que de perdre Bacchus, iura par les eauës du Styx qu'elle submergeroit la maison d'Ino. Et de faict elle eust accompli ses menaces, si Mercure ne l'eut desrobé & porté dans la forest des Cybeles. Iunon descendit du Ciel pour ce subject: mais Mercure la preuint, ayans prins la ressemblance du Soleil. La Deesse luy ceda le deuant, portant respect à ses rayons, & ne recogneut point la fausseté de ceste metamorphose. Cependant Mercure enleua Bacchus & le porta à Rhea la mere de Iupiter.

Puissante Deesse, receuez le fils de Iupiter. Cōseruez celuy, qui n'aura point d'autre sejour que le Ciel apres auoir subiugué les Indiens. La ialousie de Iunon n'a pas voulu permettre qu'Ino ayr rendu ce deuoir à son nepueu. Nourrissez vostre petit fils avec toutes les mi

gnardises & toutes les douceurs que la nature enseigne aux meres.

Après ces discours il monta au Ciel battant l'air de ces aislerons, & delaisa la forme du Soleil qu'il auoit prins. Les recommandations qu'il fit de Bacchus, outre l'amour que Rhea auoit pour ses enfans, luy en donnerent vn soin particulier. Elle le fit monter tout enfant qu'il estoit dans son chariot pour conduire ses Lyons. Les Corybantes luy presenterent vne couronne. Elles le des-ennuyoiēt avec le son des cymbales & d'autres instrumens propres à ses orgies, à quoy cet enfant se plaisoit fort. Il commença de se despaïser par ces exercices & desira d'affronter quelque beste sauuage dans les forests. Il estoit si dispos & si agile qu'il surpassoit les lievres à la course, menaçant desia les Cerfs. Il voulut estre habillé de leur nappe, comme des despouilles de sa chasse. Pour suiuant donc dans les montagnes vne Lyonne, il luy emporta ses petits, qu'il monstra à Rhea, les luy donnant pour les atteler à son chariot. Sa mere voyant cela se print à rire, & admira le courage & la generosité de son fils Elle vou-

Fut mesmes porter en ses habits les marques d'une telle proye. Comme Bacchus fut arriué en l'aage d'adolescence il se fit faire vn chariot, & ordonna quel'on y mit des petits Lionceaux pour le trainer. Ce n'est pas qu'il ne se pleust fort à mener celuy de sa mere. Au contraire il en affectoit la conduite. Quelquesfois il prenoit tres-grand plaisir à leur retirer la bride pour les dompter, & quelquesfois il la laschoit, comme s'il eust voulu leur donner la carriere. Il mettoit sa main dans leur gueulle aussi librement que s'ils eussent eu de la raison, & ces petits animaux luy lechoient les doigts. Bacchus croissoit d'esprit & de corps, en la maison de sa mere Rhea. Les Satyres & les Faunes faisoient paroistre tous les iours leurs grandes resiouissances par leurs danses & crians dans les Montagnes, Euié. Le Promontoire *Ægee* resonnoit de ce bruit & de leurs ballets. *Semele* qui estoit au Ciel estoit bien ayse de veoir l'accroissement que prenoit son fils, & le progrès de ses vertus dont elle estoit grandement resiouie: Et comme elle auoit de l'animosité contre *Iunon*, elle

luy dit en la picquant de ces parolès.

Iunon a bien esté trompee en ses vengeance. Le fils de Semele s'est mieux conserué qu'elle ne pensoit. Iupiter l'a produit, & luy a seruy de mere en ma place. Il l'a engendré & l'a enfanté tout ensemble, la necessité & le besoin ont changé le lieu naturel. Bacchus est plus noble que Mars & que Neptune, pour ce qu'ils n'ont pas eu vne si noble inassance. Latone a bien engendré Apollon: mais Iupiter ne l'a pas enfanté. Mercure est issu de Maïe: Mais il n'a pas eu cét aduantage de son pere? N'est-ce pas vne merueille de veoir Rhea qui gouuerne le monde, & qui est la mere de toutes choses, nourrir le petit Bacchus. Elle luy a donné la mammelle, & Iupiter la mise au Ciel pour la recognoistre? Est-ce Iupiter qui a enfanté Mars ton fils? Est-ce Rhea qui l'a esleué? Mais ta mere a engendré Iupiter & nourry Bacchus, & les a entretenu tous deux & le pere & le fils. Que Vulcan ne prenne aduantage sur le fils de Semele, d'autant qu'il n'a point eu de pere: car Iunon la produit imparfaict & boiteux: Semelen'est point semblable à Mars en aduventure, mon
fils

filz n'a point desrobé par ruses & par artifices le lait de Iunon, comme a fait Mercure. Il faut donc que toutes les Deesses me cedent en ces prerogatiues. J'ay eu seule vn mary qui a esté le Pere, & la mere tout ensemble. O Semele que tu es heureuse, Bacchus apres ses victoires & ses triomphes, viendra habiter le Ciel, & s'il n'aura pas besoin du lait de Iunon. Il succera vne mammelle plus plaine & plus douce.

Iunon ne peut supporter la vanité de ces paroles, sans en auoir du ressentimēt, & comme elle sceut qu'Ino auoit retiré Bacchus pour le nourir, elle s'irrita contre elle & la rendit folle. La pauvre Ino couroit par les forests, & par les montagnes nuds pieds; & cherchant le chemin qu'auoit tenu Bacchus, elle arriva en Delphe, & ne fut pas si tost entrée dedans la Grotte, qu'elle deschira miserablement ses robes, & n'exprima point sa volonté que par ces tristes signes. Sa rage s'augmenta en ce lieu, avec des mouuemens si furieux qu'Appollon en eut peur, elle prit vn serpent, & en entortilla ses cheueux, & ne peut supporter l'agitation de ce Dieu, ny en

recevoir les Oracles. Elle ne fit point de sacrifices ny de vœux. On ne voyoit qu'une miserable femme qui se tourmentoit: les chasseurs qui la voyoient de loin en auoient horreur, & se destournoient des sentiers pour en fuir la rencontre. Les Bergers conduisoient leurs troupeaux dans les vallées, & les laboureurs quittoient la charruë. La Sybille Pithie entendant ses voix horribles courut aux montagnes: mais elle fut contrainte de se retirer dans la grotte. Le Soleil qui voit tout eut compassion d'elle, & ayant pris la ressemblance d'un homme la guerit avec le Laurier luy enuoyant un gracieux sommeil qui la fit reposer. Elle demeura l'espace de quatre ans, passant le temps aux danses & aux exercices de Bacchus. Les Corycides estans curieuses de veoir ses Orgies l'y ayans rencontrée eurent soin d'elle, & cueillirent des herbes propres à chasser sa maladie. Cependant les seruanes d'Athamas la qui la cherchoient par tout estoient explorées courās par les mōtagnes, & portoiēt en leur visage des marques de regret qu'elles auoient de la Reyne. Entre autres la Nymphē Mystie auoit di-

uers ennuis, car ellen'estoit pas seulement faschee des accidens qui pouuoient estre arriuez à Ino, mais aussi de ce que Bacchus estoit esgaré avec elle. Athamas n'en regrettoit point l'absence, car il l'auoit du tout oubliee depuis si longtemps, ayant espousé la Nymphé Themisté: & apres qu'elle fut morte, il eut Hypseide en troisieme nopce; ayant oublié Ino apres tant de changemens. Il esleua son fils Melicerte & le nourrit faisant en sorte qu'il se passa de la mamelle de sa mere. Themisto engendra Schenee & Leucon, & par apres Ptee & Porphire. Elle leur fut si cruelle & si meschante qu'elle les tua, s'imaginans par sa folie qu'ils appartenoint à Ino.

Athamas deuient insensé de ce que sa femme Themisto tua ses enfans propres sur les impressions qu'elle eut qu'ils appartennoient à Ino. Ceste Nymphe retourne au bout de quatre ans, & trouua son mary Athamas hors d'esprit. Il tue son fils Learché pensant que ce fust un Cerf. Bacchus croist en force de corps & d'esprit. Il fait paroistre les effects de son courage & de ses inclinations, prend Ampele en affection, & passe le temps avec beaucoup de sortes d'exercices.

LIVRE DIXIESME.

Themisto tua donc ses enfans, sur les folles impressions qu'elle eut qu'ils estoët issus d'Ino, & Athamas scachant que sa femme auoit vsé d'une telle cruauté enuers eux, en perd l'esprit de regret. La rage luy oste le iuge-

ment. Il fouette vn troupeau de brebis, & pense que ce sont les seruantes: tant il à l'esprit troublé. Il en prend vne cōme la recognoissant pour Ino, & la bat pour se vāger d'elle apres luy auoir lié les pieds. Le bruit qu'il faisoit luy-mesme en ceste action, l'estonne & l'agite comme vn mouuement panicque, pensant entendre le siffle des Dragons, & en voir les obiects. Il tire dessus, mais ses fleches passent dans l'air, sans y rencontrer de but. Comme il apperçoit les furies avec leur attirail de viperes & de couleures, iettant vne escume qui resmoignoit l'effort de sa cruauté, il rouloit les yeux de telle façon quel'on eut dit qu'il menaçoit ceux qui le regardoient. Les veines de sa teste auoient vne grande agitation, & son visage changeoit à tous coups de couleur. Ses cheueux se herissoient quelquefois. La bouche & les levres luy trembloient. Sa langue exprimoit des voix inarticulees, & des mots sans signification. Il croit encore veoir Megere, & s'efforce de luy oster son fouet de viperes. Erynnis luy fait peur, & pour se garantir d'elle, il la veut tuer: & menassant Tisiphone, il void son ombre en vne mu-

raille. Il luy parle & l'entretient d'ex-
trauagances, & pensant veoir l'image de
Diane, il luy prend enuie d'aller à la
chasse.

La pauvre Ino apres vne absence de
quatre ans retourne en la maison d'A-
thamas. Elle fut grandement attristee
de le veoir hors de son esprit, & derencō-
trer Themisto qui tenoit sa place avec
des enfans qu'elle auoit eu de luy. Atha-
mas ne la reconnut point, car n'ayāt pour
lors que le dessein d'aller à la chasse,
pour cet effect il court dans les forests
où trouuant son fils, il le prend pour vn
Cerf & le tuë. Learché fuyoit la ra-
ge de son pauvre pere : mais il tira vn
traict qui le coucha par terre, & luy cou-
pa la teste qui luy estoit incogneue, &
qui ne le deuoit pas estre, courant dans
les brossailles en grand joye, comme
s'il eust abbattu vn Cerf, pour le mon-
trer à sa femme, personne n'osoit s'ap-
procher de luy. Il entra dans la cham-
bre & appelle son fils Learché qu'il auoit
tuë, & veit son fils Melicerte auprés de
luy. Il le prend & le met dans vn caisse
pleine d'eauë bouillante. Ce pauvre en-
fant s'escrioit au secours. Les seruantes

ne se presenterent point, mais Ino vint aussi viste que le vent, & le retira, d'où est venu qu'elle est appelé Leucothoe. Elle ne fut pas exempte de la rage de son mary Athamas qui la poursuiuit par les montagnes, & sans doute il l'eut tuée, si elle ne se fut point precipitée dans la mer, accusant le grand Iupiter d'ingratitude, & Mercure de mensonge, en ces termes.

Sont-ce les recompenses du soin que j'ay pris en la nourriture de Bacchus, que maintenant Iupiter me donne, en l'accident arriué à mon fils Melicerte qui est demy bruslé. Si vous desirez entierement me recognoistre, bruslez la mere, & le fils tout ensemble que j'ay nourry avec Bacchus. Voulez-vous delaisser mon fils en sa grande necessité. O mon fils qu'elle montagne te receura? Qu'elle grotte de Cytheron te cachera? Quel homme aura pitié de toy? Si ton pere qui y est le plus obligé n'en a de la compassion? Est-ce la mort violente d'une espee qui te perdra, où la mer? Encore vaut-il mieux estre abandonné aux flots de Neptune, qu'aux rigueurs de Mars. Je sçay fort bien qui est la.

cause du defastre qui est arriué à ta mere. Nephelle me fait sentir ses disgraces. Il desire que ie meure dans la mer comme la Nymphé Helle. I'ay entendu que Phrixas est encore en vie, & qu'il faict son sejour en la terre de Colehos: A la mienne volonté que mon fils Melicerte se fut embarqué pour faire le voyage de la Toison d'or, quittant sa patrie qui luy est si ingratte: ou que Neptune prenant pitié de sa fortune le retirast en son Palais. I'ay peur que mesme apres ta mort tu ne craigne encor la fureur de ton pere. Fuis donc sa rage, afin que tu ne voye point celuy qui a tué ses pauvres enfans, & qui vouloit encore perdre ta mere. Et toy Neree recois-moy en ton empire, & me fauorise apres Melicerte & Persee. Reçois-moy apres Danaé, Phrixus me delaiissa pource que Iupiter me rendit sterile: aussi pour m'en ressentir, i'ay enuoyé la sterilité aux terres. I'auois dessein de ruiner les enfans qu'Athamus auoit eu des autres femmes, & Iunon m'a punie, & a esté vne cruelle marastre envers Melicerte.

Elle n'eut pas si tost parlé qu'elle se

plongea dans l'eau, avec son fils. Neptune la receut, & luy donna le gouvernement de la bonnace de la mer. Jupiter ayant apperceu ceste metamorphose, la fit voir à Semele, qui dit en riant à sa sœur.

Belle Ino, vous avez le sejour de la Mer, mais Semele a celui du Ciel. Il faut que vous me cediez en ces prerogatiues que j'ay par dessus vous. J'ay vn mary immortel, qui me soulage de la peine d'enfanter: Mais vous avez espouse Athamas, qui destruit ses enfans propres. Vostre fils est citoyen de la Mer: Mais le mien ne peut rien moins esperer que d'estre du Ciel. Ne pensez point que ie vueille faire comparaison del vn à l'autre.

C'est ce que dit Semele à sa sœur. Cependant Bacchus se transporta en Lydie, où il passa le temps, ayant grandement les eaux. Il se baignoit dans le fleuve Moëonien, aux plus importunes chaleurs de l'Esté. Le Pactoler riche en ses sablons d'or, le gratifioit de ses metaux. Les Satyres y prenoient leurs esbats, & jouans en l'air ensemble, ils se plongeioient apres en cette riuiere, dont

l'un nageoit à plaisir sur le dos, & l'autre sur le ventre : l'un se laissoit tomber au profond, pour apporter à Bacchus des graines d'or : l'autre s'egayoit à prendre des poissons. Silene, à l'enuy de ces Satyres, se jettoit dans l'eau, où il faisoit mille capreolles, & mille tours, & se laissant aller iusques au fond, il ramassoit de belles pierres. Bacchus ne se donnoit pas moins de plaisir : Il nageoit à son aise, & applanissoit les flots. Le riuage se couuroit de roses & de lys, les fleurs croissoient à veuë d'œil, & les Heures immortelles luy en presentoient des bouquets. Après ce baing il deuint plus beau que iamais, ses cheveux deuinrent aussi blonds que ceux d'Apollon.

Il y auoit en Phrygie vn jeune garçon, de l'aage de Bacchus, appelé Ampele; dont la beauté estoit considerable. Premièrement il estoit sans barbe, en la fleurissante saison de son printemps, & sa face rayonnoit comme celle de Narcisse. Il auoit les yeux si doux, qu'on eust pensé voir ceux des Graces, ou de Venus : Ses cheveux crespelus & ondoyans flottoient sur ses espaulles, au gré des

vents, & descouuroient le milieu de la teste qui dardoit vn rayon, qui faisoit ombre, tout ainsi que la Lune, quand elle esclatte dās l'espais d'vn nuage. Il sortoit de sa bouche vne eloquence qui charmoit les esprits les plus rudes: Son alleure estoit majestueuse, les herbes & les fleurs croissoient sous ses pieds dans les prez, où il marchoit. Bacchus se plaisoit à conuerser avec luy, & en admiroit les perfections, honorant son merite. Il pensa qu'il y auoit quelque Diuinité cachee sous ceste forme mortelle, & sur ce doute, il luy demanda son origine, & son extraction.

Je vous supplie de grace, dittes-moy qui est vostre pere, & quelle Deesse immortelle vous a engendré? Laquelle est-ce des Graces qui vous a enfanté? N'est-ce point Apollon: ne me celez point ce qui est de vostre extraction? N'estes-vous point Cupidon sans fleches & sans carquois? Lequel est-ce des Dieux qui vous est parent? Ie ne veux pas dire que c'est Venus, de peur de nommer Vulcan, ou Mars son mary & son amy. Mais si vous estes Mercure descendu du Ciel, monstrez-moy vos ailerons & vos talonnières. N'estes vous point

Apollon sans luth & sans arc avec la chevelure esparse & flottante sur les espaulles, si Iupiter est mon pere cōme ie croy, & que vous foyez issu d'un homme ou d'un Satyre, soiez compagnon de mon Royaume: egal à un Dieu, ie n'auray point de honte de partager avec vous l'Empire. Vostre merite vous releue assez, mais i'ay tort de tirer vostre naissance d'une maison si basse. Je sçay fort bien d'où vous estes issu, encore que vous vous efforciez à me le celer. La Lune est vostre mere, & le Soleil est vostre pere, vous estes semblable à Narcisse, & les rayons qui sortent de vostre visage ont quelque rapport à ceux de la belle Diane.

Ampele qui s'estoit resioüi de ces loüanges, se miroit en sa beauté. Ce jeune garçon estoit si agreable à Bacchus qu'il ne pouuoit viure sans le voir, n'ayant eu rien de plus agreable que de l'ouyr chanter. Son absence luy estoit si sensible, qu'il ne prenoit aucun plaisir, mesme dans les delices des banquets, & dans les balets des Satyres: quand il sçauoit qu'il estoit à la chasse, s'il demeuroit trop long temps au fleuve de Pactole à se bai-

gner, en attendant l'heure de souper, ce retardement luy donnoit de l'impaticence, & quand il luy prenoit fantasie de jouer du flageollet, il luy sembloit qu'il entendoit Mygdon le fils d'Hyaine, qui défia Apollon à ce concert de Musique. Son entretien luy plaisoit tāt, qu'il estoit rauy quand il discouroit à table en vn festin solemnel, & aussi alors qu'il finissoit, la joye cessoit. S'il le voyoit à la danse prendre les mains d'vn Satyre d'vne façon courtoise, il en auoit de la jalousie, craignant qu'il ne contractast quelque amitié avec luy, ou qu'il print quelque habitude avec vn jeune homme qui le diuertist de son affection, par la ressemblance des mœurs & des inclinations, cōme la jeunesse est susceptible de toutes sortes d'impressions. S'il estoit avec luy à la chasse des Ours & des Lyons, il craignoit qu'il ne luy arriuaſt quelque accident: & regardoit en l'air si le Zephyre jaloux de son contentement ne faisoit point voler quelque pierre sur luy, comme il fit au pauvre Hyacinthe: Il apprehendoit mesme quel'Aigle de Iupiter ne le rauist, comme Ganymede, & craignoit que Neptune ne

l'enleuaſt pour ſa beauté, & qu'il ne luy fiſt changer de corps, luy racontant des fables faites à plaiſir. S'il auoit au viſage quelque tache accidentaire, il y prenoit plus de contentement qu'à tout le reſte, eſtant plus aiſe de voir ſes cheueux mal peignez que gaudronnez à la mignardife. Il paſſoit le jour entier avec luy, & n'auoit que ce regret de n'entendre point ſon Ampele de nuit. Ce jeune adoleſcent n'eſtoit pas ſeulement agreable à Bacchus, mais auſſi à tous ceux qui le regardoient. Vn Satyre ſeulement conſiderant ſes perfections, ne pouuant ſ'empêcher de teſmoigner par ſon diſcours, l'affection qu'il auoit pour luy, fut contraint de parler ainſi tout haut.

Suade qui concilie les volontez des hommes : Je ne demande que les faueurs & les bonnes graces d'Ampele. Ce n'eſt pas que ie vueille le poſſeder comme Bacchus. J'ay bien autrefois deſiré d'habiter le Ciel : mais non pas d'eſtre egal à vn Dieu, ny d'en auoir les aduantages, & les prerogatiues. Je n'ay point ſouhaitté de donner la lu-

miere au monde comme le Soleil: Je ne porte point d'enuie au Nectar & à l'Ambrosie, ien'en ay point de besoin: Si Ampele me regarde de bon œil, & que Iupiter me desoblige de ses disgraces, cela m'est indifferant, pourueu que ce jeune homme me continuë tousiours sa bonne volonté.

C'est ce qu'il disoit, esmeu d'admiration & d'amour. Cependant Bacchus qui auoit peur que Iupiter luy rauist ce qu'il aymoit tant, luy fit ceste requeste en riant.

Iupiter, ie vous supplie de m'octroyer vne seule faueur: Rhea qui ma nourry m'a dit souuentefois que vous auiez donné à vostre fils, à la requeste de Semele vostre Trisulque, & qu'à peine pouuoit-il vous appeller Papa, lors que vous le luy enuoyastes du Ciel: Quant à moy, ie ne demande point le gouuernement du foudre, nyl'administration de la pluye, & des autres Meteores: Donnez-les plustost à Vulcan & à Mars, à Mercure, ou à Apollon, faites-moy seulement vne courtoisie, & i'auray pour agreable que vous me priuiez du foudre qu'a eu Semele:

aussi bien a il esté cause de sa mort: Quel plaisir y a-t'il à se jouer de ce qui apporte vn si grand dōmage? Je desire faire mon sejour en Meonie: Je neglige d'habiter dās le Ciel, car la beauté de mō Ampele me contente dauantage. Dittes-moy, mon pere, n'est-il pas vray que vostre Aigle enleua Ganymede par vostre cō-mādemement, pource qu'il vous estoit re-cōmandable. Ainsi mon Berger me possede par les charmes de ses perfections: Je vous supplie de me le laisser, & de ne m'enuier ce contentement. Ne medites point qu'il est plus beau & plus agreable que le vostre: Vous en auez vn grand nombre que vous pouuez aymer sans me faire ce tort.

Iamais Apollon ne fut tant esperdu de la beauté d'Hyacinthe, que Bacchus l'estoit de son Ampele. Ils estoient tous-jours ensemble, & ne pouuoient durer l'vn sans l'autre: Tantost ils s'amusoient à jeter le Thyrses en l'air, tantost ils se plaisoient au riuage à chercher des cailloux, tātost à la chasse des petits Lyons, tantost à se pourmener dans vn bocage, où ils se perdoient à dessein de s'entre-chercher

chercher. Ils se mirent à luitter à force de corps : Mais le prix de la victoire n'estoit pas vn trepied d'or, ny vn cheual : Vne fluste seulement deuoit faire resonner leur amour. Cupidon estoit au milieu d'eux, sous la ressemblance de Mercure, pour juger de l'honneur du combat. Cependant qu'ils s'apprestoient, il fit vn bouquet d'Hyacinthe & de Narcisse. Ils se joignirent en fin tous deux, se tenans ferme par le dos, & s'embrassans de telle sorte qu'ils ne pouuoient se desdager. Ils s'esleuoient tous deux reciproquement, & Bacchus se plaisoit à le leuer, & à estre enleué de terre, & à s'entreserrer les mains & les doigts. Bacchus, apres auoir ainsi folasté quelque temps, le saisit au trauers du corps, & le pressa de prest. Ampele qui craignoit cet effort, voyant cela, luy dōna le crochet de son pied par derriere, & Bacchus alors en riant se laissa tomber sur le sable, & l'autre s'estendit sur son ventre. Bacchus receut en ceste posture des signes d'amitié, s'efforçant de le secoüer, & se descharger, & pour cet effect il se leua à force de reins;

Ils continuerent la luitte, iusquès à tant que le trauail & la sueur leurs ôsterent les forces. Cependant Ampele fut victorieux: Quoy que Bacchus le pûst bien surpasser de beaucoup: Mais ce Dieu, à cause de l'affection qu'il auoit pour ce jeune homme, se laissoit vaincre seulement par complaisance. Il remporta la fluste, qui estoit le prix de la victoire, & se baigna dans la riuere pour se rafraichir.

Bacchus, à qui l'honneur de la victoire faisoit enfler le courage, ne fut pas encor content. Il proposa vn combat à la course à plusieurs, ordonna des cymbales, des flustes, & des nappes de cerfs pour le prix. Il establit des bornes à iustes interualles, appellant tous les Satyres. Lencee fut le premier qui courut, puis Cissus, & Ampele courut le dernier. Cissus fut le plus agile en ceste course, & après luy Lencee, & apres Ampele. Ils coururent ainsi par l'ordre de leur victoire. Mais comme Bacchus apperceut que son amy estoit tousiours le dernier, craignant qu'il ne fut surmonté, il le secourut, & fit que

le vent le poussa de telle sorte, qu'il remporta la victoire, & apres luy Lenee, & pour le dernier Cissus: Et les Satyres admirans son agilité, publioient son adresse par tout.

Handwritten text, likely bleed-through from the reverse side of the page. The text is faint and mostly illegible due to fading and the age of the paper.

Handwritten text, possibly a signature or a date, located in the lower-middle section of the page.

Bacchus inuite Ampele à passer le temps.

*Atté persuade à ce jeune homme de
monter vn Taureau. La Lune rend
cet animal insensé, qui le precipite
du haut d'un rocher en bas. Bacchus
apprend la mort de son fauory. Ce
Dieu le metamorphose en cepts de
de vigne. Cupidon le console par le
recit des Aduantures amoureuses de
Calame & de Carpe.*

LIVRE ONZIESME.



OMME le jeu de prix fut
finy, Ampele se rejoüit de
la victoire qu'il auoit rem-
portee, tesmoignant à Bac-
chus la joye qu'il en a-
uoit par des signes remarquables. Bac-
chus l'ayant consideré en cet estat glo-
rieux & triomphant, luy dit en le con-
gratulant.

Mon cher amy, tu as remporté le

prix de la course par ton agilité, prepare toy d'en receuoir vn autre. Haste toy pour nager à l'enuy de Bacchus: & comme tu m'as vaincu dans les arenes, ie croy que tu pourras faire de mesme dans le fleuve. Laisse les danses des Satyres, ie couronneray tes cheueux de lierre apres ta victoire, pour tesmoignage que i'auray esté vaincu deux fois. Tu as de l'aduantage à te baigner en ceste riuiere, & puis il est bien seant que tu te mire en ce cristall d'eau, quel'on y voye deux Ampeles, & que l'on considere la grace que tu auras à couper la vague. Pactole s'efforcera d'accroistre ta beauté par son bain: Aussi en recompense tu dois luy faire quelque gratification, comme le Soleil faict à l'Ocean. Donne luy les rayons de ta lumiere, afin qu'Ampele esclatte comme l'Estoille du matin. Aussi bien ce fleuve reluit aux rayons du Soleil, & à l'esclat du riche metal qu'il charie, comme ta beauté esclaire le sombre de la nuict. Communique luy quelque chose de tes perfections, afin que ie crie aux Satyres: Voyez, ie vous prie, cōme la rose se joint à la rose:

D'où vient que tant de perfections s'unissent ensemble? A la mienne volonté que ceste riuere fust l'Eridan, où les riches larmes des Heliades coulent, afin que tu fusses laué d'or & d'ambre. Mais pource que i'en suis estoigné, i'iray en Alybe & ie t'embrasseray, t'honorant de couronnes & de bouquets. Laisse le fleuve d'Herme aux Satyres, aussi bien il ne porte point d'or : Mais sois tout d'or, & te laue dans ces flots dorez.

Bacchus, apres ce discours, se plonge dans l'eau, & Ampele le suiuit incontinent. Ils se precipitoient au fond, & puis ils reuenoient au dessus à force de bras. Bacchus nageoit à plaisir, & fendoit l'eau de sa poitrine. Tantost il estoit coste à coste de son Ampele, & tantost roidissant les pieds il le passoit. Mais pource qu'il luy vouloit donner la victoire, il retardoit son mouvement, & le laissoit aduancer. En fin ils abordent au riuage, & se meirent à couuert d'un petit bois, Bacchus couronna ses cheueux de lierre. Comme cet honneur luy eut esleué le courage, il voulut aller à la chasse des Lyons, des Ours, &

des Tygres, & tantost il prenoit plaisir à monter sur le dos d'un Ours, tantost à manier la teste d'un Lyon, & à conduire un Tygre en laisse. Bacchus qui le voyoit en peril de sa vie, le reprenant de sa temerité, luy dit.

Mon cher amy, que faictes-vous là, vous monstrez que vous estes bien jeune? Pourquoi entreprenez-vous de dompter ces animaux? Demeurez avec moy, ne vous meslez pas d'aller à la chasse si ie ne suis avec vous. Soyez icy avec moy, pour assister au banquet que ie veux faire aux Satyres. Quant à moy, ie ne poursuis point ces bestes feroces. Gardez-vous seulement de l'effort d'un Taureau.

Encor qu'Ampele prist ces remonstrances en bonne part, il ne laissoit pas de s'en mocquer en luy mesme: Ce qui donna mauuais presage à Bacchus. Car le mespris de ce conseil prognostiquoit qu'il ne viuriot pas long-temps, & que sa temerité le feroit mourir: Ioint aussi un mauuais augure qui arriua lors: car comme il portoit un Faon dessus ses espaulles, pour le sacrifier, il sortit

vn serpent qui le tua entre ses mains, signe infailible de sa mort. Comme il apperceut cet accident il en fut fasché & en rit tout ensemble. Bacchus qui preuoyoit le malheur qui luy deuoit arriuer s'attristoit, neantmoins il passa ce dueil promptement, se proposant de jouir du bien present & de n'apprehender point le mal qui le menassoit. Il luy faisoit compagnie dans les montagnes, dans les forests, aux riuages de la mer, n'ayant rien de plus agreable que de se veoir rassasier de cet objet. Il entonnoit quelque air nouveau d'une façon extraordinaire, l'harmonie de ces mottets le touchoit de telle sorte, qu'il iuroit que iamais Pan, ny Apollon ne l'auoit esgalé. Comme Atté eut considéré ce jeune Ampele indiscret & temeraire, elle voulut le perdre par ses artifices, & pour cet effect elle luy haussa le cœur, luy persuada d'entreprendre de gouverner le chariot de Bacchus, & de monter sur les Taureaux elle luy dit en ces termes.

O Ampele vous vous vantez de posseder les bonnes graces de Bacchus, neantmoins ie voy que vostre amy vous a esté

iusques icy, ingrat & inutile ? Quel present vous a-t'il fait pour vous obliger. Vous ne gouvernerez point son chariot, ny les animaux qui le traînent. Vous n'avez pas la charge de Maron son carrossier ? Dittes-moy de grace quelle courtoisie il vous a fait ? Encore ceux qui le frequentent comme vous peuvent-ils monstres de ses dons ? Les Bergers ont eu des flustes, & les Satyres des peaux de bœuf. Les Bassarides ont le plaisir de monter sur des Lyons. Abarie Atymnien a gouverné autresfois le chariot du Soleil. L'Aigle a eleué Ganymedes au Ciel par le commandement de Jupiter : mais iamais vostre Bacchus ne vous a fait cet honneur, & en cela Ganymedes a de l'aduantage, ayant le Ciel pour sejour. Et vous qui estes en la fleur de vostre aage ? Rejettez la conduite des chevaux sous couleur que le cheual marin jetta Glaucque en la mer, & que le Pegase renuersa Bellerophon ? N'ayez point ceste crainte : venez avec moy dans les prairies. Je vous feray monter sur vn Taureau que vous conduirez facilement. Vostre amy Bacchus prendra plaisir à vous veoir en ces exer-

cices, car il a quelque rapport avec ces animaux. Courez donc sans peur puisque Europe a passé la mer dessus un Taureau, tenans les cornes à deux mains, & n'ayant point de besoin de brides.

Ceste Deesse disparut aussi-tost, & s'enuola au Ciel. Son eloquence luy persuada d'entreprendre ceste course. Un Taureau descend en mesme temps d'une montagne pour boire en la vallee ayant vne extreme soif, comme il le tesmoignoit en ouurant la gueule, & tirant la lague. Le pauvre Ampele le fait boire, l'eauë qu'il prend à longs traits desgouste sur luy. Apres il monte dessus pour luy donner la carrière, & fit vn fouët d'osier bien deslié, & vne bride de lierre, & le couurit de fueilles, attachant à son front des lys & des œillets. Il fit vne selle de roses & de pavot champestre, & jettant dessus vne peau de diuerses couleurs, il remonta dessus, & adressant sa parole à la Lune, il luy dit,
Bel Astre, qui sçais cōduire les Taureaux au Ciel en ayant mesme la forme, permets-moy, cōme ie suis semblable à ces animaux que ie conduise cestui-cy, & ne sois point jalouse de mon pouuoir.

La Lune qui l'entendit, voulant punir sa temerité, enuoya la rage à ce Taureau, qui fut cause de sa mort. Car cet animal court à bride abbatuë comme vn cheual eschappé par les montagnes & par les valles, passant par les rochers les plus pointus & le porte comme vn vent par les campagnes. Ampele voyant sa course desfreiglee & le peril où il le mettoit commença à craindre, & dit à son Taureau, comme s'il eut eu de la raison pour l'entendre.

Arreste-toy Taureau ie te supplie, demain tu te donneras la carriere. Prends garde à ne me heurter contre vn rocher incogneu où personne ne frequente, de peur que Bacchus ignore mon desastre. Es-tu fasché de ce que i'ay doré la corne de ton front, où de ce que i'y ay attaché des boucquets de fleurs. Ne sois point enuieux de ce que Bacchus me fait l'honneur de m'aymer? Si tu as enuie de me perdre en le mesprisant? Si tu n'as point de compassion de ma jeunesse & de l'innocence de celuy qui s'efforce de te dompter, Porte moy iusques au séjour des Satyres, afin que ie meure en vn lieu, où ie puisse receuoir les derniers

devoirs. Je te supplie de m'obliger de ceste faueur, ie la recognoistray. Si tu as entrepris de me conduire comme estant semblable à vn Taureau? Vast'en a Bacchus, comme si tu estois vn homme? Parle à luy & l'entretiens de la cause de ma mort, estant ingrat à Cerés & a Bacchus? I'espere que ceste Deesse ne me laissera pas sans consolation.

Ampele parloit ainsi à ce Taureau, mais il n'entendoit point sa voix, ny ses prieres. Car comme ce furieux animal couroit sur les rochers. Il le precipita sur vne pierre pointuë qui luy brisa la teste, & la luy separa du corps, qui fut tout couuert de sang. Vn Satyre l'ayant apperceu en vint r'apporter la triste nouuelle à Bacchus. Ce Dieu attraint d'vne extreme douleur y courut plus viste que le vent. Iamais Hercule ne courut si fort quand les Nymphes rauirent Hylas comme il faisoit dans les montagnes. Estant arriué au lieu où il estoit mort. Il deplora son mal-heur & arrosa son corps de larmes, & mettant dessus luy la nappe d'un Cerf, Il parsema de roses & de lys, & luy attacha des passe-cue-lours. Ses cheueux seruirent de cor-

dons. Il luy donna son Thyrsce, & fit vne infusion de parfums liquides dans ses playes, que sa mere Rhea luy auoit donnez. Il sembla à l'instant qu'il eut changé de face & de couleur, & que ces odeurs luy eussent redonné la vie. Il deuint si agreable qu'il sembloit qu'un profond sommeil luy eut seulement osté le sentiment. Ses cheueux qui donnoient de l'amour flottoient au gré des vents: & encor qu'il fut souillé de poudre qui s'estoit destrempee avec le sang: neantmoins il ne laissoit pas d'estre parfaitement beau. Les Satyres s'assemblerent alentour de son corps, deplorans sa fortune. Il estoit mort, & neantmoins il ne paroissoit pas, & la beauté nel'abandonna point apres la vie, ayant le visage serein, comme s'il eut voulu rire. Bacchus apres tant de regrets en regardant son Ampele fit ces plaintes.

Que maintenant Bacchus se venge du fil enuieux des Parques? Quoy ne dirait'on pas que les Taureaux ont de la jalousie de l'amour aussi bien que les Vêts: mais qui est celuy d'entr'eux qui apres auoir contesté avec Phœbus en la pour-

suite amoureuse s'attaque à Bacchus.
 Apollon a esté plus heureux que moy en
 son Abarie, pource qu'il en porte le nō
 pour la consolatiō de son amour. Encor
 a-t'il eu quelque contentement en son
 hyacinthe, dont la fleur porte des mar-
 ques de sa passion, mais moy quel gage
 ay-ie d'Ampele? Quels bouquets te dō-
 neray-ie ô Ampele. Je conduiray sur ta
 tōbe le miserable Taureau qui a causé ta
 mort, & le feray compagnon de ta for-
 tune. Je luy briseray la teste, & luy cre-
 ueray le ventre de la mesme corne qui t'a
 offensé. Heureux Neptune, puisqu'e au-
 trefois aimant son Phrygien, son
 amour ne fut pas si malheureux: car il fut
 enleué au Ciel, & eut Hyppodamie en
 mariage; & le gouuernemēt de son cha-
 riot, apres auoir desiré celuy de Venus.
 J'ay eu vn fauory qui est mort hors
 de saison: car mon Ampele n'a pas eu
 le temps de se marier; & n'a pas eu ce
 bien que de conduire mon chariot. Il
 ne me laisse que les pleurs: mais mon
 cher amy le vermeillon n'a pas encor quit-
 té le bord de tes levres. Il semble que la
 vie soit en tes leures inanimées. Tes che-
 ueux sont encore crespelés & agreables;

la rose de ton corps n'est point encore
fainée, ny la mort ne t'a pas du tout de-
struit ? Tu as encore des reliques de la
vie & les marques de ton printemps. O
mes misérables amours ; qu'estoit-il
besoin d'entreprendre de dompter un
Taureau, si tu avois le desir de passer le
temps à tels exercices, que ne me le di-
sois-tu, ie t'eusse donné des cheuaux plus
faciles à conduire : ou si tu prenois plaisir
à chasser les bestes sauvages dans les
montagnes, pourquoy ne m'en aduertis-
sois-tu pas ? Je t'eusse donné mes Dra-
gōs, pour te traîner par tout où tu eusses
voulu. Helas ! on n'entendra plus ta voix
parmy celle des Satyres dans les delices
des festins. Tu ne feras plus les Orgies &
les Bacchanales avec les Bassarides. Tu
ne chasseras plus avec Bacchus. Ah ! que
l'enfer est inexorable & cruel aux Amou-
reux, il ne veut point fieschir à mes pressēs
pour me permettre que ie donne la vie
à Ampele ! Moy miserable de ce qu'il
ne veut point recevoir ces offres : s'il vou-
loit me faire ceste faueur, ie luy donne-
rois toute la richesse d'Eridan, les pier-
eries des Indes, & tout le marbre &
l'or d'Alybe. Je donneray pour le rache-
pter

pter de la mort tout le Pactole & les
areines dorees.

Il le regardoit attentiuement & fit
ceste requeste à Iupiter. Mon pere si
vous m'aymez, & si vous cognoissez la
violence de mon amour: Faictes ie vous
supplie qu'Ampele ressuscite, & qu'il me
dile ces mors:

Bacchus pourquoy vous attristez-
vous, qui a esté esmeu à vos regrets?
I'ay des oreilles & si ie n'entends
point les plaintes. I'ay des yeux & si ie
ne voids point celuy qui pleure. Cessez
de vous fascher. Ne respandez point de
larmes pour moy. Les Naiades pleurent
à la fontaine, Narcisse qui est meta-
morphosé en vne fleur. Il ne les entend
point, & le dueil des Heliades a esté im-
perceptible à Phœbus.

Helas (ce dit Bacchus) que mon pere
ne m'a-t'il legendré comme vn homme
mortel, afin que ie fisse compagnie à mō
cher amy dans les enfers. Ie m'asseure
que ie ne le laisserois pas tout seul. Qu'A-
pollon a esté heureux en ses amours. Il
porte encor le nom de son bien-aymé. A
la mienne volonté que ie fusse comme
Hyacinthe où comme Apollō! Et quoy

mon Ampele dors-tu encore , & ne danse plus ? N'yras-tu point aujourd'huy à la riuere pour t'y resioiir & y folastrer à l'ordinaire ? Voicy l'heure que tu soulois prendre tes esbats au plaisir de la chasse. Si tu es fasché contre Bacchus, ie te supplie de le dire aux Satyres, afin que ie sçaches ce que tu penses. Si quelque furieux Lyon t'a perdu ie les tuëray tous. Ie n'en laisseray pas vn en la montagne de Tmole, & mesme ie n'excepteray n'y ne pardonneray pas à ceux de ma mere Rhea. Si les cruels Pantheres t'ont destruit , ie ne mōteray plus dessus. Si ce sont les Cerfs , ie les attelleray à mon chariot. Si ce sont les Truyes i'en extermineray l'engeance. Si c'est vn Taureau , i'en perdray l'espece.

Au mesme temps que Bacchus eust finy ces tristes plaintes : Cupidon luy apparut sous la ressemblance d'un vieil Sylene tout pelu, tenant en ses mains vn Thyrses, & soustenant sa vieillesse d'un baston, & luy dit ces paroles en le consolant.

Bacchus, ie te conseille d'employer ton amour enuers vn autre dont la beau-

ré te soit plus recommandable. Le remede d'une affection violente, c'est la recherche d'une nouvelle. Le temps ne peut perdre l'amour encor qu'il donne l'oubly. Si tu veux allegger ta douleur, cherche quelque beau jeune homme qui soit plus agreable que celuy qui est mort. L'Amour esteint l'amour. Le Zephire a autrefois aymé Lacon, mais apres qu'il fut mort il caressa Cyparisse, & par apres il poursuiuit Hyacinthe. Si la raison ne te peut vaincre, au moins l'exemple te doit esmouuoir. Regarde vn peu le jardinier qui plante vne fleur: quand la premiere est morte, il n'en estime point la perte, & tousiours la replante iusques a tant qu'il en recoiue du contentement. Je veux te raconter au sujet de ta fortune vne histoire qui est du tout semblable à tes aduantures.

Il y auoit vn jeune homme sur la riue du fleuve Meandre, d'une grande beauté qui auoit la taille belle, le port graue, beaucoup d'agilité à la course & auoit tant de graces que l'on cust dit qu'elles estoient nées de luy. Ses yeux brilloient d'une lumiere semblable à celle d'une estoille, & auoit le corps

bien proportionné & poly comme vn crystal. Il portoit au menton vn petit bouquet de barbe qui commençoit à poindre. Il s'enõmoit Calame, & eut de l'amour pour vn jeune garçon quel'on appelloit Carpe, qui fut estimé le plus beau de tous les hõmes, & s'il n'eust point esté si jeune, sãs doute on l'eust pris pour l'espoux de la belle Aurore. Il surpassoit de beaucoup la beauté de Cephale & d'Orion. Si Cerés & la Lune l'eussent veu, ie m'assure qu'ils eussent mesprisé leur Iason & leur Endymiõ, & que l'advantage qu'il auoit par dessus eux eust captiué ces Deesses, qui l'eussent caressé comme vn mary commun. Calame l'aymoit tant qu'il ne pouuoit durer sans le veoir, & passoit le temps au riuage de Meandre, & quelquefois à la course. Pour cet effect ils establirēt pour bornes vn oliuier d'vn costé, & la riuere de l'autre. Calame couroit viste comme le Vent: mais pource qu'il vouloit donner la victoire à son amy, il se laissoit tomber tout exprés.

Après ces jeux, ils se mirent dans le fleuve à nager. Calame laissoit Carpe deuant luy, & le suiuoit de loing, &

tantost il s'aduançoit pour luy prendre les pieds : Tantost il s'abandonnoit à la vague, & puis il remontoit à force de bras en couppant les flots : Tantost ils n'ageoient à l'opposite l'un de l'autre, comme s'ils eussent voulu aller au deuant pour le saluër, & encor que Calame le pût deuancer, neantmoins il ne le vouloit pas faire, & s'espargnoit pour luy complaire. Carpe aborda le premier au riuage où il receut le prix d'honneur : mais il n'eut pas le loisir & le temps de goustier le fruit de sa victoire, car vn tourbillon de vent l'enleua & le jetta dans l'eauë. Le pauvre Calame ne peut le secourir, estant luy mesme en tres-grande peine pour se deffendre des efforts de la tempeste. Il s'esloigna du bord & parla a son amy qui n'estoit pas present, & qui ne pouuoit l'entendre, & fit ces plaintes.

Dittes-moy Naiades, quelle tempeste a rauy mon Carpe. Je vous supplie, obligez-moy tant que de venir à la fontaine de mon pere. Quittez ces eauës meurtrieres, & n'en beuuez point. Mon pere n'a iamais submergé personne. Je croy que c'est le Vent qui est enuieux

de mon contentement, & qui me l'a enleué apres auoir fait vn affront à Phœbus. C'est luy sans doute qui la poullé dans le fleuve, il luy a enuoyé ce tourbillon contraire comme il fit voler le Palet d'Apollon sur le miserable Hyacinthe. Mon Carpe estant mort quel bien puis-je auoir à le suruiure. Naiades, dites-moy qui a esteint le flambeau de mon amour, qui auoit à peine rendu des rayons dignes de luy. Carpe est noyé en la presence de son mal-heureux Calame sans qu'il luy ayt peu donner aucun secours. Naiades ostez de dessus ma teste vn petit bouquet de cheueux, & coupez ceux de Carpe, aussi bien il n'en a plus de besoin. Pourquoy retarde-tu? Quel attraiçt & quel charme peut auoir ceste eauë infidelle, pour te retenir. Demeure encore, le seray compagnon de ta fortune, tu trouueras que ie te suis vn parfait amy, & que ie ne veux point viure apres toy. Je veux te faire paroistre que tu as emporté avec toy les delices & les plaisirs du miserable Calame. Si quelque Nymphes t'a rauy dis-le moy, & ie le raconteray aux Driades? Si tu as quelque affection particuliere pour ma sœur

hostesse de ce séjour humide? dis-le moy franchement, ie ne manqueray pas a enrichir ta couche amoureuse de presens? N'est-ce point que tu as nagé outre les bornes que nous auions remarquées de l'œil, ayant perdu la ressouuenance du riuage: mais il est vray que ie me suis efforcé de t'appeller & tu ne m'as point entendu. Si le vent d'Orient t'a submergé que ce cruel soit vagabond a iamais, & qu'il ne soit iamais receu aux danfes & aux ballets des Nymphes pour auoir esté ennemy de l'amour. Si c'est Boree ie m'en vay en Orythie, où ie raconteray son infidelité. Si la vague t'a surmonté sans respecter où admirer ta beauté, où que mon pere t'ayt attiré à luy: qu'il recoiue son fils dans ses eaux meurtrieres, & qu'il le place auprès de Carpe. Naiades ie vous supplie de m'enseigner le lieu où il est mort, i'esteindray la flamme de mon amour, là où il est estendu.

Après auoir respandu grande abondance de larmes. Il coupa vn floccon de ses beaux cheueux & les donna au fleuve Meandre, en luy disant ces paroles.

Reçois donc (luy dit-il) mon corps & mes cheueux tout ensemble. Je ne puis plus veoir la lumiere puisque tu m'as rauy mon cher Carpe. Calame & Carpe n'auoient qu'une vie , aussi ne doiuent-ils auoir qu'une mesme mort. Naiades esleuez sur le riuage en nostre memoire vn Epitaphe & y grauez dessus ces mots:

Je suis le tombeau de Carpe & de Calame qui s'entr'aymerent tant que ceste eauë les a tous deux submergez.

Les vifs ressentimens de ceste mort le precipiterent dans l'eauë. Son pere qui auoit de la compassion de sa mort ne vouloit point le receuoir. Ils furent donc tous deux metamorphosés par la faueur de Iupiter en vne herbe, dont la tyge se nomme Calame , & le fruit Carpe.

Cupidon raconta ceste fable à Bacchus , taschant de le consoler de ses auantures , mais le recit de l'infortune de ces deux Amans luy renouuelloit la memoire de son Ampele qui estoit mort auant saison. Cependant les Heures immortelles filles de l'Annee, arriuerent en sa maison : dont l'une apporta les tri-

stes marques de l'Hyuer, & auoit en ses
pieds de la gresle, de la pluye en ses che-
ueux, & en son sein abondance de neige
L'autre qui estoit la messagere du Prin-
temps, auoit en sa teste des bouquets
de roses & de lys, & ne respiroit que
douceur & que chaleur. L'autre don-
noit l'Esté, portant en ses cheueux vn
bouquet d'espics, & en ses mains vne
faux. Cerés paroissoit dans ses veste-
mens toute passe & descoloree, à cause
de la chaleur du Soleil. La derniere por-
toit dessus sa teste vn rameau d'Oliue:
car elle n'auoit pas encore faict croistre
le raisin en la vigne, & ceste liqueur n'a-
uoit pas encore enyuré les Maronides.
Et pour ce sujet les Heures vinrent tout
exprés en la maison du Soleil leur pere,
pour impetrer ce benefice & ceste fa-
ueur.

Les Heures se presentent au Soleil, & luy demandent que l'Automne produise des raisins, conformément à la volonté de Iupiter. Il leur monstre les tables de Phanee, où estoient toutes les destinees. Ampete est changé en un cep de vigne. Bacchus se console ayant gousté de la douceur du vin. Et les Satyres s'enyurent en la vengeance.

LIVRE NEVFIESME.

LEs Heures immortelles arriuerent en la maison du Soleil leur pere. L'Estoile du soir fut au deuant d'elles, & la Lune commençoit desia de luire. La nuit se passa, & l'Aurore donnoit des marques que le Soleil estoit leué. Le Printemps auoit desia produit les fleurs & les herbes quand les Heures se presenterent au Soleil en grande humilité: Et vne d'en-

tre-elles, qui auoit soin de l'Automne, luy fit ceste requeste.

Soleil, qui faictes venir les plantes & les fruiçts de la terre, c'est maintenant que la vigne doit apporter des raisins: le Temps a autrefois faict ceste demande, & il luy a esté octroyé. Je vous supplie de ne celer point à ma sœur ma pauvreté, dittes luy que ie ne produits point de pommes ny d'espics, ny d'herbes, ny de fleurs, & pour le moins ie dois amener la vendange.

Le Soleil la consola, luy donnant bonne esperance, & luy monstrant les tables d'Harmonie, où toutes les destinees des hommes, & toutes leurs aduantes estoient escrites de la main de Phanes, & luy dit en ces termes.

Belle Deesse, la troisieme table que vous voyez, sera le temps quel'on plantera la vigne: par là vous cognoistrez où sera le Lyon & la Vierge: en la quatrieme sera Bacchus, qui versera son Nectar en terre, comme Ganimede son Ambrosie dans le Ciel.

La Nymphe curieuse de ceste cognoissance, regarde de prest, & aduise proche d'un mur vne grande table presque

aussi ancienne que le monde, où estoit escrit tout ce que le Roy Ophion auoit faict: Ce que Saturne fit, quand il coupa les parties genitales à son pere Cœlus, & comme il les jetta dans la mer, d'où sortit Venus. Comme Saturne deuoit ses enfans, & comme on luy baila vne pierre au lieu de Jupiter. Elle vid vne autre table où estoit figuré comme le Pin auoit engendré vn fils. Comme le deluge estant arriué, Deucalion bastit vn vaisseau pour se sauuer du naufrage. En la troisieme elle apperceut tout ce qui deuoit arriuer au monde, & ce que tous les hommes auoient escrit en diuerses langues: Et veid là-dedans qu'Argus deuoit estre changé en Paon: qu'Arpalice souilleroit ses mains du sang de ses enfans: Que Teree violeroit Philomele, & qu'il luy couperoit la langue: Que Niobé seroit changée en vn rocher, plaignant la mort de ses enfans: Que Pyrame & Thisbé seroient metamorphosez en riuere, apres leur accident funeste: Que Smilax & Crocus s'entr'aymeroient: & que Diane tourmenteroit Athalante. Ceste Deesse fille del'Annee, parcourut toutes ces tables,

où elle veid des merueilles, iusques à ce qu'elle fut arriuee au lieu où le Soleil luy monstra des peintures admirables, & luy en explica les prognostications. Il y auoit en ces tableaux vne vigne representee au naïf, chargee de raisins, & appuyee d'un cep : L'Heure immortelle s'arresta particulièrement à la consideration de ces objets agreables : mais apres qu'elle se fut donné ce contentement, elle chercha le lieu où estoit peint Ganymede, qui versoit vn pot plein de Nectar, & d'Ambrosie. Elle y trouua là les ordonnances & les arrests de Iupiter sur la distribution des arbres & des plantes, qui deuoit estre faite aux Dieux. Elle veid qu'il auoit octroyé à Phœbus le laurier, à Venus la rose, à Minerve l'oliue, à Cerès les espics, & à Bacchus la vigne. Comme elle eut prins plaisir à veoir ces merueilles, elle vint trouuer ses sœurs, & leur raconta tout ce qu'on luy auoit montré.

Cependant on ne pouuoit consoler Bacchus, ny luy oster le ressouuenir de celui qu'il auoit perdu. Le regret & la douleur luy affadissent le goust des delices. Il ne prēd plus de plaisir aux danfes,

ny à la Musique, ny à l'harmonie de ses instrumens, la mort d'Ampele luy reuient tousiours dans l'esprit, & ne peut se desprendre de ces ressentimens, & non seulement il le regrette; mais aussi les choses inanimées tesmoignent leur dueil. Les riuieres en porterent des marques & ne coulerent plus, retenans leurs eaux sans mouuement, en vne assiete morne, paresseuse & endormie. Herme cessa de rouler, le riche Pactole faisoit rebrousser ses flots, & le Sangarie aussi. Les arbres mesme en firent paroistre des signes sensibles. Le Pin fremissoit, comme s'il eust voulu faire des plaintes: Le Laurier secoua ses fueilles: & l'Oliuier abatit ses fruiçts. Les parques inexorables tournoient leurs fuseaux à l'enuers. Et Atropos dit à Bacchus pour le consoler.

Bacchus, ton Ampele vit encore, il ne passera point le fleuue d'Acheron, & n'est point mort, encore qu'il le paroisse. Je le feray viure d'une vie vegetable, & le changeray en vne liqueur, qui sera comparable avec le Nectar, & assistera tousiours aux banquets, prest à entonner vne chanson à la Doricque, &

les Muses se ressouuiendront de luy.
Et au lieu de tes cheueux, tu te serui-
ras du pampre de la vigne. Tu don-
neras de la jalousie à Phoebus, en la
fleur d'Hyacinthe. Cependant tu re-
chercheras l'vsage de ceste liqueur,
qui est aussi douce que l'Ambrosie,
pour le soulagement des mortels. La-
gloire & l'honneur de ton Ampelle
surpasseront celuy d'Amyclee, enco-
re que sa patrie soit abondante en mi-
nes de fer: car la sienne est riche d'or
& d'argent: Que s'il se vante de la
riuere qui y coule, Eurote est plus
grand & plus recommandable que le
Pactole.

Ampelle, tu as donné de la fasche-
rie à Bacchus: mais c'est aussi afin
que tu donne à tout le monde le vin
delicieux. Il a pleuré pour faire ces-
ser les larmes des hommes, & leurs affli-
ctions.

Après que ceste Parque cruelle l'eut
consolé, elle se retira avec les sœurs,
& à l'instant Bacchus veid vne gran-
de merueille: Ampelle fut metamor-
phosé en vne fleur. Son ventre se
changea en tige, ses bras en rameaux,

ses cheueux en raisins, & ses pieds en racine. Ces branches entrelassees les vnes dans les autres ressembloient à des cornes. De sorte qu'ayant bien peuplé la terre, il parut vn grand nombre de ceps, qui embrassoient les arbres circonuoisins, & les chargerent de fruiçts. La vigne estant venuë à perfection, & les raisins meurs, Bacchus donna l'inuention de les pressurer apres les auoir foulez, & trouua l'artifice du pressoir, & d'en faire couler le vin. Il en rougit ses mains, & en mit dans vn pot qu'il fit d'vne corne, & en beut, & apres qu'il en eut gousté, la douceur le rendit gaillard, & fit ce discours plein de vanité.

Ampele, il y a dequoy se consoler en ta mort, tu nous donne vn nectar agreable. I'ay plus de contentement qu'Apollon: car il ne boit point la liqueur du laurier & de l'hyacinthe: L'espic de bled ne peut seul nous rassasier, au contraire il ne faict que donner goust au vin. O Cérés sois propice si tu veux. Je donneray aux hommes, non seulement a boire, mais aussi à manger. Ampele, que ta mort nous est vtile! Les Parques ne t'ont

r'ont point faict sentir leurs rigueurs. Pluton ne t'a pas esté si cruel que ie pensois, & Proserpine n'a point vsé de si grande tyrannie en ton endroict, qu'elle n'ait changé l'arrest de ta mort. Elle t'a conserué pour faire compagnie à Bacchus. Tu n'es point mort comme Atymnius, & n'as point encore veu la flame de Tisiphone, ny les yeux de Megere. Tu es viuant encore que l'on te croye mort. Le tombeau ne t'a point enseuely, & la terre a eu honte de cacher vne telle beauté. Mon pere t'a changé en vne fleur, Iupiter en a faict distiler l'Ambrosie. Tu porte en tes fueilles la couleur rouge, qui est la marque de la vie, & du sang animé, pour monstrier que la chaleur ne t'a pas encore quitté. Quant à moy ie ne laisseray point le Taureau qui t'a outragé, sans luy faire ressentir vne peine digne de ceste injure. Je le sacrifieray en respandant du vin dessus ses cornes. Je melleray quelquefois dans le vin par delices, le jus de pomme, & du figuier, car ces fruiets sont de bon goust & contentent la bouche : mais ils n'ont pas les qualitez de ta liqueur.

La rose, le beau Narcisse, le passe-ve-
lours, le lys, & l'hyacinthe, te cedent
l'honneur. Toutes les fleurs se peuuent
meller avec le vin, & toutes les odeurs
viendront en vne. Et toy, Apollon, la
raison veut que tu me sois inferieur, en-
core que les feuilles de ta fleur portent
les marques de tes souffrances amou-
reuses: Et si tu portes vn arc & vne cou-
ronne dans les iardins, ie tireray le vin
delicieux de la vigne, & ie me couron-
neray de pampre: & louëray en moy-
mesme les vertus d'Ampel. Permetis-
moy que ie fasse vn heaume du marc
de raisins. Aussi bien tu resspands le sang
dans les guerres de Mars, & fais couler
ceste liqueur qui en a la ressemblance.
Ceres, ny mesme Pallas, ne se peuuent
vanter de mes prerogatiues: Les oliues
n'excitent point l'appetit, & les espics
n'endorment point les ressentimens.
Les poires sauuages donnent quelque
pointe: le myrte accroist les odeurs:
& tous ces fruiets n'assoupissent
point les sens & les fascheries, & ne
deliurent point les hommes d'vn tri-
ste ressouuenir. Mais i'ay plus de pou-

voir que tout cela, les tables sont fades, sans goust, & sans resioüissance, & les ballets sans liberté, si ie ne suis present.

Et toy, Minerue, boy ce qui sort de l'oliue, mon fruit surpasse le tien, encore que les Athletes & les gladiateurs oignent leurs playes de ton huile: car si quelqu'un est atteint de regret pour la mort de son pere, ou de sa mere, ou de ses enfans, qu'il prenne du vin, & il sera bien tost deliuré de ses ennuis. Moy-mesme i'enay esprouué la vertu: car apres la mort d'Ampele, il m'a tout resioüy. Je veux tant boire, que tous mes membres s'en ressentiront. Ne voyez-vous pas bien que les arbres, bien qu'ils soient sans iugement, rendent à la vigne des tributs & des hommages? Le palmier s'incline par respect, le palmier se baisse par deuoir, le figuier s'humilie: Et quand tu espand (ô Ampele) tes rameaux, les arbres, comme seruiteurs, les portent sur leurs espauls, les feuilles se iouent sur ton front, le Zephire rafraischit les raisins, comme si c'estoit vne seruante avec

vn esuentail aux grandes chaleurs de l'Esté.

Bacchus donna la carriere à son esprit en ce discours de vanité. Cependant il perdit le ressouuenir de ses regrets & de sa fortune, incontinent qu'il eut gousté la douceur du vin. Cecy sera conte de son origine. Mais les Poëtes en rapportent la naissance plus ancienne, & en ceste façon.

La vigne croissoit autrefois dans les montagnes, & dans les lieux inaccessibles, & espandoit là ses pampres, & ses raisins sans que l'on la cultiuast: Fournissant de fruiçts tous diuers: car les vns estoient blancs, les autres noirs: les vns meurissoient plustost, les autres retardoient leur maturité: vne branche pouffoit l'autre, & vn second raisin succedoit au premier. Ses rameaux s'appuyoient sur vn oliuier, & sembloient enyurer ses fruiçts: Tantost ils rempoient sur vn pin, & teignoient la poix de sa couleur. Ceste plante estoit incogneüe, aussi bien que sa vertu. Ce fut vn accident qui la descouurit. Vn Serpent d'vne grandeur prodigieuse, apparut à Bacchus, qui auoit la gueule toute

rouge des raisins qu'il auoit mägez dans les rochers. Cet object luy donna à penser ce qui estoit la cause de ceste couleur, portant en son corps les marques d'une teinture agreable, ce qui luy donna la curiosité d'auoiser les arbres où il auoit peu la prendre. Il aduisa la vigne, & en presence des Satyres il en print des grappes & les pressurant, il voulut en goûter. La douceur luy fit enuie d'en emplir des cruches pour en boire à cœur saoul. Ce Dragon apres auoir ainsi vendangé, se retira dans une grotte, Bacchus le suivit. Il luy vint en l'esprit que les Oracles de Rhee luy auoient autrefois predict ceste aduanture. Ayant apperceu la commodité du lieu, il caua dedans la roche, & fit une may, & bastit un pressoir. Tous ses Satyres luy ayderent à faire la vendange, les uns couppoient les raisins, les autres les receuoient dedans des hottes, les autres les fouilloient, separans les fueilles qui estoient meslez, les autres tiroient le vin, qui ruisseloit à gros bouillons, l'écume paroissoit dessus, meslée d'une certaine rougeur, qui donnoit dans les yeux. Les Silenes se resioüissoient de

veoir ceste liqueur si agreable: Ils firent des pots de corne, qu'ils remplissoient fort souuent. Ils beurent tant que la joye leur fit oublier le travail & leurs soings, se mettans à danser & à capreoller à la Bacchanalle, crians à haute voix *Eui*: Les Echos des montagnes retentissoient à ces clameurs, comme si elles eussent esté esmeuës de la mesme chaleur. L'un comença à danser d'une façon chancelante, l'autre se barbouilla la barbe de vin, l'autre aduançoit son visage teint en escarlate, vers vn arbre, pensant que cefust vne Nymphe, & s'alloit jeter dessus d'un mouuement violent, si Bacchus ne l'eust retenu. Vn d'entr'eux fut si insolent que d'aller aux fontaines pour violer les Nayades: & sans doute il les eust trainees avec luy dans les bois, si elles ne se fussent plongees au fond de l'eau. Bacchus ne se ressentit point de l'yuresse cōmune; car Rhee luy donna vne Amethyste qui le contregarda. En fin la chaleur & les fumees du vin les troublerent de telle sorte, qu'ils perdirent le jugement & la raison, s'abandonnant à des actions las-

ciues & fort deshonnestes. L'un prenoit vne Bacchante, & la tiroit de la danse pour la manier à plaisir: & comme elle resistoit à ces attouchemens, qu'il faisoit par deuant, il la prenoit par derriere avec des insolences & des postures desfreiglees. Vn autre se jetta dessus vne qui portoit les flambeaux aux Orgies, & luy baïsa le sein avec vne contenance effrontee.

Après tous ces passe-temps Bacchus vint au Palais de Rhee, avec les belles despoüilles de la vigne, & luy raconta toutes ses rejoüissances, & la solemnité des festes qu'il auoit celebrees avec les Satyres.

Jupiter desirant faire paroistre le courage de Bacchus son fils , enuoye Iris , pour luy commander de declarer la guerre aux Indiens. Rhee donna la commission à Pyrrichie de lever des gens de guerre.

LIVRE TRESIESME.



JUPITER qui desiroit accroistre l'honneur de Bacchus, & faire paroistre la grandeur de son courage, enuoya Iris en la maison de Rhee, pour luy donner aduis qu'elle le sollicitast d'entreprendre la guerre contre Deriades, qui commandoit aux Indes, afin qu'il subjugast tous ces peuples, leur enseignant ce qui estoit des mysteres des Bacchanales, & des Orgies, instituez de ce Dieu. Iris descendit du Ciel comme vn oyseau, & entra dans le cabinet de Rhee, & apres l'auoiraluee honnestement, elle l'embrassa comme elle estoit à table

avec les Corybâtes qui se resjouissoient de la douce liqueur, & de l'ambrosie de la vigne. Ceste messagere de Iupiter ne refusa point la coupe que l'on luy presenta, & beut à toute la compagnie, & apres auoir fait les complimens, elle fit ceste harangue à Bacchus touchant son ambassade.

Puissant Bacchus, ton pere m'a enuoyé icy bas, pour des affaires de grande importance, qui te regardēt. Il te commande de faire la guerre aux Indiens & de les reduire sous le joug de ton obeissance, afin que tu donne des loix de religion à ce peuple barbare, qui en combat l'establissement par la liberté, & le desfreiglement de son esprit, & qui en apprehende les entraues, & les liens? Prends resolution de leurs declarer la guerre, & de produire quelque stratageme qui soit digne du Ciel, car encore que tu sois issu de Iupiter: Neantmoins la Cour celeste ne t'y receura point si ta vertu ne le merite & les heures immortelles ne t'ouuriront point la porte, Mercure mesme encore que sa charge l'excuse de ces faicts heroïques, à peine y a-t'il son sejour. Bien qu'il aye

tué Argus le Berger pour le service de Jupiter, & a deliuré Mars des liens de Vulcan. Apollon jouyt de ce bien, mais ce n'est pas sans sujet. Il a dompté des animaux. Ton pere mesme n'est point arriué au Ciel que par sa vertu, ayant abyfmé les Tytans dans les Enfers? Tu ne dois point faire de difficulté de travailler pour la gloire apres Jupiter, Mercure & Apollon.

Iris luy porta ce commandement & aussi-tost elle disparut & s'envola au Mont Olympe. Rhea qui auoit entendu ces commandemens & ces conseils donna commission à Pyrrichie de leuer des gens de guerre. Ce Capitaine courut par toute l'Europe, & par toute l'Asie, pour faire son armee, leur donnant le rendez-vous en Lydie avec ordre d'y demeurer iusques à ce que le temps fust venu de battre la campagne.

Mais! ô Muses Corybantides? Racontez combien il y eut de compagnies de Satyres, de regimens de Sylenes? Combien de Cornettes, de Bassarides? Combien de braues Seigneurs & d'une extraction remarquables se trouuerent aux occasions. Quant à moy ie confesse

ingenuëment que ie ne le puis faire, encore que i'eusse cent bouches, mais pour soulager ma foiblesse, ie nommeray seulement les principaux Capitaines & ceux qui auoient commandement dans l'armee, en inuocquant Homere le pere d'eloquence, cōme les Pilotes esgarez se recōmandent à Neptune.

Le premier qui commanda ce fut Acteon qui estoit parent de Bacchus, & pour ce subiect, il quitta Aonie sa patrie. Il vint vn grand nombre de Bœotiens qui estoient Citoyens de la ville de Thebe, d'Arne, de Pacteone, d'Ocalque & d'Erythree, de Midee, d'Ilesie, de Scole, de Schoene, & d'Eleone, où l'on dit qu'il y a vn estang qui est tout réply d'Anguilles, de Thespis, d'Haliarte, qui est separee du mont Helicon par vne riuere. Tous ceux qui habitoient Authedone qui est voisine de la mer, de Polichne, Nisee & Corone. Tous ces soldats se trouuerēt au lieu qui auoit esté arresté pour faire la monstre, ranger les bataillons & practiquer l'exercice militaire. Acteon estoit general de l'armee & Hymenee Capitaine de quelques compagnies des Bœotiens. Il estoit grandemēt

aymé de Bacchus. Apres luy il y auoit Phœnix qui entreprit le voyage de Colchos dans le vaisseau de Iason, avec Meleagre, & qu'encore Hymenee fut jeune, il ne laissa pas pourtant de prendre les armes pour le seruice de Bacchus, & de liurer le combat aux Indiës. Il estoit soustenu de plusieurs soldats d'Aspledon, d'Orchomenie, d'Hyrie où Orion ce grand Geant fut engendré de la terre, par le moyen de l'Vrine qui se congela dont il se fit vn corps viuant semblable à vn homme. Il estoit accompagné de ceux qui s'estoient embarquez avec Menelas, & qui furent arrestez en Aulide où Diane s'irrita contre eux, retardant leur nauigation, dont ils furent contraints de luy sacrifier Iphigenie pour appaiser ceste Deesse, qui se contenta d'une bische qui fut bruslée en sa place par les ruses d'Vlyssé, pource qu'elle auoit esté promise à Achilles auant le siege de Troye, d'où vient que l'on faict encore en Aulide quelque solemnité en la faueur de ceste Nymphe. Ce sacrifice appaisa Diane, & le Vent s'esleuāt, la bonnace quitta leur flotte. Iphigenie vint en la terre des Tauricques.

où les peuples s'ot si cruels qu'ils sacrifient
ceux qui se sont eschappez du naufrage.
Elle deliura son frere Orestes que l'on
alloit presenter sur l'autel, comme vne
offrande à Neptune. Vn grand nombre
des Boeotiens suiuirent Hymenee. Et
entre autres les Phocenses, & les habi-
tāts d'Hyampolis, le pays natal de Cypa-
rissi, où l'on dit qu'il se glorifia tant de
sa beauté, qu'il vouloit aller au pair avec
Minerue. Il estoit assisté de ceux qui ha-
bitoient Pythone, Crise, d'Aulide, Pa-
nopee, où Apollon fit part à Bacchus
du sejour de Parnasse. Vne grande par-
tie de son armee estant assemblee en
Delphes. L'Oracle donna des asseuran-
ces de la victoire, le Tripied exprima
quelques voix d'une bonne aduanture,
& l'eauë de la fontaine Castaliene mur-
mura comme si elle eut esté agitee d'une
fureur, ou d'une chaleur diuine. Il y
auoit des compagnies d'Euboe, & par-
ticulierement des Corybantes qui a-
uoient contribué à la nourriture de Bac-
chus, le resiouyssans dans les monta-
gnes avec leurs cloches & le battement
de leurs poësles. Les Corinthiens s'en-
roulloient sous ses drapeaux, & entr'au-

tres Acmon, Prymnee, Mimas, Dam-
nee Sacespale, Melyslee, & Idee, au-
trefois leurs pere Socus les auoit chassés
du pays à cause de leur impieté. Ils vin-
rent en Gnosse, & de là ils coururent
vagabonds par toute la terre circonui-
sine, & habiterent la ville de Crete. De
là ils passerent en Phrygie, & de là à A-
thenes où ils demurerent iusques à tant
que Cecrops eut tué Socus, à l'instant
ils quitterent la terre de Marathon, &
retournerent en la contree des Aban-
tes, le sejour ordinaire des Curetes, qui
se plaisoient anciennement aux instru-
mens, aux danfes & aux ballets. Les Ci-
toyens des Abantes se mirent à l'armee,
& ceux qui estoient d'Eretrie, de Styre,
de Cerinthe & de Cariste, & de l'Isle,
d'Acrys, & de Gereste, de Styge, de Co-
tyle & de Siride, & pareillement ceux
de Chalcis, ville Metropolitaine des
Elopiens. Il y auoit sept chefs en l'armee
qui auoient tous le mesme dessein con-
tre les Indiens. Et entre les autres Ere-
ctees paroissoit, que Pallas auoit nourry
& esleué, & l'on dit que comme Vul-
can voulut jouir de ceste Deesse, il res-
pandit sa semence en terre par son im-

puissance. Erecthee estoit le General des Atheniens, ayant avec luy Siphnee, qui auoit eu quelque commandement en la ville. Ils estoient assistez des Citoyens de Marathon, de Celee, de Thorice & d'Aphidne, d'Eleusine, la terre de Ceres, où l'on dit que Triptoleme prit son chariot attelé de Dragons pour courir partout le monde, & pour ensemençer les vallees, & les cāpagnes. Acharnee ne manqua pas de se trouuer au camp avec ses genereux enfans. Le bruit estoit si grand de tout ces escadrons qui s'assembloient sous les enseignes, que la ville d'Athenes en estoit toute esmeuë, & le riuage Phalerien en resonnoit. *Æacque*, que Iupiter metamorphosé en Aigle engendra *Ægine*, fille d'*Asope*, parut avec beaucoup de courage, prestant secours à son frere *Bacchus*. Il luy donna vn regiment de *Myrmidons* qui auoient autrefois esté des Fourmis courantes par les rochers à la queste pour leur prouision, & qui furent depuis changez par la faueur de Iupiter en hommes, & apres sous la conduite d'*Æacque*. Ce grand Capitaine fit grauer sur son bouclier pour marque

de sa naissance. Vn Aigle qui enleuoit vne Nymphé, & vn fleuve ardent de feu & de flammes, & auprès estoit l'image triste d'une fille qui regardoit Alope en grande commiseration, & sembloit s'escrier. O Iupiter tu m'as delaisé vn beau gage de ton amour, & vn present digne de moy en tuant mon pere si miserablement. Asterme commandoit en Crete, dont la beauté estoit aussi recommandable que la grandeur de son courage. Il estoit fils de Minos & de Phestras, & secourut Bacchus l'ayant reconnu pour parent, à cause de son pere qui estoit le petit fils de Semele. Son pouuoir s'estendoit en plus de cent Villes, dont les Citoyens, comme de Gnosse, de Gortin, de Rhytus & de Lycaste, de Cifame de Citree, porterent les armes pour son seruice. Ce genereux Capitaine vint de Crete, & l'estoille de Mars rendit vn esclat qui prognostiqua les victoires qu'il r'emporteroit à l'aduenir. Il ne voulut pas demeurer dans la ville ny s'accocquiner dans les delices. Il espousa la liberté de la campagne: Mesme apres la guerre des Indes, il ne peut se resoudre à se retirer. Il quitta Crete
&

& son pere & sa mere, se bannissant de son pays, & s'en alla en Scythie. De là il passa en la terre de Colchos, où il donna le nom d'Asterien à ces peuples. Delaisant le contentement qu'il prenoit en la riuere d'Amnise, il voulut boire de l'eauë du Phasic.

Comme tous les vaillans hommes s'apprestoient à la guerre, le seul Aristee qui deuoit y estre des premiers à cause qu'il estoit allié de Bacchus, alloit en secret par les villages de la Grece, publier que la liqueur faite avec le miel estoit meilleure que le vin, au preiudice de Bacchus. Les Dieux qui cogneurent son ambition & sa mauuaise volonté donnerent des arbitres pour ce differët, & eux-mesme en voulurent iuger. Ganymedes versoit à table de l'un & de l'autre: mais ils furent tous rassassiez au troiesme pot de ce moust: Au contraire ils ne peurent iamais estancher leur soif par le vin, & tousiours ils recommençoient leur beuueté, passant tout le iour à vüider leur couppe. Iupiter donna le prix d'honneur à Bacchus. Cependant, il admiroit les ouurages des abeilles, & leurs gauffres si bien rāgées

par figures carrees. Aristee, fut tellemēt
fasché de l'affront qu'il receut en ce iu-
gement, que cela fut cause qu'il n'alla
pas à la guerre de si bonne volonté. Il
sejourna long-temps à Pharrasie. Les
peuples s'armoient pour le suiure & par-
ticulierement ceux qui habitoient les
villes de Laseon, de Cytree, de Stym-
phale, de Polychne, de Ripe, de Stra-
tie, de Mantinee, & d'Henispe d'Ar-
cadie, qui a pris le nom d'Arcadie, que
Calisto engendra avec Iupiter, qui l'a
depuis enleué au Ciel, & luy donna le
nom de Bootes. Aristee conduisoit au-
tant d'hommes de guerre, comme Sy-
rene engendra d'enfans avec Apollon
lors qu'il la mena en la Lybie deserte,
mesprisant sa Daphné qu'il auoit autre-
fois tant aymee: & donna à son fils vn
arc & vn bouclier, & luy pendit derrie-
re les espaulles vn carquois qu'un bau-
drier couuroit. Achatiss vint de Sicile
pour luy faire compagnie, assisté des
Cillyriens, des Elymiens, des Palin-
giens, & de ceux qui habitoient lors la
ville de Catane auprès de Lymne voisi-
nes du Palais des Syrenes, Alletho-
lons & Terphsicore. Il y auoit aussi vne

grande partie des hommes qui faisoient leur demeure à Camurine, où le fleuve Hyparis desgorge ses eaux à Hyblé, à Ætna, où il y a vn rocher qui brusle sans cesse. Les habitans de la ville de Pele & de Nisee, & ceux qui sont voisins d'Arethuse, & d'Alphee qui coulent dans la mer.

Faune le fils de Circe & de Jupiter prit les armes. Les peuples Occidentaux, & de la Lybie, où Cadmus auoit autresfois demeuré long-temps avec la belle Harmonie, dont la grace & le merite furent cause des grandes guerres & des troubles qu'Hismene entreprit pour ce subject estant grandement passionné pour l'amour d'elle. Mais Cadmus r'emporta la victoire, & subiugua toute l'Æthiopie par le secours de Jupiter, de Mars & de Venus. Et l'on dit qu'il jouit d'Harmonie proche de Triton, & que les Nymphes Hesperides leurs chanterent vn Epithalame en faueur de leur mariage, decorans leurs couches de fruits dorés qu'elles tirerent de leur jardin. Ces deux amans coronnerēt leurs cheueux de lierre au lieu de bouquets de fleurs. Toutes les Graces & les Nymphes

assisterent à ces resjouïssances cōmunes, & mesme Athlas leur ayeul maternel y voulut dāser, encore qu'il fut chargé du Ciel. Cadmus fit bastir plus de cent villes en la Lybie & leur en donna le nom en recognoissance.

Ce pays fournit à Bacchus vn grand nombre de soldats, dont la plus grande partie estoit de la contree où estoit Iupiter Ammō, & de la riuiera de Chremete & de Cinyphe, & des peuples Auchetes, & Bacales. Ce grand pays estendu en beaucoup de terres & de Prouinces fortifia grandement l'armee. Comme tous ces regimens furent arriuez Crateogone en print la conduite. Ce Capitaine estoit fils de Psylle & d'Anchiroé, qui fut si insolent que de faire la guerre aux Dieux. Car comme il receut del'incommodité du vent chaut du midy, il voulut s'en venger & pour cet effect il freta des vaisseaux pour combattre les vens, & particulierement celuy qui luy auoit apporté du dommage. Ceste presumption fut punie, car comme sa flotte estoit en la plaine mer auprès d'Æole, les tempestes & les tourbillons conspirerent sa perte, & firent submerger ses vaisseaux.

Toutes les cōpagnies de Thrace & de Samos s'assembloient, comme le Prince Emathion auoit donné ordre, avec les peuples de Tesmere, de Physiade, de Zerinthe, & de Perseide. Il en venoit vne si grande abōdance de tous les costez que l'on ne pouuoit en retenir le nōbre. Toute la lignee d'Electre s'y fit enrooller, & elle mesme qui auoit esté enleué au Ciel, donnoit de bons presages de la victoire. Ogyre qui cōmandoit en l'armee, apres Bacchus auoit tant d'auantage en la guerre que les Geants mesmes l'eussent apprehendé. Son courage & sa vertu estoient indomptables, & ne pouuoient estre vaincuës que par luy-mesme. Il n'y auoit que sa force propre qui le pust destruire. Il jura par la Victoire que luy seul estoit capable de reduire toutes les Indes sous son obeissance. Oeagre fils de Mars, quitta Pimplee & abandonna son fils Orphee entre les mains de Calliope. Litrus & Lapethé, conduisoient les cōpagnies de Cypre, où Venus aborda comme elle fut engendree de l'escume de la mer. Les habitans de Seste, de Tanase, de Tembre, de Panurcte, & aussi les Lapythes, dont l'insolence fut nuiss-

sible a quelques-vns d'entr'eux aux banquets qu'ils firent. Les Citoyens de Cynire, de Paphos, de la contree où Venus se baignoit si souuent avec Adonis, le fils de l'incestueuse Myrrhe : de Salamee que Tinucer fils de Telamon bastit : de Cimpse, de Toribie, de Sardie, de Cerasse & les circonuoisins du fleuve Hermus, de Pactole riche en or, & de la Terre où Typhō auoit rejetté le feu du foudre qui estoit tombé sur luy, & qui auoit bruslé la terre, reduisant mesmes les rochers en cendres. Ce Geant pouuoit grandement nuire aux desseins de Bacchus, troubler toute la terre, & renuerser les Empires : mais le Prestre du Temple de Iupiter Lydien, l'arresta sans faire aucune violence, & le dompta sans armes, seulement avec des paroles magicques. La vertu secrette le charma & le rendit sans mouuement & sans force, luy disant, Arreste-toy meschant, & à l'instant ce Geant perdit tout sentiment. Il ne craignoit pas tant les foudres de Iupiter que les charmes de ce Prestre, & les entraues que son discours luy donnoit. Car la force de ces mots luy auoit tellement frappé l'imagination

qu'il mesprisoit tous les efforts violens que l'on eust peu luy faire, au regard de ce qu'il ressentoit. Cet assoupissement luy estoit si sensible qu'il ne respiroit qu'à se desgager de ces liens. Mesme en abandonnant la vie, afin qu'il ne fut plus sujet à ses attaintes. En cet estat il fut attaché à la terre sa mere, & garroté de peur que sa liberté ne fut trop nuisible au monde.

On n'enroolla pas seulement les hommes qui estoient aguerris, mais aussi ceux qui n'y auoient point d'inclination Gabee & Stamne, qui auoient charge de tenir le nombre & le roolle des soldats y receurent des joueurs de flustes & d'autres instrumens, tellement que vous eussiez dit que Bacchus conduisoit plustost son armée à la nopce, ou aux ballets qu'à la guerre: & que l'on deuoit ouïr plustost le son des cymbales que de la trompette, & faire ressonner les amours, les mignardises & les carresses de Venus, plustost que les allarmes, la charge, & la tuërie. Les Phrygiens s'armoient de bonne volonté pour le seruice de Bacchus, & tous ceux qui habitoient, Budee, Menee,

Dresie , qui estoient voisins du fleuve Ogrimone & de Meandre. Les Citoyens de Dreante & de Celene, & de Sangarus, & d'Elepic, de Dirce, & d'Aonie, que Priase quitta, se bannissant de son pays lors que Iupiter enuoya le deluge, que tous les arbres estoient inondez d'eauës, & que les montagnes furent semblables à la mer, il s'absenta pour ce sujet, & ne pouuant perdre la ressouvenāce du lieu où il auoit esté esleué, pleuroit souuentefois en regrettant sa patrie, & recherchoit la riuiera où il auoit pris tant de plaisirs, mais il estoit contraint de boire d'une eauë estrangere. Et apres que ceste inondation fut passée, & que les coupeaux des montagnes commencerent à paroistre, & que les eauës se furent retirees dans la mer, il retourna en son pays où il embrassa son pere que Iupiter auoit contre-gardé du deluge à cause de sa grande pieté. Il eut dessous luy beaucoup de soldats. Asterne & Miletus leur firent compagnie, assistez de Caune qui auoit le mesme dessein de faire le voyage des Indes. Ce jeune homme n'auoit pas encore souillé la couche sa sœur Biblis, ny corrom-

pu sa chaste virginité. Il n'auoit point
aussi prins d'exemple en la personne de
Iunon & de Iupiter, & sa sœur estoit
encore vierge, car il ne cherchoit que
les passe-temps de la chasse, estant in-
nocent de ces affections incestueuses:
Biblis non plus n'estoit pas encore
changee en vne fontaine ruiselante.

Cependant les soldats qui venoient de
tous les costez de Mycale, & de la con-
tree voisine de Meandre, estans tous as-
semblez, le general les conduisoit au son
du tambour en la ville de Migdon pour
faire la monstre, & le bruit estoit si grand
qu'il raisonnoit comme vn Echo à plus
de dix lieuës à la ronde.

Les Dieux prennent les armes en faueur de Bacchus. Son armee passe aux Indes. Iunon qui ne s'efforçoit qu'à tra- uerser le dessein de Bacchus, parle à Astris sous la ressemblance d'un Indien, & luy persuade de se rebeller. Le fleuve Astacis tainct du sang respandu, fut changé en vin, & les Indiens n'en sçachans pas la force, s'en- yurerent.

LIVRE QUATORZIESME.

RHEA. qui auoit dessein d'auancer les armées de Bacchus, courut par toute la terre pour les assembler. Elle s'enleua dās l'air, & passa comme le vent, & aussi viste que la pensée, & fit tout le tour du monde, en Orient, en Occident: inuitans mesmes les Nayades & les Hamadriades hostesses des forests. Les peuples s'assembloient en Lydie, où elle fit ses sacrifices

ordinaires, pour auoir vn heureux succez des entreprises. Mais apres auoir rapporté le nombre & les noms des vail-lans hommes qui s'enroollerent pour le voyage des Indes. O Muses, ie vous supplie de m'inspirer d'une pareille faueur, les noms des Dieux, & des Deesses qui porterent les armes à ce mesme dessein. Premièrement les deux Cabires fils de Vulcan, sortirent de Lemnos, armez de pied en cap, avec vn courage martial: Et aussi Alcon & Eurimedon, tres-experts aux forges, que Thracique auoit engendrez avec Vulcan. Ces braues soldats furent assistez des Ductiles, des Ideyens, & des Corybantes, qui sauuerent Iupiter dans les rochers, de la cruauté de Saturne, de peur qu'il ne le deuorast, comme il auoit fait les autres enfans, & le cachèrent par le moyen des poesses d'airain, qui empescherent qu'il n'entendist sa voix. Pyrriche & Idiees leur commandoient. Cyrbas, & les Telchines, enuieux del'honneur que l'on pouuoit aquerir à ceste guerre, y vinrent aussi contre leur volonté. Licus Scelmus Damnamenee, qui gouuernoit autrefois

chariot de son pere, Thrinax, Macaree, Augée fils du Soleil, qui furent si méchans que d'empescher par charmes que les terres de Rhodes ne fussent fertiles: pareillement Chiron, qui fut metamorphosé en Cheval. Les Cyclopes y firent bien de l'exécution: Ils eslançoient des montagnes entieres, & les rochers pointus leurs seruoient de picques, & les flames d'Ætna leurs estoient des dards. Ils vsoient de ce feu, comme s'il eust esté de la forge. Il y auoit entre les Brontes, Sterope, Euryale, Elatree, Agee, Trache, & le superbe Alimede. Le seul Polypheme estoit resté dans les delices de l'amour. Car la passion qu'il auoit pour Galatee, plus violente que celle de la guerre, le retenoit captif aux riuages de la mer, où il faisoit resonner ses plaintes amoureuses. Les Faunes, les Satyres, qui ont la partie d'en bas semblable aux chevres, & qui ont des cornes, s'armerent avec grand courage. Et entre les autres Argene, que l'on surnomma Capricorne, pource qu'il souloit traire le lait des Chevres dans les lieux secrets, pour s'en rassasier. Pan le Dieu des Bergers y estoit: Omyster, Daphe-

nee, Philamne, & Glaucque, dont la couleur du corps ressembloit à celle de la mer: Le genereux Argus, accompagné des deux Bergers qu'Hermes auoit engendré avec les Nymphes. Hermes estoit vn sage Prophete, & fort grand Cabaliste. Sosus son pere se pouuoit glorifier d'auoir vn fils qui cognoissoit les secrets les plus obscurs de la nature. Il y auoit aussi Agree, qui n'auoit point d'autre contentement que ceux de la chasse des bestes farouches, & qui ne prenoit plaisir qu'à pratiquer le mesnage des champs, & des troupeaux de brebis, mesprisant la recherche des sujets amoureux, iusques là qu'il negligea d'accoster Penelope, qui passa la nuit dans la campagne. Mais ce n'est pas de merueille de ce qu'il se monstra si insensible: car il ne se plaisoit qu'à la Musique, & aux exercices innocens. Phorbus le cruel, Silene le vieillard, Astree, Maron, & Lenée, firent le deuoir de Soldats. Pœmene, Thiasé, Hypsicore, Oristus, Phlegree, Apee, Gemon, Lycon, Acropote, Petriee, Pheree, Lenobie, Sarte, Pheresponde, Lycque, & Pronome, que Mercure eut d'Iphthimen

filles de Dorus, d'où sont venus les Grecs, que l'on appelle Dorides, que Bacchus esleua autrefois aux honneurs leur donnant son sceptre, se delibererent de ne s'espargner point contre les Indiens. Les Satyres ne voulurent pas renoncer à ces genereux desseins. Ils se promirent de tout renuerfer: mais ces gens là ne sont propres qu'à boire, & à faire des insolences. Ils paroissent des lions à table, mais ils fuyent la charge comme les lievres eurent les chiens. Il y en auoit fort peu entr'eux qui fussent agueris: & ceux qui eurent le courage de se jetter dans le peril, s'armerent d'une façon diuerse & crotresque. Les vns estoient couuerts de peaux de bœufs, les autres de lyon, les autres de Pantheres & de cerfs, portans en la teste des cornes, qui s'appointissoient par les bouts, les cheueux en boucs, & les oreilles grandes que le vent esbranloit, avec une queue qui leur pendoit par derriere. Il y auoit aussi à la guerre une autre espede d'hommes, que l'on appelloit Centaures, qui auoient le corps tout velu comme des bestes. Iunon les auoit metamorphosez en vn genre d'animal

cornu: car autrefois ils estoient en forme humaine, & yssus des Nayades, que l'on appelloit Hyades, filles de Laurus. Ces Nymphes prirent beaucoup de soin à la nourriture du petit Bacchus, & pour le contre-garder de la jalousie de Junon qui le poursuiuoit elles le tenoiēt caché dans vne grotte, sous vne forme estrangere, car il ne fut pas si-tost nay qu'il print la ressemblance d'un cheureau en partie, & de l'autre il estoit semblable à vne jeune fille, & mesme il en portoit les habits & la coiffure, & en auoit la voix, pour tromper l'enuie de Junon. Mais cet artifice luy fut inutile: car ceste Deesse reconnut ces ruses, & le mēsonge du sexe, & descouurit que Bacchus estoit caché sous cet exterieur fallacieux. Elle se voulut venger de ces Nymphes gardiennes, & pour cet effect elle cueillit des fleurs & des herbes de la Thessalie: & comme elles estoient assoupies d'un profond sommeil, elle leur respandit l'essence sur la teste, & oignit leur front d'une escume magique, & à l'instant elles furent metamorphosees, leurs oreilles commencerent à croistre, & vne queue leur pendit par derriere, les cornes germerent à leur front, leur

poil se herissa, leurs cheueux s'alongerent, leurs yeux deuinrent grands & affreux, leurs barbe couurirent leur visage, & commencerent à mugir comme des bœufs.

Il y auoit aussi douze Capitaines qui commandoient en ceste armee, dont la vertu & le courage estoient fort recommandables: Voicy leurs noms, Spargene, Glenec, Eurybie, Cetee, Rhiphone, Petree, Æsucque, Orthaon, Amphitheme, Faune, Phanes, Nomeon. On remarqua encore vne autre espee de Centaures, qui furent produits de la semence de Iupiter, lors qu'il voulut violer sa fille Venus, qui ne vouloit pas commettre vn inceste: La Terre receut les effects de l'amour, & en fit naistre des animaux de diuerses façons. Et non seulement ceux que le sexe appelloit à la guerre s'y treuuerent, mais aussi les Nymphes & les Bacchantes: Les vnes venoient de Meonie, les autres de Sipy-le. Les Oreades quittoient les montagnes, & celles mesme qui estoient lassées de viure. Les Driades abandonnoient les bois & les forests, & particulierement les Melies: Les vnes prenoient
les

les cymbales & les instrumens de Rhee, les autres s'armoient toutes de lierre. Les Lydes, les Menades, & les Bassari- des leurs faisoient compagnie: Et entre autres Ægle, Callichore, Eupectale, Ione, Calyce, Ilene, Rhode, Ocyone, Erronthone, Æriste, Methe, Harpe, Oenanche, Licaſte, Steſichore, Prothos, & Thrygie. Bacchus se disoit le Conduc- teur general de toute ceste armee. Et si il n'auoit point de bouclier ny de pic- que, d'espee, ny de casque, portant pour ses armes vne couronne en la teste faite de serpens, & la nappe d'un cerf sur le dos. Son pourpoint estoit tauelé, & de diuerſes couleurs, tenant de la main gauche vne corne cauee en forme de pot, remplie de bon vin, de la droicte son Thyrsé entourré de lierre, & mar- choit en cet estat avec les Corybantes. Les regimens le ſuiuoient, les chariots portoient les prouiſions, les Mulets estoient chargez de barriques de vin, & quand ils se laſſoient on les donnoit aux asnes. Il y auoit aussi vne grande quantité de coupes & de vaisſeaux à boire. On y conduisoit des Pantheres qui estoient liées avec du lierre, & aussi

des Lyons. Les Satyres qui estoient demy-chevaux, hannissoient apres le vin, desirans de porter Bacchus. Comme il cheminoit en cet arroy, il arriua au fleuve de Sangarie, voisin de Phrygie, & passa par la contree où Niobé fut changée en rocher. Ceste miserable Nympe voyant la resistance que vouloient faire les Indiens, leur fit ce discours.

O peuples, que vous estes peu aduisez ne vous defendez point contre les armes des Dieux, & particulièrement du fils de Iupiter, de peur que Bacchus courroucé ne vous conuertisse en pierres, comme Apollon a fait en mon endroit. Ne regrettez point Orôtes le gendre de d'Eriades Roy des Indes, qui a esté submergé: Le courroux de Rhee peut beaucoup plus que celuy de Diane. Craignez d'offencer le frere d'Apollon, de peur que ie ne pleure vostre mort, avec celle de mes enfans.

Ceste pauvre Niobé fit paroistre les effects de son respect, & se teut aussitost. Bacchus continuant son chemin arriua en Ascanie, où les peuples le receurent avec toute sorte d'applaudisse-

ment, se reduisant en son obeissance: Et en tesmoignage du deuoir de subject, qu'ils luy promirent, ils firent des ballets & des banquets solempnels. Bacchus passa la nuict en joye, voyant vne si grande facilité à la conqueste de ce pays, & eut vn songe qui luy fut vn presage heureux de la victoire qu'il deuoit remporter sur les Indes: Le Ciel luy apparut tout en feu, & comme il se fut esueillé au matin, il donna ordre de se re-
tir prest au combat, contre ceux qui feroient les rebelles. Quelques habitans se mirent en defence pour luy resister: mais incontinent il enuoya deux Heraults d'armes, pour les sommer de se rendre, ou de s'apprester au combat. Mais Iunon qui ne s'efforçoit qu'à s'opposer aux desseings de ce conquerant, print la ressemblance d'un Indien, & suscita Astrais d'entreprendre la guerre contre luy, luy disant.

Celuy-là seroit bien lasche de courage qui craindroit des regimens de femmes, que l'on conduit pour vous forcer dans vos Royaumes. Prêds courage, ô Astrais, tu as des armes plus fortes que Bacchus: vne picque n'est pas vn baston de

lierre: vne couppene ne peut faire de l'exécution comme vne espee. Et toy, Celienne, ne permets point que des estrangers enuahissent l'Estat.

Ce discours le resolut à la rebellion, & Iunon disparut & s'esuanoüit en l'air. Cependant les Herauts demanderent audience en la Cour d'Astrais: mais apres qu'ils eurent faict leur harangue & leur sommation, il se mocqua d'eux, & leur fit des affronts.

Ils retournerent au camp de Bacchus, & luy rapporterent la mauuaise reception que l'on leur auoit faite. Astrais donna commission à tous ses Capitaines de leuer des gens de guerre, & se campa auprès du fleuve Astacis, en attendant le choc. En fin les deux armées se joignirent, les Indiens se mesloient dans la presse, tout ainsi que les Gruës quand elles font la guerre aux Pigmées lorsqu'elles retournēt aux pays chauds, fuyans les rigueurs de l'Hyuer, & se monstrans courageuses, volent en l'air, paroissans comme vne nuée noire dessus l'Océan: Les deux ennemis se choquoient rudement d'une part & d'autre, les compagnies des Bassarides ne s'y

espargnoient pas: Les vnes auoient entouré leurs testes de viperes, les autres de lierre, vne autre estoit armee d'un Thyrsse, vne autre esprise de fureur auoit les cheueux espars & flottans à la nonchalance. Vne jouïoit des cymbales, vne autre battoit vne peau de bœuf, qui faisoit resonner l'Echo: vne autre se mit des serpens à la teste en couronne: vne se vestit de peaux de Pantheres, vne autre de chevreaux: vne mettoit dans son sein vn serpent, qui siffloit comme s'il eust voulu conseruer sa virginité: vne autre sautoit nuds pieds, & dansoit: vne autre couppoit la teste à vn chameau, & le pressoit de cheminer, pour le faire tomber dans les sablons: vne autre print vn Taureau, & luy deschira la peau & le ventre: on voyoit mesme vne Bassaride sauter de rocher en rocher nuds pieds, sans craindre la pointe & l'aspreté. Cependant les ennemis se chargeoient furieusement, & le bruiet qu'ils faisoient ressembloit en quelque façon à celuy que l'on fait en dansant. Leucque enleua vn rocher tout entier, & leur lancea à la teste.

Les Bassarides ne faisoient pas moins d'exécution, les familles Nigrassimes en abattoient un grand nombre. Eupetale rendoit des effets de son courage. Stefichore se mesloit furieusement dans la presse, jouans des cymbales. Les deux armées eurent beaucoup à souffrir, la trompette resonnoit & augmentoit le bruit. Les Bassarides jettoient de grandes clameurs, comme si elle eussent esté hors du sens. Il parut un homme que Jupiter enuoya, qui predict que Bacchus remporteroit la victoire.

Il y auoit bien de la perte du costé des Indiens, la terre estoit toute couuerte de corps, & le fleuve Astacis auoit prins couleur de sang, de la quantité des hommes, qui estoient morts. Mais Bacchus eut compassion d'une si grande deffaitte, & voulut monstrier les effets de son pouuoir, & pour cet effect il changea ce fleuve en vin. Les ruisseaux de ceste liqueur couloient & enyuroient les terres circonuoisines. Un Indien des plus illustres ayant veu ceste merueille, dit ces paroles par admiration.

J'ay veu yne estrange metamorphose en ceste eau : elle n'a point esté laiçt

des chevres, ceste liqueur n'est point semblable à celle que l'on tire des mouches à miel : mais elle rend vne framboise agreable, & resioüit les sens.

Cet homme ayant soif en print avec la main, & en goustâ : Le miel (ce dit-il) rassasie plustost que cela : Ah la grande merueille, ie ne sçauois perdre la soif, & en beuuant ie veux encore boire de ceste ambrosie, qui ne peut rassasier : O Hebe, apporte ta cruche, & viens icy l'emplir. Et toy, ô Ganymede, qui es le sommelier, ou le garde du gobelet en la Cour des Dieux, fais en prouision pour Iupiter : Et vous, mes amis, venez en boire, quant à moy il me semble que ie suis au Ciel : les Nayades distribuent librement le Nectar aux hommes, que l'on auoit reserué au Ciel pour les Dieux.

*Les Indiens estans enseuelis dans le vin,
furent deffails par Bacchus, & ame-
nez captifs. Hymnee le Berger de-
vint amoureux de la belle Nicee, &
la recherche d'amour.. Ceste Nym-
phe le tua d'un coup de fleche.*

LIVRE QVINZIESME.



OMME cet Indien eut
aduerty les autres de ce
changement si estrange,
& de la douceur de ceste
liqueur, ils s'approcherent
tous de ce fleuve pour boire. Les vns
se jettoient dedans, les autres se cour-
boient sur le riuage alongeans la bou-
che, les autres en puisoient avec les
mains pardeffus leurs compagnons:
les autres emplissoient des vaisseaux,
& les emportoient: & apres qu'ils eu-
rent bien beu, les yeux leur tourne-
rent dans la teste, & virent tous les
objets doubles, pensans veoir deux

rochers , & deux riuieres , la quantité du vin qu'ils prirent les enyurant leur ostale iugement & la raison. Ils se ruèrent sur les troupeaux des champs, & ayant aduisé vn taureau dans le fort de la forest, ils le saisirens & le lièrent, pensant tenir Bacchus comme vn esclauë, à cause du rapport qu'il auoit avec cet animal. Vn autre couppa la teste à vne chevre, croyant auoir la peau d'vn Capripede. Vn autre tua des bœufs comme si ce fussent esté des Satyres. Ils poursuivirent les Cerfs, croyans que ce fussent les Bassarides. La diuersité des couleurs leur troubloit la veuë, & l'excez de leur passion estoit tel, que quelques vns combattoient les arbres, couppans les branches, & s'opiniastroient contre les fueilles, se repaissant d'vne victoire imaginaire. Cependant l'armee de Bacchus faisoit vn grand bruit avec leurs cymbales & leurs instrumens, que l'Echo faisoit resonner, les vns dansoient, les autres jouïoient de leurs trompettes, les autres couppoient vne branche d'oluiuer, pensant prédre la barbe de Maron, les autres faisoient les Orgies avec de grandes insolences, les autres entendans

lestambours, jettoient leurs armes. Les vns estoient espris de la fureur de l'Amour, & enleuoient des Bacchantes & les vouloient violer, les renuersans par terre: mais ils estoient bien trompez en leurs desseins, car les serps qui estoient gardiens de leur virginité rampoient dessus le ventre, & empeschoient les efforts des ennemis. Comme ces indiens tous espris de vin couroient çà & là dans les montagnes, le doux Morphee les assoupit d'un profond sommeil pour gratifier Bacchus, & luy donner l'occasion d'enuahir le pays. Ils dormoient tous en diuerses postures; l'un sur le nez, vn autre met sa teste dessus vne pierre estendu sur le riuage d'une eau, dont le murmure le fauorisoit; vn autre'embrassoit ses deux costez de ses mains, vn autre tenoit sa teste appuyee d'un seul bras: vn autre dormoit en figure ronde comme vn serpent, & la plus grande partie se retira dans les forests. Vous en eussiez veu vn estendu sous vn chesne, vn autre sous vn laurier, exprimans en dormans quelques voix confuses & inarticulees, vn autre sous vn oliuier, vn autre sous vne Palme, dont les ra-

meaux sembloient trembler au vent de son haleine , vn autre estoit sur l'arene qui vomissoit la quantité de vin qu'il auoit mal digéré. Bacchus voyant tous ces ennemis en cet estat , se prit à rire, & dit.

Soldats qui estes venus icy pour mon seruice , reduisez les Indiens à mon obeïssance , sans resistance , & sans combat. Il y a moyen des subiuguer sans esandre du sang. Qu'ils se resouent & deliberent de me recognoistre pour leur Roy. Qu'ils honorent mon Thyrsé , couronnans leur teste de lierre. Qu'ils delaissent leurs souliers , prenans mes brodequins. Qu'ils quittent leurs coustumes & leurs loix , & qu'ils crient à haute voix, *Euie* , ou quelque autre acclamation de ioye.

Les Soldats obeïssans à ce commandement se mirent en deuoir de les prendre. Vn d'entre eux se saisit d'un Indien , & le lia le trouuant au camp, vn autre en prit vn par la barbe , vn autre par les aureilles , vn autre par les cheueux , à cause qu'il n'auoit point de cordon , vn autre lia & garrota les mains d'un Indien derriere son dos,

Maron ne s'espargna pas d'en enleuer vn qui estoit assoupi de sommeil, & en lia vn grand nombre aux chariots, & dessus des Elephans, Erechtee en portoit dessus ses espaulles, & vne Bacchante chassoit deuant elle vn Elephant qui en estoit chargé, & Hymenee eut vn bouclier d'or pour despoüille. Bacchus fut grandement resiouy de sa bonne fortune, on fit vn pillier entage de toute l'armee des ennemis pendant qu'ils estoient enseue- lis en vn profond sommeil.

Il se rencontra vne belle Nymphé appelée Nicee, qui n'auoit point d'autre passetemps que ceux de la chasse, & qui n'auoit point encore receu en son cœur aucune passion amoureuse. Elle estoit semblable en chasteté à vne Diane, & prenoit ses desdits à courre vn lievre, où à poursuiure quelque beste dans les montagnes, ne pouuant s'arrester dans les delices de la paresse, & dans la solitude d'un cabinet, elle aymoît la campagne & la liberté innocente. Sa quenouille n'estoit point autre que son arc: & ses fuseaux estoient ses fleches. Son petit mestier & son ouurage n'estoient point autre que les filets & les paneaux qu'el-

le ourdissoit pour les tendre, selon les lieux & les occasions. Son plaisir n'estoit pas tousiours de prendre vne biche à la bricolle, ou vn lievre au collet, elle auoit le courage bien plus releué, & n'estimoit pas la chasse qui se pratiquoit par ruzes & par surprises, voulant que la generosité y eut la meilleure part, & de l'aduantage, estimant à honneur d'arrester vn Ours, & d'affronter vn Lyon, n'ayant point d'autre reproche à faire à Diane, que de ce qu'elle n'osoit faire traifner son chariot par des Pantheres, & par des Orgies, mais par des Cerfs: elle ne se rendoit point delicate en onguens, & en delices de la bouche, se contentant de boire l'eau froide d'une fontaine à la rustique. Son sejour n'estoit pas en vne vallee facile d'accez, mais sur la pointe d'un rocher inaccessible, & souuentefois au retour de la chasse, apres auoir lassé les bestes des forests à la course, ou à la meute des chiens, elle s'entretenoit avec vn Panthere à luy faire des caresses sourdes & muettes. Souuentefois aux grandes & importunes chaleurs de Midy elle alloit dans vne grotte trouuer vne Lionne pour jouier avec elle, & cet animal la flat-

toit de la queue, & la lechoit, pensant que ce fut Diane, & baissoit la teste comme s'inclinant deuant elle. Il y auoit vn Pasteur qui auoit esté nourry dans les montagnes, appellé Hymnee, qui gardoit ses bœufs en vne forest, voisine du séjour de ceste Nymphes cōme il l'entveüe vne fois. Il en deuint si passionné, qu'il ne renoit plus le soin de son bestail, l'amour qui le pressoit ne luy permettoit pas d'y penser seulement, & encore qu'il fut présent de corps, à sa cōdition, neantmoins sō esprit estoit avec celle qui l'auoit blessé, laissant son troupeau à l'abandon, & fut semblable à Anchises qui poursuivit Venus fort amoureusement, gardant ses bœufs dans les prez. Hymnee ayant veu la belle Nicee à la chasse, perdit la patience & le repos. Son troupeau estoit sans conduite, & les vaches couroient çà & là, comme pour le chercher: mais il estoit occupé à la consideration de la beauté de sa Nymphes. Cupidon luy donnoit des attraitz violans, & des charmes, & pour l'engager dans la furie de la passion, il faisoit esleuer vn petit vent comme elle estoit à la chasse, qui la descouuroit par interualles, cependant il en déroboit les objets par reprises, son corps

floriffoit cōme vn pré, ses pieds estoient
sēblables à la roze qui est meslée de rou-
geur, ses cuisses blanches comme vn lys,
son ventre arondi & poli comme vn cri-
stal. Cet amant n'oublia pas ses yeux en
ce sujet, & veit à la dérobee, tout ce que
le vent indiscret luy peut mōstrer, il l'ac-
compagnoit tousiours où elle alloit. Tā-
tost il baisoit son arc, tātost il manioit ses
fleches, comme si l'attouchement de ce-
ste Nymphē luy eut departy quelque fa-
ueur qui eust peu contenter vn amant:
Quāt il voyoit qu'elle bandoit son arc, il
admiroit ses mains. Quand elle retrouf-
foit ses bras il ouuroit les yeux pour con-
siderer la grace qu'elle auoit à tirer, pour
voir si elle n'estoit point aussi belle que
Iunon, & se tournoit souuent vers l'Oc-
cident pour veoir si elle n'estoit pas plus
agreable que la Lune. Le pauvre Hym-
nee estoit blessé, & sa playe ne pouuoit se
guerir, il se ressouuenoit tousiours loing
& prest de sa belle Nicee, & songeoit sās
cesse, comme elle auoit si bien décoché
contre vn Ours, comment elle en auoit
tiré la peau, cōment elle s'estoit baignee
à la fontaine, & entre autre chose, il ne
pouuoit oublier la faueur qu'il auoit
euē du vent, qui l'auoit descouuertē

si familierement il supplioit les Zephi-
res, recognoissant la commodité de ce
seruice de souffler tousiours dans les ro-
bes des Nymphes, afin que les amoureux
eussent quelque soulagement de leurs
peines. Or comme vn jour il la vied à la
chasse il se deschargea de sa passion, &
luy dit.

A la mienne volonté que ie fusse vne
fleche, vn reth où vn carquois. A la mien-
ne volonté que ie fusse vn traict, qui
abatist les bestes, afin que Nicee me ma-
niaist souuent, que ie fusse le nerf ou la
corde de l'arc qui luy pend par derriere,
ma Nymphes m'appuyeroit contre son
sein quand elle tire, ô belle Nicee!
c'est à bon droict que tu fais estat de
tes flesches, elles sont plus heureuses que
le pauvre Hymenee, pource qu'elles
touchent tes mains. Je porte enuie à tes
reths: il est bien vray que ie n'en ay pas
vn si grand desir que de ton arc, & de tes
traicts. A la mienne volonté qu'elle se
baignast à la fontaine aux grandes cha-
leurs du iour, au retour de la chasse, afin
que ie la visse à plaisir en son naturel, &
sans chemise. Venus ne m'a point enco-
re fauorisé en ceste occasion, & si ie ne
sçay

ſçay pourquoy ie n'ay point commis de
 faute en Trinacie, ie ne garde point les
 bœufs du Soleil dās les mōtagnes. Mon
 peren'a point publié les amours qu'elle
 pratiquoit avec Mars. O Nymphe! ne
 me fuis point encore que ie ſois Berger,
 ma condition n'a point eſté ſi rabaiſſee,
 qu'elle ne merite la couche des Deeſſes,
 Tithon dont la beauté dōna de l'amour
 à la belle Aurore, n'eſtoit-il pas berger?
 Ganimede que Iupiter fit enleuer par vn
 Aigle, n'auoit-il pas eſté de meſme. Ma
 Nymphe, viens avec moy, cōduits mon
 troupeau, & ie t'appelleray la plus belle,
 & a plus deſirable que la Lune, quand
 elle eſt avec ſon Endymon. Quitte ton
 dard, & prends mes aiguillons, afin que
 l'on die qu'une Venus mene les bœufs
 d'Hymnee. La chaleur de l'amour luy
 donna ce mouuemēt, & le pauvre Hym-
 nee creut l'auoir eſmeuë par ſō diſcours,
 comme ſon ſilence le ſembloit teſmoi-
 gner. Ce paſteur euſt de l'eſperāce en ſes
 bonnes graces, & pour l'obliger d'auan-
 tage, il ſe chargea de ſes dards, & de ſon
 carquois, baiſa les reths & les preſſa pres
 de ſa poictrine, & dit ſecrettemēt en luy-
 meſme. Arbres & vous Cheſnes, ie vous

cōjure par Venus, dittes-moy pourquoy vous auez refusé vostre séjour à ceste mymphe au deluge de Pyrrha, & de Deucaliō, & toy Daphné, parle à moi, à la mienne volonté que Nicee eut donné de l'amour à phœbus, ie croy qu'il eust eu plus de faueur, & n'eust pas esté contraint de la rechercher dans les veines insensibles du laurier. Ces deuoirs & ces seruices ne la pûrent iamais flechir. Il s'approche de sa Nymphé, & châte vn Epitálame en la faueur de ses amours, en témoignant sa passion. Mais Nicee se riant de son berger, luy dit: Vous auez de la grace, & de l'aduantage à entōner vos affections sur vostre Musette: mais ceste Musique n'a pas toujours reussi à leurs amoureux, Pan n'a rien oublié sur ce sujet pour la belle Echo, & s'il n'en a point receu de courtoisie. Helas! que le Berger qui ay-moit Daphnie y a employé de temps, & si elle ne luy a pas esté plus fauorable, au contraire, elle se cachoit d'autant plus dās les cauernes des rochers, pour euit le charme de ses chansons. Helas! que Daphné a presté l'aureille au luth d'Apollō, sans l'obliger de ses bōnes graces.

Ce discours fut suiui d'vne actiō, qui donna vn certain presage de la cruauté

dont Nicee deuoit vser enuers luy. Elle
branla son dard contre Hymnee d'une
façon Martiale & rude : mais ce berger
à qui l'amour faisoit autāt de peine, que
ceste action luy dōnoit de doute, ne sça-
chant sa volōté, luy dit en colere. Belle
Nicee, tuez-moy de vostre main, ie l'au-
ray pour agreable. Ma mort sera ma vie.
Ie ne crains point vos dards, ô Nymphé
rebelle à l'amour, i'en desire les ataintes,
afin d'estre deliuré du mal qui me tour-
mēte. Que i'esteigne le feu qui me brusle.
ie mourray volontiers, & la mort me sera
douce. Si vous voulez me frapper de vos
fleches, apres auoir esprouué celles de
Venus, ie vous coniure par ceste Deesse,
de ne me frapper point à la teste, mais ti-
rez-les contre mon cœur, qui a desja re-
ceu celles de Cupidon. Si vous auez pour
agreable de me perdre, tuez-moy, mise-
rable que ie suis en amour, bandez vostre
arc, & ne vous espargnez pas, mais amol-
lissez vn peu la dūreté de son fer. Ie seray
le but fatal de vos yeux & de vostre arc.
Que i'auray de cōtētemēt de vous voir
en la posture pour me descocher vne
flesche mortelle. Ie meurs de la douce
mort de l'amour, ie ne la crains point,

ie n'apprehẽde point la pointe aceree de
vos jauelots, voyãt vos belles mains em-
ployees à ces offices funeste : Percez-
moy donc de vos traicts, i'en ay receu de
plus cruels ; & de plus dangereux. Hé
belle Nymphé! quãd vous m'aurez tué,
ne bruslez point mon corps ; i'ay vn feu
qui me cõsomme. Enterrez moy de vos
mains propres, m'obligeant de cestefa-
ueur inutile à vn amoureux, afin quel'on
die. La Nymphé à pris pitié de celuy
qu'elle a perdu. Ne me prisez pas ma flu-
ste ny mon baston, mettez vostre dard
tout ensanglanté de mon sang sur mon
tombeau, parsemez-le de Narcisse, &
de Passe-velours : que ces fleurs y croif-
sent, & que l'Anemon tesmoigne l'acci-
dent de la mort arriüée au pauvre Hym-
nee, avant le temps. Si la mer impitoya-
ble, ou si les rochers insensibles ne vous
ont point engendré. Respandez vn peu
de larmes, qui soient seulement suffisan-
tes d'aroser vos yeux, & grauez de vostre
main cet Epitaphe dessus mon tombeau.

Icy gist le Berger Hymnee, que la
Nymphé Nicree trop cruelle a tué &
enseuely.

A ce desespoir amoureux, la Nymphé

se fascha contre luy, elle ouurit son carquois, & luy tira de sang froid vne fleche qui luy perça la gorge, & luy interrompit son discours qu'il vouloit continuer. Ce Berger ne mourut pas sans estre regretté des Druides, & des Oreades, Rhyndacie mōstra qu'elle en auoit bien du ressentiment, & blasma la perfidie de Nicee. Les Najades respandirent abondance de larmes. Niobé redoubla ses pleurs, Abarbarer qui n'auoit point encore sprouué les pointes de l'amour, luy rapprochoit ceste cruauté en la compagnie des autres Nymphes, jamais Phaëthon ne fut tant regretté des Helindes, Cupidon n'approuua pas ceste procedure infidele, & jettant son arc de despit, il iura qu'elle s'en repentiroit, la rendāt esclauue de Bacchus, apres auoir mesprisé celuy qui l'aymoit si passionnément. Rhee deplora l'accident d'Hymnee, & pareillement Echo. Les arbres mesmes en eurent du dueil, & dirent.

Qu'as-tu faict pauvre Berger? Venus net'a-elle iamais gratifié, Diane a-elle esté tousiours cruelle, elle a veu Adraustes tout ensanglanté, elle a veu Adrauste tout mort, & la monstre à Venus, accusant

Cupidon de rigueur, & a recueilli les larmes des taureaux qui pleuroient.

Son troupeau ne fut pas insensible à cet infortuné, les vaches regrettoient leur pastre en mugissant, & dirēt en chātant avec le refrain.

Nostre berger est mort, la Nymphē qu'il ay moit tant la tué, elle luy a donné la mort pour recompense de ses seruices, a teint ses dards dans son sang, estignant le flambeau de l'Amour. Nostre berger est mort, la Nymphē qu'il ay moit tāt la tué. Les Nymphes plus courtoises l'ont regretté, la cruelle n'a point escouté les prieres des rochers & les arbres, del'Orme & du Pin, qui disoient, barbare & inhumaine, ne bande point ton arc, ne tuē point ton Berger la terre en gēmi, les animaux, mesme les Ours, & les Lyōs luy enseignoient la douceur en le regrettās. Nostre Berger est mort, la Nymphē qu'il ay moit tant la tué. Et vous bœufs, cherchez d'autres lieux, & d'autres montagnes, car mon berger est mort de la main d'une Nymphē dans vn bocage. Adieu prairie, adieu pastis. Nostre berger est mort, la Nymphē qu'il ay moit tant la

tué. Adieu campagnes, vallons & fontaines. Nostre Berger est mort, la Nymphé qu'il auoit tant aymee la tué. Adieu Náyades, adieu Hamadriades, adieu Pan, adieu Phœbus. A qui reuiendra ce flagellet, & toy Cupidon, ne touche point à ton carquois, & ne jouë point de cet instrument: car le berger qui y auoit de l'auantage est mort. Apollon a monstté à sa sœur l'innocence d'Hymnée, & Diane encore qu'elle ne sçache que c'est que de l'amour, en a pleuré son mal-heur.

Cupidon pour venger la mort d'Hymnee faict rencontrer Nicee entre les mains de Bacchus, qui la poursuiuit à la chasse. Nicee s'enyure, & Bacchus la viole. Hymnee luy apparoit, & luy reproche sa perfidie. Elle se desespera, & Bacchus se ressouuenant d'elle, faict bastir une ville qu'il appella Nicee.

LIVRE SEIZIESME.



A mort de ce Berger ne fut point impunie, Cupidon qui auoit de iustes ressentimens de ce crime, se voulut vëger. Pour cet effect il se delibera d'aller avec son carquois en la fontaine où Nicee souloit se baigner aux grandes chaleurs du jour, apres auoir passé le temps à la chasse. Ceste Nymphe ne manqua pas de s'y rencontrer : Comme elle prenoit là ses plaisirs & contentements, Bacchus y arriua par aduanture, où il veid

la beauté de Nicee, & Cupidon luy décocha en ce point vne fleche amoureuse, qui luy donna de viues atteintes. Il la suiuoit en tous les lieux où elle alloit: tantost il admiroit sa chevelure flottante au gré des vents, tantost il consideroit l'esclat de son visage, qu'il comparoit avec celuy de la Lune: ne prenant plus de plaisir avec les Satyres, leur insolence luy estoit desagreable, leur liberté offensoit la seruitude de la beauté qui le possedoit. La compagnie des Bacchantes luy estoit ennuyeuse, & sa passion luy fit dire ces mots en l'air: I'iray où elle voudra aller, ie suiuray son arc, son carquois & ses fleches, & où l'Amour la conduira: Ie prendray plaisir à manier ses rets & ses panneaux, & chasseray avec elle: Ie luy ayderay à courir le Cerf: mais si sa discourtoise me rejette en Amazone guerriere, & comme ennemie des carresses amoureuses, ie la flechiray par prieres, & la flatteray de la main, non pas comme esleuant vn rameau d'oliuier: car cet arbre est vierge, & consacré à Minerue, qui ne reçoit pas volontiers les offres de l'amour: Mais comme si en maniant vne grappe de

raisin pendant de la vigne. Si elle se fache, qu'elle ne me perce pas de sa pique: mais qu'elle m'offense plustost de son arc. Ceste playe me sera agreable, à cause du rapport qu'elle aura avec celle qui a blessé mon ame: Si elle ne veut pas me perdre, qu'elle me tienne captif par les cheueux, me trainant en vne seruitude rigoureuse. La beauté de ses mains consolera le malheur de ma condition: Car elle a eu en partage toutes les faueurs du Ciel, qui sont departies aux autres Nymphes. Voicy vne Aurore plus belle. La Lune ne luy est point comparable; car elle a ses eclypses & ses defauts: mais Nicee est tousiours en son plain & en sa perfection. Autrefois l'Amour m'auoit follement persuadé de prendre des figures estrangeres pour son seruice, & me fusse facilement laissé emporter aux commoditez de ses changemens, si les reproches honteux que l'on faict à mon pere, ne m'en eussent empesché: Mais si ceste fantaisie m'y eust flechy, au prejudice de l'honneur, ie conduirois Nicee par les orages de la mer, comme Europe. Elle tiendrait mes cornes à

deux mains, pour se garantir du naufrage. Je voudrois estre vn amoureux aislé, afin que ie la peusse enleuer comme Iupiter rait *Ægine*: Je ne ferois pas si cruel que de brusler le pere de celle que i'aymerois, luy faisant vn si funeste present pour son doüaire. Je voudrois estre vn oyseau, aussi bien elle ayme les fleches aislees: Je desirerois plustost qu'elle fust vne autre *Danaé*, si i'estois vne pluye d'or, ie me respandrois en son sein. N'est-il pas raisonnable que *Nicee* qui reluit comme l'or, ait vn mary tout d'or?

La violence de son amour mit fin à son discours, & s'en alla pourmener en vn jardin, où il vid des fleurs dont la couleur & la beauté se rapportoient à celle de sa Nymphe: Ces objects l'esmeurent, & luy firent encor dire.

Belle *Nicee*, à peine ay-je veu en ces iardins aucune beauté qui fust comparable à la vostre: Quoy l'avez-vous changee en fleurs? I'ay manié les roses, & i'ay veu que c'estoient vos joües, mais encor la seule blancheur n'y est pas: La rougeur d'un passe-ve-

lours la colore: i'ay touché les lys, ie pensois que ce fussent vos mains: i'ay cueilly vn hyacinthe, ie croyois voir vos cheueux. O belle Nicree, receuez-moy pour compagnon de vostre chasse, si vous voulez ie porteray vos rhets, vos paneaux, vostre arc, & tout l'attirail necessaire à cet exercice, & si ie ne veux point demander secours à mes Satyres. Apollon n'a-il pas porté le carquois de Cyrene? Mais quelle enuie aura-on contre moy, si i'ay le bien de la suiure? Ie ne me laisseray point de ces fardeaux, quand mesme il la faudroit porter sur mes espaulles: Ie ne suis pas plus grãd que mon pere, il a autrefois porté Europe sur son dos. Belle Nymphes, quels charmes & quels attraiçts ont les forests, pour vous y arrester, pour y borner vos delices & vos contentemens? Espargnez vostre beauté, gardez que la fatigue ne ternisse vostre teint, & que la duresse de la terre qui vous sert de couche n'altère vostre santé. Si vous voulez venir en mon palais, ie vous feray dresser vne couche, & i'estendray dessus des peaux de Pantheres & de Lyons, & vous reposerez là à vostre ayse. Que si vous-vous

plaisez à chasser avec la meutte des chiens, ie vous donneray ceux dont Pan faict estat : & si vous en estes grandemēt curieuse, ie les enuoyeray à Sparte, pour les faire nourrir par Apollon Carnien. Ie feray mesme venir ceux qu'Astree possede, ie vous accommoderay de rhets & de paneaux pour la chasse. Si vous craignez les ardeurs extrêmes de la Canicule, ie planteray la vigne sur vostre liēt, qui vous rendra vne ombre agreable, & des fruiets en abondance. Si vous apprehendez les rayons du Soleil, oignez vostre face d'huile, de peur que la chaleur ne vous gaste le teint : Et de peur que les vents ne partroubent vos cheueux, entourez vostre teste de roses & d'hyacinthe. Pour accroistre l'hōneur du seruice quel'on vous doit, ie vous donneray vn grand nombre d'Indiens, qui seront vos valets de chambre. Mais à quel propos vous presenter ceste nation barbare? l'Aurore s'estimera bien-heureuse de vous seruir. Belle Nicree, vous estes plus belle que Diane: Ie vous ameneray soixante personnes qui sont fort bien instruites aux ballets & aux danses, afin que vous ayez vne suite pareille à celle

de Diane, & qu'elle ne s'aduantage par dessus vous, à cause qu'elle est la Deesse de la chasse. Je vous donneray les Charites, obligez-moy dont de quelque faueur, & vous résolvez de venir en ma couche apres les labeurs de la chasse, afin que vous foyez vne Diane dans les forêts, & vne Venus dans le liect. N'est-ce pas de l'honneur de chasser avec Bacchus? Si la vertu & le courage vous portent aux armées, ie vous conduiray à la guerre que i'ay entreprise contre les Indiens: Vous les subjuguerez sans qu'ils fassent resistance, quand mesme Minerue les secoureroit. Si vous voulez mon dard & mes armes; prenez-les, & allez à la chasse des Cerfs: Si vous desirez conduire mon chariot, il est à vostre seruice, attellez-y les Pantheres & les Lyons.

Bacchus atteint de ceste passion, pourfuiuoit sa Nymphe, luy criant: Belle Nicee, attends Bacchus ton mary. Mais elle se fascha, & luy respondit:

Fais ce discours à quelque Nymphe credule qui t'ayme: persuade ta passion & tes bonnes volontez à Minerue: oblige Diane à ton amour: & apres imagine

toy quetu as gaigné Nicee. Ie suis compagne de ces deux Deesses : Mais si Minerve se monstre rebelle, & si Diane fuit ta rencontre, ne recherche plus l'amour de Nicee : car ie ne te verray point de bon œil à la chasse. Deporte-toy de ta poursuite, de peur que tu ne ressenties les effets de mes disgraces, aussi bien qu'Hymnee. Ie blesseray Bacchus, encore qu'il s'estime invulnérable : ie le tueray, encor qu'il pense estre immortel. Si ton corps est à l'espreuve de l'espee & de la picque. Ie te garrotteray, & tu seras en pareille peine que Mars. Ie te tiendray dans les entraues par l'espace de trois mois, tant que tu ayes renoncé à mon amour. Ne t'ingere dōc pas de toucher mon carquois, i'ay vn arc, & tu as vn thyrses : I'employe mes fleches cōtre les Lyons, accompagnant Diane : & toy tu chasse les Cerfs avec Venus. Ta recherche ne m'agree point, encore que tu sois fils de Iupiter : Si ie voulois auoir vn mary lasche de courage, sās vertu, & effeminé, ie prendrois Bacchus. Il m'en faut vn qui soit genereux, qui soit vn Mars, qui ait vne espee comme i'ay vn arc : Mais n'ayāt point d'intention de plaire mcsme

aux Dieux: Je refuserois Iupiter quand il me demanderoit. Cherche donc, ô Bacchus, vne autre Nymphé: Pourquoi te hastes-tu? tu cours comme Apollon quand il poursuivoit Daphné: tu me suis comme Vulcan couroit apres Venus. Pourquoi te hastes-tu, ta course est inutile? Ne sçais-tu pas bien que les fouliers de chasse y sont plus propres que les brodequins.

Bacchus iugeant à ces desdains & à ces refus, qu'elle estoit trop rebelle, la quitta, neantmoins la passion qui le tourmentoit, ne peut luy faire oublier celle qui le possedoit. Il la cherchoit tousiours dans les montagnes, aux lieux où elle hâtoit: Il auoit vn chien que Pan luy auoit donné, qui le suiuoit tousiours, & pource qu'il l'estimoit de bon instinct il luy parla de la sorte.

Pourquoy accompagnes-tu Bacchus? pourquoy chasses-tu avec celuy qui poursuit vne Nymphé? Es-tu le protecteur de nos amours? Cherche la belle Nicree, tu n'as pas laissé Bacchus seul & vagabond dans les montagnes: Aye pitié de luy, recherche pour son seruice les grôtes des Nymphes, trouuaillant pour le bien

bien de ton maistre : Ie te recompēseray
de tes labeurs, & t'enleueray au Ciel,
te donnant vne estoille senblable à cel-
le de la Canicule : Ie te feray citoyen du
Ciel, te logeāt auprès du Chien celeste,
afin que tu meurisse les raisins en la sai-
son aussi bien que luy : Quel mal peut-il y
auoir quād il y aura trois chiens au Ciel ?
Si tu as compassion d'un amoureux, fais
des reproches à ma cruelle de ce qu'elle
qui est femme mortelle, fuit les embras-
semens d'un Dieu immortel. Accuse
Adonis & Venus, & poursuis la belle
Echo, de peur qu'elle ne refroidisse en-
core dauantage le cœur de Nicee : Ne la
laisse pas toute seule avec Pan, craignant
qu'il ne la flechisse à l'amour par pro-
messe. Si tu recognois quelque mouue-
ment fauorable, viens en secret l'annoncer
à ton maistre, en abayant. I'employeray
un autre de ta meute à la chasse des San-
gliers, & des Lyons. O Pan, ie t'estime
bien-heureux de ce que tes chiens ont
l'instinct de chasser à l'amour. Et toy, ô
Fortune, qui te jouë des hommes, si tu
as pouuoir sur cet animal, commande
luy qu'apres auoir rendu seruice à Pan, il
se mette en deuoir de m'obliger. Et v

arbres, & rochers, faites des reproches à Nicee: Les chiens sont esmeus de compassion, & ma Nymphé est insensible: ces animaux ont quelque espece de raison, que Iupiter leur a donnée: mais aussi il leur a dénié la parole.

Comme il faisoit ces plaintes, appuyé sur vn arbre, Melia qui estoit à l'ombrage, cachée dans les herbes, entendant le discours passionné de Bacchus, & luy dit:

Bacchus, retire-toy d'icy, les Nymphes chassent aux bestes de la forest avec Diane, & toy aux iardins de Venus. N'est-ce pas merueille de voir celuy qui a tant de vanité de son merite sous le joug & la captiuité d'une simple fille? Il a subjugué les Indes, & il est vaincu de Nicee. Ton pere Iupiter n'a point joiuy des Deesses par les charmes de ses persuasions: Il n'a point flatté Semele, que lors qu'il a receu de la courtoisie: & n'a point caressé Danaë avec tant de ceremonie, que lors qu'il l'a recogneuë fauorable à ses desseins. Tu n'ignores pas les vaines amours d'Ixion, d'Antrope, & des Satyres, qui auoient desguisé leur sexe.

Ceste Nymphé se retira dans le bocca-

ge. Cependant Bacchus pourſuiuoit Nicee avec la meſme paſſion dans les montagnes: mais elle s'eſſorçoit de l'eſgarer dans les deſtours, & quelquefois elle ſe deſroboit de ſes yeux.

La chaleur du Soleil l'eſchauffoit, & fatigue de la courſe luy donnoit de la ſoiſ. Elle voulut boire à la fontaine que Bacchus auoit changee en vin; ne ſachant point la vertu de ceſte liqueur, & en beut à cœur ſaoul: à l'inſtant elle ſe troubla. La teſte luy commença à tourner, & veit deux fontaines & deux rochers, & les fumees l'endormirēt. Cupidon l'ayant aperceuë la mōſtra à Bacchus. Il ne māqua pas de s'approcher ſās faire bruit, de peur qu'elle ne ſ'eſueillaſt recueillant la fleur de ſa virginité en cet eſtat. La terre produiſit à l'inſtāt de l'herbe ſuffiſamment pour en faire vne couche en faueur de Bacchus, la vigne eſtendit ſon pāpre plein de raiſins, avec abondance de fueilles, qui faiſoient vne ombre agreable.

Nicee fut violee dans le ſommeil de ceſte façon. Les foreſts luy chantoient vn broüillant vn Epitalame, que l'Echo

faisoit resonner en ses cauernes. Cependant Hymnee qui estoit mort luy apparut en songe, & la troublant de visions, luy dit en hayne de sa cruauté.

Nicee, il y a vne Deité qui punit la perfidie des Amans, & qui venge l'innocence de ceux qui ont trop aymé. Si tu as follemēt fuy les embrassemens d'Hymnee, tu es prouue la violence de Bacchus: Je te poursuiuois par voyes legitimes, & maintenāt vn autre jouit de toy sans ton consentement: Tu m'as donné le sommeil de la mort, & le sommeil a corrompu ta virginité: Tu as bien eu le courage de voir mon sang ruisseler de mon corps en riant, & maintenant tu vois celuy qui se respend à la perte de l'Hymen en pleurant.

Le Spectre tint ce discours, & à l'instant il s'esuanoüit en l'air. Le bruit de cerapt courut par tout, & donna de la jalousie à Pan, à cause que ceste liqueur auoit facilité sa jouissance. Vn Satyre passionné d'amour, ayant veu ces actions, dit tout haut:

Pan a des desseins pour l'Amour qui neluy ont pas reussy: mais ie croy qu'il jouyra de la belle Echo par ses artifices,

& qu'il aura du secours de ses ruses. O Pan, viens icy à ceste fontaine, quitte ta condition de Berger, laisse ta houlette & tes troupeaux: Qu'esperes-tu des Pastres & des bois? viens prendre de ce Nectar pour endormir les Bergeres, & pour en jouir à plaisir.

Pan receut cet aduis d'un visage riant, & luy respondit: A la mienne volôté que mon pere m'eust enseigné les inuentions d'vser du vin à mon aduantage, & de trôper les Nymphes: I'accôplirois vne grande partie de mes vœux, & ie prendrois plaisir à jouir d'Echo en son yuressse. Arriere les prairies & les valles herbuës, puisque le nectar de ceste fontaine charme les Nymphes rebelles. Bacchus a trouué en sa vigne vne belle inuention pour consoler les amoureux. Arriere le plus doux lait de nos chevres, car il n'a pas la vertu d'affoupir les sens, ny de captiuer les Nymphes. Moy seul, ô Venus, ie suis sans faueur. Helas Syringue a rejeté mes embrassemens, & a fuy ma poursuite. Elle chante la courtoisie triomphante qu'il a rauy à Nicee, & l'Echo luy respond:

Bacchus a esté seul heureux en sa pra-

tique, en jouïssant de celle qui le mes-
prisoit : mais aussi il l'a trompee avec le
vin.

Pan tesmoigna par ces paroles son re-
gret & sa jalousie. Bacchus apres auoir
pleinement satisfait à sa passion, quitta
Nicee. La Nymphe s'esueilla en sursaut,
se faschant contre le sommeil, la fontai-
ne, Venus, & Bacchus, & ayant ouy le
reste des chansons que les Oreades
auoient entonnees du rapt de Nicee, elle
se print à pleurer, & ayant aduisé sa cou-
che parsemee de fleurs, & ombragee de
pampres & de raisins, & couuertes de
peaux de Pantheres: elle iugea à ces mar-
ques que Bacchus l'auoit violee, & sen-
tit vne douleur au ventre, qui tesmoi-
gnoit l'effort quel'on y auoit fait. Elle se
deschira le visage, s'arracha les cheueux,
& en se frappant elle dict :

Helas que ie suis miserable pour ma
virginité, que la liqueur de Bacchus m'a
desrobee : Que ie suis miserable pour ma
virginité, que le sommeil amoureux m'a
ostee : que ie suis miserable pour ma vir-
ginité, que Bacchus m'a corrompuë.
Que les eauës empoisonnees des Hy-
driades se perdent malheureusement :

que ma couche soit abyfmee aux enfers.
Mais, ô Nymphes Hamadriades, dittes-
moy, qu'est-ce que i'accuseray, le som-
meil, l'Amour, l'artifice, & le vin, m'ont
despucelée? Mais que la belle Echo ne
m'en dōnoit-elle aduis? que ne me disoit-
elle à l'oreille que ie n'entendisse point
les raisons de Bacchus. Les arbres ont
esté muets en ceste occasion si importā-
te: Le pin n'a point brüy, & le laurier ne
m'a point dit: Belle Nymphes, garde-toy
bien de boire de ceste fontaine.

Nicee fit ces plaintes en pleurant, car
la douleur la pressoit de telle sorte, que
quelquefois elle vouloit s'abandonner à
vne mort violente: tantost elle se reso-
luoit de se tuer avec vne espee: tantost
de se precipiter du haut d'un rocher.
Et ayant prins resolution de se venger,
elle vint à la fontaine pour l'empoi-
sonner, ou la faire perdre sous terre:
mais Bacchus l'auoit changee en eau:
Alors elle pria Iupiter & Diane de
seicher les ruisseaux, & de ruiner en-
tierement le séjour des Nayades. El-
le jettoit souuent les yeux du co-
sté des montagnes, pour veoir si el-
le ne pourroit point surprendre

rique, en jouïssant de celle qui le mes-
prisoit: mais aussi il l'a trompée avec le
vin.

Pan tesmoigna par ces paroles son re-
gret & sa jalousie. Bacchus apres auoir
pleinement satisfait à sa passion, quitta
Nicee. La Nymphe s'esueilla en sursaut,
se faschant contre le sommeil, la fontai-
ne, Venus, & Bacchus, & ayant ouy le
reste des chansons que les Oreades
auoient entonnees du rapt de Nicee, elle
se print à pleurer, & ayant aduisé sa cou-
che parsemée de fleurs, & ombragée de
pampres & de raisins, & couuertes de
peaux de Pantheres: elle iugea à ces mar-
ques que Bacchus l'auoit violee, & fen-
tit vne douleur au ventre, qui tesmoi-
gnoit l'effort quel'on y auoit fait. Elle se
deschira le visage, s'arracha les cheueux,
& en se frappant elle dict:

Helas que ie suis miserable pour ma
virginité, que la liqueur de Bacchus m'a
desrobee: Que ie suis miserable pour ma
virginité, que le sommeil amoureux m'a
ostee: que ie suis miserable pour ma vir-
ginité, que Bacchus m'a corrompue.
Que les eauës empoisonnees des Hy-
driades se perdent malheureusement:


que ma couche soit abyfmee aux enfers. Mais, ô Nymphes Hamadriades, dittes-moy, qu'est-ce que i'accuseray, le sommeil, l'Amour, l'artifice, & le vin, m'ont despucelée? Mais que la belle Echo ne m'en dōnoit-elle aduis? que ne me disoit-elle à l'oreille que ie n'entendisse point les raisons de Bacchus. Les arbres ont esté muets en ceste occasion si importāte: Le pin n'a point brüy, & le laurier ne m'a point dit: Belle Nymphes, garde-toy bien de boire de ceste fontaine.

Nicee fit ces plaintes en pleurant, car la douleur la pressoit de telle sorte, que quelquefois elle vouloit s'abandonner à vne mort violente: tantost elle se resoluoit de se tuer avec vne espee: tantost de se precipiter du haut d'un rocher. Et ayant prins resolution de se venger, elle vint à la fontaine pour l'empoisonner, ou la faire perdre sous terre: mais Bacchus l'auoit changee en eau: Alors elle pria Iupiter & Diane de seicher les ruisseaux, & de ruiner entierement le sejour des Nayades. Elle jettoit souuent les yeux du costé des montagnes, pour veoir si elle ne pourroit point surprendre

Bacchus : car elle auoit prins le dessein de le tuer, & mesme de brusler les vignes. Souuentefois en le suiuant pas à pas dans les montagnes, elle fraploit le vent & aduançoit sa picque en l'air croyant l'offencer : mais c'estoit en vain, car elle ne le pût iamais rencontrer. En fin elle se fascha fort asprement contre la fontaine, & jura qu'elle ne boiroit iamais de ceste eau, qu'elle ne reposeroit iamais les nuicts en tesmoignage de son regret, qu'elle ne dormiroit iamais dans les cāpagnes, & s'irrita contre les chiens de ce qu'ils ne l'auoient pas defenduë de ce rapt. En fin elle se desespera, & se pendit, cherchant dans la mort le remede de son mal, craignant les reproches de ses compagnes, & de paroistre deuant Diane. Apres auoir esté abusee, elle deuint grosse, & enfanta vne fille quel'on appella Telethè, qui eut de grandes inclinations aux plaisirs de la chasse. Bacchus en ressouuenance de sa Nymphe fit bastir vne belle ville auprès de la fontaine, & la nomma Nicee. Ce qu'il fit apres la premiere guerre des Indes.

Bacchus apres auoir subjugué un grand nombre d'Indiens yures, arriue en la maison de Bronchus en passant chemin, & luy donne inuention de planter la vigne. Astrace descouure à Orontel l'artifice dont Bacchus auoit usé en la défaicte des Indiens. Oronte voyant les progrès que l'armee de Bacchus faisoit, se desespera, & se tua de son espee.

LIVRE DIX-SEPTIESME.

 E sommeil, & l'enyurement des Indiens ne finirent pas la guerre, car Bacchus fut contraint de rendre vn cōbat, & de resister aux efforts de Deriades, qui commandoit en ce pays. Il sortit de la ville de Nicee, & oublia ses larcins amoureux, prenant la cōduitte de toute l'armee. Ses regimens entourerēt son chariot & esclattoit, paroissant au milieu des soldats, & obscur-

cissoit leur lumiere. Vous eussiez dit en le voyant que c'estoit vn Soleil radieux, accompagné d'estoilles. Il n'estoit point armé à l'ordinaire d'espee, ny de picque, mais d'un baston de lierre, & de ceps de vigne, dont il menassoit tout le monde, enyurant de sa liqueur tout l'Orient. Les compagnies d'ordonnance le suiuoient tres-volontiers, se ressouuenans de la victoire qu'ils auoient desia remportee sans coup frapper. Ceste esperance leur donnoit beaucoup de courage. Les Silenes tardifs ayant entendu le bruit que faisoient les Munallandes en dansant, vindrent promptement pour emporter quelque Indien assoupy de sommeil. Bacchus passa en la contree d'Alybe, où est le fleuve de Gendie, riche en ses sablons d'or, accompagné de l'infanterie des Satyres. La nuit estant venue, il prit le couuert en la pauvre cabane de Bronchus: car ce n'estoit pas vn Palais, ny vn somptueux edifice pour recevoir vn Roy avec sa suite. Ce païsan le traitta à la rustique de lait & de fromage, tira vn agneau de son estable qu'il voulut tuer pour soupper: mais il le remercia. Il se tenoit deuant luy en grande

obeyffance, prest à le seruir, & le con-
uoit des yeux avec vn estonnement stu-
pide & trouble: mais comme il voit qu'il
ne vouloit pas qu'on luy preparast de la
viande, il meit la nappe, & la couurit de
simples alimens, le traittant comme au-
trefois Cleonee receut Hercule aupres
de Molorche. Le pauvre Bronchus ap-
porta sur la table vn fromage gras, d'un
œil riant, & d'une façon gaillarde, Bac-
chus rioit de sa simplicité, & mangea
avec vn grand appetit, meditant en luy
mesme, que la nature est contente de
peu, & que ces viandes estoient acqui-
ses doucement, sans peine, & sans tyran-
nie. Il admira la structure de ceste mai-
sonnette, comme la Nature l'auoit ca-
uee, l'ayant distinguee en plusieurs lieux
pour la commodité du logement, mais
apres qu'il eust entierement pris sa re-
fection, Bronchus espris d'une fureur
Bachicque, prit son flageolet, & com-
mença d'intonner quelque chanson
en l'honneur de son hoste. Bacchus
prenoit vn extreme plaisir à ceste har-
monie, & à l'instant luy presenta vne
couppe toute pleine de vin, & luy dit
en ces mots.

Mon bon vieillard prens ceste liqueur qui oste tous les soings & les plus cuisantes afflictions. Ayant ceste boisson tu n'as plus besoing de laiët, assure-toy qu'elle est le doux nectar des hōmes, & qu'elle est la viue image de l'Ambrosie, que Ganymede verse aux Dieux dans le ciel. Le laiët des chevres ne rejouit point & ne faiët point oublier les ennemis.

Bacchus luy donna la coupe, & luy enseigna de planter la vigne, & à la cultiver, & sortit de la maison de Bronchus luy ayant faiët ces recompenses. Cependant les Satyres s'assembloient en la campagne pour combattre des Indiens, Thyrsene jouioit de la trompette, animant furieusement leur courage à la charge, il les inuitoit à boire, afin que la chaleur, & la fumee le precipitassent dans la presse. Mais Astrane qui estoit jalouse des victoires de Bacchus, aduertit Oronte du dessein des Satyres, & des artifices dont ils auoient vsé à leur grand desaduantage, & luy dit en ces termes.

Oronte, escoute les conseils, & les aduis que ie te veux donner, & ne tefasche point, quand tu les auras receus. Il faut que tu sçaches la cause de la victoire que

Bacchus a remportee. Le combat estoit pour nous, mais nos soldats furent deceus, les regimens de Satyres, & les compagnies des Bossarides commençoient à bransler: mais comme il veid ses gens s'en aller en desroute; attendu qu'ils ne peurent se defendre, ny d'espees, ny d'arcs, ny de picques, il s'aduisa d'une grãde ruse. Il conuertit vne fontaine en vin, & les fit boire de ceste liqueur, qui leur osta le iugement & la raison; tous ceux qui en goustèrent perdirent la ressouuenance du combat, s'amusans à danser & à fluster. Vn profond sommeil les faisoit, & ne peurent se garantir de la mort, les vns estoient estendus sur la terre à digerer leur vin: les autres faisoient des insolences; & tous en general furent la proye & les captifs des Bacchantes, qui les emporterent sur leurs dos, sans contredit, & sans aucune resistance. Ceux que nous auons armé maintenant n'ont point encore beu de ceste liqueur si dangereuse, & ne sont point tombez dans la rigoureuse seruitude des Satyres. Quant à moy, i'estois seul cõtre tous les soldats, exempt de ces assoupissemẽs, & libre de ces liens, i'ay tousiours fu les approches

de ceste fontaine, garde-toy donc bien de boire, de peur que les ennemis ne te prennent tout vif, mesme apres la victoire: car c'est là vne autre ruse de guerre. Oronte ayant receu cet aduis se facha grandement, & redoublât son courage & sa generosité; il se ietta à corps perdu dans la meslee. Les Bassarides, & les Centaures les soustenoiēt viuement, ils enleuerent vne partie d'vne montagne, & la lancerent aux ennemis, les Capripedes ne s'y espargnerent pas, ils prirent vn Indien par la teste, & le deschirent avec leurs ongles, luy ouurant le ventre, & en enfourcherent vn autre avec la pointe de leur corne, le faisant piroüetter en l'air. Vn autre des Satyres abattoit les Indiens, comme celuy qui moissonne les bleds en la saison, les entassans les vns sur les autres, comme des faisceaux de paille. Il môstra à Bachus ses cornes toutes pleines du sang des ennemis, & luy offrit en sacrifice, en fin ils firent vn si furieux carnage, qu'ils enyurerent les parques. Pan n'estoit pas grandement esloigné de là, il en frappa vn de sa corne, qu'il luy força sa cuirasse, luy perçant le ventre d'outre en outre, vn autre

yarriua , qui donna vn si furieux coup, qu'il diuisa le coupeau de la montagne en deux. Oronte qui voyoit que les Satyres faisoient tant d'execution , iugea qu'il estoit à propos de donner courage à ses gens , de peur qu'ils ne prissent la fuite. A ce subject il leur fit ceste harangue militaire d'une façon superbe & menaçante.

Sus donc compagnons , combattez les Satyres vaillamment , ne craignez point les premiers efforts de ce Bacchus effeminé. Gardez - vous bien de boire de l'eauë de la fontaine, de peur que l'assoupissement ne vous saisisse, & que son poison ne vous abatte comme les autres qui sont morts ou captifs, de peur que le sommeil ne nous terrasse apres auoir faict vne si grande perte comme nous auons faict de nos gens. Sus donc combatons vaillamment ce poltron, s'il a du courage qu'il paroisse au combat , & au duel que ie luy presente. Qu'il destruisse mon armee , & qu'il m'attende ainsi que doit faire vn braue & genereux Capitaine en bataille rangée, afin qu'il cognoisse que les Orôtins sont bien duits à la guerre. Qu'il combatte

avec le lierre , & moy avec vne espee ,
quant i'auray vne bonne picque , que
me fera-il avec ses rameaux ? que fera vn
Satyre avec vn baston de chesne : mais
apres la victoire , ie le traineray captif , le
faisant seruiteur d'Oronte. Ce vilain se-
ra contraint de laisser les Indiens , & de
se battre avec Oronte seul à seul ? N'est-
ce pas vn beau guerrier , qui n'a soin que
de godronner les cheueux : il est Capi-
taine des Bassarides , quel secours peut-il
auoir des femmes ? Les Amoureux sca-
uent qu'elles descochent des flesches
qui ne sont pas de cruauté , mais d'amour
& de courtoisie , & que leurs dards ne sôt
pas de Mars ce Dieu cruel de la guerre ,
mais de Venus , dont les yeux & les œil-
lades sont des iauelots. Et apres que
i'auray remporté vne victoire glorieuse ,
ie marieray ses soldats avec les Indien-
nes , les contraignās de force d'en auoir
l'alliance pour agreable.

Oronte apres ce discours de vanité ,
se jetta à corps perdu dans la presse , &
chargea avec tant d'impetuosité , que
personne ne pouuoit le soustenir , non
pas mesme Eurymedon le genereux , ny
Alcon son parent. Celuy qui comman-
doit

doit aux Satyres s'enfuit, & les Silenes le
suiuient. Cependant Oronte estoit en
fougue & en alarme contre les Centau-
res, il prit vn gros cailloux & en frappa
Hylee. Ce coup fut si rude qu'il cheut à
terre, où se debattāt, il rēdit les derniers
souspirs ; apres auoir crié d'vne voix af-
freuse, & semblable à vn mugissement.
Erembee enfoncea sa picque dans le sein
d'Helice, & luy percea la mammelle, el-
le se laissa tomber, & le vent luy retrouf-
sa ses habits ; comme s'il eust voulu en-
core la surcharger de ceste hôte en mou-
rant. Mais Bacchus ayant apperceu que
son armee estoit presque en desroute, &
que les Satyres auoient eu du pire en la
bataille. Il eut peur, criant en leur don-
nant courage d'vne telle façon, que l'on
eut pensé que ce fut esté le bruit de neuf
mille hommes en desordre. Oronte ne
perd point temps, & le poursuit en cet
aduantage, & voulut le combattre, & en-
core qu'il n'y eut point de comparaison
entre luy & Bacchus, non plus qu'entre
vn hōme, & vn Dieu, neantmoins il l'in-
uitoit au combat. Ils se joignirent tous
deux, l'vn ayant vne picque, & l'autre vn
Thyrse. Oronte fit vn grand effort cōtre

la corne de Bacchus, mais ce fut en vain car il ne l'auoit pas semblable à vn taureau subiette au fer, & à estre esbranlee, comme celle d'Achilous, qu'Hercules luy arracha autresfois : mais elle estoit pareille au croissant de la Lune, & à l'espreuue de toutes violences. Oronte ne laissoit pas de poursuiure Bacchus avec ses dards, mais la pointe s'émouffoit cōme s'il eut touché vne image de plomb. Bacchus se mettoit en deuoir de le toucher de son Thyrsé, mais il manquoit par plaisir, & alors Oronte en se moquāt de luy, de ce qu'il se defendoit d'vn baston de lierre, luy dit.

N'est-ce pas là vn braue Capitaine, il conduit des femmes à la guerre, pensant qu'elles soient capables de merester. Si tu as du courage, & que tu sois vaillant, parois à la teste de ton armee, & te defends de ton Thyrsé ? Si tu as de l'aduantage, & de la grace à bouffonner, rends-toy à mon obeyssance, afin que tu ayes l'honneur de me seruir de basteleur, ou te presente au combat, & tu cognoistras quel Capitaine mon pere Hydaspe a engendré. Je veux bien que tu sçaches, que

ie ne suis point de Phrygie, où les hommes n'ont non plus de courage, ny de generosité que des femmes. Je ne suis point vn esclau de Bacchus, sans armes & sans courage, les artifices, & les ruses dont tu vses au defaut de la generosité, ne sauueront pas tes Capitaines, la douceur du vin n'enyurera plus nos soldats. Je cōduirai les Bassarides en mon triomphe, & les Silenes seront esclaves de mon pouuoir, & ie prendray tous les Satyres, les reduisant sous le joug d'une cruelle seruitude.

Bacchus se fascha grandement de ce discours, se frappant la poitrine de son baston. Oronte continuoit ses efforts, & dardoit ses jaelots avec vne grande force, neantmoins ils ne peurent nuire à Bacchus. Ceste resistāce l'estonnant, & se tourna vers l'Orient, dit au Soleil en desespoir.

Soleil qui esclaire au ciel, & qui donne la lumiere à la terre, employe la course de ton chariot pour moy, publie par tout que les Indiens sont reduits sous le joug d'une cruelle seruitude, & que le braue Oronte s'est tué de ses propres mains, & que les Satyres ont eu l'auātage

en la guerre encore qu'ils soiēt coitards, publie | qu'ils ont remporté la victoire par ruse & par artifice , en yurāt nos soldats; que les Bassarides qui ne sont point aguerries, renuersent nos gens avec des fueilles & des rameaux. Si tu as souuenance des amours de Clymene, deliure Oronte, en consideration de la consanguinité, en tant qu'il est issu d'Astris, fille du Soleil , afin que ie ne sois point esclau de celuy qui veut commander au Soleil, & à la terre, & posseder les Indes. Continuë ta course , fauorise nostre party, & enseuelis le pauure Oronte.

Comme il eut faict ses plaintes, il tira son espee, & se l'enfoncea dans le ventre. Oronte fut changé en riuiera, & luy donna son nom, Bacchus le voyant aux abbois luy dit ces paroles de mocquerie.

Oronte rend les derniers souspirs de la vie en terre estrangere, & que ton pere Hydaspete dresse vn tombeau pour cōsoler le mal-heur de ta mort, mes armes sont assez puissantes pour vaincre le reste de ton armee. Tu n'as point beu de l'eau de la fontaine dont tu auois pris tāt de precaution. Le fleuve de vin n'est point cause de ta mort, si tu veux bois en

tout ton saoul: mais il est bien vray que tu n'en as point de besoing estant aux riuieres des enfers, bois donc de l'eau du Cocythe & de Lethé, ayant le ventre plein de celuy a qui tu as donné le nom, afin que tu oublies ton desastre & ta mort.

Oronte fut ainsi metamorphosé en riuere, son corps flottoit dans les eaux, & les riuages le repoussent. Les Nymphes Hydriades deplorèrent son malheur, & luy dresserent vn tombeau avec cet Epitaphe.

Icy gist le Capitaine des Indiens, qui a fait la guerre à Bacchus, & qui s'est tué de ses propres armes.

La mort d'Oronte ne finit pas les combats, aussi la charge n'estoit pas du tout faite, car on n'auoit pas encore sonné la retraite. Les Indiens ne s'étonnerent pas de l'accident de leur Capitaine, ils reprirent vn nouveau courage, se jettans à corps perdu dans les regimens des Silenes, aussi les Satyres & les Bassarides ne s'y esparignoient pas, s'escrimans avec leurs bastons si dextrement, qu'ils renuerferent vne grande partie des ennemis, qui s'estonnerent de l'effort qu'ils leurs faisoient. Leurs robes estoient toutes tein-

tes du sang qui ruisseloit de tous costez, les Bacchantes se rangerent en cercle, pour inuestir les Indiennes, les trompettes resoïnoient hautement, eschauffant & animant les courages au meurtre & au carnage. Tous les soldats de Bacchus se conseruerent si bien, qu'ils ne furent point offensez : Mais les Indiens ressentirent la violence du combat, les dards des ennemis ne produisoient point d'effects, car ils frapportoient les arbres au lieu des hommes, le Pin, & le Laurier consacré à Phœbus receurent les coups, & quelquefois l'air, en fauorisant ces arbres, pour le respect d'Apollon.


Les Satyres gagnerent le champ de bataille, les Indiens demanderent à l'instant composition, ce qui leur fut aussi tost octroyé, & alors l'on sonna la retraite. N'est-ce pas vne grande merueille, quand on considere que les nappes des Cerfs ayent peu resister aux picques & aux jaelots, & que des cuirasses ayent esté forcees avec vne branche de lierre. Astras considerant la desroute deses gens, se rendit & recogneut Bacchus pour euitier la mort. Cependant

Aristee le Chirurgien de l'armee, dont l'experience estoit des long temps cognüe, pēsa les playes de ceux qui auoient esté blesez, particulièrement des bassarides, il leur apposa le Centaure en cataplasme, apres les auoir purgez du sang meurtry, guerissant Emyre, & les autres qui auoient esté offensez, en la main, à la jambe, ou au ventre, & tira vne fleche du corps d'un Capitaine, luy pressant doucement la playe pour sortir l'humeur viciueuse, il couppa à vn autre vn membre pourry d'un dard empoisonné, meslant parmy ses onguens du miel, & estuua les playes avec du vin, il en guerit vne grāde partie par la vertu des paroles magiques. Cependant qu'il s'occupoit à ces exercices charitables, les Indiens se reduisoient à l'obeïssāce de Bacchus, les Bassarides en prindrent vn grand nombre de captifs. Apres ceste deffaiete, vne bonne partie retourna en leur pays montez sur des Elephans. Comme Bacchus eut remporté vne victoire si glorieuse, Pan entonna en son honneur vn chāt de triomphe. Blemys qui commandoit en quelques Prouinces des Indes, mōstra à Bacchus vn rameau d'oliue, en témoignage

de la paix qu'il demandoit, avec toutes
fortes de submissions, le genouil en ter-
re, Bacchus le releua, & luy promit avec
toute assurance de luy estre bon Roy,
En cet estat triomphant il fut receu par
tout le pays avec beaucoup d'applaudis-
sement & de joye, commandant quel'on
perdit la memoire de la tyrannie d'O-
ronte, Blemys apres toutes ces reco-
gnoiſſances, passe en l'embouſcheure
du Nil pour commander aux Ethio-
piens, où il establit son sejour & son
Empyre, leur donnant son nom.

*Bacchus arrive au Palais de Staphyle,
& de Botrys, où il est receu avec
toute sorte d'applaudissement. Il
leur fait present de sa liqueur, dont
ils se resjouirent tous en un banquet
solemnel.*

LIVRE DIX-HVICTIESME.

 E bruit, & la Renommee
courut par toutel'Assyrie, que
Bacchus auoit subjugué les In-
des. Staphyle sur la reputation
de ses victoires, desira de le voir avec
passion: Et pour cet effect il commanda
à ses cochers de se tenir prests. Botrys
son fils fit atteller ses cheuaux à son cha-
riot, & fut au deuant: Mais comme il
vid venir le carosse de Bacchus traîné
par des Pantheres & par des Lyons, il
rebroussa chemin: Staphyle se retira aus-
si voyant ces animaux. Cet equipage ex-
traordinaire luy donna de la crainte:
mais comme Bacchus se fut vn peu ap-

proché, Staphyle luy monstra vn rameau d'Oliuier, en signe de la paix qu'il demandoit, le receuant avec des paroles de courtoisie, & des offres de seruice, luy faisant ce discours.

Bacchus, ie te conjure par ton pere Iupiter, & ta mere Semele, de ne passer point par icy, sans faire l'honneur à mon fils de prendre le logement en son Palais. Ie sçay comment Lycaon a receu chez luy Iupiter, & comment il tua son propre fils pour luy presenter à table, ayant ce bien que de manger avec luy en Arcadie: Comme l'on dit aussi que Tantale le traitta aux montagnes de Sipyle des viandes qu'il donna ayant sacrifié son fils Pelops, dont l'espaule fut mangée de Cerés, qui luy fut réparée d'une d'iuoire, par la faueur de Iupiter. Mais à quel propos est-ce que ie rapporte Lycaon & Tantale hostes des Dieux? Phlegyas n'a-t'il pas receu à sa table Iupiter & Apollon, quand Neptune eut faict submerger tous ceux qui estoient dans l'isle, l'ayant frappée de son Tridët, les conseruant tous deux de mal? Et toy qui portes la viue image de ton pere, & qui doibs esgaler sa vertu, fais-moy

l'honneur de passer vn jour en mon Chasteau, m'obligeant de ceste faueur, encore que ie ne merite pas de receuoir chez moy, celuy qui porte les marques d'une Diuinité.

Bacchus flechit à ces offres. Staphyle monta en son chariot, pour luy faire compagnie iusques à son Palais, où il deuoit le traiter. Maron le cocher de Bacchus donna la carriere à ses Pantheres, & les haista d'aller avec son fouet. Les Satyres couroient deuant en dansans, & les Bacchantes les suiuoient de prest, battant la campagne de leurs pieds, & passoient legerement sur les montagnes s'entre-tenans de faults & de dances agreables pour tromper le labeur du chemin. Les Capripedes se tenoient par les mains, comme s'ils eussent voulu faire vn bransle. Comme toute ceste troupe approchoit du Palais, Botrys alla deuant en diligence, pour aprestier à soupper. Le banquet fut somptueux, & la table fut couuerte de plusieurs metz delicieux, & de diuerses sortes de viandes, & Staphile desirant le traiter à la Royale, luy fit present de pieces

fort rares & exquisés, & luy fit veoir son Palais fort somptueusement basty & doré, dont l'esclat paroissoit comme le Soleil. Les murailles estoient semblables à l'argent, le frontispice brilloit, l'Ame-thyste, l'hyacinthe, l'agate, l'ophte & l'esmeraude y reluisoient. La couverture de la maison estoit enrichie d'or, & le pavé de grandes tables de metal: les colonnes estoient cizelees, & d'un bois en façon d'ivoire.

Bacchus entra dans le Chasteau, admirant la beauté & l'excelence de ce bastiment, iettant ses yeux de tous les costez. A peine estoit-il entré, que Botrys commanda aux seruiteurs & officiers de tuer grande quantité de bœufs & de moutons, ce qui fut fait avec beaucoup de diligence. Tous ceux qui avoient leur charge à faire aux ceremonies y arriuerent. On y prepara le souper, la Musique les entretint à table, les cymbales resonnoient, & tous les instruments dont les Bacchantes usent, comme les cloches & les flustes. Il se fit un grand bruit & une pareille confusion en ce banquet, le vin troubla les assistans, & particulièrement Maron, qui fut si in-

folent, que de venir dans la salle à recu-
lons, estant appuyé des espauls de deux
Satyres, en dansant avec des postures
desreiglees, & vn visage enflammé &
reluisant, comme vn objet présenté aux
rayons de la Lune. Il tenoit d'une main
vne couppe, & de l'autre vne peau de
bouc pleine de vin. Les Bacchantes
estoint à l'entour de luy qui dansoient:
& se bransloit sur vn pied, comme s'il
eust voulu tomber. Les officiers de la
Cour ne furent pas exempts de ceste fu-
reur Bacchique, apres qu'ils eurent gou-
sté le vin délicieux. Methe femme de
Staphyle, beut tant qu'elle s'enyura, &
par apres elle conuioit les Bassarides à
vuider les couppes d'une façon gaillar-
de, appuyant sa teste chargée de la li-
queur, sur l'espaule du plus proche d'elle:
mais apres la fureur la saisit, & dansa
comme les autres: Les Bacchantes la
prinrent par la main, & la conuierent à
chanter. Staphyle se chargea si bien
qu'il y parut: Son fils Botrys auoit les
yeux esclairans, & la face enluminee: Il
lia les cheueux de son pere avec du lierre
en forme de bouquet. Ils se mirent à
danser & à capreoller, tantost d'une fa-

çon, tantost del'autre, en donnant des loüanges à Bacchus. Methe print place entre son mary & son fils, & les inuita à mille insolences. Pythus le vieillard se remplit iusques aux dents, & accompagna les autres: On voyoit sortir de sa bouche vne escume vineuse, qui luy arrosoit la barbe.

Ils passerent tout le jour à boire, en fin la nuict couurit la terre d'un voile noir, les estoiles commencerent à briller, l'air à s'obscurcir, & le Soleil se cacha dans l'Occident, laissant derriere luy des marques & des vestiges d'une lumiere mourante. Apres que les tables furent leuees, ils s'en allerent coucher. Staphyle & Botys se retirerent en leurs chambres, & Bacchus fut conduit en vn lieu où on luy auoit dressé vne couche fort somptueuse. Il passa là la nuict, non sans beaucoup de songes, & d'inquietudes. Il songeoit que les Indiens s'estoient rebellez, & qu'il les auoit exterminiez combattans vaillamment la vaine & la fallacieuse image de l'armee ennemie: Et que Lycurge luy estoit apparu avec vne mine qui le mena-

soit de le combattre à outrance. Il luy fut aduis qu'il voyoit vn Lyon furieux sortant d'un rocher, qui l'auoit poursuiuy iusques à la mer, & que les Bacchantes auoient fuy les attaintes de ceste beste qui vouloit les déchirer. Que la crainte leur ayant faict tomber le Thyrses des mains, c'estoit vn mauuais presage pour luy. Neantmoins qu'une d'entre-elles plus courageuse que les autres, auoit en fin dompté ce Lyon, & qu'après l'auoir garrotté avec des fueilles de pampre, au mesme instant qu'un grand nombre de femmes s'estoit venu jeter sur luy, & le deschirerent en mille pieces, sans que Diane l'eust peu garantir de l'effort du lierre, & qu'il tomba un foudre du Ciel qu'il luy emporta la teste.

Bacchus eut ces songes, qui le mirent en grande perplexité. Il se leua promptement, print sa cazaque, & lia ses cheueux de serpens, chauffant ses brodequins, & commanda à un Satyre de luy apporter son Thyrses, appellans ses Sylenes d'une voix si haute, que l'on

l'entendit par tout le Palais, & fit retentir l'Echo. Botrys s'esueilla, & aussi Pithus. Comme Methela Reyne eut ouï ceste clameur, à peine leua-t'elle la teste, tant elle l'auoit chargée de vin & de sommeil, elle se rendormit attendant le sommeil agreable que l'Aurore donne au matin. Il est vray qu'elle s'estoit couchée fort tard. Staphyle voulut reconnoistre Bacchus de presens d'hospitalité, il luy donna vn beau vase d'or, qui luy seruoit à table à boire du lait: pareillement des voiles & des ouurages excellents, tissus de la main d'Arachné la Persienne d'auprès du fleuve de Tygris. Et apres l'auoir remercié de l'honneur qu'il luy auoit fait, il luy parla de ceste sorte.

Bacchus, combats vaillamment pour ta gloire, & en ma faueur: execute des stratagemes, qui soient dignes de l'honneur de ton extraction: montre que tu es yssu de Iupiter. Ton pere a terrassé en sa ieunesse les Titans, qui menassoient le Ciel. Resueille ta vertu, & subjugue toutes les Indes. Ie me ressouuiens d'une histoire que mon ayeul a raconté à mon Pere, & ie veux t'en faire part. Belus
Roy

Roy des Assyriens commandoit en ce pays, lors que les Titans firent la guerre à ton pere. Saturne couppa les parties genitales à son pere Coclus: mais aussi, pour punition de ceste meschanceté, il eut vn cruel combat contre son fils Iupiter. Il luy dardoit des pluyes & des broüillards, comme des jauelots, & des gresles en abondance: Mais Iupiter resoluoit par sa chaleur ces froides Meteores. Sa vertu te doit estre exemplaire, arme donc ton bras contre les Indiens, & ne crains point la force des Elephans: car Iupiter a vaincu vn monstre plus horrible. Il a foudroyé la monstrueuse chenille, qui auoit cinquante testes de diuerses especes: elle auoit celle de lyon, & le frôt de Sphynx, les defences de sanglier, & des testes de chiens & de Scylle. Elle paroissoit au ventre de diuers sexes, couuert d'escailles de poisson, comme vne Balaine, avec les pieds crochus comme des faux, & qui en auoient la grãdeur. Vn Scorpion luy pendoit par derriere, qui luy seruoit de queue. Telle estoit ceste horrible beste, qui destruisoit les Elemens, la terre, l'eau, & l'air: elle y voloit avec ses ailles, le troublant

d'orages & de tempestes. Il sortoit de ses yeux vn feu plus vif que celuy qui esclat- te des foudres, & neantmoins ton pere a vaincu cet animal. Imite donc sa vertu, afin que ie t'appelle vn autre Iupiter vainqueur des Indiens, comme il l'a esté des Geans. La guerre & la victoire que tu entreprends sont en ta bien-seance: car Iupiter abyssma Indus fils de la Terre en l'entreprise des Titans, dont les Indiens sont surnommez. Ton pere a sur- monté Indus, & toy reduis Deriades à ton obeyssance. Sois semblable à Mars, qui a triomphé du Serpent Echidna, dont la grãdeur estoit si espouuantable, qu'il osa mesme combattre Iupiter, & neantmoins il le surmonta. Je ne pense pas que tu sois moindre que luy: car ie croy que tu tiendras teste à tous les en- fans de Iupiter, puisque tu as dompté avec ton Thyrsé d'aussi furieux enne- mis, que Mars avec sa picque. J'ay receu en ma Cour vn autre fils de Iupiter, qui est fort genereux: Persee vint hier loger en mon Palais, il me dit qu'il auoit prins le dessein de bastir vne ville au- près des peuples Cilices. Si Persee a acquis beaucoup d'honneur en l'exe-

cution genereuse de ses desseins, ie croy que tu ne luy cede en rien, & qu'il y a des rapports & des conuenances de vos victoires, & de vos armes. Il porte avec luy la teste horrible de Meduse, & toy tu as le raisin, messager de resiouys-
sance. Il tua le Monstre marin aupres de la mer Erythree, & tu as vaincu les Indiens, dompté Deriades, comme tu as reduit Oronte, beaucoup plus meschant qu'un monstre. Perlee a deliuré la belle Andromede de la mort, & tu as deliuré la Nymphé Astrasie de la tyrannie des Indiens.

Comme il luy eut faict ceste harangue, il se retira en son cabinet. Cependant Bacchus estoit fort content de la bonne opinion que l'on auoit de luy, du merite que l'on luy donnoit, & de la gloire que son pere auoit acquise, dont mesme il auoit vne vertueuse jalou-
sie, desirant accroistre ses triumphes, & de remporter d'autres victoires sur les Indiens. Pour ce sujet ne voulant pas tromper l'esperance que l'on auoit conceuë de la grandeur de son courage. Il appella pour ce sujet Pheresponde, Herault d'Armes, & luy dit :

Prudent fils d'Iphigenie, & bien-aimé Herault, allez-vous en annoncer ma volonté au superbe Deriades, & luy dites: Sire, résolvez-vous de recevoir Bacchus, ou de le combattre. Faites dignement ceste charge, & ie vous estimeray autant qu'Orontes.

Bacchus esmeu des aiguillons de l'honneur, desirant gratifier les peuples de ses presens, & d'establir son Empire, s'en alla par tout l'Orient, portant ses raisins & sa vigne. En passant par l'Assirie, il la remplit de ceste plante. Cependant qu'il faisoit ce chemin Staphyle mourut, au grand regret de ses subjects. La Cour en fut en vn dueil extreme: ses seruiteurs & officiers firent paroistre vne grande affliction à leur contenance, deschirant leurs vestemens. Les Damoiselles suiuanes qui auoient du ressentiment de la perte que la Reine Methe faisoit d'un si bon mary, s'arrachotent les cheueux.

Bacchus ayant fait son voyage, repassa par le Palais de Staphyle, se ressouenant du bon traitement qu'il luy auoit fait autrefois. Comme il y fut entré, il aduisa Pithus d'une conte-

nance fort triste. Ce qui luy fit juger que le Roy estoit mort. Il salua Methe, la trouuant toute esplorée, & luy dict :

Prudente Reyne, dittes-moy qui a changé vostre visage en si peu de temps? Pourquoi estes-vous attristee? Le vous ay laissée en si belle humeur : Qui est-ce qui a terny la fleur de vostre beauté? Je ne vois plus ceste rougeur agreable en vos jouës. Et vous, bon vieillard, qui vous faict respendre tant de larmes? & qui vous a faict couper vostre barbe en signe de dueil & de tristesse? Et vous, Botrys, qui vous a rendu la teste chauue? où est vostre belle perruque qui flotloit sur vos espauls? Où est la suauë odeur qu'elle rendoit à Bacchus? Pourquoi portez-vous ces vestemens sales & deschirez? où sont les riches parures de pourpre que vous portiez cy-deuant? Je ne vous cognois plus, l'affliction vous a du tout changé. Où est allé le Roy Staphyle, que j'aye l'honneur de le saluer? Dittes-moy qui a enleué vostre pere en si peu de temps, depuis que j'ay eu le bien de le veoir, & de boire à ses bonnes graces?

Je me doute bien de la cause de vostre dueil: encore que vous-vous efforciez à me la celer. Je n'ay pas besoin que vous me l'exprimiez, vos yeux me le resmoignent assez, & vostre dueil m'en donne assez de cognoissance: Vos pleurs me declarent le sujet: la couleur & la qualité de vos robes m'aduertissent de la mort de Staphyle: Helas le Ciel enuieux nous l'a rauy injustement. J'esperois apres la guerre des Indes, d'assister aux nopces du genereux Botrys.

Bacchus estant de retour au Palais de Staphyle, receut les nouuelles de la mort du Roy, à son grand regret. Methe la Reyne le supplie de luy donner de son vin. Bacchus institué des jeux de prix sur le tombeau, à la Musique & à la danse. Oeagre remporte la victoire sur Erechtée quant au Luth. Vn Silene contesta avec Maron à danser, & fut metamorphosé en vn fleuve.

LIVRE DIX-NEVFIESME.



OMME Bacchus leur eut faict ce discours plein de ressentiment, Botrys ne luy respondit rien, se contenant dans vn silence triste & stupide: neantmoins il fut surmonté des pleurs & des larmes, qui luy tomberent des yeux. Methe, apres plusieurs gemissemens, luy dit ces paroles:

Bacchus, le sommeil eternal de la mort a endormy Staphyle, qui se plaisoit tant à veoir vos danſes & vos ballets. Les Parques cruelles ont rauy le pauvre Staphyle: Ce malheur ne m'est pas arriué ſeul, i'ay eſté trauerſee de ſdeux ennuys. Bacchus m'a laiſſee ſans es liqueurs, & mon mary eſt mort de maladie. I'ay du dueil pour tous les deux, pour la mort de l'un, & pour l'abſcence de l'autre. S vous voulez obliger celle qui a beſoin de conſolation, donnez-moy à boire de voſtre nectar, afin que i'appaiſe ma douleur par ce moyen, O Bacchus, mon eſperāce, donnez-moy ſeulement vn raiſin: Quand i'auray veu vne couppe entre vos mains, ie ne reſpandray plus de larmes.

Bacchus flechit à cés prieres, & prenant pitié d'elle, presenta à elle & à ſon ſils vne couppe pleine de vin, qu'ils beurent tous deux, & ſe reſioüirent, oubliās leur triſteſſe. Methe, apres auoir deſchargé ſon eſprit de faſcherie, dit à Bacchus: Bacchus, vous eſtes venu à la bōne heure. I'en'ay plus de triſteſſe. I'ay perdu mes reſſentimens par voſtre liqueur. Ie ne pleureray plus la mort de mon mary, ny

mesme de mon pere. Quant Botrys mon
fils viendroit à mourir, ie prendrois pa-
tience, car Bacchus est mon pere, mon
fils est mō mary; & si vous voulez ie vous
promets que ie vous suiuray en tous les
lieux où vous irez, & en vostre pays. Que
ie sois la cōpaigne des Bassarides, ie por-
teray vos Thyrses & vos Pampres, m'e-
stimant bien heureuse d'approcher la
trompette de mes levres, pour sonner
vne chamade. Bacchus, si vous auez de la
compassion, ne laissez point ceste pau-
vre veufue sans secours, de peur que ie
ne deplore la mort de Staphyle, & l'ab-
sence de Bacchus, vous aurez mon fils
botrys pour seruiteur, il vous accompa-
gnera à la guerre des Indes. Ha ! que ie
serois ayse de le voir à vos pressoirs, em-
ployé à fouler les raisins. 'Ressouuenez-
vous aussi du bon veillard Pythus, & ne
l'abandonnez pas, sans luy faire ressentir
vos faueurs.

Bacchus ne peut riē refuser à la Reine,
la confirmant en ses bonnes graces, &
luy dit d'un visage riant. Prudēte Reine,
vous aurez ce cōtētement que de ban-
queter avec moy, vous serez à Bacchus,
vous serez tousiours compaigne de mon

Pampre, & de mes coupes, les hommes vous appelleront les delices, & le contentement qu'ils ont à boire, & ie nommeray Botris le fruit & le raisin de la vigne, & Staphyle sera le cep & la tige qui le porte, tellement que ie ne pourray me resjouir dans les banquets, sans Methe, & sans Botrys.

Ces presens de courtoisie le contentèrent, cependant Bacchus qui vouloit honorer la mort de Staphyle, institua vn jeu de prix sur son tombeau, fauorisant ses funerailles de ces pompes & de ces ceremonies, & ordonna qu'il se fit de la Musique à qui remporteroit le prix à bien jouer du Luth, donnant pour ce subject vn taureau & vn bouc, & inuita tous ceux qui en auoient de la cognoissance.

I'ay institué, ce dit-il, vn ieu de prix en l'honneur de Staphyle, celui qui remportera la victoire, aura le bœuf, & l'autre qui sera vaincu, aura le bouc.

Bacchus ayant parlé, Oeagre citoyen de Bistonie, fort expert à jouer de cet instrument se presenta, & Erechthee contesta avec luy, ils s'appresterent tous deux à ce combat, se couronnans de lauriers, & commencerent leus chansons, tou-

chans les cordes, avec vne grande legeré, & alternatiuement selon les tons, & les mesures. Ils pressoient doucement de la main gauche les touches en vne posture droite, & sãs estre assis, de peur qu'autrement ils ne perdissent, & la grace de leur Musique, & la viue voix des tons. Erecthee commença le premier, comme il y arriua par sort, entonnant ceste chanson du pays.

Celee a receu à Athenes, Ceres & son fils Triptoleme en sa maison, & leur a donné des fructs, n'estoit-ce pas la raison? puisque Triptoleme a trouué l'invention de semer les grains, aussi en recompense de ces bõs offices, Ceres pleura sa mort, & consolal'affliction que son fils eut à cause de la mort de son pere. Ainsi Staphyle a autrefois traité Bacchus en son Palais, ainsi il luy donne des presens dignes de luy, deliurant Botris de ses ennuys par le vin, & assoupit les plus cuisantes douleurs de Methe.

Erecthee entõna ces motets, au grand contentemēt de la compagnie, qui loüa l'harmonie & les fredons de son instrument. Oeagre commença sa chanson, & comme pere d'Orphee, a qui la Muse

estoit cogneu, rauit les auditeurs par ceste melodie.

Apollon a redonné la vie à Hyacinthe son bien-aymé, aussi Bacchus ressuscitera son cher Staphyle. La feste n'est pas encore passée.

Il n'eut pas le loisir d'acheuer, car le peuple s'esmeut, & les Satyres firent vn grand bruit. Bacchus témoigna par sa contenance, que ceste voix auoit flechy ses oreilles. Botrys s'approcha pour entendre ceste douce Musique : mais ayāt esté interrompu, Bacchus luy meit la couronne sur la teste, Oeagre prit le Taureau, la recompense de sa victoire, Erecthee fut grandement jaloux de l'honneur que l'autre receut, prenant le bouc d'vne façon triste & hôteuse. Mais Bacchus ne se contenta pas de ceste seule resioüissance, il institua encore vn jeu de prix à faire danser, & donna pour ceux qui emporteroient la victoire, vn grand vase d'or, le plus excellent chef-d'œuvre de Vulcan, que Venus luy donna autrefois, & le fit remplir d'vn bon vin vieil de quatre fucilles, & posâ vne couppe d'argent plus petite que l'autre, doree tout à l'entour avec vn lierre graué sur vne vigne. Ce

que le Roy d'Alibely auoit présenté en recognoissance de l'hospitalité, il y joignit vn pressoir, où l'on auoit fraichement foulé des raisins: car il n'estoit pas mal à propos, que celuy qui seroit vaincu, se cōsolast de ceste liqueur. Mais apres que Bacchus eut monstré ces prix à toute l'assistance, il inuita ceux qui auoient de la disposition à la danse.

Celuy, dit-il, qui dansera le mieux avec les gestes & la contenance requise, aura le grand vase, & celuy qui sera vaincu prendra la coupe. Je ne suis point de ceux qui promettēt & ne tiennēt point. Je ne promets pas vn trepied d'or, ny vn cheual, ny vne picque, ny vne cuirasse: aussi n'est-il pas question icy de jouer au palet avec violence, ny acourir legèrement, ny à s'exercer de la picque, mais seulement de danser en la memoire de Staphyle, qui se plaisoit grandement aux ballets. On ne veut point courir la bague, ny voltiger, ce ne sont pas icy les combats d'Elide, ny aussi la course d'Oenomane, les loix & les bornes de ce ieu ne sont autre que les fauts, les capriolles frizees, l'agilité, la grande disposition & mouuements des pieds, la

legereté des mains, les gestes du front, & l'action parlante des mouuemens, & des yeux.

Maron esmeu des aiguillōs de la gloire, encore qu'il fut cassé d'une grande vieillesse, se leua à dessein d'estre vn des contendans, non à cause que ce beau vase estoit d'or, & richemēt clabouré, mais pource qu'il estoit remply de bon vin, iusques au haut de l'anse, le desir & l'object de ceste liqueur luy donnerent vn courage vert & fort, l'odeur le rendit gaillard, & commença à desnoier ses bras, & deslier ses pieds. Sa vieillesse ne parut aucunement, il supplia l'ombre de Staphyle de luy estre fauorable en vne si grande entreprise.

Je suis Maron, dit-il, le compagnon de Bacchus. Ie ne sçay point pleurer. Quelle sympathie peut-il auoir entre Bacchus & les larmes? il'y a des prix sur ton sepulchre, qui sont posez pour la danse. Reçois-moy donc en ceste glorieuse contestation avec joye, car Maron n'entend rien à se fascher, Maron ne sçauroit s'attrister, il est le seruiteur bien-aymé de Bacchus. Sois-luy donc fauorable, encores que tu aye beu du fleuue de Bethe;

oblige moy, afin que ie boiue le vin deli-
cieux, comme s'il auoit esté sacrifié en ta
memoire, & apres ie dāseray d'allegres-
se, comme si tu estois encore en vie: car
ie me plais à m'employer en vn subject si
agreable, & il faut que tu sçaches que ie
ne danse pas pour Staphyle qui est mort,
mais pour celuy que l'on estime estre en
vie en ces jeux qui luy sont dediez. Ie ne
suis pas le seruiteur de Bacchus, aussi ie
n'entonne point des chansons funestes,
comme il fit aux peuples de Crete, quāt
il deplora la mort d'Atimnis. Aussi ie
n'ay point esté compagnon des regrets
des Heliades au fleuve d'Eridan, a la
cheute de Phaëthon, encore que ie sois
son bastard, ie n'ay point esté citoyen de
Sparthe pour pleurer la mort d'Hyacin-
the. Que si tu es assesseur de Minos pour
iuger les morts, ayans mesme voix deli-
beratiue au siege de Rhadamanthe, &
que tu te pourmene librement dans les
champs Elisiens, Exauce les prieres de
ton Maron, & en recompense ie te feray
vne offrande agreable, sois moy donc
fauorable, & me donne la victoire, qui
est desirée de tant de personnes, ie t'of-
friray les premices de mon vase.

Maron tout aussi tost commença de danser , maniant ses pieds en diuerses postures , & tournant ses mains en plusieurs façons , avec des actions & des mouuemens significatifs de son intention. Il rouilloit les yeux , tantost d'un costé , tantost de l'autre , les abaissans , & les leuans à mesure qu'il vouloit représenter quelque chose , contournant sa teste en diuerses figures , avec dessein de darder ses cheueux , n'eust esté qu'il n'en auoit point. Il dansa avec un courage ieune & vigoureux , descriuant par signes la genealogie des Titans , non pas celle de Saturne & de Phanes : car elle est beaucoup plus ancienne que l'autre , & presque du temps & de l'age du monde , & apres il monstra comment Ganymedes verfoit le nectar au banquet des Dieux , par la personne des Satyres , & en regardant les Bacchantes , il demonstra Hebe. Maron auoit de l'industrie à représenter ces histoires , par des actions sourdes & muettes de ses mains , & par le mouuement de ses pieds. Il attendoit le iugement des assistans avec beaucoup d'impatience , pour remporter le vase plein de vin : mais il suruint vne contestation

itation entre Aristee & Bacchus, non de
 pas, de la course, ni à jouier au palet: mais
 de l'excellence du breuuage, ou de ce-
 luy de Bacchus, ou de celuy d'Aristee, &
 les deux vases deposez pour le prix de la
 danse y seruirēt; l'vn se glorifioit du vin,
 & l'autre du miel. Iupiter fut iuge de ce
 differēt, en la presence de tous les dieux,
 Cupidon tenoit d'une main vn raisin, &
 de l'autre vn rameau d'oliue, Aristee
 versa sa liqueur emmellee dās des coup-
 pes, & les presenta aux dieux par ordre:
 mais ils furent rassasiez au troisiemepot,
 & se plainquirent de ce que la qualité de
 ce breuuage les rassasioit si tost. Mais
 Bacchus remplit grande quantité de
 pots de bon vin, donnāt le premier à Iu-
 piter, le second à Iunon, le troisieme à
 Neptune, & aux autres dieux, & à Phœ-
 bus qui estoit fort triste: comme ils eu-
 rent beu, ils le trouuerent si bon, qu'ils
 demanderent encore à boire, & ne peu-
 rēt estre rassasiez, car vne nouvelle soif les
 faisoit. Les dieux donnerent la victoi-
 re à Bacchus, & Cupidon le couronna
 de Pampre & de Lierre. Cependant vn
 Silene contendant avec Maron, parut,
 & voulut danser à l'enuy, s'apprestant

pour cet effect, & commence à s'enleuer de terre en capreollant, jettant les yeux deçà & delà. Quelquesfois il conjoignoit ses pieds avec des postures bien estranges, & quelquefois il les escartoit: tantost il tournoit en cercle avec vn mouuement fort rapide, & tantost il se tenoit ferme sur vn pied, esleuant l'autre en l'air: & quelquefois il prenoit son pied avec la main gauche, & piroüettoit, aduançant son ventre en deuant, tantost sa teste alloit de mesme, avec l'action des bras: mais il s'estourdittellement dans la confusion de tant de diuerses gestes, qu'il tomba, & se rompit la teste, & fut metamorphosé en vn fleuve, son corps desgorgeant grande abondance d'eauë, & son front estant changé, ses cornes s'humecterent. La riuere croissoit à veuë d'œil, & son ventre parut large comme le liët naturel de ce fleuve, avec vn sable au fond, & ses cheueux furent comme des rayons d'eauë, quand le vent la faict filer en pointes. L'on veit sur le riuage vn flageollet bien formé, venu de soy-mesme, sans qu'aucune personne y eut traouillé, qui entonnoit des chansons rustiques, par le moyen des

Zephirs qui souffloient dedans.

Après ceste metamorphose, Maron remporta la victoire, comme elle luy fut adiugee par l'aduis de toute l'assistance; il prit le vase qui estoit plein de vin, le conseruant pour tesmoignage de l'honneur qu'il auoit acquis en ce jeu: & quant à la couppe d'argent, qui estoit destinee au Silene, il la jetta dans le fleuve avec la liqueur, pour ne l'en frustrer point; à l'instant l'on remarqua qu'il la receut avec vne grande joye, & le vin sembloit entendre vn doux murmure qui venoit de l'eauë, & Maron parla à Silene en ces mots.

Silene, Maron ne te faict aucun tort ny de desplaisir; en te donnant ce qui t'appartient de droict & de raison, car d'oresnauant, ie ne t'appelleray point autrement qu'une couppe, qui contient le vin delicat & deliceux. Reçois donc ceste liqueur, & aussi le vase: il semble que tu saute, & regimbe encore dans l'eauë avec tes pieds de chevre, pour le moins sois favorable, specialement à bacchus, qui a toujours esté tō amy, aux Satyres, & aux

Silenesaussi, gratifie Maron de quelque chose, de peur que ie ne reconnoisse entre tes flots que tu dissimule vne amoureuse jalousie de ma victoire, augmente le vin avec ton eauë, & te mesle avec Bacchus: qui t'a donné ce mauuais conseil, que de contester avec ceux qui sont plus grand que toy à l'exemple de Mursias, qui fut si insolent que d'entrer en deffia avec Apollon, dōt il receut vne peine sortable à son orgueil, car il le fit escorcher tout vif, & forma de sa peau vn certain instrument creux par dedans, qui semble tousiours vouloir murmurer cōme vn flageollet, pour demonstrier la Musique superbe de ce Sylene: mais à la fin Phœbus eut pitié de luy, & le chāgea en riuiera, dont l'eau murmure, cōme si elle vouloit se plaindre en la mesme façon que tu fais, encore que tu ayes eu vne meilleure fortune, neantmoins tu ne poursuiuras plus les Nymphes dans les montagnes, tu ne feras plus l'amour aux Bacchantes, mais aux Hydriades, tu ne porteras plus les serpens, qui sont les marques de Bacchus, mais les anguilles, & au lieu de dragons, tu prendras les poissons. Si tu es priué de la compagnie de Bacchus, tu n'en es pas

moindre , au contraire, ie t'estime plus heureux: car tu feras croistre & grossir le raisin, & le vin dans les pots. Que veux-tu dauantage , de porter Bacchus apres Iupiter, le pere de toute la Nature. Les Satyres ferōt tes flots, & tes cōpagnons, le pressoir sera le grād Ocean, aussi en as-tu desia la ressemblāce, & s'il n'est point hors de propos, qu'vn Silene portāt cornes soit en la forme d'vne riuiera dont le cours & le flux peuuent ressembler à ceste figure cornue.

Maron luy tint ces propos, & tous les assistans furent grandement estonnez, de voir Silene changé si promptement,

Après que les jeux de prix furent finis, Eris la Deesse de discorde ayant pris la ressemblance d'Attis, persuade à Bacchus de continuer ses victoires, en quittant les bombances de la Cour de Brotys. Il arrive au Royaume de Lycurgue, où l'unon enuoye Iris sous l'apparence de Mars, pour le faire rebeller contre Bacchus, & au mesme temps elle luy parut comme son frere Mercure, & luy persuada de porter à Lycurgue ses presens en son Palais sans arme, où il fut attaqué de telle sorte, qu'il fut contraint de se jetter dans la mer rouge.

LIVRE VINGTIESME.



Es jeux de prix finirent. Cependant les Satyres estoient avec Bacchus dans la maison de Brotys à banqueter, où les heures immortelles se resioüissoient

pareillement. La Musique les entretenoit avec des instrumens, dont l'harmonie estoit grandement agreable, se defians les vns les autres à boire, encore qu'ils fussent yures. Les Bacchantes dansoient, jouans des Cymballes, avec des contenances follastres, & leurs cheueux espars çà & là, qui flottoient au gré des vents. Bacchus appella Methe, & luy dōnavne robe fort riche & d'une grande valeur, & commanda à Botrys de quitter ses habits fordides. Ce qu'il fit, se delibérant d'oublier son ennuy, & de se resioüir avec la compagnie des Bassarides. Il ouurit, obeissant aux commandemens de Bacchus, tous les coffres où estoient les riches parures du Roy Staphyle, dont le lustre esclattoit de bien loing: il vestit le Pourpre triomphant de son pere, & souppa avec Bacchus: mais apres que la nuit fut venuë, toutel'assistance alla se coucher, Pythus & Maron prirent vn meisme liët, où ils se dennuyèrent tous deux à loisir. Pendant la nuit, Eupetale, la mere nourrisse de Bacchus alla allumer vn flambeau & aussi tost elle appresta vne fort belle couche pour coucher Bacchus. Les

Damoiselles suiuanes dresserent vn liēt pour la Reine. Ils reposerent tous à plaisir : mais Bacchus fut importuné de songes, & veid la Deesse de Discorde dans vn chariot, traîné par des Lyons, soubz la ressemblance d'Attis, conduisant le carrosse de Cybelle, & s'approchant deluy, dit d'une voix menaçante.

Bacchus, le repos de la nuit te donne-il le sommeil agreable, est-il seant à vn grand Capitaine de dormir? Deriadeste somme de cōbattre, & tu t'amuse à banqueter, & à folastrer dans les delices, Iunon ta marastre te poursuit, voyant ton oisiveté, & tu perds le temps à danser, Iupiter à honte de ta bombāce, & moy-mesme ie rougis deuant Iunon de ta ieu nesse, craignant que tu n'execute rien qui contente ceste Deesse. Ton pere a terrassé les Geans, ie crains les reproches de Mars, & de ta sœur Minerue qui brave Bacchus encore qu'elle ne soit qu'une fille: son Ægyde a surmonté le Thyrsse: car autrefois elle a defendu les portes du mont Olympe, de l'assaut des Titans, n'ayant faict que de l'honneur à son pere: Mais toy tu le deshonore, regarde comment Mercure & Apollon se

moquent de ta foiblesse. Phœbus
n'est pas sans gloire, il montre son dard
ensanglanté du sang des enfans d'Iphi-
medes. Mercure se peut vanter de la
mort d'Argus. Quant à moy, ie me ban-
niray du Ciel, pour euites les repro-
ches quel'on fait à Bacchus de sa couar-
dise. Mesme Diane, encore qu'elle ne
fasse que chasser, neantmoins elle te
blasme du peu de courage que tu mon-
stre. Ie me promets bien de n'aller point
au Ciel, de peur d'entendre l'insolence
de Latone. Ie seray faschee de deux cho-
ses, de voir Semele affligee pour ce su-
jet, & Maye enuieuse pour vn autre.
Mais si tu continuë tousiours, ie ne t'e-
stimeray point le fils de Iupiter: car tu
n'as point tué Othon & Ephialtes, ny
Titys, ny Orion. Tu n'as point deliuré
ton pere de la garde importune d'Ar-
gus, tu n'es propre qu'à banqueter avec
Botrys, au Palais de Staphyle, sans hon-
neur & sans gloire, passant le temps aux
balets & aux danfes. Et sans doute tu
fais tort à la reputation des Satyres, les
accoustumans ainsi à yurongner: Car ils
perdront toutel'adresse qu'ils ont à la
guerre, & l'employeront à boire, & à

folastrer. Il est bien permis de se rejouir: mais c'est apres la guerre. Il n'est pas hors de propos de se reposer: mais c'est apres la victoire que l'on doit danser & chanter. On ne merite point le Ciel que par la vertu, & par les stratagemes, & si il n'y a pas peu de difficulté. Le chemin à ce degré d'honneur est laborieux. Prends donc courage, & execute quelque chose qui soit digne d'un grand Capitaine. Iunon te promet le séjour du Ciel, encore qu'elle soit jalouse de ta grandeur.

Ceste Deesse disparut, & Bacchus se leua promptement, portant encore en son visage l'estonnement que le songe luy auoit donné. Botrys se jetta hors du liect, & vestit sa camisole qui estoit à fond d'or, releuee de foye. Il ceignit son baudrier, & print son sceptre. Cependant les Satyres attellerent les Pantheres à son chariot. Les Silenes & les Bacchantes s'appresterent à la guerre. Toutes les compagnies s'assemblerent, & la trompette leur donna le signal. L'un se mit sur vn Ours, l'autre sur vn Taureau, l'autre sur vn Lyon. Botrys ne voulut pas abandonner Bacchus, il le suiuit avec ses

compagnies d'ordonnances: & non feu-
Botrys, mais aussi Pithus se delibera de
l'accompagner en toutes les rencontres
& les combats, & de sacrifier sa vie pour
son service. Aussi il ne fut pas sans re-
compense, ayant receu aux pressoirs de
Bacchus, des aduantages qu'il n'osoit
esperer, lors qu'il fut heureusement
changé en vn Tonneau, d'où vient que
le mot de *Pithos*, signifie vn poinçon. Il
eut ce bien que de contenir en soy ceste
liqueur delicieuse, tesmoignant sa joye
par ces paroles, en la presence des Sa-
tyres.

Je suis Pithus, (ce dit-il) & par la faueur
de Bacchus ie reçois le vin qui coule du
pressoir: Je suis seruiteur de Staphyle &
de Botrys: je les ay esleuez tous deux
avec beaucoup de soin, esperant de les
entretenir en bon estat.

Bacchus aduança le voyage & la guer-
re des Indes, passant les riuieres de Bi-
blis & d'Adonis, & les montagnes du
Lyban: & fut en Arabye, où il admira la
grandeur de la forest Nyfiacque. Il y
auoit en ce pays là vn homme cruel, ap-
pellé Lycurgne, barbare en ses mœurs,
& heterocle en ses loix, defendant

l'usage du vin: & estoit si adonné à la cruauté, qu'il couronnoit le frontispice de sa maison de testes humaines. Il ressembloit à Oenomaus, qui fut si meschant que de perdre vn grand nombre d'Amans, qui luy faisoient l'honneur de rechercher sa fille Hippodame, la promettant à celuy qui remporteroit la victoire à la course, dans vn chariot dont les essieux estoient rompus: continuant ceste trahison iusques à ce que Pelops aduerty par Myrtous son cocher, luy fit rompre le col par le mesme artifice.

Lycurgus auoit quelque rapport avec luy en ces barbares habitudes: car il prenoit bien la peine d'aller sur les grands chemins supplier les passans d'aller loger chez luy: & par apres il les garrottoit & les sacrifioit à Mars son pere, & mettoit leurs testes dessus ses portes, tout ainsi que le soldats, apres la victoire, pendent leurs armes au rattelier: ainsi Lycurgue apposoit leurs mains & leurs pieds aux entrees de sa maison: les presentans mesme à Iupiter l'hospitalier. Les pauvres passans estoient deschirez par morceux, comme des brebis, & leur sang innocent ruisseloit sur les Autels;

& mesme ses sujets estoient contraincts de luy offrir des sacrifices au prejudice de Iupiter. Et toy, ô Bacchus, tu n'ignores pas la jalousie & l'enuie malicieuse de Iunon. Aussi en cōtinuant ses poursuittes ennemies, elle enuoya Iris, pour esmouuoir Lycurgue contre toy. Ceste messagere des Dieux ne manqua pas de venir en diligence, ayant prins la ressemblance de Mars, & pour mieux se desguiser elle mit en sa teste vn heaume, endossant vne cuirasse, avec vne picque en sa main: & non seulement elle en print les habits, mais aussi la voix & la parole, avec ses boutades guerrieres, & ses rodomontades de Capitaine, & le port de mesme: parlant à Lycurgue en ces mots.

Genereux Capitaine, yssu de Mars, crains-tu les regimens effeminez des Bassarides: elles ne sont pas des Amazones de Termodon, & des guerrieres du mont Caucase, & n'entendent point à tirer de l'arc, ny à darder des jaelots: Elles ne sçauent pas courir sur vn cheual à bride abatuë, ny rompre la lance. I'ay honte de te persuader la guerre contre des femmes. Veux-tu laisser Bac-

chus en paix? C'est vn homme cōme vn autre, & mortel. Il n'est pas venu du Ciel comme l'on dit: C'est la fable Grecque, qui dit qu'il tire son extraction de Iupiter: Mais quant à moy, ie ne puis croire qu'il l'ayt engendré l'ayant cou-su en sa cuisse, n'adjoustant point de foy à ces contes faicts à plaisir. Iupiter n'au-roit pas produit vn fils si lasche & si mol: Encore Mars ton pere peut tesmoigner que Pallas, bien qu'elle ne soit qu'une fille, est plus genereuse que luy. Mon fils, tu pourpēse faire quelque chose de grād, & qui sera difficile, encore que tu sois yf-su de Mars, & qu'il commande aux ar-mees: neantmoins si tu veux ie m'arme-ray pour ton seruice, & ne te laisseray point seul dans les combats, & si tu as besoin du secours d'une Déesse, Iunon te le prestera à l'aduantage de Lycurgue son petit fils. Je feray porter en nostre Temple des picques de bois en façon de Thyrses, & des cornes de Cētaures, avec des cuirasses de pāpre & de lierre. Je cō-treferay les longues queuēs qui pendent aux Satyres, portans tous ces equipages apres la victoire. Et quant aux courōnes de fleurs & de fueilles, & aux armes des

Bassarides, nous les donnerons à ta sœur Venus, aussi bien tout ce bagage ne sert qu'à l'Amour. Je les mariray à mes seruiteurs, les contraignant de les espouser, comme le droict de guerre le permet contre les captifs. Je brusleray leurs vignes & leurs branches qu'elles estiment tant, & tout ce qui appartient à Bacchus. J'employeray la plus industrieuse des Bacchantes aux ouvrages, luy enseignant à demeurer en la maison, bien qu'elle ayt accoustumé de courir librement dans les montagnes. Je la vestiray d'une robe à l'ordinaire, luy defendant l'usage crotisque des es peaux. Je la feray tourner le moulin, luy donnant le soin du mesnage, & des ouvrages de Pallas & de Venus, l'assubjettissant à travailler en tapisserie, ou au pessellement, plustost que de s'amuser à jouer follement des cymbales. Quant aux vieux Silenes qui sont inutiles à tout labeur, ils me serviront de bouffons & de basteleurs quand ie feray à table, & au lieu de crier *Euie*, ils feront resonner des loüanges & des Eloges en l'honneur de Mars & de Lycurgue.

Lycurgue estant trompé par le desguisement de ceste Deesse, qui se changea en Esperuier, se promet la victoire, & toutes de bonnes aduentures, à cause que cet oyseau est le plus genereux, en tant qu'il prend les Colombes, & les autres oyfillons: Ioint aussi qu'il veid en songe vn Lyon espouuantable, qui poursuiuoit des Cerfs dans vn bois. Il se delibera de poursuiure Bacchus, & de combattre les Satyres sur ces heureux presages.

Cependant ceste Deesse qui ne desiroit que la perte de Bacchus, vint au Palais, pour luy persuader de porter à Lycurgue ses presens, sans entreprendre aucune guerre contre luy, & luy dit, ayant prins la ressemblance de Mercure.

Mon frere, ie vous conseille de fauoriser Lycurgue de vos presens d'hospitalité, desportez-vous de combattre vostre bon amy, & venez librement en sa terre, ne refusant point le traitté de paix, avec celuy qui n'a point d'ambition. Quel aduantage peut-on auoir à reduire vn homme qui s'est desia assubjetty de sa propre volonté? Ne declarez point

point la guerre à celuy qui vous rend
hommage: n'endossez point pour ce su-
jet vne cuirasse: ne prenez point vn heau-
me: laissez vos Thyrses ensanglantez, &
& portez-luy joyeusement vos pampres
& vos raisins, il les receura avec joye, &
avec applaudissement. Ne vaut-il pas
mieux chanter à table, & aux danſes, que
de faire resonner vne trompette? Laissez
vostre armee dans la forests, qu'elle se
campelà, en attendant l'ordre que vous
luy donnerez: Et cependant vous visite-
rez le bon Lycurgue, qui ne desire autre
choſe que d'auoir l'hōneur de vous voir
chez luy. Resoluez-vous donc d'y aller,
conseruant vostre courage pour Deria-
des. Vous deuez respecter sa vertu; car
c'est vn Roy genereux, qui tire son extra-
ction de Mars, & qui en a le courage & le
merite.

Ceste trompeuse Deesse luy persuada
par son artifice, de visiter ce Roy en l'e-
stat qu'elle luy auoit conseillé. Bacchus,
qui ne se doutoit point de sa trahison,
deposa son Thyrse, ses serpens, ses armes,
& sa cuirasse. Il se couronna de lierre,
portant vn barillet de vin couuert de
pampre, avec des coupes: & laissa son

armee au mont Carmel, & son chariot de Lyons. Ayant resolu d'aller au Palais de Lycurgue en cet arroy, sans armes & sans defence. Les Bassarides luy firent compagnie avec leurs cymbales & leurs cloches. Comme elles furent proches de là, le Rôy entendit vn grand bruit: Il sortit à l'instant, & ayant aduisé les Corybantes, avec leurs instrumens, & Bacchus couuert de lierre, il fut tout esmeu. Cet objet le mettant en cholere, leur parla de fureur, avec vn ris à la Sardanique.

Bacchus, tu m'apporte des presens, mais regarde ceux que les passans me donnent, dont les testes sont attachees à ces portes. Il faut que tu les pares aussi de ton Thyrsé, de tes pieds, ou de tes mains. Si tu commandes aux Satyres cornus, je les tueray tous cōme des bœufs: Ce sera là vn don d'hospitalité, afin que l'on dise, que ma maison est couronnée des membres de Bacchus. Je ne commande point aux Boetiens, & cest terre n'est point la ville de Thebes: ce n'est point icy la maison de Semele, où les femmes accouchent par le foudre, comme elles en ont conceu. Venez

donc, & ie vous couperay la teste par la moitié, & vos cornes aussi.

Lycurgue fit paroistre les effects de sa cholere, se jettant à corps perdu sur les Bassarides. Elles en eurent les atteintes: L'une jetta ses cymbales, l'autre ses cloches, vne autre ses pampres, vne autre tomba avec ses coupes & ses flustes: Tout ainsi que quand les Nymphes dansent sur le riuage, ou sur vn rocher au son des instrumens, en paix & sans trouble, en faisant resonner aux eaux sourdes les amours de Pan ou de Neptune: Lors qu'une grande abondance d'eaux surnage le riuage, elles courent aux collines, en quittant leurs flageollets, pour se sauuer du naufrage: ainsi les Bacchantes fuyoient les mauuais traitemens de cet inhumain qui les menassoit de leur ruine. Bacchus fut engagé avec luy au combat. Iunon qui le poursuioit de ses disgraces ordinaires, donna courage à Lycurgue, au desauantage de l'autre: Et de faict, il l'estonna de telle sorte avec vn foudre, qu'il creut que Iupiter le secouroit par le moyen incognu de son Trisulque. Ceste imagination l'affoiblit tellement qu'il fut

contraint de se jetter dans la mer rouge, où Thetis le receut en ses bras, & Nereee le conserua, le consolant de ces paroles.

Dis-moy, Bacchus, pourquoy es-tu triste? Ce n'est point l'armee des Arabes qui t'a vaincu: Ce n'est pas vn homme qui ta poursuiuy: mais c'est Iunon, la sœur & la femme de Iupiter. Elle s'est armee pour le seruice de Lycurgue: mais il ne faut pas se fascher de ce qu'elle ta subjugué. Iupiter mesmen'a point eu de honte de luy ceder. Ce te sera vne consolation, quand l'on dira que Iunon s'est bandee contre Bacchus.

Lycurgue grandement fasché de ce qu'il ne pouuoit suiure Bacchus dans les eaux, le depit luy fit dire:

A la mienne volonte que mon pere m'eust enseigné à nager, aussi bien qu'il m'a aprins les ruses de la guerre, afin que ie puisse le combattre dans les flots de la mer: Mais pource que ie n'y entēds rien, & que ie ne cognois point la profondeur des mers: habite le sejour de Leucothee, iusques à Tace, que l'on luy donne le nom de Melicerte. Je n'ay point de besoin en ceste occasion d'espee, ny d'au-

tres armes: mais des pelcheurs qui me le retirent delà. Et vous autres qui seruez Neree en les exercices, ne iettez pas vos reths sur les poissons: mais sur Bacchus, afin que vous le preniez aussi bien que Leuerthes, & que Palemon le conduise en mon Palais, quittant la mer Erythree pour venir dans vn chariot tiré par des cheuaux, & que vous me seruiez tous deux en ma maison.

Il ne se contenta pas de poursuiure Bacchus: il fit encor des menaces à la mer, & vouloit la fouetter: mais Iupiter voyant ceste impieté, luy cria.

Lycurgue, tu as perdu la raison: arreste-toy, iusques à tant que tu ayes le iugement. Tu sçais que Tyrresias vid Minerve en la fontaine, & si il n'estriua point contre luy avec violence: Et comme il la vid seule & toute nuë, aussi en perdit-il la veuë pour sa peine.

Iupiter luy donna cet aduis d'en haut, en menassant son impieté & sa rebellion.

Après que Bacchus se fut jetté dans la mer, Licurgue poursuit les Bacchantes, & entre autres Ambrosie. Elle appelle la Terre sa mere au secours, qui la fit changer en cep de vigne, dont les liens garrottent Lycurgue. L'Arabie le deliure de sa captivité. Neantmoins il est privé de la veüe. Bacchus enuoye un Herault d'armes à Deriades, pour luy declarer la guerre.

LIVRE VINGT-VNIESME.



LYCURGUE ne finit pas le combat, apres que Bacchus se fust jetté dans la mer: mais il poursuivit les Bassarides. Iupiter qui vouloit punir son insolence, donna courage à Ambrosie, pour luy faire resistance. Elle commença à se mettre en fureur & en alarme. Neantmoins il ne s'estonna pas, soustenant cet effort avec

vne plus grande generosité, & luy lança vne grosse pierre, dont il l'assena par le sein. Ce coup nela tua pas, ce qui le fascha de telle sorte, qu'il s'escria.

O Mars, Roy de la guerre, & pere de Lycurgue, considere l'opiniaistreté d'une femme, qui combat en la place de Bacchus. La merme l'a rauy, & m'a enuié la gloire de le vaincre. Il est caché en ses flots, seray-je contrainct de m'en retourner en ma maison sans proye & sans captif.

La cholere le transporta aussi-tost: voulant saisir Ambrosie, & la lier comme vne esclauue prinse en la guerre, mais il nela peut ny tuer, ny emmener. Elle luy eschappa des mains, & supplia la Terre sa mere de luy ayder en vne occasion si importante, pour euitier la fureur de son ennemy. Elle exauça ses prieres, & s'ouurit, la receuant en son sein, & la metamorphosa en vn cep de vigne, remplie de petits tortillons, qui semblent representer les liens qu'elle prepara à Lycurgue. Et pour l'obliger dauantage, Rhee luy donna la parole, en gratifiant Baccus.

Encore que ie sois vne plante insensible, neantmoins ie ne laisseray pas de combattre Lycurgue. I'offenceray son corps mesme dans les branches, luy faisant la guerre: Et au lieu de chesnes, ie le garrotteray de fueilles, afin que l'on dise que les Bassarides tuent leurs ennemis n'estans que fueilles & branchages. Garde-toy donc de nos pampres, les vignes te combattront viuellement. Ie te poursuiuois estant en vie, & ie te vaincray estant morte, pour te monstrier quel courage les Bacchantes peuuent auoir. Tu sçais quelle force a le Remore, qui arreste vn grand vaisseau, encore que le vent fasse tous ses efforts à la pousser. Ie te seray vn autre Remore, t'arrestant sans chesnes, en attendant le retour de Bacchus.

Son discours fut accompagné d'effets: Elle estendit ses rameaux, garrottant Lycurgue avec ses tortillons. Cependant il murmuroit, s'efforçant de se desgager: mais il n'eut pas la force. Les Bacchantes s'assemblerent à l'entour de luy à dessein de l'estouffer. Mars en aduisa vne qui portoit vne coignée, & de peur

qu'elle n'offençast son fils, elle luy arracha de force, neantmoins il ne peut le deliurer de sa captiuité, encore qu'il eut bien desiré: car il fut contraint de ceder à la force, & au foudre de Iupiter: Mais ô Muse, dittes moy le mal qu'ils luy firent.

Clide & Gigarto le fouetterent si bien, qu'elles luy firent rougir tout le corps du sang qui ruisseloit de ses playes. Pphlio luy mit des espines aux pieds, Eriphe s'efforcea de le terrasser Phasilee luy perça le ventre, Cheope luy couppa le nez, & Cisseis le bastit avec des bastons de lierre.

En ce mesme temps il arriua vn grand accident en Arabie, Neptune combatit avec son trident, & frappa la terre, esbranlant ses fondemēs. Les vents firent vn grand tremblement, les villes, & les maisons tomberent & les arbres aussi, les Nymphes Nyfiques se plaignirent de cet accident & de la mort de leurs parens. Tout fut en confusion; l'une pleuroit la mort de son fils, vne autre ensanglanta ses mains d'un enfant, Agane pourfuiuit les siens, & les couppa en plusieurs morceaux, vne autre craignoit la

rage de Pan : car il ne fut pas exempt de ceste fureur, il tua ses propres enfans, & les mangea. Cependant Lycurgue estoit garrotté avec les fueilles, sans qu'il flectit son courage, ne voulant pas s'humilier deuant Bacchus, encore qu'il fut en captiuité, n'ayant point peur de son foudre, son opiniastrété fut si grande, qu'il ne succomba point, au contraire, il menassa les Iacchantes, encore qu'il fut atteint de tous les costez, n'estant assisté que de Mars, & combattu des autres Dieux, de Iupiter, de Neptune, de Neree, & de Bacchus.

Allumons du feu, ce dit-il en cholere, & bruslons les vignes, les fueilles, & les pampres. Bacchus estant caché dans les eauës, & que Thetis en recoiue les cendres, & qu'elle esteigne le feu qui se sera conserué. Rompez tous ces liens, & ces tortillons, & les reths des Nereïdes. Approchez-moy pres de la mer, afin que ie me joigne à Protee le dieu Marin, pour combattre Bacchus qui s'y est refugié, & que ie le brusle avec Melicerte.

Il fut mort en ces extremittez, n'eust esté que l'Arabie prit pitié de luy, le deliurât de la captiuité où il estoit, & rom-

pit ses chaifnes, le mettant en liberté, & arracha les fueilles d'Ambrosie, apaisant Neptune, à desseing d'honorer Lycurgue comme vn Dieu, & luy sacrifier: mais Iupiter, de peur que sa rebellion ne donnauuaise exemple, & que l'on ne fit à l'aduenir des reproches à Bacchus. Il priua Lycurgue de l'vsage des yeux, le contraignant de chercher vne conduitte pour le mener par les chemins. Cependant les Nereïdes traitterent Bacchus fort somptueusement, & la belle Ino chanta vn Hymne en sa loüange, & Melicerte versoit du vin: mais comme il estoit en ce sejour avec Thetis, il eust le loisir de caresser la belle Ino, & de conferer avec elle, & de cōmunquerauec Palemon, qui auoit esté nourry avec luy. Mais pendant son absence tous ses compagnons furent en grande peine, & ne firent plus de balets, & de danse, le cherchant en tous les lieux où ils croyoient qu'il y fut. Les Satyres couroient dās les mōtagnes avec beaucoup de tristesse. Les Capripedes n'en auoient prs moins d'ennuy, les Silenes jettoient leurs Cymballes, Macris sa nourrice en porta vne grande tristesse,

& la fit paroistre en sa contenance: mais comme ils estoient en ceste fascherie Sciline abandonna la mer, monta dans son chariot, & vint annoncer le retour de Bacchus tant desiré. En ce mesme temps il enuoya vn Satyre à Driades en la qualité d'Herault, pour luy declarer la guerre. Il passa par le mont Caucase, & arriua en la ville metropolitaine des Indes. Sa façon pouuoit apprestre à rire: car il estoit semblable à vn Taureau avec les cornes qu'il portoit en la teste, il auoit vne massuë qui luy pendoit sur vne espaule, & les oreilles grandes comme vn asne, & le corps tout velu, & vne queue qui luy trainoit, & les pieds de chevre. Les Indiens estonnez de ceste forme si estrange, s'assemblerent à l'entour de luy, Driades estoit au milieu d'eux dans son chariot, tiré par des Elephans. Quelle nation de gens, ce dit-il, nous enuoye Bacchus? sont-ce là de ses Ambassadeurs? ce Satyre est semblable à vn taureau, ce n'est pas vn homme, ie croy qu'il nous l'a enuoyé pour nous faire rire: il semble auoir deux natures; l'vne d'homme, & l'autre de bouc. L'on dit que ton maistre a esté enfanté par le foudre de Iupiter: mais l'eauë peut

vaincre le feu, si mon pere Hydaspes veut
il esteindra son foudre par ses flots.

Driades passionné de colere declara la
guerre, en frappant son bouclier de son
espee, dont le bruit fit resonner l'Echo.
Ce Satyre voulant accomplir son Am-
bassade, luy dit.

Driades, le Roy Bacchus te somme de
recevoir ses presés de sa vigne, son pam-
pre & son vin, sans guerre, & sans conte-
station, autrement il te poursuiura iusques
à tant que les Bassarides ayent reduit les
Indiens sous le joug de leur obeissance.
Voila ce que i'ay à te dire. Respōds à ce-
ste proposition, afin que ie le rapporte à
mon maistre.

Il n'eut pas si tost acheué, que Driade
s'écria, ô Dieux! quelles paroles hardies
profere vn homme qui est demy beste?
N'estoit que i'aurois hôte de me venger
d'un Heraut qui est sans armes, & sans
deffense, sinon celle que le droict des gēs
& l'honneur de la foy publique luy don-
nent, ie t'apprendrois à parler. I'ay en-
tēdu la peine où s'est trouué Bacchus en
ses combats, ie sçay comment Lycurgue
la redressé, lors qu'il fut cōtraint de fuir,
& de se jetter dans la mer pour se sauuer,

encore qu'il prene la qualité d'un Dieu: Si tu veux establir les mysteres, prends la peine d'aller iusques en la region des Medes, & les publie, on te caressera là comme un imposteur. Je te monstrey la terre des Bactriens, où l'on adore le Dieu Mithias, & Phaëton l'Assirien en Perse. Quant à moy, ie ne cognois point tant de diuinitez, & ne les honore point ny Saturne, ny Iupiter. Ie ne croy pas, comme l'on dit, qu'il deuorast ses enfans. Ie ne recognois point la nature des presens que tu nous offre, n'y aussi ta vigne, ie n'ay point d'autre boisson que celle que ie puise dans le fleuve Hydaspes. Semele ne m'a pas engendré apres apres auoir receu son amoureux foudroyant, & le feu ne m'a pas enfanté: mais c'est la guerre qui nous accroist, & qui nous multiplie, ie ne reuere point les enfans de Iupiter, n'ayant point d'autre Dieu que la terre, & l'eauë. Va, rapporte cela à ton maistre. Retire-toy cependant, que ie ne bande mon arc, & fuis mon espee. Que Bacchus arme ses Satyres & ses monstres, qui sont bestes & hommes. Qu'il range les regimens de femmes en champ de bataille. Apres la vi-

toire, que ie suis asseuré de remporter,
ie te conduiray captif avec Bacchus en
mon triomphe, & ne pense pas que ie te
donne la qualité de Heraut d'armes: car
tu n'es propre à rien, mais tu me seruiras
à table pour me faire rire, voyant tes grã.
des oreilles, & ta sotte posture.

Après ces menasses il le quitta, cepen-
dant ce Satyre escriuir promptement la
responſe qui auoit esté faicte à la somma-
tion. Bacchus, fais la guerre à Deriades, si
tu es assez fort pour le combattre.

Il ne manqua pas de rapporter le tout
à son maistre. En ce mesme temps les Si-
les, & les Bacchantes receurent les nou-
uelles du retour de Bacchus, dont ils fu-
rent grandement resioüis. Maron com-
mencea à témoigner sa force par la dan-
ſe, Minallion fit reformer ses instrumens:
Bacchus sortit de la mer, où Protee luy
auoit raconté tout ce qui s'estoit passé
en son absence, luy rapportant que
Neptune auoit esbranlé toute l'Arabie
avec son trident. Que Lycurque auoit
perdu la veuë. Que les bergers estoient
deuenus furieux. Qu'Ambrosie auoit
esté changée en vigne, & qu'elle s'e-
stoit fort courageusement defenduë

contre Lycurgue, l'ayant mesme garrotté, le recit de ses histoires le contenta. Le Heraut d'armes qu'il auoit enuoyé à la Cour de Bacchus luy fit entendre la rebellion de Driades, luy donnant le breuet où sa responce estoit escritte : Bacchus se delibera de le combattre. Pour cet effect il māda les Rhadamañes, vail-lans Capitaines, que Minos auoit autre-fois chassé de Crete en Arabie : & cōme il eut pris le dessein de se preparer vne armee nauale, il monta en son chariot, & arriua en l'Orient, ayant passé par le mōt Caucase. Mais Driades ayant entendu que Bacchus s'aduançoit, ordonna que l'on fortifiast les frontieres de son pays pour luy en empescher l'entree, laissant vne grande partie de ses cōpagnies au fleuve, en atendant le tēps de le joindre. Et pource qu'il se resolut de ne cōbattre point Bacchus en bataille rangee, il cō-manda à son infanterie de se cacher dans l'espoisseur de la forest en ambusca-de pour surprendre les ennemis. Ce lieu estoit fort propre, car jamais les rayons du Soleil n'auoient penetré son obscurité, & la pluye n'auoit jamais mouillé la terre. Et ie croy que si on eut jetté vne
pierre

Pierre dedans elle ne fut pas tombée à bas, toute l'infanterie se tint en grand silence, sans faire aucunement de bruit, se reposant toute la nuit, en attendant l'occasion que la fortune pouuoit leur presenter.

*Bacchus faict passer son armee iusques à la riu-
ue du fleuve Hydaspe, où les animaux, &
les arbres mesme le recogurent, luy faisant
hommage, au grand cōtonnement des enne-
mis. Vne Hamadriade Indienne descouvre
l'Ambuscade qu'ils auoient préparé à l'ar-
mee de Bacchus. Oeagre & Æacquetuent
vn grand nombre d'Indiens, & la terre
leur mere en faict des plaintes à Iupiter.*

LIVRE VINGT-DEVXIESME.

MAis apres que l'infanterie fut
arriuee au fleuve Hydaspe, les
Bassarides y danserent avec
beaucoup de resioüissance. Les
Satyres menerent vn grand bruit, & la
terre sembloit participer à ceste joye,

Najades voguoient dans les flots auëc vne contenance gaye, les Nymphes chantoient tout ainsi que les Syrenes quant elles entonnent leurs chansons. Le bocage voisin fremissoit, comme s'il eust eu du ressentiment, & les chesnes jetoient des voix inarticulees. Les Hamadriades follaistroient, vne Nymphé chantoit au haut d'un arbre, & au pied il y auoit vne fontaine qui bouillonneoit, où les Najades se baignoient par grãde volupté: l'on voyoit au pres vn rocher (d'où couloit du vin en abondance) les abeilles qui auoient faict leur miel sur les petits arbrisseaux, & les Oreades les mangeoient. Ceste liqueur arrosoit les plantes circonuoisines, & mesme l'Oliuier. Les Serpēs sifflaient en vne façon comme s'ils eussent voulu chanter, lechans les pas par où Bacchus auoit passé, avec vne posture d'hommage, & de reconnaissance. Les Tygres sautoient dessus les rochers, vn grand nombre d'Elephans courroit sur les collines inaccessible, & si hautes, que les oyseaux n'eussent pas osé entreprendre d'y voler, & le Lyon les deuançoit à la course, les oyseaux imitoient la voix & les paroles des

hommes chantans la victoire de Bacchus, les Pantheres, & les Ours tesmoignoient le mesme applaudissemēt. Diane retint ses chiens à l'attache.

Voyant la douceur de tous ces animaux, elle débādā son arc, de peur qu'elle ne les offençast de ses fleches. Vn Indien espion veid toutes ces merueilles au trauers d'une branche qui estoit vn peu escartee; comme vn homme peut entrevoir par la visiere d'un heaume.

Comme donc ils eurent apperceu tous ces miracles dans la forest, il en rapporta l'histoire au camp des Indiēs avec beaucoup d'estonnement, blasmant la rebellion des Morrhee & des Driades. Cependant les Indiens couroient d'une furie par la campagne, en deliberation de se ruer sur les Satyres. Ils décochoiēt leurs traits sur les arbres qui estoient agitez de la fureur Bacchique. Vne Indienne couppa vn rameau d'Oliuier, & la presenta à Bacchus en tesmoignage de la paix qu'elle luy demandoit, & de l'obeissance qu'elle promettoit luy rendre.

Les ennemis se fussent rendus facilement aux merueilles qui leur estoient

apparüe : mais Iunon qui ne se lassoit point de faire la guerre à Bacchus , se desguisa en la façon d'un soldat , & donna courage aux Indiens avec aduis de ne boire point de l'eau du fleuve , qu'ils rencontreroient encore qu'ils eussent grand soif , leurs persuadans par ses artifices que ceste liqueur estoit empoisonnée , & qu'elle leurs osteroit la raison : comme ils estoient engagez dans les passe-temps , les Indiens voulurent les surprendre & vinrent à la file : mais vne Hamadryade tenant en sa main vn thyrses , & vne couronne de lierre , sortit du bois & descouvrit les ruses des Indiens & leurs embuscades.

O Bacchus , ce luy dit-elle , qui es le Roy de tous les fructs la vigne qui t'est consacrée doit remercier les Samadryades des courtoisies qu'elles te font , ie ne suis point Bassaride , encore que i'en porte des marques , ie ne suis point compagne de Bacchus , le thyrses que ie porte n'est pas de luy , ie ne suis point de Phrygie ta patrie , ie n'habite point la terre des Lydiens , ie suis Hamadryade hostesse des bois , où tes ennemis t'ont dresse des embusches , ie veux au

preiudice de ma patrie deliurer ton armée du peril où elle est, les aduis que ie te donne sont tres-veritables, ie veux recevoir tes loix, encor que ie sois Indienne: car ie dois recognoistre la faueur que nous fait ton pere Iupiter de ses pluyes qui seruent à faire croistre nos chesnes; mais ce n'est pas assez, il faut que tu m'obliges de ta vigne, & ie la planteray icy, donne moy tes raisins & ceste liqueur qui assoupit les ennuis, ne passe point la riuere de peur des ennemis, considere ceste forest ils sont là dedans cachez, & n'attendent que l'heure de la charge: mais que peuuent faire ces coyons dedans ce bois qui ne viuent qu'autans que tu retiens tes armes, ne les publie point cet aduis de peur que Hydaspe ne le sçache, & qu'il le descouure à tes ennemis.

Ceste Nymphe se retira aussi promptement qu'un oyseau changeant de forme & s'en retourna dans la forest, Bacchus visita tout son camp, & aduettit tous ses Capitaines en secret de tout ce que l'Hamadryade luy auoit dit, ayant entendu le dessein des Indiens, avec ce conseil qu'elle auoit donne de ne les attaquer pas sans armes, ils prindrent reso-

lution de se comporter selon les occurrences & selon cet aduis. Apres qu'ils eurent banqueté, ils vindrent boire au fleuve: car on ne leur bailla point de vin, de peur que l'yuesse ne les endormist d'un profond sommeil. Neantmoins les regimens se retirerent, qui çà, qui là, & reposerēt sur leurs boucliers, tous prests de rendre combat cōtre les Indiens qui deuoient faire vne sortie, & Iupiter destourna leur resolution, faisant tomber vne grosse pluye qui les empescha: mais le Soleil estant leué, & au retour de l'Aurore, l'armee de Bacchus s'approcha de la forest, sonnant vne chamade, Thuree Capitaine des Indiens sortit, & courut dessus, les Satyres reculerent à desseing, & grossirent la queue, en diminuant la teste de l'armee, comme s'ils eussent voulu fuir, iusques à tant que les ennemis furent en plaine campagne, & à l'instant ils retournerent, la queue parut à la teste des Indiens, & les chargerent d'une estrange façon. Il y auoit vn Capitaine Lydien fort vaillant, qui renuersoit tout ce qui se presentoit deuant luy, rompant les hayes des picquiers, & forçoit les regimens. Aussi

estoit-il armé à son aduantage. Le casque qu'il portoit estoit doré qui reluisoit au Soleil, brillant, & esbloüissant les yeux des Indiens. Sa cuirasse esclattoit, comme si elle eust esté battuë du plus fin or que Pactole faict rouler en ses sablons. Ce Mars genereux estoit assisté d'un Capitaine qui estoit d'Alybe avec un pareil equipage, ses armes estoient toutes argentées, dont l'esclat ressembloit aux rayons de la Lune.

La presence de Bacchus espouuenta les ennemis, encore qu'il n'eust point d'espee, ny de picque. Il estoit au milieu de ses Capitaines, combattant d'un tel courage avec son Thyrsé, qu'il renuersoit tous les ennemis, Thuree mesme ne pouuoit soustenir les furieuses charges qu'il faisoit, vne grande partie de cette armee fut contrainte de luy faire iour, & euter sa rencontre. Oeagre genereux Capitaine le seconda, les poursuiuant d'un si grand courage, qu'il rompit tous leurs rangs, tout ainsi qu'un torrent d'eauë renuersé les chaussées que l'on a faict pour les contenir dans leurs bornes, & desracine les arbres, de mesme

il passe dans l'armée foudroyant tout, les soldats se mettoient à couuert de leur bouclier, qui estoient faicts en façon de tortuës, & estoient assemblez aupres de luy en rond, se defendans le mieux qu'ils pouuoient. Ils estoient fort pressez: car il les poursuiuoit de pres, estant assisté d'un vaillant soldat, passant dessus avec son cheual, l'un auoit un coup de pique dans la mammelle, un autre un coup d'espee sur la teste, un autre dans le ventre, un autre auoit la main couppee, & elle tomba à terre en palpitant, un autre ne quitta point le bouclier encore qu'elle eut esté aualée, les ames qui estoient contraintes de quitter leurs corps les regrettoient, desirant de sejourner plus long temps, un autre brandissoit la pique menassant de couper un bras: Et les ennemis se defendoient avec leurs boucliers qui resonnoient aux coups qu'ils receuoient, & alors ils faisoient piroüetter leurs piques d'une grande violence. A l'un ils estropierent un bras, à l'autre la teste, esclarcissant le nombre des Indiens: & tout ainsi que l'air se purifie de ses nuages, apres que les rigueurs de l'hy-

uer sont passees , & que le Printemps est venu. Ainsi ce braue Capitaine fait jour dans l'armee des ennemis. Quelques-vns jetterent vne grosse pierre en l'air, qui tomba dessus vn heaume, & rompit la courroye qui le serroit: l'Indien parut la teste nuë. Les armes faisoient vn cliquetis estrange, les chevaux mesme hannissoient si fort, que l'on eust iugé que la chaleur du combat les eust esmeus. L'Echo faisoit resonner cest tintamarres, & le son des trompettes dans ses cauernes. Il y eut vn grand nombre de morts, l'un respandoit le sang par sa playe, vn autre tomboit sur le ventre. Les morts s'esleuoient quelquefois, vn autre se rouloit sur le sable, vn autre s'appuyoit sur son bouclier, vn autre se couchoit sur la teste d'un de ses camarades qui estoit blessé, vn autre crioit estant offensé à la gorge, & roidissoit les pieds en mourant, & vn autre mordoit la terre avec ses dents, comme s'il se fust courroucé contre celuy qui l'auoit blessé, vn autre auoit sa robe teinte de son sang. Vn Indien qui veit que ses gens reculoient, sonna de la trompette pour les ralier, & à l'in-

stant ils acoururent en diligence, se jet-
tans dans la presse avec plus de courage,
craignans de perdre la bataille, & que
leur Roy ne leur en fist des reproches. Ils
poursuiuirent *Æacque*, qui n'estoit
point armé ny de casque, ny de bouclier,
ny de cuirasse: mais seulement de l'assi-
stance que luy donna *Minerue* en ceste
occasion, si dangereuse pour luy. Elle le
cacha d'une nuée, qui par apres se reso-
lut en pluye, arrosant la terre, dont la
seicheresse estoit grandement nuisible
aux fruiçts. *Æacque* estant entouré de
ses ennemis, reprit courage, & les char-
gea d'une furieuse façon: Il tuoit l'un, &
faisoit fuir l'autre. Le champ de batail-
le fut tout couuert de sang. Il y auoit vn
grand nombre de morts, l'un estoit
estendu dessus son compagnon, l'autre
respiroit encore. Le sang ruisseloit de
tous les costez, que la terre receut,
ayant compassion de la mort de ses en-
fans, dont le regret luy fit faire ces
plaintes.

Iupiter, qui commandez au Ciel & à
la terre, qui enuoyez la pluye pour faire
croistre les fruiçts, vous en auez fauorisé
toute la Grece: mais vous auez arrosé

toutes les Indes de sang. Celuy qui labouroit la terre, & qui moissonnoit est mort. Vostre pluye a fait croistre les espics aux payfans: & vous auez moissonné les Indiens apres les espics. Vous auez enuoyé la pluye comme Iupiter, & repandu le sang comme vn Mars.

La Terre tint ce discours à Iupiter, qui fit esclatter son foudre: & Æaque fut atteint de crainte. Vn Indien luy darda vn jaelot, & peu s'en fallut qu'il ne luy deschira le corps: Mais Minerue destourna le coup. Neantmoins pource qu'il auoit effleuré la peau de sa cuisse, il eut de la frayeur. Vn pieton des ennemis se voulut sauuer dans le bois d'où il estoit sorty: mais Erethee pousse son cheual, & le poursuit; Il estoit aussi esloigné de luy, comme vn jaelot, qui est dardé peut atteindre. Ce pieton se retourna, craignant le derriere, & se presente à la teste du cheual: mais il se retira, & donna vne passade: Cependant cet Indien s'obstine avec son bouclier à sept peaux renforcees, & le poursuiuit avec l'espee à la main, à dessein ou de mourir, ou de le faire tōber, ou de le tuer. Ce qu'il eust executé, n'euy


esté qu'Erethee le perça de sa lance, le renuersant, & tomba tout mort sur la place. Cependant Eaque se jetta dans la presse des ennemis, & banda son arc prest à descocher: Toutes ses fleches ne perdirent point leur coup; car Calliope les conduisoit. Il en tira neuf, & en frappa neuf soldats, de sorte que le nombre des morts reuenoit à celuy des fleches: La premiere atteint le front, la seconde la poitrine, la troisieme les intestins, la quatrieme le ventre, la cinquiesme les costez, la sixiesme les pieds & comme il tiroit les autres, elles volerent plus viste que le vent, sans que l'on peust les appercevoir. Tout ainsi que quand vn Forgeron manie vne barre de fer sur son enclume, les estincelles de feu sautil- lent à mesure qu'il bat, tantost vne, tantost deux outrois, & puis sans nombre: De mesme il decochoit ses fleches, les vnes apres les autres, esclaircissant l'armee: Mais quand Bacchus apperceut que l'on auoit faict jour dans l'armee des ennemis, donna courage à ses soldats, les animant des pointes de l'honneur & de la gloire, Eaque ne desista point de combattre, se ruant sur les

ennemis d'une fureur incroyable: Il tuoit l'un & renuersoit l'autre, il les poursuuiuit iusques à la riue du fleuve, & les acula, les contraignant de se jeter dans l'eau, en tuant vne grande partie sur le sable. Il y eut vn si grand nombre, que la riuere en deuint toute rouge & ensanglantee. Vn des principaux se precipita dans l'eau pour se sauuer, l'on voyoit son corps flottant & enflé, à l'ordinaire de ceux qui sont enseuelis dans l'eau. Il y en eut vn grand nombre qui demanda composition à *Æaque*: mais il ne voulut point en receuoir, au contraire, il les poursuuiuit avec vne plus grande fureur, & le fleuve en fut tout remply. *Æaque* n'executa pas seul ces exploits de guerre, il estoit assisté d'une Diuinité, combattant vaillamment en ce lieu comme pere de *Pelee*, en prognostiquant les stratagemes qu'*Achille* son petit fils deuoit faire au fleuve *Scamandre*. Ceste perte fut sensible aux *Nymphes*, vne *Nayade* touchée de ressentiment de tant de carnage, parla de la sorte, en blasmant grandement *Æaque*.

O cruel ennemy des Nayades, pour
quoy respandez-vous tant de sang?
Ayez compassion de ces flots innocens,
que Iupiter faict couler. N'avez-vous
pas assez tué d'Indiens? Cessez d'esmou-
voir les Nymphes aux larmes. Vostre
mere n'estoit-elle pas Nayade? Je sçay
qu'*Æaque* se plaisoit en ce séjour. Res-
souvenez-vous de celle qui vous a en-
gendré, & ne poluez plus vostre de-
meure, autrement ie l'abandonneray, &
m'en iray en la mer, où *Thetis* me rece-
ura: Et cependant que *Bacchus* & *Eryn-*
is furie d'Enfer, prennent le soin de ce
fleuve de sang.

Æaque poursuit les Indiens iusques dans le fleuve Hydaspe, où il en tuë un grand nombre. Les Satyres se resoluent de passer en l'autre riuë. Hydaspe pour se venger de la mort de ses enfans & de ses voisins, persuade à son frere Æolé d'es mouoir la tempeste, pour noyer l'armee des Satyres. Bacchus brusle & consomme l'eau du fleuve. L'Ocean parle à Thetis pour inonder toute la terre.

LIVRE VINGT-TROISIESME.

ETTE Nayade apres ces plaintes, se plongea dans l'eau: Mais Æaque ne desista point de tuer, & de pourluiure les ennemis iusques dedans le fleuve. Vne grande partie s'arresta sur le riuage, combattant vaillamment, & l'autre se jeta dans l'eau. Vous eussiez veu ces pauvres Indiens se debattre de pieds & de mains, comme s'ils eussent nagé pour euitter la mort: mais les flots trop cruels

les engloutirent. *Æaque* ne demeurá pas long temps en celieu apres tant de carnage. Il se retira dans la campagne, & serua sur vn Regiment qui auoit soustenu plus que les autres, & les accula de meisme. *Bacchus* alors le joignit. Les ennemis se precipiterent dans l'eau, & si vn d'eux nageoit sur son bouclier, il le frappoit par derriere. S'il estoit sur le dos, il l'offensoit de son thyrsé en la poitrine: car il connoissoit la profondeur & les endroits perilleux des eaux, depuis que *Lycurgue* le contraignit de se jeter dans la mer, où *Neree* le receut. Il y eut vn grand nombre d'Indiens aculez par le fleuve, & l'vn d'eux s'empestra dans la bourbe, presque iusques á la teste, & neantmoins il ne laissa pas de se defendre courageusement contre *Bacchus*. Il darda vn iavelot á *Æaque*, mais la main luy varia, & toucha *Bacchus* au lieu de l'autre: Ce coup ne fut pas aussi sans vengeance, il le frappa fort rudement de son Thyrsé, & si il ne peut euité ce coup: car il auoit les pieds empestrez de la vase & du limon. Vn autre s'eschappa dans l'eau, où il combattit contre la mort. Vn autre estoit iusques au méton,

comme

comme s'il eust esté fiché, & se mit à nager, euitant le chocq des flots, qui vouloient l'engloutir: Vn autre iusques au nombril, vn autre iusques aux levres, vn autre à qui on voyoit seulement les cheveux. Vn Indien des plus courageux ayant veu ce grand carnage, l'vn tué d'un coup d'halebarde, l'autre d'une pique, l'autre d'une fleche, l'autre du thyrsse, monstra ce desastre à Mars: La cholere, & la tristesse luy firent deschirer sa face, respondant abondance de larmes. Le desespoir le saisit, prenant resolution d'imiter le courage d'Orontes, qui se tua de ses propres armes, pour n'estre point vaincu. Il deposa sa cuirasse, & tirant son espee, il se l'enfonça dans le ventre.

Reçois mon espee en tes entrailles, (ce dit-il) car ie crains que ce lasche Bacchus ayt l'honneur de m'auoir vaincu: Je veux mourir de ma main, de peur que mon pere ne me reproche que jaye esté surmonté avec vn thyrsse, & qu'un Satyre effeminé soit mon vainqueur.

Il mourut constamment de ses propres armes, avec vne resolution qui tesmoignoit la force de son courage: ne ressemblant pas à Ajax, dont la mort

fut enragee. La deffaitte fut si grande, que le fleuve d'Hydaspe en fut tout remply, leur servant de tombeau, non sans estre blasiné des siens: car vn des ennemis qui estoit aux abois de la mort, fit ces reproches à Hydaspe.

Mon pere, pourquoy receuez-vous vos enfans dans vos flots? Pourquoy auez-vous permis qu'ils ayent esté tuez? I'ay passé souuent par la terre des Bactruens: mais Araxes n'a point enduré vne telle boucherie de Medes. Euphrates n'a point receu les Perles. I'ay esté à la guerre au mont Taurus: mais ny luy, ny Cydnus n'ont point enseuely les Cilices. Tanais n'a point souillé ses mains de ses peuples Sauromates: au contraire, il s'est armé pour leur seruice, ayant vaincu les Colechiens leurs ennemis. Eridan est plus heureux que vous, car il a receu Phaeton qui estoit estrangier, & non point ses citoyens: n'ayant point englouty Galatee, & n'a point seruy de tombeau à Celte, desirant plustost de faire rouler innocemment ses richesses qui sont dans ses sables, & donner lustre aux larmes des Heliades, que d'assister à des offices si funestes. Le Rhein

s'est bien autrefois armé contre ses propres enfans: mais il auoit raison de le faire, car il punissoit alors leurs incestes. Mais vous, sans auoir compassion de vos enfans propres, vous trauallez à leur mort. Comment pourrez-vous vous joindre aux autres fleuues en l'estat où vous estes, mesme à la mer & à Thetis, tout estant remply de sang & de cruauté? Gardez de polluer Neptune de vos corps: Vostre eau corrompuë est pire que les coups de Bacchus, & l'un me tourmente plus que l'autre.

Il finit ce discours avec la vie, tombant au fond de l'eau; son heaume paroissant à deniy. Les corps flottoient, & les armes ressembloient à des mats de nauires, & les boucliers nageoient dessus. Bacchus auoit resolu de ne se retirer point de la charge qu'il n'eust tout tué: mais il jugea qu'il estoit à propos pour son honneur de conseruer Thuree, pour le rendre tesmoin de sa victoire: Et de faict il luy donna la vie.

Comme Iunon eust esté aduertie de la perte des Indiens, elle descendit en

terre, & s'arresta en Autolie: Et parla à Hydaspe, luy persuadant de se venger de Bacchus. Mais apres ceste deffaitte, il delibera de passer le fleuve Hydaspe. Pour cet effect l'armee se procura diverses inuentions: les vns printrent des barques de pescheurs, les autres de petites nasselles; les autres avec deux ais joints ensemble; les autres assembloient des picques & en faisoient des batteaux sans voile & sans rame: les autres passoient sur leurs boucliers. La Caualerie ne fut pas en peine, car les cheuaux qui nageoient donnoient de l'aduantage à leurs Caualiers. Quant à l'infanterie, elle eut plus de peine, estant contrainte de s'accommoder de peaux de bouc enflées de vent. Entre les autres le Dieu Pan passa avec ses pieds de chevre, sans batteau, encore que la riuiera fut grandement haute. Lycus gouuerna le chariot, que ses cheuaux marins conduisoient, passant avec son frere. Scelme monta sur vn taureau, & ne fut pas beaucoup empesché. Les Silenes nageoient de pieds & de mains. Hydaspe qui auoit dessein de se vanger, dit à son frere Æole,

d'une voix qui ressembloit à vn torrent qui bruit.

Mon frere, iusques à quant vostre eau fera-t'elle tranquille? Je suis d'aduis que vous l'esmouviez en despit de Bacchus, & que nous engloutissions son infanterie. Il n'est pas seant à vous, ny à moy, de permettre qu'ils passent ainsi à leur aise, ne nous ayans point recognus. Obligez-moy donc, & commandez aux Vents de les troubler, & de faire naistre vne tempeste qui soit capable de perdre les Satyres: que la nasselle des Silenes perisse, & que mes flots entraînent le chariot de Bacchus. Je ne veux point laisser la mort de mes enfans impunie: joint aussi que c'est vne honte que ces pietons passent à pied sec. Dites-moy donc d'où vient que l'eau est si facile, & qu'elle est teinte? D'où vient que les Nayades entendent le hannissement des cheuaux, & le cliquetis des armes? Quoy, est-ce qu'il y a de la honte à combattre contre des fleuves, & de ce que des femmes se hazardent si libremēt en vn lieu où les plus hardis Indiens n'ont pas osé entreprendre, ny mesmes Deriades avec son chariot d'Elephans.

Æole flechit aux raisons de son frere:
La tempeste s'esleua aussi-tost: il esmeut
la vague, & combatit le passage de Bac-
chus avec ses flots. La tourmente reson-
noit cōme vne trompette, esleuant l'eau
contre les Satyres. La tempeste fut si
grande, qu'une Bassaride atteinte de
frayeur, laissa tomber ses cymbales, & se
mit à nager, remuant les pieds & les
mains, & rompit de force les liens de ses
souliers: & les flots qui s'esleuoient ius-
ques à sa teste emportoient ses cheueux.
Vne Bacchante fut contrainte de quitter
son voile, & ses peaux de Pantheres. Vn
Satyre nageoit le mieux qu'il luy estoit
possible. Märon auoit peine à s'eschaper
à cause de sa vieillesse, laissant aller sa
peau de bouc & son flageollet à la mer-
cy des flots, sa perruque luy flottant
dessus les espaules. Le fleuve murmu-
roit, appellant Bacchus au combat. Le
vent estoit si grand, qu'il pouffoit l'eau
iusques aux nuës. Iamais Bacchus ne fut
en telle peine, iamais il n'eut vne pareil-
le crainte en la guerre, comme celle qu'il
eut en ce passage. Iamais Scamandre ne
fit vn tel combat, qu'Hydaspe par l'ora-
ge, & par la tempeste. Bacchus irrité de

tes atteintes, & de ces resistances, dit tout en cholere,

Pourquoy trouble-tu le fils de Iupiter? Ne sçais-tu pas bien que c'est luy qui te donne la vie & le cours? Si ie veux le supplier il te seichera. Tu es yssu des Nuees que mon pere resoult en eau, & cependant tu fais la guerre au fils de celuy qui assemble les nuages pour ton service. Garde-toy bien du foudre de mon pere, de peur que celuy qui luy a seruy à me produire, contribuë à ta perte. Garde-toy que ie ne t'appaise comme le fleuve d'Asope, iulques à tant que i'accoise ma cholere. Veux-tu, toy qui n'es qu'eau, faire la guerre au feu? Tu ne sçauois seulement soustenir la moindre estincelle du foudre. Que si tu te glorifie de l'extraction que tu tire de la Nymphe Asterie, elle est yssuë de la famille du Soleil: Et mon pere a autrefois foudroyé Phaethon, lors qu'il voulut conduire le chariot de Phœbus, & deplora son accident, & s'il n'a pas esté si hardy que de luy faire la guerre pour cet affront qu'il luy fit, n'ayant pas osé esteindre le feu de son Trisulque par ce-

luy de son flambeau, encore qu'il soit le pere de la chaleur. Si tu te glorifie de l'Ocean, considere que l'Eridan a esté frappé du foudre, & que ton ayeul n'a pas endure moins de trouble, ayant mesme veu brusler son fils, & si pour cela il n'a pas faict la guerre au Ciel, n'osant estriuer contre le Trisulque de Iupiter. Mais appaise tes flots, en considerant la peine que ta temerité peut recevoir, de peur que ie ne voye brusler Hydaspe, aussi bien que l'Eridan.

Ces menaces ne peurent le flechir, ny l'appaiser, au contraire il esmeut la vague avec plus grande violence : Et sans doute il eust englouty toute l'armee de Bacchus, s'il ne l'eust empesché. Comme il eut prins ce dessein de se vanger d'Hydaspe, il cueille pour cet effect la ferule dans vn boccage voisin, & y mit le feu par le moyen des rayons du Soleil. A l'instant tout s'embrasa, les arbres se reduisirent en cendres, la fumee obscurcit l'air, & la vapeur fuligineuse monta, & le vent porta les estincelles de lieu en autre, & tomberent dans le profond du fleuve : Les poissons furent bruslez, la flamme consumma l'eau, & la

wase, Cet embrasement estonna grande-
 ment les Nymphes des fleuves. Les Hy-
 driades se trouuerent sans eauë, & les
 Najades furent contraincts de chercher
 vn autre séjour. L'vne se retira dans le
 Gange, l'autre dans l'Inde, l'autre dans
 le Choaspe. Mais l'Ocean n'estoit point
 content de ce desastre, & de cet incen-
 die. Il menassa Bacchus d'vne voix sem-
 blable au bruit que faict le cours rapide
 d'vn torrent, engloutissant tout le mon-
 de par ses flots. En faisant ces menasses,
 Tethys femme de l'Ocean, & mere de
 l'Vniuers. Que ferons nous à ceste heure
 que Iupiter s'est courroucé contre nous
 & contre nos enfans. Saturne n'a engen-
 dré qu'vne race Homnide, Iupiter a per-
 du miserablement Asope & son fils Bac-
 chus a bruslé Hydaspe. Mais quant à
 moy, le desespoir me conseille de resister
 à ses foudres par mes flots, d'englou-
 tir le Soleil, & d'esteindre son feu. Je fe-
 ray disparoistre les estoilles du ciel, afin
 qu'il voye la Lune submergee d'vne con-
 fusion d'eauë, j'inonderay le Pole Arcti-
 que, & l'estoile du Chariot, & le Dau-
 phin qui estoit mon citoyen, ie le remet-
 tray en son premier element, le retirant

de là pour l'enuoyer en la terre des Celtes. Je feray que l'Eridan fera feu & eaue tout ensemble. I'osteray la clarté au ciel, conduisant les poissons, qui sont des estoilles en la mer, & ils nageront apres auoir esté attachez au ciel.

Tethys tu dois enfler tes eaues, afin que ie sçache s'il n'y a point de Taureau sur la mer qui enleue vne Nymphé apres Europe, & que la Lune s'estonne de voir ma forme cornue semblable à la sienne. Je m'en iray au ciel pour cognoistre Cephee & Bootes, & ie feray la guerre comme Neptune, qui s'arma autrefois cōtre le ciel à l'entour de Corinthe. Je cacherray la Chevre Celeste, la nourrice de Iupiter dōnant au verseur d'eaue tant qu'il en sera content. C'est pourquoy, ô Tethys! monstre que tu as du ressentiment. Iupiter a engendré vn bastard pour perdre les fleuues, & les hommes innocens. Son Thyrsa a tué les Indiens, & a bruslé Hydaspe: mais nous ne deuons pas endurer ces affronts sans ressentiment.

Iupiter appaisa la cholere de Bacchus, & Hydaspè le recognoist, luy rendant hommage. Les Satyres passent le fleuve. On rapporte à Deriades la deffaicte de son armee qui estoit en ambuscade. Bacchus traite son armee dans la forest, où Leucus entone sur son luth les victoires de Iupiter contre les Titans, & la contestation de Minerve & de Venus pour les petits ourages, dont les Dieux furent iuges. Venus est conseillée de travailler à la multiplication, plustost qu'à la toile.

LIVRE VINGT-QUATRIESME.

Iupiter considerant le grand trouble, & le grand mal-heur qui pouuoit arriuer de cet embrasement, appaisa la colere de son fils, & esteignit le feu par vn gros nuage qui se diuertit en eaue, moderant la fureur de l'Ocean. Iunon qui n'auoit autre desseing que de perdre Bacchus, l'affoiblissoit. Cependant Hydaspè se remit en son bon sens, s'excusant enuers Bacchus de sa promptitude, & luy dit d'une voix douce & amiable,

Bacchus, ie vous supplie de me pardonner, ie vous ay de l'obligation. Je sçay que tous les fleuves viennent de Iupiter, vostre pere, mais faictes quelque grace aux eauës qui nourrissent les fruiçts. La vigne ne germe que de leur abondance: i'ay manqué à mon deuoir. Le feu que vous m'avez enuoyé à saict recognoistre l'extraction que vous tirez du ciel, & du foudre. Mais la iuste douleur que i'ay eu de la mort de mes enfans m'a poussé, & pour venger les Indiens, i'ay menassé les Dieux. Quant à moy, i'ay honte de paroistre deuant mon pere, & de souiller Neptune de mes eaues ensanglantees. C'est ce qui m'a donné subject de me reuolter contre vous. Mais ie vous conjure par Iupiter, que vous retiriez le feu d'Hydaspe, autrement les Najades m'abandonneront, & changerõt de sejour, les vnes sont desia dans les forests, compagnes des Driades, les autres se sont bannies, habitans le fleue d'Inde, vne autre demeure dans le mont Caucase, vne autre sejourne avec Choaspe en des riuieres estrangeres. Iamais ie n'eusse pensé que vous eussiez voulu perdre les eaues avec des herbes qui seruent à faire

croistre vostre vigne, au contraire vous
deuriez les augmenter, afin que les rai-
sins en receussent plus de nourriture.
Vous sçavez que les tyges cauees des
plantes peuuent servir à faire des flustes
estans jointes. Ne les bruslez donc pas,
car elles accompagnent vostre liqueur
aux banquets & la resioüissent, de peur
que vous ne receuiez du reproche de
Minerue, qui a treuüé l'inuention des
flageollets, & honorez l'instrument de
Pan, dont il se sert pour faire entendre sa
passion à sa Syringue. Cessez de faire la
guerre au cours de mes eues, par vostre
ferule. Je puis grandement contribuer à
l'accroissement de ceste herbe. Je me
souuiës d'auoir autrefois seruy à Zagree,
que l'on appelloit le premier Bacchus
de vostre nom, quant Iupiter le donna
en garde aux Nymphes. Mais vous qui
estes vn autre Zagree, & plus parfait.
Faites-moy grace, pour l'amour de ce-
luy dont vous estes yssu, ayât souuenan-
ce de l'eue de Lamus, & de Meonie vo-
stre patrie. Hydaspes est frere de Pactole,
que vous aymez tant. Quoy, si vous auez
obligé tant de fleues, nous desnierez-
vous quelque faueur, ne bruslez donc

point noseaues, car vostre pere Iupiter tire quelquefois son foudre de nos vapeurs qui l'esleuent en l'air. Appaisez vostre cholere, puis que ie viés vous rendre hommage avec toute sorte d'humilité. C'est l'ordinaire de tēdre les mains à ceux qui sont supplians en la guerre, quand Typhon flechit aux menasses, & à la cholere de Iupiter, il retira son foudre.

Bacchus se laissa aller à la commiseration, & esteignit son feu, par le moyen d'un vent glacial qui s'esleua. Hydaspes se remit en son premier estat, remerciāt Bacchus & Iupiter. Mais comme Bacchus passoit le fleuve, Deriades qui luy auoit declaré la guerre (s'il vouloit vsurper son pays, & y apporter ses vignes, & y apporter ses pampres, comme il le menassa par le Satyre que Bacchus auoit enuoyé en Ambassade,) se prepara à le soutenir, & pour cet effect il assembla tous les regimens des Indiens, & leur donna ordre de se camper aupres du fleuve, pour empescher que l'armee ne passast. Mais Iupiter qui void tout descendit du ciel expres pour assister Bacchus, amenāt avec luy toutes les Deitez, qui ne luy fi-

rent aucun déplaisir. Iupiter se souuenãt des amours de la belle Ægine, porta Æacque en la forme d'un Aigle, & le fit passer. Apollon fit vne pareille faueur à son fils Aristee en memoire de Cyrene. Mercure conserua Pan le fils de Penelope, & obligea Hymenee. Calliope porta Oeagre sur ses espauls, Vulcã eut soing de ses enfans, les Cabires, & les enleua comme vn feu qui prend air. Minerne obligea son Erethee, citoyen d'Athenes. Toutes les Nymphes Hamadryades furent conseruees, & particulièrement celles qui caressioient les Chesnes. Apollon ne manqua pas de donner secours à sa Daphné, & sa mere Latone se monstra fort courtoise enuers les autres arbres. Les filles du fleuve Cydnus firẽt courtoisie aux Bassarides & aux Bacchantes, & les deliurerẽt du peril qu'il y auoit au passage : car elles sçauoient la route de chemin que Iupiter leur pere auoit donné à Bacchus pour la recompense, & pour le bien de sa victoire sur les Indiẽs, & que les Najades estoient desia aguerries, cõme Typhõ les auoit instruite au cõbat qu'il eut cõtre Iupiter. L'armee ayãt passé ainsi, Bacchus les deuãça

avec ses Satyres qui luy faisoient compagnie. Les Bacchantes ne demurerent pas derriere, les Telchines plus diligens que les autres, passerent sur leurs chevaux suiuan Bacchus de prest. Il y en auoit vne grande partie derriere; qui auoit de la peine à trouuer le chemin. Mais Iupiter qui estoit en Aigle, portāt son fils *Æacque* monstroit le chemin. L'armee passa par les rochers, & se retira la nuict dans les bois, où elle fit sa tente. Les Satyres chassoient aux bestes fauues avec les *Hamadriades*. Les autres *Nymphes* s'y employoient aussi, quand les *Bassarides* trouuoient de petits *Lionceaux* elles les allaittoient aussi familièrement, que s'ils eussent esté des enfans, les plus hardies cherchoient par curiosité les grottes des *Dragons*, les autres couroient le *Cerf*, les autres montoient sur des *Elephans*, l'un bandoit son arc, & tiroit à un orme, un autre à un oliuier, un autre à un pin, où les fleches faisoient un grand bruit.

Voyla comment l'armee folastroit dās les forests: mais cependant *Thuree* arriva à la Cour de *Driades*, & luy raconta le desastre qui estoit arriué à son armee,

mee, à peine pût-il parler, tant la douleur luy pressoit le cœur.

Deriades, ce dit-il, Roy des Indes, nous auons esté en ambassade dans la forest comme vous nous auez commandé, & nous y auons campé vostre armee, en attendât que Bacchus passast. Mais nous auons esté trompez en nostre desseing, il ne s'est pas engagé dās les bois, & s'est tousiours donné la liberté de la campagne, nous cōtraignant de sortir. La chargea esté grande, les trompettes raisonnerent si hantement, que l'on entendoit le son à deux lieües à la ronde, leurs peaux & leurs cymbales retentirent là dedans, faisant vn grand nombre d'Echo. Les chesnes sembloient parler, & les aduertir, & les Nājades tesmoignerent par leurs larmes la passion qu'elles auoient pour eux. Comme on est venu aux mains, nos gens couards, & lasches de courages, n'ont point eu de defense, & n'ont voulu rendre le combat, & ce Dieu que l'on appelle Bacchus, les tuoit comme des mousches avec son Thyrsè, ses pampres, & ses fueilles. Ce qui est bien estrange, il a faict vne telle destruction & carnage en vostre armee, que

les plus vaillans ont esté tuez , & les autres se sont perdus volontairement dans l'Hydaspe. Quant à moy , ie suis d'aduis (sous le bon conseil de vostre Majesté) que nous scachions des Sages Brachmanes , si c'est vn Dieu, ou vn homme , afin que vous licentiez toutes vos compagnies , & que vous ne les perdiez pas, comme vous auez faict les autres , dans l'ambuscade de la nuit. Le Soleil est couché, & les estoiles commencēt à paroistre. Si vous resoluez de donner la bataille , pour le moins attendez à demain.

Deriades receut ces raisons , non pas qu'il s'estimast trop foible, ou qu'il flechit, mais pource que la nuit luy estoit suspecte. Il ne luy seruit de rien d'auoir campé son armee aupres du fleuve. La mauuaise fortune luy donna des attaintes d'une colere furieuse, il monta dessus vn Elephant , & tous les Indiens le suiuirent fuyans dans la ville, apres qu'ils eurent les nouvelles de la perte de leurs gens. Le bruit de ce defastre courut par tout, le dueil fut vniuersel, toutes les femmes pleuroient, deschirans leurs vestemens, le sang couloit de leur

sein. Vn bon vieillard couppa ses che-
veux de tristesse, ayant perdu quatre en-
fans en vne belle adolescence, qui pro-
mettoient quelque chose de grand,
Æacque les ayant tué. Les femmes n'a-
uoient pas moins de ducil, l'vne pleu-
roit son frere & son pere, l'autre déplo-
roit son espoux, comme Laodomie
regretta la mort de Protefilas, en mou-
rant entre les bras de son mary, dont
l'ombreluy apparut, par le moyen de la
faueur des Dieux. Vne Indienne qui
estoit preste d'accoucher fut en grande
tristesse entendant les nouuelles de
la mort de son mary, elle s'en alla au
fleuve, & fit entendre ses plaintes & ses
regrets à ses flots.

Je ne boirray plus du fleuve Hydaspe,
puis qu'il a contribué à mon mal-heur,
je ne passeray plus son courant, & ne tou-
cheray point, miserable que ie suis, l'eau
qui recelle celui que ie regrette! Non
certainement, n'y toy, ô Hydaspe, ny ce-
luy que tu fais voguer en tes flots. Je ne
ioüiray iamais de celui qui est icy ense-
uely. Qui est-ce qui me voudra receuoir
en l'estat ou ie suis? Dittes-moy Nym-
phes, où est mō mari, afin que ie l'ēbrasse

& que le fleuve m'engloutisse aussi bien que luy. A la mienne volonté que ie me fusse deliurée de ce qui m'empesche, & que ie l'eusse esleué, car ie suis à terme. Mais quand ie serois accouchée, & que mon fils voulut chercher son pere, en criant, pappà, on le luy monstreroit.

Les eauës sourdes d'Hydaspen n'entendirent point ces tristes voix. Vn autre Indienne déplorait la mort de celuy qui luy auoit promis la foy de mariage, & auoit beaucoup de regret de ce que la mauuaise fortune enuieuse de son bien l'empeschoit de jouir de ses embrassemens dans la couche nuptiale.

Comme toute la ville estoit en pleurs & en dueil, Bacchus voulut traiter ses Satyres dans la forest, & pour cet effect il commanda que l'on tuaist grãde quantité de bœufs, de vaches, & de brebis. Apres que toutes ces viandes furent bien assaisonnees, ils se mirent tous à table avec Bacchus, & beurent tant, qu'ils vuiderent tous les pots. Le vin leur donna dans la teste & les resioüit. Leucas qui estoit de l'esbat, commença de chanter la guerre des Titans contre Iupiter, & aussi sa victoire, comment il les abis-

maux enfers avec son foudre. L'Ape-
the Cyprien estoit assis aupres de ce Mu-
sicien, il luy donna vn morceau de vian-
de entre-lardé, & le pria de chanter la
fable de Minerue, & la contestation de
Venus avec elle à tistre de la toile: mais
il fit difficulté d'entonner ce subject,
pource qu'elle receut autrefois vn grand
affront en la presence de tous les Dieux,
comme elle entreprit de faire les ouura-
ges de Minerue, ayant oublié le soing
del'Amour, au grand preiudice de tout
l'Vniuers, neantmoins il l'entonna par
importunité sur son luth.

Venus voulut vn iour contrefaire la
toile de Minerue, encore qu'elle n'y eust
aucune adresse, le fil dont elle se seruoit
estoit gros & mal tissu, ainsi que celuy
dont on se sert aux cordages des vais-
seaux, qu'un cordier auroit filé à longs
traicts. Elle passoit les iours & les nuicts
à ce desseing, & se plaisoit à vn labeur
qui ne luy estoit pas ordinaire, s'effor-
ceant de faire vne camisole: mais son
ouurage estoit si mal ourdy, que le fil se
rompoit, outre les autres defauts que
Minerue pouuoit mieux remarquer. Le
Soleil, & la Lune furent tesmoins ocu-

lares de ceste belle entreprise. Les seruantes de Venus luy aydoient, Pasithee tournoit le fuseau, Suade manioit la laine & la deuidoit, & Aglaïa la distribuoit, la baillant à Venus. Cependant qu'elle s'amusoit à ces ouurages elle negligea les pratiques de l'amour, & le monde Vniuersel en receut de l'incommodité en l'ordre de ses generations. Harmonie se pleignit, de ce que les mariages estoient inutiles & sans fruct. Cupidon desbanda son arc, & ne descocha plus de fleches amoureuses, alors il n'y eut plus de resioiïssance & de nopces, on ne cria plus *Hymen Hymenee* : mais le monde commençoit à diminuer, & à finir. Minerue sceut que Venus auoit entrepris de contrefaire sa toile, dont elle fut faschee : mais quand elle veit les defauts de son labeur, & l'imperfection, elle annonça aux Dieux, & fit ces reproches à Iupiter.

Iupiter, vous m'auiez autrefois donné cet auantage que de bien trauailler à la toile, mais maintenant ie ne scaurois plus m'en glorifier, car vostre fille Venus a ceste vanité, que de me vouloir surpasser. C'en est point Iunon, la sœur, &

la femme de Iupiter qui m'enuie l'honneur de ma condition : mais c'est celle qui commande à l'Amour & qui est effeminee, & molle de courage. Quand est-ce que Venus à combattu pour le ciel? Combien de Titans a-t'elle renuersé avec sa ceinture qui a tant de vertu? N'est-ce point qu'elle me heurte apres tant de victoires qu'elle a remporté en tant de guerres. Dittes-moy Diane où vous auez veu Minerue dans vos forests à la chasse des bestes? & qui est-ce qui inuoque Iunon, quand les femmes sont en trauail d'enfant. Les Dieux ayans esté aduertis de ce desseing, s'assemblerent pour veoir la toile de Venus, quand ils l'eurent consideree, ils furent estonnez de voir ses defauts, Mercure luy dit en riant,

O Venus, vous prenez plaisir à trauailler à la toile, & vous Minerne, laissez vos exercices vils, & que Venus se mesle de bransler vostre picque, & de manier vostre Ægide. Je sçay bien pourquoy vous faictes cet ouurage, belle Venus: Mars vous a prié de luy faire vnecamifole pour coucher avec vous : Faites-luy donc, mais ne luy baillez point de

bouclier: car quel besoin Venus en'peut-elle auoir. Representez-y le Soleil qui descouure vos amours, adjoustez-y, si vous voulez les liens, & les entraues que Vulcan vous prepara. Et toy Cupidon, manie les fuseaux aussi bien que l'arc, & ourdis à ta mere vne piece de toile, afin que ie te voye autant propre à tistre, qu'à voler, & que tu tire du fil en lieu de fleches. Fais Mars de fil d'or, & le represente comme s'il portoit vne aiguille au lieu d'un bouclier. Mais, ô Venus! ie vous conseille de quitter vos ouurages, & de prendre le soing de l'Amour. Le monde commence à finir, cependant que vous employez vostre temps à ce labour inutile.

Comme il eust acheué, tous les dieux se prindrent à rire. Venus quitta sa toile, & ceda l'honneur à Minerue, elle s'en alla à Cypre, où elle trauailla à la multiplication, pour repeupler le monde.

Leucas entonnoit ceste chanson de Minerue, & de Venus. Mais apres que les Satyres eurent bien beu, le sommeil les saisit. L'un se jeta sur la nappe d'un cerf, vn autre sur des fueillards, vn autre sur

la terre, vn autre sur des peaux de moutons. Vne grande partie d'entr'eux res-
uoit aux combats, pensans estre aux
prinſes avec les ennemis. L'vn ſongeoit
qu'il tuoit vn Indien, vn autre qu'il le te-
noit par la teſte, & le deſchiroit: vn au-
tre, qu'il auoit eſpouuanté les Elephans
de Deriades. Cependant qu'ils eſtoient
tous en ce profond ſommeil, les Panthe-
res, les Lyons, & les chiens de Bacchus
faiſoient bonne garde, alternatiue-
ment ſans dormir, & veilloient de peur
que l'armee des Indiens ne les ſurpriſt,
comme le temps le permettoit, à cauſe
que la Lune eſtoit en ſon plein, & que
les Eſtoilles paroiſſoient au Ciel ſans
nuage.

Le Poete inuoque sa Muse, & le secours d'Homere. Il faict vne comparaison des stratagemes de Persee, & d'Hercules, avec ceux de Bacchus. Attis donne à Bacchus des esperances de la victoire de la part de Rhee, & luy faict present d'un bouclier, ouurage excellent de Vulcan.

LIVRE VINGT-CINQVIESME.



MUSE, inspire moy encore l'esprit & la fureur Poëtique, pour descrire les guerres de Bacchus: car elles ne sont pas finies, il les a continuees dans l'Orient par l'espace de sept ans: Les oyseaux sinistres croüacent encore sous les arbres, comme s'ils vouloient prognostiquer encore les troubles que Bacchus doit faire dans les Indes. Je ne veux pas deduire ce qui s'est passé dans les six pre-

mieres années: Je me contenteray de prendre la dernière, en imitant Homere en son Illiade. I'y adjousteray quelques antiquitez de la ville de Thebes, & quelques autres belles histoires: Car la fureur Bacchicque qui l'a autrefois possedee en certaines aventures, & à l'accident arriué au pauvre Penthee m'y contraint: Et mesme Cytheron, qui en porte encore des tristes marques, m'oblige à m'en ressouvenir.

Dittes-moy, ô Muses, qui est celuy qui flechira les rochers insensibles, comme Amphion, & qui les forcera de suiure la Musique: Mais ie sçay bien d'où vient l'harmonie qui faict resonner les Histoires de Thebes. Elle sort de la Muse de Pindare. Mais descriuons la guerre des Indes, & monstons qu'il n'y en a point cy-deuant eu vne plus grande & plus sanglante dans l'Orient: Et par apres vne mieux conduite, & avec plus grande prudence. En remarquant qu'il n'est point venu vne si grosse armee à Troye. Je raconteray dõc les stratagemes de Bacchus, le cõparant aux plus genereux qui ayent iamais esté,

rapportant tout ce que les enfans de Jupiter ont faict de grand, afin que ie voye si aucun d'eux a produict des prouesses pareilles à celles de Bacchus. L'on dit que Persee vola en l'air, si cela est vray, qu'à-t'il faict de plus? Il a coupé la teste de Meduse : mais ce n'est qu'un cōbat imparfait, & qui n'est point cōparable avec les stratagemes de Bacchus: car Persee n'a point paru en la teste d'une armee, ny sur terre, ny sur mer. Mars ne luy a point liuré d'assauts. Nerec n'a point esté ensanglantée de sa guerre, & ne s'est point sauué à nage de la mort. Il a dompté Gorgone, estant assisté de la picque de Minerue, des ailles de Mercure, du bouclier de Meduse, & du secours de Jupiter son pere: Mais il n'a point soustenu l'effort d'Euryale braue Capitaine, & n'a point entendu le son de la trompette, subjuguant toute la Lybie, & n'a point mis en defroutte ses ennemis, ny bruslé, ou pillé des villes gaignees au prix de son sang, & par sa generosité: Mais Bacchus a deffaict ses ennemis, tant sur terre que sur la mer, arrosant la terre de leur sang, & en a ensanglanté les fleuves & les Nereides, ayant

subjugué les nations barbares, & les Indiens qui estoient en grand nombre, dōt la plus grande partie a esté tuee, & l'autre noyee. Et si ie ne veux pas rapporter ce qu'il fit au fleuve Hydaspe, & comme il le brusta entierement. Si vous me demandez ce qu'a faict Persee, ie vous diray qu'il a changé le mōstre de la mer en pierre, avec la teste de Gorgone: Qu'a-t'il faict de plus? S'il a metamorphosé Pollux en vne autre forme, & s'il l'a changé en pierre, le labeur de Bacchus est bien plus grand: car il a vaincu les Indes, non pas avec la Gorgone: non pas vne beste: ny Pollux, mais il a reduict les Geans qui portoient des serpens au lieu de cheueux, quand il renuersa Porphyriion, Encelade, & Alcyonee avec son Thyrsē. Ses armes de lierre & de pampre ont donné secours aux Dieux, quand les fils de la terre entrepirēt de combattre le Ciel, & firent plus d'effect que le foudre. Considerons donc les proïesses & les victoires du Leuant, le Soleil qui les a veuës les a admirees: & la Lune qui a reconnu les stratagemes de Persee n'en a pas faict d'estat. Autant que Phaëton a acquis d'honneur & de prerogatiue par-

dessus Mars, autant Bacchus en a remporté sur Persee. Il les a tous deux combattus, quand les Mycenides voulurent luy resister avec leurs picques, & dès lors ils furent contraints de luy ceder. Quand à moy ie ne puis admirer, ny louer l'entreprise de Persee, quand il tua la pauvre Ariadné, qui ne respiroit que l'amour, & les carresses de Venus. Que s'il se vante d'estre fils de Iupiter, sa mere Danaé n'a pas eul'aduantage d'estre rauie au Ciel, comme Semele qui y est à la table des Dieux immortels, avec son fils Bacchus. Danaé n'a point eu ceste faueur: mais elle receut Iupiter sous la fabuleuse apparence d'une pluye d'or. Ie sçay bien qu'Andromede esclatte en ce sejour azuré: mais croyez-moy qu'elle n'est pas à son contentement, elle est plus miserable que l'on ne pense, & faict souuent ces reproches à Persee.

Quelle faueur m'as-tu faict (luy dit-elle) de m'auoir portee au Ciel? Tu m'as donné vn beau gage de ton amour. I'ay changé de lieu, & non pas de fortune: La Balaine celeste me tourmente encore icy, i'ay vn signe en opposi-

tion, qui ne me faict pas moins de peur que le monstre de la mer, estant garrottee & attachee entre les estoiles fixes, & si ta faux ne me sert de rien, & les yeux de Meduse neme prestent point secours. Ce signe horrible me trouble, & si tu n'as pas le courage de monter icy pour me defendre. Ma mere Cassiopee qui deplore mon malheur, se fasche contre moy, de ce qu'elle entre dans la mer, craignant la jalousie que les Nereydes ont de leur beauté, estimant le sejour de l'Ourse tres-heureux, de ce qu'elle n'apprehende point les eaux de l'Ocean. Cephee, mon pere, qui a le ressentiment de mon affliction, me plaint, voyant la peine que la pauvre & desolee Andromede endure de ce cruel monstre qui est au Ciel.

Ceste Nymphe luy faict ces reproches, & si il ne se met point en devoir de l'assister. Si Persee se glorifie des Estoilles qui accompagnent Andromede, considerez Ophiisque, & la couronne d'Ariadné, qui se leue avec la Lune.

I'ay entendu l'aduantage & le secours

que Venus donna à Minos, en l'entreprise d'une guerre. Ceste Deesse print un heaume pour son service, & Snades'arma d'une bonne picque, & Venus parut comme une courageuse Minerue, assistant Minos. Les petits Cupidons décochoient leurs fleches, & l'Amour assiegeoit les villes. Mais comme Mars eut apperceu Venus au combat, assistee de ses Cupidons aislez, il luy donna la victoire, & livra les villes. Tellement que Minos les reduisit, non par la violence & par les armes, mais par l'amour. Ce n'est pas elle qui a subjugué les Indiens. Venus ne s'est pas armee avec Bacchus. Ce n'est pas elle qui a vaincu par sa beauté: Ce n'est pas une Nymphe & la trahison qui l'ont rendu victorieux, mais la vertu & le courage. Si vous honorez la memoire d'Inarche, ie rapporteray tous les labeurs d'Hercule: Je sçay qu'il a suffocqué un Lyon indomptable, & qu'il l'a terrassé sans armes: qu'il a dompté Cyrene dans la forest: mais une fille a faict cela en sa jeunesse: Mesme Bacchus tira de la forest en son adolescence un Lyon, & l'amena à Rhee sa mere, le contraignant, par les garrots & les liens dont il le ferra, de le
suiure.

suiure, qui plus est: il gouuerne son chariot qui est tiré par des Pantheres, & par des Tigres, les plus cruelles bestes, l'on dit qu'Hercule tua vn furieux Sanglier dans les montagnes d'Arcadie: mais ces animaux seruoient de iouïets, & de passe-temps à Bacchus, qu'est-ce que Hercule à tant fait. Il a tué l'Hydre à sept teste aux marais de Lerne: mais ie desirerois qu'il eut entrepris ce labeur tout seul, & qu'il n'eut pas appelé Ioalus à son secours: Ils ont tué vn monstre hideux, ce n'est pas merueille que deux hommes ayent combattu vne beste: mais Bacchus à terrassé tout seul les Geans qui portēt sur leurs espaules grād nombre d'Hydre & de Serpens pires que celui d'Hercule. O Ioalus sois luy favorable vn autrefois en vne pareille occasion, tu as tué l'Hydre, & Hercule à remporté l'honneur de la victoire, Bacchus a eu des monstres à combattre plus horribles que ceux de Lerne & de Nemees. Il y a eu beaucoup de couronnes & des Lauriers, & aussi de cruelles guerres contre ses ennemis depuis que son Pere Iupiter la produit au monde de sa cuisse. Je ne veux pas mettre en ligne de

compte ce qu'il fit à la biche aux cornes d'or. C'est faire tort à Hercules de l'appeller dompteur de ces bestes. La chasse des Cerfs & des Sangliers n'est qu'un petit jouët à Bacchus. Quant au Taureau qu'il dompta avec sa massue, ce n'est pas une grande execution: Souventefois une femme a rangé ces animaux furieux: Une Bacchante en a conduit une troupe, & les a prins par les cornes, & souventefois elle leur a résisté, & les a lassés; encore qu'ils soient capables de luitter avec des Lyons. S'il a vaincu Gerion à trois testes, Baccus a terrassé Alpus fils de la terre qui en avoit cent, & qui faisoit la guerre aux Dieux, dont la grandeur estoit si prodigieuse, qu'il touchoit au Soleil & à la Lune, mestrisant à sa volonté la Deesse Astree. Voila tous les combats & les prouesses d'Hercules, que Jupiter a engendré avec Alcmene couchant avec elle trois nuicts. Les victoires de Bacchus ne sont que genereuses: Un Geant, & un vaillant Capitaine des Indes, sont des eschantillons de ses triomphes, non pas un Cerf, ny un bœuf, ny une truie, ny un taureau, ou un

oyseau, ou vn sanglier, ou le cheual qui mangeoit les hommes: mais c'est Deriades, & le braue Oronte, qui ne peut estre vaincu que de ses propres armes.

C'est pourquoy Homere fils de Melee, la trompette des loüanges d'Achilles, sois-moy fauorable en vn sujet si releué. Ton Illiade paroist commel'Aurore. Je ne rapporteray point, par respect, la guerre des Grecs & des Troyens: car ie ne veux pas comparer Bacchus avec Achilles, ny Hector avec Deriades. Aussi n'appartenoit-il qu'à ta Muse à chanter les stratagemes de ces genereux hommes, & mesme ceux de Bacchus, si tu en eusses voulu prendre la peine. Je pense bien que tu eusses laissé aux autres Poëtes les guerres du vaillant Achilles, si Thetis n'eust sollicité ta Muse pour l'honneur de son fils. Mais puisque i'ay entrepris de représenter au naïf les hauts faicts de Bacchus, inspire-moy la chaleur de ton esprit, & les mouuemens extraordinaires de la fureur qui enrichit tes ouurages outre les forces humaines. Et vous, ô Deesse fauorable, portez-moy dans le milieu des Indiens, dans la meslee, & que i'aye

une bonne picque, & le bouclier d'Homere, afin que ie combatte Morrhee & Deriades. Que i'auray de contentement d'entendre le son des cymbales & des trompettes de Bacchus & d'Homere, ayant tué le reste des Indiens.

Comme Bacchus estoit dans la forest, en attendant le temps de joindre les armées de Deriades: Hydaspes regrettoit la mort de ses enfans, & la ville deplorait l'accident funeste arriué à ses citoyens. Toutes les rues resonnoient de pleurs & de regrets. Deriades ayant entendu que le fleuve auoit esté changé en vin, s'estonna de ceste merueille, & eut honte en luy-mesme de resister à celuy qui auoit le pouuoir de faire ces metamorphoses. Ce bon vieillard print de ceste liqueur, en beut, & en fut tout resjoyuy, oubliant ses ennuys. Il en remplit des peaux, & dressa vn autel à Iupiter & à Bacchus, considerant leur grandeur & leur puissance. Ayant aduisé sur le riuage des chiens yures, qui auoient trop beu, il vint en la ville, & dit à Deriades que le fleuve auoit esté changé en vin. La framboise & l'odeur de ceste liqueur s'estoient espanduës par toute la vill, & l'air

les cōmunicquoit par les ruës, prognostiquant aux Indiens les victoires que Bacchus remporteroit sur eux. Ce prodige les estonna de telle sorte, qu'ils se mirent en garnison dans les tours, faisant bonne garde, fortifiant les murailles de la ville de boulevards, & de bastions. Mais Bacchus estoit dans les montagnes en oisiveté, avec vn grand regret de ce que Iunon retardoit ses conquestes, differant la guerre. Comme il veid que ses Lyons auoient esté inutiles dans les escuries, par l'espace de dix mois. Il perdit l'esperance de iamais executer les grands desseins qu'il auoit. Attis (qui autrefois s'estoit chastré pour conseruer sa virginité) vint par la Scythie, de la part de Rhee, avec son chariot tiré par des Lyons, pour consoler Bacchus, & luy donner des aduis de grande importance pour ses entreprises. Aussi-tost que Bacchus l'aduisa venir, il fut au deuant pour le receuoir. Attis luy tint ce discours.

Bacchus fils de Iupiter, dis-moy quand tu retourneras en la terre des Lydiens en triomphe, ayant reduict toutes les Indes à ton obéissance? Rhee n'a point encore

veu de butin des despoüilles de tes ennemis: Tes captifs n'ont point encore traitté tes Lyons en tes escuries, apres tes victoires, & ne les ont point conduits au riche fleuve de Pactole: Mais tu coule le temps inutilement. Tu n'as point amené de l'Orient les Indiens: Est-ce faute de conduite, ou de courage? Prends ces dards, & ce bouclier, que ie t'apporte de la part de Rhée: Ils ont esté forgez de la main de Vulcan.

Si vous desirez sçauoir (luy respondit Bacchus) qui arresté le cours de mes conquestes, c'est la jalouse enuieuse des Dieux: car ie m'asseure que ie pourrois en vn seul jour reduire tous les Iudiens avec mon Thyrsé, n'estoit l'enuie de Iunon, qui s'oppose directement à l'honneur de mes victoires. N'ay-je pas souventefois attaqué vn des genereux Capitaines qui soit dans l'armee de Deriades, prest à le terrasser? Mais Iupiter a destourné les coups par son foudre. Qu'il differe tant qu'il voudra la guerre, ie me promets bien de faire demain vn affront à Mars, & de continuer mes effort, iusques à tant que i'aye vaincu les Indiens.

Attis luy respondit en branlant son jaelot.

Bacchus, n'apprehende point la cholere de Mars, ny l'enuie de Iunon, ny de tous les Dieux, ayant la faueur de Rhee. Ne crains point l'armee des ennemis, As-tu peur qu'elle attaque le Soleil, & qu'elle bleffela Lune? Qui seroit si hardy que d'entreprendre Orion, & de darder des Iaelots à Bootis? Mais tu diras que l'Ocean pere de Deriades, s'est opposé à tes victoires: Considere aussi ce qu'Hydaspe t'a faict au passage, & cōment il a esté traitté. Ne perds point courage, combats vaillamment, Rhee a predict tes victoires, apres beaucoup de labeurs. La guerre ne finira point que six ans entiers ne soient passez: Ainsi la prescience de Iupiter l'a arresté, & la loy irreuoçable du destin l'a accordé à la jalousie de Iunon: Mais au septiesme tu seras paisible possesseur des Indes.

Apres cet aduis, il luy donna vn bouclier, & mangea avec luy en tesmoignage d'amitié, & de resioüissance de ces bōnes nouvelles. Apres qu'ils furent rassasiez, Attis s'en retourna en Phrygie, passant par le mont Caucase, & par l'Assyrie,

& de la par la terre des Bactriens, & du Liban, & du mont Taurus, & estant entré en Meonie. Il arriua au Palais de Rhee, & destela ses Lyons & les mena dans les escuries.

Cependant Bacchus qui auoit receu les aduis & les consolations de Rhee par le moyen d'Attia, print resolution de se resiouir avec les Oreades en attendant le temps & l'occasion, il leur monstra le bouclier que l'on luy auoit donné qui estoit vn chef d'œuvre de Vulcan, avec vne excellente graueure, diuersifiée de couleurs. Il y auoit représenté au milieu la terre & à l'entour le Ciel esclatant d'estoilles: la terre estoit ceinte de l'Ocean, le Soleil paroissoit sous l'or, & la Lune sous l'argent, on y voyoit dedans les Estoilles du Firmament en forme de Couronnes, à l'entour des sept Zones & du Pole, ces deux Planettes sembloient se leuer de l'un en Orient, & l'autre en Occident, le dragon celeste estoit aupres du chariot qui retournoit son corps, & sa queue, tout ainsi que le Meandre, quant il fait serpenter ses belles eaux d'un cours sinueux. Helice sembloit regarder la teste de

l'Ourse, tout le ciel y estoit au naïf: mais encore il y auoit graue la ville de Thebes avec les sept portes. Zethus paroïssoit en la posture qu'il portoit les pierres pour bastir les murailles, Amphion jouïoit de sa harpe, & les rochers sembloient sautsauter, avec tant de naïueté, que l'on eut creu veritablement qu'ils eussent de la raison & du sentiment, & qu'ils se fussent approchez à ceste harmonie. On y voyoit aussi vn Ganymede qui estoit enleué par vn Aigle, dont Iupiter en auoit pris la forme, il voloit en l'air, le tenant d'une façon, qu'il sembloit qu'il eust peur de l'offenser de ses pieds crochus, & de le laisser tomber dans la mer, craignãt que la Parque cruelle ne luy fit donner son nom à l'Hellespont, estant frustré de son Ganymede bien aymé. La table des dieux y estoit bien representee, on le voyoit qui versoit ne Nectar à Iupiter, & Iunon qui monstroït à ses yeux vne contenance triste & enuieuse, faisant signe à Minerue qu'il n'estoit pas bien seant que Ganymedes qui n'auoit point d'autre condition que celle d'un berger, presentast l'Ambrosie aux Dieux immortels. Le combat de Tyle avec le Serpent. Le

Moris, la vertu, & les effects de l'herbe que la femelle apporta au Dragon male, & la victoire signalee de Damafone fils de la terre, & dompteur de monstres y estoient representez au naif. Tyle Citoyen de Moerne passoit par le fleuve de Migdo, aux montagnes voisines d'Hermé. Il voulut attaquer vn dragon, dont la rencontre luy fut fatale, car il se jetta dessus luy, & l'estouffa de son venim, luy entourant le col de sa queue en couronne, Tyle tomba mort, semblable à vn arbre insensible. Vne Najade qui se rencontra à ce mal-heur poursuivit cet animal pour le recognoistre, deplorant son destin. Ce serpent estoit accoustumé à tuer les passans & les bergers, & Tyle n'estoit pas le premier. Ceste meschante beste ne viuoit pas tousiours des animaux de proye, mais souuent elle deuoroit les arbres. Souuent elle faisoit mourir les pelerins de la puanteur de son haleine. Moros aduertie de la mort de son frere, se porta au lieu où le dragon faisoit sa demeure, qui sifflait horriblement, elle n'osa pas l'approcher. Elle prit resolution d'implorer le secours de Damafone fils de la terre, puis

fant dompteur des monstres. Ce geant auoit beaucoup d'auantage en ce combat : car il estoit fort puissant & robuste. Il estoit aussi tout velu comme vn Satyre, ne se seruant point d'autre espee que d'arbres, d'autre bouclier, que d'vn rocher, d'autre cuirasse, que de fortes escorces.

Meroë le rencontra dans la forest, où elle le supplia de luy faire ceste courtoisie, ses larmes le flechirent, & apres qu'il luy eut monstré son frere tout deschiré qui palpitoit encore vn peu, il ne perdit point de temps, incontinent il desracina vn arbre, & attaquace serpent: mais il n'eut tant de facilité qu'il pensoit, car il se jetta dessus luy, & luy lia les pieds avec sa queue, respendant son venin mortel sur le front de Damasene. Tout ce qu'il pût faire pour se desambarrasser de ce meschant dragon, ce fut de le secoüer, & de luy donner de la pointe de son baston sur la teste avec vne telle force qu'il la luy escrasa. Ce serpent mourut de ce coup. La temelle qui cherchoit son masse aux environs de là, le rencontra mort tout

estendu sur la terre, le deplorant comme si c'eust esté vne femme qui eust perdu son mary. Elle s'en alla en la montagne, où elle arracha la fleur de Iupiter, & l'apporta avec ses dents, & la fit fleurir à son masse, à l'instant l'odorat de ceste herbe eut tant de vertu qu'il luy donna la vie, & commença à remuer la queue, & à ouvrir la gueule, & à siffler d'une façon molle & enrouïee, & à ramper lentement, se retirant en la grotte de la montagne; Morie qui veid toutes ces adventures, iugea qu'elle pourroit resusciter son frere par ce moyen elle prit la fleur de Iupiter, & luy fit fleurir, incontinent il fut animé, son corps qui estoit trāsi de la froideur de la mort, s'eschauffa de la chaleur de la vie, commençant d'avoir le mouuemēt des pieds, & à marcher, ressemblant à vn homme qui s'esveille d'un profond sommeil. Son sang porteur des esprits vitaux, colora son visage, ses yeux s'ouvrirent, sa langue se desnua promptement. Ceste belle histoire estoit depeinte au naïf, & pareillement l'accouchement de Cybele: & cōme elle donna à Saturne qui deuoroit ses enfans, vne pierre en la place de lu-

puter qu'elle voulut sauuer. Vous voyez comment il la manioit, faisant paroistre à ses yeux, que ce qu'on luy auoit baillé estoit de difficile digestion.

Toutes ces aduantures estoient representees dans ce bouclier, avec vn artifice admirable. Les Bassarides & tous ceux qui estoient de l'armee de Bacchus louoient grandement cet ouurier de Vulcan. Mais apres qu'ils eurent passé le temps à la contemplation de cet artifice, le Soleil se coucha, & la nuit couurit la terre d'ombres, & toute la compagnie se retira, & s'en allerent reposer.

Minerue pour fauoriser Bacchus son frere, & aduancer ses victoires, apparoit à Deriades sous la ressemblance d'Oronte son gendre. Il luy conseille de faire les apprests de la guerre. Pour cet effect il donne commission à ses Capitaines de leuer les soldats. Tertaphe est condamné par Deriades à mourir de faim en prison. Sa fille allaitte son pere, & luy sauue la vie.

LIVRE VINGT-SIXIESME.



OMME Deriades dormoit en ses tentes Minerue qui ne desiroit que d'auancer les victoires de son frere, luy apparue en songe sous la ressemblance d'Oronte son gendre, afin de luy donner le courage de poursuiure Bacchus, & le trompant de l'apparance de ce corps emprun-

té de l'air, luy dit en luy persuadant la guerre.

Deriades dors tu. Tu es grandement blasmable, ô qu'il est important aux grands Roys de dormir toute la nuict. Celuy qui prent conseil en ses affaires ne doit pas se donner tant de repos. Les ennemis sont aux portes, prests à la petarder, & tu n'y prens pas garde. N'entends-tu point le son des Cymbales, & les tintamarres funestes des cloches. Aye pitié de ta fille Putonoë, veufue depuis peu, qui regrette tant la perte de son mary, & ne laisse pas la mort d'Orontes impunie, chastie ces poltrons qui sont cause de son mal-heur, Endures-tu deuant tes yeux les cruels homicides de ton gendre. Regarde ma poictrine blessée de la pointe de son Thyrsé. Helas! que Lycurgue n'est-il icy? que ne commande il aux superbes Arabes? Bacchus n'est pas vn Dieu comme on pense, puisqu'un homme l'a poursuyui & contrainct de se jeter dans l'eauë pour se sauuer. J'ay autrefois veu Deriades prest à entreprendre la guerre pour vne moindre occasion. Sois donc vn Lyon, encourage Bacchus & fais en sorte que tu sois d'un courage

semblable, & fuit la pointe des armes, il n'a point vaincu les Indiens par sa générosité. Ton pere luy a faict vn affront, car comme tes Capitaines fuyoiēt, Hydaspes les a faict submerger. Tu n'es pas à comparer avec les autres, l'extraction que tu tire de Phaëton ton ayeul te donne des aduantages que les autres n'ont pas, tu n'as pas vn corps mortel, vne espee, ny vn dard ne te percerōt pas aux prises que tu auras avec Bacchus.

Minerue ayant executé son desseing, se retira au ciel, ayant changé sa forme. Deriades ne mesprisapoint les aduis que l'on luy auoit donné. Il commande aux Trompettes d'assembler tous les Soldats, & aux Capitaines de faire la monstre, avec charge expresse de r'assembler tous les gens qu'ils auoient congediez. On s'assembloit au rendez-vous : Tous ceux qui auoient du commandement, s'y trouuerent tous les premiers, comme Agree, Phlogie, les deux fils d'Eulee, apres les funerailles qu'ils firent à leur pere. Tous les peuples qui habitoient sur les riuages du fleuve d'Inde, & du Bedion, de Propanise, & de toutes les isles où les enfans succent les mammelles

les de leur pere en la place de leur mere. Quant aux soldats, il y en auoit vn grand nombre. Les regimens de Darde, des Prasiens, & de Salāges, qui ne viuent que du fruct que l'on appelle Chydope, qu'ils font moudre à leurs moulins. Les Zabiens qui autresfois auoiēt esté commandez par le Capitaine Palthanor, ennemy capital de Deriades, & seruiteur fidelle de Bacchus, & en recognoissance des bons offices qu'il luy auoit rendus: il luy donna vn commandement dans la ville de Thebes, laissant le sejour de son pere Hydaspe, pour demeurer en Maronie. L'armee de Deriades se mit en estat. Morrhee leua vn grād nombre de compagnies, assistant son pere Didnasides, dont la vieillesse estoit si incommodee, qu'il ne pouuoit tenir son bouclier qu'à grande peine, regrettant encor la mort de son fils Oronte. Morrhee paroissoit dans ses regimens comme vn Roy, haultant de fougue & de courage, menassant de terrasser luy seul toute l'armee de Bacchus. Il voulut le cōbattre en duel pour se vanger de celuy qui auoit esté cause de la mort de son pere. Il estoit accompagné d'vn grand nombre d'Indiens, & de

tous ceux qui habitoient *Æthre* la ville du Soleil , & les forests d'*Anthene* & d'*Orycie*, & de *Nisice* de *Melene*, & de *Patalinne*. Pareillement tous les regimens des *Dysseiens* & des *Sabires* qui ont le corps tout velu, dont ils prennent aduantage en la guerre, ne craignās point de se jetter dans les occasions, & perils de la meslee. Ils estoient soustenus des peuples, qui ont les aureilles si longues qu'ils peuuent dormir dessus à leur aise. Ils receurent le commandement de *Bringue*, & de *Daniole*, estant soubs la Colonnelle de *Morrhee*, avec cinq des plus braues, & des plus sages Capitaines del'*Orient*. *Tectaphe* ne manqua pas de s'y enrooller comme les autres, qui autrefois se garātīt de la faim & de la mort, par la charitć de sa fille qui luy donna la mammelle. *Deriades* auoit ordōné que le pauvre *Tectaphe* fut mis dans vne prison obscure, ayāt les fers aux pieds & aux mains, sans que l'on luy donnast à boire ny à manger. Il estoit dans les tenebres, en attendant la cruelle mort de la faim. Son visage se changeoit, il ressembloit mieux à la mort, qu'à vn hōme viuāt. Les forces commençoient à diminuer, & les

esprits vitaux languissoient. Les gardes empeschoient que personne ne luy portast aucune nourriture, comme il estoit ordonné. Mais la fille esmeuë de pieté, & de regret du mal-heur qui estoit aduenu à son pere, s'aduisa d'une ruze, & trompa les gardes, & leur fit ce discours plein de compassion & de pleurs.

Geolliers cruels, & inhumains, ne me tuez pas, ie ne porte rien, ny à boire, ny à manger, i'apporte à mon pere des tristes larmes, mes mains qui ne sont nullement empeschees d'aucune chose, vous le tesmoignent. Si vous estes en défiance, cherchez par tout dessus moy, ostez ma robe, ie n'apporte point de viure. Si vous voulez m'obliger, enfermez moy avec mon pere, ie ne crains point la mort, ny que le Roy le sçache qui ne peut se fascher avec raison, contre celuy qui respand des larmes pour vn mort, & qui se courroucera contre celuy qui meurt si miserablement, & qui n'aura pas compassion d'un si grand mal-heur. Je desire fermer les yeux de mon pere, & de luy rendre les derniers deuoirs. Enfermez-moy donc avec luy : Peut-on enuier la mort aux miserables,

afin qu'un mesme contienne le pere & la fille tout ensemble.

Comme elle les eut esmeus à la pitié, en leur persuadant, elle entra en la prison, & donna la mammelle à son pere, le deliurant de la mort. Cet office de pieté fut recogneu par les gardes, & au mesme temps rapporté à Deriades, qui luy fit grace, en consideration des deuoir charitables que sa fille luy auoit rendus. Le bruit de ceste histoire courut par toute l'armee, & on loüa grandement la charité de ceste fille. Cependant Ginglon & Hyree, & Hyppalme amenerent les regimens des Arachotains des Dioscoriës qui ont quelque ceremonie à enterrer les morts de la guerre. Habrарthe y parut contre son gré, estant fasché de l'affront qu'il receut de Deriades, qui luy fit raser les cheueux & la barbe, qui est vne grande ignominie entre les Indiens. Il ne se porta pas de bonne volonté à son seruice pour ce subject, cachant sa honte avec vn heaume qui luy couuroit la teste, couuant en son esprit vne secrette vengeance. Et de faict, comme les gës de Deriades cōbatoient le jour, il enuoyoit de nuict à Bacchus les aduis de tout ce

qui se passoit dās l'armee. De sorte qu'il portoit les armes pour Deriades en apparence, & pour Bacchus en secret, & de bonne volonté. Entre les plus vaillans hommes qui estoient en l'armee, on raporte les compagnies des Xutiens, & des Arieniens, des Saoriens, des Ioriens, des Caspiriens, & des Arbiens. Aussi pareillement tous ceux qui habitent Hyspore, & l'Asanie, où les fēmes sont si diligētes de la main, qu'elles font vne camisole de laine en vn iour. Les Cirrheiens y estoient aussi enrrollez, qui sont grandement experts aux guerres nauales voguās en mer, non pas avec des vaisseaux de bois, ny de cuir bouilly : mais ayans l'inuention de faire des nauires avec des peaux de catames, de façon qu'ils peuuent facilement dresser la nauigation, & cingler en haute mer: Ces gens estoient cōduits de Thyamis & d'Holcase, & des enfans de Tarbere. Il vint vn grand nombre d'Arizantes, où les arbres distillent le miel, que la rosee du matin a congelé sur les fueilles, en si grande abōdance que les abeilles le rendent dans les panniens. Les oyseaux se plaisent en ceste region, & volent sur les branches en picottant ceste

ceste liqueur, les serpens rampent sur les fleurs qui sont couuertes de miel, & le lechent. Aussi en recompense ils ne jettent point de venim, mais vne liqueur agreable & semblable au miel. L'oyseau quel'on appelle Harion, qui ressemble à vn Cygne, chante sur les arbres, des Airs, & des Motets nouueaux, comme si c'estoit vn homme qui entōnast vn Epitallame sur son luth, quelquefois il repete mot à mot les chansons des Bergers, fredonnant si melodieusement au matin, que vous diriez que vous entendez la douce harmonie des Rossignols. Outre ces perfections, il est si bien instruit qu'il predict la pluie qui doit arriuer en peu de temps. Il a les yeux si estincelans quel'on diroit que c'est l'aurore qui se leue.

Le valeureux Pylœtis fils d'Hippalme vint aussi avec ses compagnies, & amena avec luy son frere Billas, & pareillement les peuples Hydarces, & les habitants de la ville de Carmine & Cyllarus, & Astrais Capitaine des Indiens. De plus il arriua encore vn grand nombre de Soldats, qui s'estoient embarquez en trois cens vaisseaux sur le fleuve d'Inde, qui se desgorge dans la mer Orien-

rale , & qui passe aupres d'une montaigne d'Æthiopie , où les eaux se débordent en quelque temps de l'année , pour arroser les campagnes, asséchées par les rayons du Soleil, comme le Nil : Où il y a un cheval marin qui flotte dans son courant. Et tout ainsi qu'en esté lors que l'inondation du Nil se fait , les paysans faulchent les prez , & coupent les bleds , craignant les incommoditez de l'eau. De mesme l'on dit que ce fleuve nourrit des Hypopitames , & des Crocodiles , ennemis des hommes qui les poursuivent , leurs faisant une guerre semblable à celle que les laboureurs la font à Ceres en la saison. Ces peuples quitterent ces isles , & cette cõtree pour le service de Deriades , ayant Rigbasse pour conducteur.

Le commandement de s'armer fut si general , que les vieillards ne peurent se dispenser. Areste tout cassé de labeur & de vieillesse , fut contraint d'endosser la cuirasse , & de prendre son bouclier , qu'il ne pouoit manier qu'avec bien de la peine , prenant pour luy servir de compagnie , cinq enfans qu'il auoit,

de Lyons, Myrse, Glauque, Periphante, & de Melanes, que la nature auoit produict, tous cinq muets, sans qu'ils peussent exprimer aucune parole. Cet accident si estrange n'arriua pas sans vn presage qui fut plus prodigieux: car comme Arete eut espousé Laobie, & qu'il fut question de faire les ceremonies, & sacrifier à Venus vne truie, pour la rendre fauorable à ceste alliance. Celuy qui auoit la charge de presenter l'offrande, veid cinq poissons qui sortirēt du corps de ceste truie. Ce monstre estonna les assistans: car qui pourra jamais croire que cet animal pūt produire quelque chose de contraire, ou de different de son espee. Tous les peuples circonuoisins furent grandement estonnez de voir ces poissons semblables à ceux qui sont dans la mer. On interrogea les deuins sur ce subject. Ils respondirent, que ces poissons representoient cinq enfans que Laobie deuoit engendrer muets comme ces animaux, & ils cachèrent les remedes, & les particularitez, craignāt de faire tort au pouuoir que Mercure s'attribuē sur les lāgues: mais Bacchus leur redōna la parole, & les délia par cōpassion

Après la victoire des Indes, les habitants d'Eucol, où est le domicile de l'Aurore, ne manquerent pas de prendre les armes: Et ceux de Gorgandin, & d'Oeta, d'où viennent les Elephans qui vivent deux cens ans: Ces animaux sont noirs depuis les pieds iusques à la teste, ayans les dēts lōgues & semblables à vne faux, la trompe entortillée, dont la force est capable de renuerier tout ce qui se presente deuant eux, & ont les pieds sans jointure. Il y a quelque rapport entre eux & les chameaux, estans assez forts pour porter vn grand nombre de combattans sur leur dos, & comme ils sont infatigables, ils marchent d'vn pas ferme, & assuré. Ils ont le front large, & les yeux grands, les oreilles descharnees & assez estenduës, qui se laissent aller facilement au vent, la queuë petite, qui se remuë au mouuement du corps. Ils entrent quelquefois en la chaleur du combat, & se seruent de leurs dents comme d'armes offensiuës. Quelquefois ils enleuent des soldats tous armez avec leur trompe, les tuënt, & les foulent aux pieds. Bacchus, apres auoir reduit les Indiens, se fit conduire au pays de Coueusie, sur des Ele-

phans, dont les femmes qui n'en auoient
iamais veu, furent grandement espou-
uantees.


Le Prince Pyloetes, apres auoir receu
les commandemens de Deriades, pour
se preparer à la guerre declaree à Bac-
chus, s'achemina en diligence avec Ma-
rathon, & les peuples d'Aristoburie, les
Daobiciens, les Æthiopiens, les Sace-
iens, & les Bactriens le suiuirent, & pa-
reillement les Blemyens. Les Æthio-
piens ont cette ruse de guerre que de
prendre des testes de cheuaux morts, les
accōmodant de telle façon, qu'ils leurs
seruent de heaume, & chocquent les en-
nemis, s'efforçant de hannir comme ces
animaux, pour les estōner. Tous ces peu-
ples assemblez par le Lieutenant Gene-
ral de l'armee, estoient en l'obeyssance
de Deriades, (que Hydaspe engendra
avec Astris, fille du Soleil) luy promet-
tans de mourir à son seruice, en combat-
tans les armees de Bacchus: & empes-
cher les vsurpations qu'il vouloit faire
dans l'Orient. Quant à la genealogie de
Deriades, l'on l'a rapporte diuersement.
L'on dit qu'Hydaspe fit l'amour à Ceto,
fille de l'Ocean, d'où il est yssu: Et à ce

conte il tireroit son extraction des Titās; car Thaumas eut d'Electre deux enfans, Hydaspes & Iris, dont l'un auoit son cours & son mouuement en l'air, & l'autre dans le fleuve & dans l'eau.

Il vint vn si grand nombre de soldats de tous les costez, que la ville ne les pouuoit contenir. Les cheuaux & les autres animaux remplirent toutes les rues. Les vns se retiroient sur les murailles, les autres dans les tours, les autres aux corps-de gardes pour prendre le repos. Les Capitaines, & ceux qui auoient commandement en l'armee, se logerent au Palais de Deriades, où ils furent traittez fort magnifiquement. Apres soupper ils se coucherent, en attendant l'Aurore, pour resoudre entr'eux le lieu propre pour le combat.

Deriades dresse son armee, & faict une harangue militaire à ses soldats. Bacchus se prepare à le combattre, apres auoir animé les Satyres à la guerre.

LIVRE VINGT-SEPTIESME.

 PRES que l'Aurore se fut leuee, en chassant les tenebres, qu'elle eut quitté la couche de son vieil ialoux Thiton, & que le Soleil eut donné la lumiere, & dissipé les nuages de la nuit, & seichant la rosee qui estoit dessus les fleurs, apres que Phœbus eut donné la course à ses chevaux. Il inuita les armées à se ioindre cependant Iupiter fit pleuuoir du sang: presage mal-heureux de la perte des Indiens. La terre se destrempa, & parut toute ensanglante, comme si on y eust res pandu le sang des ennemis, Deriades se presenta à la teste de son armee, & fit ceste harangue militaire.

Compagnons alleurez-vous de la victoire, & combattez vaillamment Bacchus, ce Dieu cornu. N'espargnez point les Satyres & les Pans: car ils sont Dieux immortels & inuulnerables. Je les enfermeray dans les montagnes, leurs donnant la garde de mes Elephans, aussi bien il y a grande quantité d'animaux là qui ont besoing de conduite. Je leur donneray les Centaures pour compagnons, quant aux autres ie les afferuiray à la chambre de Morrhee pour luy faire passer le temps. Je veux que Bacchus se laue dans le fleuve d'Inde, & qu'il appelle Hydaïpe fleuve de son pays, au lieu de Sangarie, & que le plus fameux d'Alibé qui le suivent nous seruent, & qu'ils boient de l'eau du Gange. Viens donc Bacchus tu fuy à la generosité de Deriades, la mer te pourra rassasier, si tu te iette dedās cōme au cōbat de Lycurgue, que la nostre t'engloutisse. Celle d'Arabie, est suffisante de te noyer & tous les Satyres, & les Bassarides aussi, Neree ne te sera pas fauorable, Thetis Indienne ne te receura pas volōtiers & ne te conseruera pas comme son hôte, craignant trop de desobliger mon

pere Hydaspe: Mais tu diras ; le tiré mon extraction de Iupiter, ne dois-je pas estre traité plus doucement? Non, la Terre, (dont les Titans & les Indiens sont sortis) a produit le Ciel estoillé, dont tu es yssu: mais ma terre t'abyssera, car elle a autrefois captivé Saturne fils de Coelus, qui deuoroit ses enfans. Je veux que tu sçaches que ie suis le conducteur invincible de l'armée, beaucoup plus puissant & plus genereux que Lycurgue qui t'a mis en desroutte avec tes Bacchantes. L'aduantage que tu prends de ton origine ne m'estonne pas. J'ay entendu la miserable condition de ta mere Semele, & l'accident funeste qui luy arriua à ses nopces, quand Iupiter la brusla. Ne dis donc point que son foudre esclattant ayt esté son espoux, & qu'elle en a receu de l'honneur: Ne rapporte point que Iupiter t'a porté en sa cuisse. Cet accouchement viril, contre les loix du sexe, ne me trouble point. Au contraire ie m'en mocque, ie laisse aux femmes a porter les enfans. Mais si ton pere veut armer sa Pallas, de qui il espere la victoire, qu'il le fasse en quelque lieu où il voudra, ie la dompteray par

mes armes, d'une façon qui luy est inconnüe. Tu conduits sous tes drapeaux des Satyres: mais quel honneur de les vaincre après avoir terrassé Iupiter & Minerue? Si Vulcan s'en veut mesler, i'en seray tres-ayse: car aussi bien i'ay besoin d'un bon forgeron pour faire des armes à Deriades. Je ne crains point cela: Si il lance le foudre de son pere, i'ay l'eau d'Hydaspe pour l'esteindre, & le secours d'Æaque parent de Bacchus. Et après que ie l'auray reduict à mon pouuoir, ie l'enuoyeray à Pluton, & si Iupiter ne l'enleuera pas sous la forme d'un Aigle, pour le garantir. J'en cognois beaucoup qui ont esté en peine sans aucun secours, encore qu'il luy fussent proches. Dardané ne l'estoit-il pas? & neantmoins il est mort malheureusement? Et de mesme Minos. Le ressouvenir de ses amours ne les a pas deliurez. Et s'il rend la justice aux Enfers, quel interest ont les Indiens, on ne luy doit enuier ceste charge. Si Æaque est Iuge souverain des morts, ie ne l'y empeschерay pas cet exercice. Cependant tuez les Satyres, & les Geans, & non pas les Cyclopes: car i'ay besoin d'eux. Ils me feront sans trouble

dans leurs forges vne trompette, qui resonnera comme vn foudre, afin que ie sois semblable à Iupiter. Ils me feront des Trisulques, & son pere se courroucera dauantage quand il me verra dans l'armee esclattant de foudres & d'esclairs, & en aura de la ialousie : mais quelle iuste enuie peut-il auoir contre moy. Le Soleil pere de ma mere est tout de feu. Est-il hors de propos que ie le manie avec les aduantages que mon extraction me donne, & pource que ie suis fils d'Hydaspe. Je feray la guerre à Bacchus avec ses flots, & ie l'engloutiray avec ses Bassarides. Prenez donc courage, & noyez les Telchines dans la mer, les mettans en la garde de Neptune leur pere, & cependant apportez à Deriades les despouilles de la victoire. Brusle Erechthee fils de Vulcan, l'on dit qu'il voulut forcer Pallas, qu'il fut produit par hazard, & que ceste Deesse prit le soing de le nourrir. Amenez-moy les Corybantes, que Lemnos deplore la mort des Cabires. Que Vulcan abandonne sa forge. Voyant la perte de ses gens, estant fasché de seruir au Triomphes de Deriades. Renuersons par nostre

stre courage tous les enfans de Iupiter. Quant à Aristee, ie n'ay point l'ambition de tuer vn Chasseur, & vn fils d'Apollon, & celuy qui a trouué l'inuention du miel. N'espargnez non plus les Bassarides, que ie veux pardonner à Bacchus. Vous donnant aduis, que pas vn soldat ne s'espouuante de ses Lyons & de ses Ours, ny de celuy qui les conduit: Ils ne sont pas si meschans qu'ils paroissent. Au reste, qui craindra vn Panthere, ou vn Lyon, quand les Elephans sont en deffence?

Comme deriades eut mis fin à sa harangue, les Indiens se preparerent au combat: Les vns estoient sur des Elephans, & les autres sur des Cheuaux. L'infanterie estoit grosse, les vns estoient armez de boucliers, les autres de dards, les autres de faux, d'arc & de fleches. Ils se rangerent en champ de bataille. Cependant Bacchus assembla ses soldats, & les dressa en quatre bataillons: Le premier il le mit du costé du Septentrion, d'où coulent les riuieres du mont Caucas: le second estoit tourné vers l'Occident, où le fleuve d'Inde se perd: le troisieme vers l'Orient, & le quatrieme au

Midy. Apres qu'il eut ainsi disposé son armee, il fit ceste harangue à ses soldats.

Satyres & Bassarides, c'est maintenant qu'il est question de mourir, ou de vaincre: Renuersez les ennemis, & mellez les thyrses avec les picques à vostre aduantage, que la trompette vous soit aussi agreable que les cymbales & les flustes à nos banquets. Que vos pampres defferrent leurs dards, que les trompettes sonnent vne cruelle chamade, au lieu des instrumens qui entonnoient des chansons agreables pour nous resioüir. Si Hydaspes se reduit en mon obeissance, s'abstenant de plus esmouuoir ses flots pour me troubler, ie luy promets toutes sortes de faueurs: Ie le conuertiray en vin, le couronnant de fueilles, & planteray sur la riue grande quantité de vignes: Mais s'il se rebelle contre mon pouuoir, secourant les Indiens, ie le brusleray encore, & alors vous le passerez sans incommodité, & inefme sans vous mouïller les pieds. Et si Deriades, qui se vante d'estre yssu du Soleil, me poursuit avec le feu, ie me seruiray des eaux de Neptune pour l'esteindre. Ie

en'en iray en l'Isle de Trinacrie, où sont
les bœufs du Soleil, & luy feray la guer-
re. Apres la victoire, ie prendray Lam-
petie la fille, & la conduiray captiue en
mon triomphe, afin qu'Astris deplore
la condition miserable de Deriades.
Ie la meneray en la terre des Celtes,
afin qu'elle soit changee en arbre, com-
me les Heliades, & qu'elle accompa-
gne leurs larmes. Aduancez vous donc
aux combats, & terrassez les Indiens:
Prenez-moy Deriades le superbe, & luy
accommodez vn vestement de la nap-
pe d'un cerf, couuert de lierre, afin
qu'apres la victoire il nous obeïsse, jet-
tant sa cuirasse aux vents, & qu'il chauf-
se nos brodequins, laissant ses bottes,
Qu'il apprenne à celebrer la feste des
Orgies, en mesprisant la discipline mi-
litaire: Et apres vos victoires, appor-
tez les testes des ennemis, car i'ay des-
sein de les attacher aux portes des Ly-
diens, & sur tout celle de Deriades.

Ce discours animé leur donna coura-
ge. Les Silenes, & les Satyres s'assem-
blerent en grand nombre, dont le
bruit resonnoit par toute la contree.
Les Bassarides jouoient de leurs cym-

bales & de leur cloches, les Satyres se barbouillerent de vermeillon, & se preparerent au combat, les Bacchantes firent courir leurs Tigres à brides abbatues contre les ennemis, d'une telle furie que les Elephans s'en espouventerent. Maron parut en la meslee encore qu'il fut tout cassé de vieillesse, où il fit paroistre des effects de son courage.

Cependant que les armées se joignoient; tous les Dieux furent conuoquez à un banquet solemnel que fit Iupiter, Ganymedes y versoit le nectar: car il n'estoit pas employé à la guerre, comme à celle des Grecs, & des Troyens y ayant interest par la consideration de sa patrie, dont Hebe pendant son absence seruit la Cour des immortels; Apres que Iupiter les eut traitté: il fit ceste harangue, à Apollon, à Vulcan, & à Pallas.

Apollon qui commandez à ceux qui tirent de l'Arc. Ressouvenez-vous du mont Parnasse, & de Bacchus, vous sçavez l'accident arriué au pauvre Ampel sur un rocher: fauorisez vostre frere en ses entreprises, secourant les Bassarides de vos fleches, & honorez

le mont Parnasse en faueur des chansons
que les Bachantes y ont fait resonner
en vostre loüange, & en l'honneur de
Bacchus: tât de jour que de nuit à la clar-
té des flambeaux. Ayez ressouuenance
de Cyrene vostre fille, obligeant Agree
& Bacchus tout ensemble. Combattez
pour les Satyres & empeschez la ialousie
de Iunon, de peur qu'vne marastre d'A-
polon n'ait du contentement, à la per-
te de Bacchus, elle a tousiours poursui-
uy les miens avec vne passion estrange,
& ennemie, comme vous pouuez le
sçauoir en l'accouchement de Latone
vostre mere qui estoit grosse de deux en-
fans, elle ne peut auoir vn lieu pour se de-
liurer en repos, tât elle estoit disgratiee,
le fleuve Penez, & Siren luy refuserent
ceste courtoisie, Asope mesme rebrous-
sa sa course en tesmoignage de son refus,
la seule isle de Delos luy fit faueur, & vn
Palme luy donna bonne deliurance, &
vous Minerue fille de Iupiter vostre pe-
re & vostre mere tout ensemble, don-
nez secours à vostre frere, assistez les
habitans de vostre pays qui suiuent
Bacchus, de peur que l'on vous rappor-
te la mort des enfans de Marathon gra-


tiffiez vostre ville Atticque, où les oli-
uiers croissent en abondance. Obligeant
le bon homme Icarie, Bacchus luy don-
nera de ses fruiçts. Ressouuenez-vous
de Triptoleme, & de Celee, ne les dis-
gratiez pas comme ceux de Metanore;
car Iupiter a faict naistre des gens qui le
secoureront. Il vous a engendree de son
cerueau, mais vous qui sçauiez manier la
picque & vostre Ægide, secourez les Sa-
tyres : car ils portent des peaux de che-
ures. Pan, le Dieu des Bergers, a eu be-
soin autrefois de vostre Ægide, quand il
ayda à combattre les Geans : Et depuis
quand il assista les Grecs en la guerre de
Marathon, où les Medes furent tuez.
Secourez donc vostre frere, qui doit de-
liurer la Grece de la tyrannie du Capi-
taine Boeotien, afin que les citoyens d'E-
leuthe chantent les victoires de Bac-
chus. Iecroy que les Grecs ne dōneront
point d'Eloges à Eleusine, au mespris de
Bacchus. O Dieux qu'il y a de partiali-
tez au Ciel ! Voyez, ie vous supplie, Ju-
non qui tient le party de Deriades, &
Minerue qui semble rejeter les compa-
gnies Cecropides, delaissant Bacchus &
son armee. Mars se melle pour les In-

diens : mais ils peuuent s'asseurer que ie
resisteray seul à leurs desseins, iusques à
ce que Bacchus soit victorieux. Et toy, ô
Vulcan, seras-tu inutile à son armee? as-
tu quitté le soin de Marathon? Ressou-
uiens toy du coffre de Ginecus, où il
nourrit les enfans qui t'estoient recom-
mandables, & de ceste Nymphé qui les
esleua en ta faueur? Ta coignée a seruy à
Pallas, quand Iupiter la produisit de son
cerueau, afin que tu conseruasses les ci-
toyens d'Athenes. Auras-tu si peu de res-
sentimēt que de laisser tes enfans enga-
gez dans le peril de la mort? Pour le
moins defends les Cabires, car Alcima-
chie a besoin de ta force.

Ceste harangue esmeut si bien les Dei-
tez, qu'Apollon, Pallas, & Vulcan se li-
guerent pour le bien de Bacchus : & au
contraire Iunon se banda avec Hydaf-
pe, avec Mars & les autres Dieux. Cerés
qui auoit quelque jalousie des fruiets
qu'il auoit apportez au grand contente-
ment des hommes, se mit du costé de
Deriades : joint aussi l'enuie qu'elle por-
toit à l'honneur & à la gloire de Zagree,
le premier Bacchus.

*Les armées de Bacchus & de Deriades
se chocquent rudement. Les Saty-
res font vne grande deffaite, &
le champ de bataille leur demeure.*

LIVRE VINGT-HVICTIESME.

 A guerre estoit ouuerte entre les deux ennemis, sans qu'il y eust apparence de composition. Phaunus, & Aristee estoient avec Æaque à la teste de l'armée. Ce genereux Capitaine paroissoit avec son bouclier, excellent chef-d'œuvre de Vulcan, en tel arroy que les Indiens fremissoient de peur. Il monta dans vn chariot tiré par des Pantheres, & courut dans le gros des ennemis, avec vn si merueilleux effort, qu'il espouuanta les Elephans, & ceux qui les conduisoient. Vne grande partie des soldats ne s'escri-
moit pas d'une espee, ny d'un jaelot: mais avec des fueilles de lierre, & en ren-
uersoient plus de ceste façon, que les

Indiens ne faisoient avec leurs armes ferrees. Les Silenes chargeoient en crians, & les Bacchantes estoient armez de peaux de Pantheres qui leurs seruoient de cuirasses, les Satyres estoient montez sur des taureaux, les domptans comme si ce fussent esté des cheuaux: Les ennemis s'efforçoient de soustenir ceste grande violence, leur trompette resonoit la chamade & la charge, les armées s'approcherent de si prest que leurs heaumes estoient conioints aux autres. Les Tyrtes aux picques, les bottes aux brodequins, & les peaux aux cuirasses. Neantmoins au commencement du combat, la confusion les auoit escartez: car l'un chantoit en dansant. Vn autre crioit en tombant. Vn autre inuocquoit Bacchus. Vn autre le menaçoit. Vn autre desiroit de faire les Orgies, & de celebrer les banquets à l'ordinaire: mais comme la charge eut donné de la chaleur, & qu'il fut question de combattre pour l'honneur, & pour la vie, on ne s'espargna pas: car les deux partis se chargerent rudement. Phalenee attaqua Deriades, & luy darda vn lauelot: mais il ne le toucha pas, & passa à

costé, se fichant en terre. Corymbase voyant l'effort qu'il auoit voulu faire contre Deriades son Roy, ne le manqua pas, il luy couppa la teste, & Phalence tomba mort. Dexioche entreprit courageusement Phlogus, & luy couppa son heaume en deux, luy razant le haut de la teste : mais a l'instant il se mit à couuert sous le bouclier de son camarade, qui luy rendit ce deuoir au besoing, comme autresfois Ajax garantit Teucer du peril de la mort avec le sien à sept peaux. Corymbase tira son espee, & auala la teste à Dexiocque. Et pendant ces alarmes Clytie Capitaine de l'infanterie darda vn iauelot à Deriades, & sans doute il l'eut tué. Mais Iunon qui ne poursuuiroit que la perte de Bacchus, & de ses gens destourna le coup en sa faueur. Neantmoins il ne se retira point à ce coup failli. Il tua vn Elephant de Deriades, & fit renuerser le chariot, le cocher retiroit la bride ensanglantée, estant contrainct de couper les courroyes qui tenoient cet animal lié, & Celenée en amena vn autre en la place. Cependant Clytie qui pensoit auoir desia la victoire, poursuuiuit

Corymbase d'injures & de mauuaises paroles.

Demeure la Corymbase, poltron, & ne t'en fuis point, ie te monstrey ce que les gens de Bacchus peuuent faire. Ie conduiray tous les Indiens captifs en Phrygie, ie ruineray & destruiray leurs villes avec ceste picque, & apres la victoire ie rendray Deriades esclau de Bacchus, contraignant les Indiens d'espouser les Satyres sans douaire, encores qu'ils soient tous velus.

Corymbase s'irrita grandement à ces injures & opprobres, & ne pouuant supporter ceste insolence, il luy couppa la teste, comme il parloit encore elle vola en l'air en sautant, & tomba en terre, la destrempant avec le mesme sang qui en estoit sorty. Apres auoir faict ce coup il se rua sur les Silenes, & les espouuanta, non sans raison: car c'estoit le plus vaillant & le plus genereux Capitaine qui fut en toute l'armee des Indiens, apres Deriades & Morrhee. Il attaqua par apres Sebetes, & luy donna vn tel coup de picque dans la mammelle qu'il le renuersa par terre. Par apres il se jetta

sur Oenomas ; mais il s'enfuit plus viste que le vent en l'armee de Bacchus. Neantmoins il le poursuiuit la picque dans les reins, & accourut tant qu'il approcha de prest : il luy perça le corps d'outre en outre, & tomba tout mort, ce braue guerrier ne desista pas de tuer il attaqua quatre soldats, Tindarie, Thoon, Antesion, & Onites, & lestua, mais aussi il receut beaucoup de coups, dont il mourut. Neantmoins il ne tomba pas à terre pour cela, & se tint droict & ferme, avec son bouclier, & sa picque d'une telle façon qu'il sembloit qu'il combattoit encore les ennemis, & ne changea point de couleur, n'y de visage, ny de posture, comme il paroissoit en cet estat glorieux, on l'esleua comme vne statue de Mars, & les soldats admirerent la mort, & la viue cõtenance de ce braue Capitaine qui n'auoit point quit-tény ses armes, ny son bouclier apres la mort mesme, cet object admirable de vertu & de generosité leur donnant vn courage extraordinaire. Vn d'eux auale le bras d'un Athenien, & tomba à terre fretillant, & le sang se destrempa avec la poudre, l'Athenien fut contrainct de se

defendre de la main gauche, en remuant
touſiours ſa picque : mais l'Indien ſe re-
tourna, & luy couppa l'autre bras, le ſang
couloit à bas, & il ſembloit encore vou-
loir ſe couvrir de ſon bouclier, diſant ces
paroles en pleurant.

Je deſire encore vne troiſieſme main,
aſin que i'execute quelque ſtratageme,
digne de Minerue. Neantmoins ſi ne
laisſeray pas de pourſuiure les ennemis
en ce qui me reſte de force, aſin que l'on
face eſtat de la generoſité des Atheniens
qui combattent des pieds, apres la perte
de leurs mains.

Le courage ne luy manqua pas, il ſe
jetta dans la preſſe, avec tant de coura-
ge que l'on l'admiroit. Il receut vn coup
dans le ventre, qui l'abbatit. Et non ſeu-
lement l'infanterie eſtoit aux combats,
mais auſſi la caualerie ſe chargea rude-
ment, les vns tomboient de deſſus leurs
cheuaux, les autres perçoient ceux qui
fuyoient, les autres ſ'entre-choquoient,
les cheuaux que l'on tuoit, renuerſoient
leurs hommes, tout ainſi que Pegafe fit
tomber Bellerophon. Vn autre percé
par derriere ſe laiſſoit aller à la renuerſe,
ayant les pieds ſur le dos de ſon cheual.

Les Cyclopes inuestirent les ennemis. Argilippe entre autres armé de fer, combattoit avec des flambeaux. Les Indiens en craignoient les approches, encore que leur Roy fut yssu du feu. Ces Cyclopes dardoient des boules de flamme, brulant toutes les armes qui s'y opposoient. Ils ne se seruirent point d'autres arcs, ny d'autres fleches, reduisans tout en cendre, qui n'estoit pas semblable à celuy dont Salmonee fut brusté pour auoir voulu contrefaire le foudre de Iupiter, ny de celuy dont Typhon combattit avec les Dieux. Mais ce feu dont les Cyclopes estoient armez, ressembloit à celuy qui tombe du ciel, beaucoup plus vif que celuy d'Ætna, & des forges de Vulcan, son esclat estoit pareil aux esclairs qui paroissent à reprises. Le tonnerre grondoit de mesme façon, que si ç'eust esté celuy de Iupiter. Argilippe frappoit les ennemis fort rudement, comme s'il eust forgé vn fer à coup de marteaux sur vne enclume. Il poursuiuit Deriades de bien prest, & luy jetta vne grosse pierre dont il le frappa par la poitrine, & sans doute, le coup l'eust tué si son pere Hydaspes n'eust empesché la mort, la dou-

leur de la playe luy fit quitter ses armes, & son bouclier, & tomba de son chariot tout ainsi qu'un grand sapin, quand il a esté abbattu avec la coignée. Tous les Indiens accoururent pour le secourir, craignãt que ce Cyclope ne l'assommast de quelque gros cailloux, cõme il auoit la force de l'enleuer : car il estoit semblable à un Polypheme, ayant un œil au milieu du front, qui estoit affreux. Les Indiens apprehendoient grandement les rencontres de ces gens-là ; pource qu'il leur sembloit que cet œil fut une Lune en son plein. Pendant ces rudes at-taintes, Iupiter se prit à rire, voyant en l'air une espee de guerre, en ce que les nuages qui s'estoient assemblez pour se resoudre en pluye, & les communiquer à la terre, furent conuerties en neiges.

En ce mesme temps Tragies estant assisté de son frere parut en la presse avec son bouclier, qui sembloit estre esgal à un rocher en grandeur. Elatrec estoit armé d'une haute picque, & en faisoit une grande execution. Euriale se monstra fort vaillant & genereux, poursuivant l'armee des Indiens fuyante iusques aux riuages de la mer, & inuestit

les Indiens, les trauersant avec son espee qui auoit vingt coudees de longueur, il couppa vn rocher, & le lancea aux ennemis, dont vne grande partie fut tuée, & noyée tout ensemble. Il se fit vn grand bruit: mais comme les Bacchantes s'es-mouuoient, Prymnee arriua qui les ap-paisa, tout ainsi que quand il vient vn vent agreable aux Pilotes, qui ont souffert la violence de la tempeste. Aussi les compagnies que l'on attendoit, arriuerent à leur contentement, comme les Nautonniers se resioüissent, quand ils voyent l'estoille de Pollux, messagere de la serenité apres tant de bourasques, Halimedes le Cyclope les assistoit, foudroyant les ennemis avec ses jaelots, & les espouuëta de telle sorte qu'ils furent presque mistous en desroute. Phlogie picqué au vif de la perte des Indiës, voulut le vanger sur ce Cyclope, pour cet effect il banda son arc, & luy decocha vne fleche, qui ne porta pas: parce qu'il gauchit le coup. Mais luy voulant se venger, il enleua vn rocher, & le lancea: mais Phlogie s'enfuit & se retira sous la cornette de Deriades. Halymedes fut si courroucé de ceste fuitte, qu'il tua douze soldats

ze foldats par vn horrible mugiffement qui les eftourdit, ce qui eft vne grande merueille que la crainte ayt peu renuerfer des hommes. Ceste voix prodigieufe raifonna par toute l'armee, & fut entenduë iufques au ciel. Le bruit eftoit grād, les Corybādes fe meflerent dans la preffe comme les autres, Dāmnee combattoit fort vaillamment, Ocytheus en renuerfa vn grand nombre, l'vn d'vn coup d'efpee, l'autre d'vn dard, l'autre d'une fleche, l'autre d'une picque, l'autre à la courfe: car il y auoit autant d'aduantage qu'Iphiele qui pouuoit courir fur l'eauë, & fur les efpics de bleds fans les abattre: Mimas tres-expert à la dāse, fit des mouuemens en certaines postures fi eſtrāges & fi crotelques, qu'il troubla le iugemēt de plusieurs, tout ainſi que fit Pyrrichius en Ida, quād il fit reſonner l'airain à grād coups, pour empescher que Saturne n'entendit la voix de ſon fils Iupiter. Mimas n'eust pas moins de dexterité & de hardieſſe. Il tua vn grand nombre de foldats qu'il ſacrifia à Bacchus au lieu de taureaux, & de vin. Meliſſee ne fut pas moins genereux, il monſtra que ſon nom qui ſe rapporte à celui des abeilles, rendoit des

effets de leurs aiguillōs aux combats où il estoit engagé, soustenāt de pied ferme les efforts des ennemis avec Orythies, cōme vne enclume qui endure les coups de marteau. Acmon le secondoit avec vne pareille generosité, il auoit autrefois nourry Iupiter en sa grotte, par le moyen d'une Chevre qui venoit l'alaitter. Quand les Indiens entendirent le son des boucliers qui auoient serui à la conseruation de Iupiter, ils firent difficulté de les attaquer, & mesme Morrhee se retira craignant de perdre les Coribātes qui auoient présenté à Saturne vne pierre en la place de son fils : Neantmoins les Satyres inuestirent le chariot de Deriades, l'entourāt de boucliers & de dards. Le bruit de ceste meslee fut si grand, qu'il fust entendu iusques au ciel, les heures immortelles eurent peur pour les deux armées.

Après que Iunon eust esté aduertie de la perte des Indiens , persuade à Deriades de r'assembler ses gens. Hymenee . le grand amy de Bacchus est blessé en la cuisse. Morphee apparoit à Mars en songe , par le conseil, & par l'artifice de Rhea pour le faire absenter du camp des Indiens , luy donnant aduis que Vulcan caresse Venus à son preindice.

LIVRE VINGT-NEVFIESME.

A Pres que Iunon eust entendula deffaicte des Indiens, elle pensa que la victoire dōneroit del'advantage à Bacchus en la poursuite de ses desseins, elle suggera à Deriades vn nouveau courage ; & vne furieuse enuie de r'assembler les gens, pour cet effect il fit sonner la trōpette & les ramassa, les vns par prieres, les autres par menasses. Les Indiens esmeus par ces aiguillons, se jetterent dans le gros des Satyres, à testes baissées, où Morrhee fit vne si grāde execution, qu'ils furent cōtrains de reculer, neantmoins Hymenee soustint cet effort aüec beaucoup de generosité, estant dessus son cheual, combattāt de l'espee,

il renuerçoit tout ce qui se presentoit à la
pointe , & paroissoit entre les enneinis
comme le iour entre les tenebres. Apres
que Bacchus l'eust assisté d'une force ex-
traordinaire, Hymenee se porta avec tât
de valeur, que Bacchus prenoit vn grand
contentement à le voir en cet estat , pre-
ferant sa picque aux armes de Iupiter, il
luy vouloit tant de bien , qu'il ne l'eust
pas desiré pour compagnon de ses
victoires, de peur de faire tort à sa gloire
& à son merite. Comme il dōnoit la pas-
sade à son cheual, Bacchus foüettoit ses
Lyons pour le joindre de prest, s'appro-
chant, le caressant des yeux & d'applau-
dissement, comme Phoebus entretenoit
son Atymnius. Bacchus estoit tellement
possédé qu'il desiroit tousiours le voir:
mais la meslee le desroboit de ses yeux,
comme si c'eust esté vne nuee. Il luy re-
prochoit souuent de ce qu'il estoit yssu
de Phlegyas, de condition mortelle, &
non pas de Iupiter , neantmoins il ne le
quittoit point , le conseruant aussi soi-
gneusement que son fils, craignant qu'il
ne fust tué de quelque dard. Aussi quand
il le voyoit engagé, il le soustenoit com-
battant en sa place , & l'animoit de ces
paroles.

Mon fils darde ton jaelot, les ennemis s'affoiblissent, tu n'as pas seulement offensé les ennemis de tes traicts: mais tu as frappé Bacchus d'une fleche de ta beauté, luy qui dompte les geans, n'espargne donc point Deriades l'insolent Capitaine des Indiens, qui est si hardy que d'entreprendre la guerre contre les Dieux, afin que l'on die qu'Hymnee s'est rendu victorieux de Bacchus, & de Deriades.

Ce discours l'émeut de telle sorte qu'il se porta dans la presse avec plus de courage dont Bacchus en fut si cōtent qu'il se jetta aux Indiens, & les mit en desfouite. Vn d'entre eux voyant l'exécution qu'il faisoit, dit à Melanee, le piquant de ces paroles.

Braue guerrier où est ton arc, où sont tes fleches. Est-il possible que des femmes qui ne sont point aguerries nous terrassent, tire donc sur Bacchus, & ne pense point qu'il soit immortel, que ceste fausse reputation de diuinité ne t'abuse, ne le crains point, il est hōme mortel comme vn autre, l'extraction dont il se vante de Iupiter, est vn mensonge, ne l'espargne donc pas, si tu l'offense, prens

les recompenses que Deriades promet
à ceux qui seront victorieux : car il desire
de voir Bacchus sur vn buscher, vaincu
de la main des siens. Vn seul coup peut
finir la guerre, & pource que ceste entre-
prise est grande, laue tes mains d'eauës
lustrales, & promets en conscience que
tu sacrifieras apres la victoire vn taureau
à Hydaspe, & vne brebis noire à la terre.
Ces reproches qu'il luy fit luy dōnerent
vn nouveau courage. Melanee tira vne
fleche de son carquois, & banda son arc,
voulant frapper Bacchus, mais le coup
fut destourné par la faueur de Iupiter;
qui ne manqua pas de frapper Hyme-
nee en la cuisse, ce n'est pas que Bacchus
ne l'eust preueu : mais il pensa que c'e-
stoit assez que d'ēpescher la playe mor-
telle, & d'addoucir le coup : cet Archer
continuoit à décocher ses traicts, mais
Venus gauchit les pointes, tout ainsi
qu'une bonne mere chasse les mousches
qui importunent son fils en son repos.
Hymenee estant blessé de ceste façon,
monstre sa playe à Bacchus en pleurant,
afin qu'il luy donnast quelque remede : il
le prit par la main, & le fit monter en son
chariot, se retirant à l'escart. Et tout ainsi

qu'Appollon deplora l'accident arriué au pauvre Hyacinthe, accusant la jalousie de Zephyre. Ainsi Bacchus regretta l'infortune de son Hymenee: mais quād il veid que la fleche n'estoit pas dedans, il y apporta la sonde, & retira vn petit bout qui y estoit resté. Les larmes d'Hymenee l'esmeurent grādement, se courrouceant cōtre la cruauté de Mars, & de Melanee, disant ces paroles.

Le taureau a tué mon cher Ampele, & maintenāt Mars veut perdre Hymenee. A la mienne volonté qu'il eust faict tuer les soldats que i'ay conduicts à la guerre, & qu'il eust conserué celuy-cy inuulnérable, quel regret puis ie auoir de la mort des Satyres & des Cabires, que les Silenes soient desfaicts, & que les Bassarides fuyent, pourueu que mon Hymenee demeure sain & sauue, & toy Apollon sois luy autāt fauorable qu'à ton fils Aristee; & pense que la mort de mon amy me fera aussi sensible que l'enuie d'Aristee en mon endroit, quand il voulut loüer son miel au preiudice de mon vin: mais n'est-ce pas que le destin me defend de le deplorer, maintenant qu'il n'est que

bleffé, puis qu'il faut que ie regrette encore vne fois, la rigueur des Parques, & sa mort. Quelle enuie nous trouble tous deux? Iunon me regarde d'un œil jaloux & ennemy, suscitant ce mal à ce ieune homme & à Bacchus son amy, & a pousfé Mars sous la fallacieuse ressemblance d'un Indien, à ce coup perilleux, afin de brauer Bacchus en ses affections: mais ie m'armeray d'une arme & d'une pique contre Melanee, & ie vengeray Hymenee d'une telle façon, qu'il aura subiect de se contenter. Que si tu meurs, ô Hymenee delaisant la guerre sans victoires, ie la finiray par mon courage, & ne me seruiray plus de mon Thyrsé, ie prendray tous les ennemis encore qu'ils soient reduits, faisant mille cruautéz à Melanee. C'est pas Deriades qui t'a bleffé Hymnee, encore qu'il soit indigné contre moy, sois-luy d'oc favorable, ô Venus! apres auoir caressé Adonis pour Mars, & frappé vn autre Adonis en la cuisse, le sang amoureux murmure en coulant de la playe, & demande que tu fauorise Bachus. Enuoye icy Phœbus qui est instruit en la Chirurgie, & il le pensera. Mais laisse Phœbus dans le ciel,

ceste pluye luy renouuellera celle de hyacinthe: Enuoye plustost Pejon, il est sans amour & sans dessein. Mais n'ay-je pas besoin de remedes, aussi bien que celui que ie veux faire guerir? Le recognois quelques autres sortes de playes, qui portent l'image de celles qui sont au corps. Il y en a dans l'armee qui font offence au ventre, aux mains, à la teste, aux oreilles: mais moy ie suis cruellement blessé au cœur, aussi bien qu'Hymenie.

Bacchus tenoit les yeux fixement sur la playe, & y applicquoit quelquefois la main fort doucement, & quelquefois il la parsembloit de fleurs, & l'estuuoit de vin. Et tout ainsi qu'un payfan esgoutte l'eau d'un fourmage qu'il a mis dans l'esclisse: Ainsi il presse la partie pour faire sortir le sang meurtry & l'humeur vitieuse. Apres qu'il fut guarý il retourna au combat, pour se venger de Melanee, & bā dant son arc, luy descocha vne fleche. Hymenee animé de cholere & de ressentiment, couroit entre les ennemis avec plus de courage, & les renuersoit, ne quittant point la compagnie de Bacchus, & le suiuoit par tout, tout ainsi

que l'ombre n'abandonne iamais le corps. Cependant Bacchus ne desista point de combattre les ennemis, & enlevant vn Indien en l'air avec son Thyrses, il le monstra à Iunon. Aristee se porta fort vaillamment avec son arc, imitant la vertu de son pere, & s'escrima de ses armes, comme s'il eust esté à la chasse, lançant aux ennemis vne pierre aussi grosse que celle dont on se sert à presumer les oliues. Il espouuanta les ennemis avec ce tourbillon. Les deux Cabeïres fils de Vulcan ne firent pas moins d'effort avec le feu qu'ils jettoient dans l'armée des ennemis, de leur chariot, que leur pere auoit construit de diamans, tiré par des cheuaux qui souffloient la flamme par la bouche, comme les Taureaux qu'il donna à Ætes Roy de Colches. Ces genereux soldats poursuiuoient les Indiens avec la halebarde qui auoit esté forgée sur l'enclume de Lemnos, avec l'espee de mesme. Si vn Indien ruoit vne pierre, ils la couppoient avec le tranchant, d'vne telle violence, que les estincelles de feu en rejallissoiēt. Eurimedon gouuernoit les cheuaux, & dardoit ses jaelots de feu, tournant & virant les flā.

beaux d'Hecate, conuenables aux Thyades. Les Corybantes armées de courage & de générosité, ne s'espargnoient pas non plus que les autres, faisant raisonner les espees sur les boucliers. Le bruit du mouuement sembloit imiter celuy de la danse. Cependant les Indiens auoient du pire en ces alarmes, vn des plus braves d'entre eux tomba à terre ayant entendu le son des Boucliers. Vne Bassaride le voyant reuersé, le tua, & aussi beaucoup d'autres. Lence enleua vn rocher tout entier, & le lança aux ennemis. Les Bacchantes se jettoient à corps perdu dans la presse avec leur lierre. Eupetale monstra à Bacchus qu'elle auoit du courage pour son seruice, terrassant vn grand nombre d'Indiens avec son pampre. Terpsichore courut dans la meslee, en remuant ses cymbales: Iamais Hercules ne chassa si promptement les oyseaux Stympthalides, qu'elle esmeut les ennemis à ce grand bruit. Trygie demeura derriere les regimens des Indiens, & n'osa pas se presenter au combat: car outre sa vieillesse, elle estoit grandement couarde. Les Silences

la laisserent au camp, où elle s'efforça de desbaucher Maran à l'yurongnerie; mais il ne voulut pas frustrer l'armée de la présence de sa personne. Les Satyres auoient souuentefois supplié les Dieux que ceste vieille fut tuee en quelque occasion, d'autant qu'elle apportoit de la confusion. Calyee esmeuë de la fureur Bacchicque, combattoit vaillamment. Mais les Indiens ayans esté repoussez avec tant de violence, reprirent vn nouveau courage. Oeone lassée des alarmes & des combats, commençoit à perdre son rang. Astree s'enfuit avec Staphyle, & Celœne avec Calyne. Morrhee voyant la desroute des Silenes, les poursuivit furieusement, & en blessa vn grand nombre. Maron s'enfuit, & Lenee s'espouuanta, & Dorycle espouuanta Lycaste. Mais comme Bacchus eut apperceu les accidens arriuez à ces femmes, il apporta remede à leurs playes, commandant à Eupetale de les estuuer avec du vin, & Staphile endormir la douleur, estanchant le sang par paroles. Myrto guerit la main qui estoit blessée avec du myrthe, & tira vne fleche de l'espaule de Cabyre, & pensa la

nouvelle playe de Nise, ayant vn particulier regret de Lycaste. Apres que Bacchus eut remedié aux playes des Bassarides, il ralia ses gens, & recommença la guerre, faisant sonner les cymbales, & se presenta à la teste de l'armee avec les Gorybantes. Les boucliers qui receuoient tous les efforts des ennemis, faisoient vn grand bruit, les jaelots que l'on dardoit d'une part & d'autre, sifflaient en l'air: les arcs que l'on desbandoit resonnoient, & pareillement les trompettes. Mais comme les armées furent arriuees au fleuve Hydaspe, Bacchus poursuivit les Indiens, & les mit en desroutte, & pareillement ceux qui auoient prins la liberté de la campagne: car son armée estoit diuisée en deux. Les ennemis estoient aux extremités, tout ainsi que les Pelerins quand ils sont incommodés des cuisantes chaleurs du Soleil en plein midy. Bacchus glorieux de la victoire que son courage luy donnoit, desfia Deriades avec ces paroles injurieuses.

Deriades, que crains-tu? Si tu es yssu d'Hydaspe, comme tu te vante, demande luy secours. Le Prince des Indiens se glorifie d'estre venu du Ciel: mais il est

autant inferieur à Bacchus, qu'Hydaspe l'est à Iupiter. Mon pouuoir ne luy est point comparable: car si ie veux ie monteray au Ciel, & si ie veux ie feray aller mes dards iusques à la Lune. Et encores que tu sçaches les ruses de guerre, combats premierement avec Bacchus.

Les Satyres animez de ceste boutade guerriere, se ietterent à corps perdu sur les Indiens. Pan attacque Melanee, & luy deschira le ventre, prenant vengeance de la playe qu'il auoit fait à Hymenee, en faueur de Bacchus. Pendant ces allarmes la nuict vint, on sonna la retraite, & les deux armées se retirerent en leurs tentes: Mais cōme Mars reposoit, Morphée le Dieu du sommeil luy apparut, par le conseil de Rhee, qui ne desiroit que faire absenter ce Dieu du camp des Indiens par cet artifice, en faueur de Bacchus.

Mars indomptable (luy dit-il) dors-tu? est-il seant qu'un Capitaine qui endosse la cuirasse pour la guerre, repose si profondément? Tu ne sçais pas que Vulcan caresse maintenant sa Venus à plaisir, ayant chassé pour ce fujet sa Nymphé Charide. Cupidon a rendu sa mere

amoureuse; encore qu'elle aye autrefois esté si rebelle à ses embrassemens. Il luy auoit procuré la recherche de Minerue: mais elle ne voulut point fléchir à sa passion amoureuse. Iupiter luy conseilla de fuir son accointance, & qu'elle ne luy pouuoit estre que prejudiciable, se ressouuenant encore de son fils Erechthee, qu'elle nourrit fort soigneusement, encore qu'il ne fust pas d'elle, craignant d'auoir vne pareille peine en la production d'un semblable. Reueille-toy donc, & vas en Thrace, tu y rencontreras Venus en la couche amoureuse, que les petits Cupidons ont parsemé de fleurs. Tu verras le superbe Palais de Paphos, qui est tout couronné de roses & de myrthes. Persuades toy que ce sont icy les amours des Bibliades, & que Vulcã a repris celle qu'il auoit autrefois deshonorée. O pauvre Mars, tu ne possede plus les bonnes graces de la Deesse Venus, vn forgeron boiteux ta preuenu. Chante maintenant les embrassemens amoureux de Venus & de Vulcan: mais ie te conseille d'aller en Sicile, à la forge des Cyclopes, & de les supplier de


ma part qu'il te fassent des liens & des entraues, pareilles à celles dont tu fus garrotté autrefois, afin que tu les lie ensemble, & les Dieux loueront ceste honnestee vengeance. Ils riront voyant celuy qui auoit forgé les chesnes, y estre enlacé luy-mesme. Resueille toy donc, & pratique cet artifice au desaduantage de la Nymphé qui t'a esté injustement rauie. Pourquoy entreprends-tu les affaires de Deriades, n'y ayant point d'intérest? Tiens cecy en secret, de peur que le Soleil ne l'entende, & le rapporte à son fils.

Ce Phantosme n'eut pas si tost disparu, que Mars s'esueillâ. L'Aurore commençoit desia à poindre, il se leua, commandant à Phebus, & à Dimus, qu'ils preparassent le chariot, ce qu'ils firent promptement, & attellerēt les cheuaux. Mars monta dedans, & s'en alla en Paphos, & delà à Cythere. Pourfuiuant son chemin il arriua en Cypre, regardant souuentefois du costé de Lemnos, & ne pouuoit voir les forges que d'un œil jaloux & enuieux, desirant descouurir sa Venus, neantmoins il en craignoit la rencontre, de peur de receuoir d'elle quelque disgrâce,

grace a 'cause qu'elle l'auoit preuenue.
Après qu'il eut fait toutes ses recherches. Il quitta le sejour de Lemnos, & monta au Ciel pour renouueller la guerre contre Iupiter, le Soleil Vulcan & Minerue.

Bacchus deffaiët vn grand nombre d'Indiens en l'absence de Mars. Iunon assiste Deriades de son secours, & Bacchus est contraint de fuyr, & se retirer en vne forest, où Minerue par le commandement de Iupiter le vint trouuer, pour luy persuader de r'allier ses gens, ce qu'il fit avec vn heureux succès du combat.

LIVRE TRENTIESME.

 **M**ARS estant de retour de Lemnos monta au Ciel. Cependant Bacchus en l'absence de ce Dieu deffit vn grand nombre d'Indiens, tantost il se presentoit à la teste pour soustenir l'effort des ennemis: Tantost à la queue, tantost aux ailes de l'armee animant les Satyres en l'aduantage qu'il auoit contre Deriades.

des. Quand il apperceut que Mars auoit delaiſſé le camp des Indiens à la perſuaſion artificieule de Rhea, il reprint vn nouveau courage, terraffant tous ceux qui s'oppoſoient à ſes armes. Ariſtee tenoit les bataillons de la main gauche, où il rendit des effets genereux: Morrhee voyant que les Satyres faiſoient tant d'execution avec leurs feuilles & leurs lierres, parle à Deriades de ceſte façon.

Deriades quelle merueille eſt cecy mes ſoldats ſont tuez avec des Thyrfes & des Pampres. Ceux qui ne ſont point couuerts de boucliers deſſont mes gens qui ont de fort bonnes cuiraffes faites à l'eſpreuue de l'eſpee & de la pique, les Baſſarides ne ſ'eſtonnent point de nos armes encor qu'elles ſoient toutes nuës, ſe conſeruans ſans eſtre bleſſees, ce prodige m'eſtonne, & il n'eſt pas permis aux hommes d'en ſçauoir la cauſe quant à moy ie vous conſeille de quitter vos armes, & de prendre leur Thyrſe & leurs Rameaux: Car vous voyez que les ennemis en font plus d'execution que nous. I'ay bien

hanté les guerres & les armées, mais
iamais ie n'ay veu vne chose pareille.
Leurs Pampres rendent plus d'effect
que nos Iauelots. Permettez donc que
ie m'en serue. Nos flesches ne sont pas
si fortes que leurs herbes, & que ie
quitte mes bottes. Leurs brodequins
sont plus addroits à la guerre, que me
sert d'auoir vn bouclier de fer puisque
de simples femmes les forcent, elles
jouënt de leurs Cymbales, & nos sol-
dats estant estourdis à ce bruit tom-
bent. Nos Heaulmes cedent à leurs
couronnes de fleurs & nos cuirasses à
leurs peaux de Pantheres. Je me suis
mesme souuentesfois efforcé de tuer
Bacchus, & luy ay dardé des Iauelots
mais la pointe s'emouffe, & rebouche
sans effect.

Deriades offensé de ses parolles se
mit en colere contre luy, & le regardant
d'un œil furieux, luy dit ces parolles de
menasse & d'arrogance.

Morrhee effeminé, pourquoy crains-
tu ce coyon de Bacchus? Pourquoy ap-
prehende-tu les Satyres, qui sont plus
propres à folastrer qu'à rendre vn
combat digne de nous.

Ceste boutade luy donna courage & à l'instant il se jetta dans la presse, & blessa Euremydon en la cuisse. Ce coup fut si violent qu'il le fit tomber a terre, & fut demeuré en ceste extremité, n'eût esté que son frere Alcon le vint secourir le couurant de son bouclier & de son espee, tout ainsi qu'un Lyon qui defend ses petits. Morrhee ayant apperceu ceste defense se presenta pour combattre les deux freres, afin que leur mere deplora la mort de ses deux enfans tuez en un mesme iour & en vne pareille occasion, & sans doute il les eut tuez tous deux, si Eurymedon n'eut imploré le secours de son pere Vulcan.

Mon pere (luy dit-il) qui forgez les armes de la guerre & qui maniez le feu, faite-moy la faueur que vous m'otroyastes quand Cerés print ce qui estoit necessaire à la conseruation de sa fille qu'elle cacha en des Grottes pour la garentir de l'effort des amoureux qui la poursuiuoient. J'ay espouuanté les ennemis de sa chasteté secourant mon pere, & Acmon. C'est moy qui eschauffe l'air en vos Forges, deliurez-moy du peril ou ie suis, Morrhee m'a

bleffé , & s'il n'est pas content il me veut encortuer.

Vulcan ayant ouy la priere de son fils, descendit du Ciel tout en flamme, & dardant vn jaelot de feu, entourra la teste de Deriades, comme si ce fut esté vn collier, ce feu brusla les courroyes de son Heaume, & luy eschauffa la teste de telle sorte qu'il eut tout consummé, si son pere Hydaspe ne l'eut secouru au besoin, luy arrosant le corps à force d'eauë, & le rafraichissant. Vn nuage de fumee entourra Morrhee & sans doute Vulcan l'eust estouffé là dedans n'eust esté qu'il ne voulut pas donner ceste affliction à Hydaspe, que de veoir la mort du pauvre Morrhee gendre de Deriades, apres celle d'Orontee. Vulcan poursuit les ennemis, & ne se retira point que pour secourir son fils Eurymedon qui estoit fort bleffé. Il le chargea sur ses espaulles, le portant en vn petit bocbage escarté du combat, où il guerit sa playe par ses medicaments, mais apres que Morrhee fut remis en son premier estat, il ne perdit point l'enuie de la guerre, au contraire son courage s'ac-

creust , & s'eslongnant pourtant de la rencontre de ce Dieu , dont les armes sont de feu , il reprint sa premiere route , se meslant dans la presse , où il tua Phlogie que Bacchus aimoit tant , à cause qu'il auoit de la grace à représenter par les gestes & par l'agitation des mains & des pieds quelque histoire agreable dans les delices de ses banquets , ayant tant d'auantage & tant de naïueté qu'il esmeut Bacchus aux larmes encore qu'il ne fut pas en prinse de ceste passion lors qu'il representa la cheutte & la mort de Phaëton par sa contenance contraignant les assistans de regretter sa condition & son malheur quand son chariot fut precipité. Comme Morrhee apperceut ce Balaadin muet , il le perça de sa picque & luy dit :

Cen'est pas icy la danse que tu as tant pratiquée à la table de Bacchus , en le resiouissant de ta contenance ridicule , maintenant tu danse d'une triste façon , si tu as encore de la passion à tes ballets , fais-les chez Pluton , tu n'as pas besoing de te barbouiller d'auanta-

ge. Danse si tu veux auprès du fleuve Lethé, & que Proserpine s'esbatte à tes exercices:

Après auoir tué Phlogie, il courut comme le vent après les Silenes & les espouuanta. Tectaphe le suiuoit, luy que Deriades auoit commandé que l'on fit mourir de faim dans vne prison obscure: mais il ne peut euitier la mort en ceste occasion (que les Satyres forcerent les Indiens) mais qui est celuy qui peut destourner sa rigueur quand le destin a donné sa loy ineuitable quand la Parcke inflexible, suit l'ordre & la necessité. L'artifice n'a peu garantir Tectaphe de la fureur des Satyres. Il est bien vray qu'il en auoit auant tué vn grand nombre, car il deffit Pylee Onthrie, & Pythé & en eust renuersé bien d'autres, mais comme Eurymedon l'apperceut il l'attraqua, & luy donna vn coup dans le front, luy fendant la teste. Il tomba à demy mort, & se ressouuenant en cet estat de la charité de sa pauvre fille, & de sa deliurance, lorsqu'il estoit en la prison par l'ordonnance de Deriades, il sospira

• & la memoire de ceste aduventure luy fit respendre beaucoup de larmes, & luy a dit ses paroles de regret.

• Ma fille, & ma mere, & ma nourrice pourquoy ne vous estes vous pas approchée de moy en ce point, puis que i'ay auoisiné la mort de si prest, pour quey ne m'avez vous encore secouru : Qu'est deuenue vostre affection en mon endroit, gardez-vous la foy à vostre mary viuant pour en frustrer vostre pere mourant, si l'inuention & si l'artifice peuuent reuouer vn homme des Enters. cherchez quelque bonne ruse, treuuez le moyen de me pouuoir deliurer de la mort, cōme vous avez fait de la prison de Deriades, afin que i'euie ces accidens, s'il est possible de retourner de ce lieu que la loy du Destin defend.

La parolle luy manqua aussi-tost, sa fille qui estoit dessus vne tour de la ville voyant son pere blessé s'abandonna aux cris, & aux larmes, & aux regrets, & deschirant sa belle face, & couppant ses blonds cheueux, elle fit ces tristes plaintes, comme s'il eut peu les entendre.

Mon fils & mon pere (luy dit-elle)
ie ne vous donneray pas aujourd'huy
le lait de ma mammelle ? Comment !
(miserable que ie suis) vous donneray-
je la vie qui est à vous , Comment vous
secoureray-je , A la mienne volonté
que ie puisse tromper Pluton , mais
mon pere ie vous feray vne autre cour-
toisie. Je ne vous laisseray point seul
entre les morts , & cependant receuez
le sang que vostre fille a respandu de
regret , aussi bien que le lait que ie vous
ay donné : Et vous Geolliers de mon
pere , monstrez ie vous prie la prison où
il est retenu , affin que ie le deliure. He-
las l'Enfer ne vous ressemble pas , il est
inexorable. Je ne scaurois luy faire en-
core ceste faueur. A la mienne volon-
té que ie fusse tuee de la mesme espee
& que celuy qui a blessé le pauvre Te-
ctaphe en face autant , à la mal-heureuse
Moree , afin que l'on puisse dire que le
pere & la fille sont morts d'une mesme
espee.

La mort du pauvre Tectaphe ne fi-
nit pas le combat , ils s'eschauffoit au
contraire , Morhee tua Dasille , &

plus en plus le plus genereux soldat de toute l'armée, & Alcimachie la fille d'Harpalion qui fut si hardie que de venir au Palais de Iunon, portant vne couronne de lierre. Ceste Deesse la hayt tousiours du depuis, autant que Rhea l'aymoit. Alcimachie fouëtta vne statuë qui luy estoit consacree avec des Pampres, en despit d'elle, mais aussi elle ne peut eiter sa cholere & son ressentiment: car elle fut du depuis tuëe & enterrée en terre estrangere, & ne veid plus son pere Harpalion, ny Lemnos son pays, demeurant entre les ennemis & à leur misericorde. Morhee ne se contenta pas de sa mort: mais aussi il tua Codone la plus belle Nymphé que le fleuve Alphée ayt iamais nourrie, elle estoit encore à marier en la fleur de sa beauté, ce guerrier trop insensible n'eut point de compassion deses blonds cheveux & de sa belle face, il y mit les mains meurtrieres. Son blanc sein ne le peut esmouuoir. Ses beaux yeux n'eurent point de pouoir sur luy, il n'eut point de honte de la playe qu'il luy fit: Helas il l'a

ruée mal-heureusement & est tombée morte, non pas de l'espée de Mars (car il est plus fauorable aux Nymphes, pour le respect de sa Venus) mais de celle d'un homme aussi insensible qu'un rocher: Apres ces exploits il pourfuiuit les Moénades avec beaucoup de chaleur, & deffit Eurypile Sterope , Sos, Staphyle & Gigarto & Melatæne. Les Telehins esmeus de ceste perte soustinrent cet effort, & pour ce sujet ils desracinerent un Corinier, & l'esbrancherent, dont ils se seruirent contre les Indiens, mais Iunon qui n'auoit point d'autre dessein que de perdre Bacchus, donna courage à Deriades faisant esclatter son bouclier, & son Heaume comme si ce fut esté un Soleil, cet objet troubla les yeux de Bacchus luy donnant l'espouuante, mais ayant apperceu l'assistance de Iunon, il se retira au petit pas du combat, les Indiens s'auancerent voyant sa retraite, & alors Deriades renuersa les regimens des Bacchantes d'un courage inuincible, Bacchus fut contraint de se cacher dans la forest, laissant l'euenement de la guerre à

la Fortune. Il apprehendoit tant les disgraces de Iunon qu'il n'osa pas soutenir ses gens, mais Minerue descendit du Ciel par le commandement de Iupiter avec charge tres-expresse de persuader à Bacchus de rallier ses gens, & de se presenter au combat, elle se mit derriere luy & le print par ses cheveux rendant vn esclat de sa diuinité en l'accusant de sa grande poltronerie & couïardise.

Bacchus (luy dit-elle) où fuis-tu, la crainte ne t'a iamais suggeré vn dessein si mol & si lasche aux premiers combats, où sont tes Thyrses & tes flesches de Pampre, que rapporteray-je à Iupiter s'il me demande si le Roy des Indiens est subjugué, ie ne luy scaurois respondre autre chose sinon que Deriades espere de triompher & que Morhee combat à son aduantage; est-ce là vn tesmoignage du courage que le Ciel t'a inspiré? Quoy es-tu entré en la Lybie, as-tu combattu avec Persee, t'a-il conuerty en pierre, as-tu veu les cheveux serpentins de Meduse? As-tu crainte des Dragons. Semele n'a pas

engendré vn fils genereux & semblable au pere, Danaë la fille d'Acrise a enfâté le valeureux Persee, & il n'a pas re-jetté le secours de ma Faux, & les aisles de Mercure, le monstre qu'il a dompté dans la mer en peu rendre tesmoignagne, & si tu es en doute de sa vertu demande-le à Cephee, interroge l'Orient & l'Occident, ils te diront que les Nereides ont grandement crains Persee le mary d'Andromede, aussi les Hesperides chantent souuent ses louanges, & les victoires qu'il a remporté sur Meduse. Æacque s'est monstre plus vaillant que toy, n'ayant point fuy Deriades, ny les allarmes des Indiens, il n'y a pas long-temps que les Capitaines d'Arabie respectoient ton merite, mais ils te mespriserent à ceste heure que tu as le cœur failly, quand ie considere le grand courage de Lycurgus qui te pourfuiuit iusques dans la mer, Ie le louë & honore Mars son pere, de ce qu'il a vn fils si courageux & si vaillant & quine desgenere point de sa vertu, tu dois prendre exemple de Iupiter, il n'a iamais fuy les combats des


Titans quand ils s'armerent contre le Ciel, tes ennemis mesme n'ont rien acquis qu'à la pointe de l'espee: Morrhee n'a point possédé les bōnes graces de Chei-robie que pour la guerre & par les victoires. Si tu as du courage il faut que la gloire de ton pere te soit exemplaire. Autrement ie ne t'appelleray plus mon frere, tant que tu tourneras le dos à Deriades & à son armee: mais ie te conseille de reprēdre les armes en asseurance que tu verras Minerue à ton secours avec son *Ægide* indomptable.

Minerue luy ayant fait ce discours elle luy inspira vn nouueau courage, & à l'instant il se delibera de joindre les ennemis sur les asseurances que ceste Deesse luy donna de la victoire, & tua en cet estat vn grand nombre des Indiens, blessant Phringue à l'espaule avec son Thyrsse, ce soldat fuyoit, mais Melissée l'arresta. Il poursuivit Agretie, mais voyant qu'il ne pouuoit l'atteindre, il se jetta sur les Bolanges, & mit en desroute les Arachotes, & les regimens des Salanges, & les Capitaines de Phringue & d'Agretie, terras-

fant ces peuples qui se couchent sur leurs oreilles. Il blessa Melamon qui s'estoit tapi dans vn arbre sous les fueilles, dont il decochoit ses traiçts sur les Bassarides. Iunon ne le peut conseruer qu'à grande peine, pource qu'il faisoit le guerre plustost par trahison que par courage, à l'ombre d'vn rocher où d'vn arbre espais, desnichant les Satyres par les jaelots qu'il dardoit secrettement.

Iunon voyant la deffaiete des Indiens se delibera de tromper Iupiter, luy enuoyant le Sommeil elle descend aux Enfers suppliant Proserpine d'enuoyer Megere une des furies pour affliger Bacchus. Iunon cherche Venus au mont Liban, & luy demande sa ceinture.

LIVRE TRENTÉ-VNIESME.

 OMME Bacchus eut deffaiet vn grand nombre d'Indiens, en ceste rencontre, il courut par tout le pays. Cependant Iunon qui auoit esté aduertie de la perte de ceux qu'elle fauorisoit, descendit en terre, où elle veid leur desastre, elle delibera de trauerser Bacchus par quelque autre inuention. Voyant encore les vestiges des liens d'Andromede, & du monstre Metamorphosé en pierre, elle se porta au lieu (se ressouuenant des trauaux, & des monstres qu'elle auoit suscité à Persee) avec doute craignant fort de le rencontrer, mais il

il n'y estoit plus, ayant desia passé la Lybie à trait d'aïles, pour arriuer en la grotte, estant assisté de l'œil fatal de Phorcys, où il couppa heureusement la teste de la Gorgone, & laua ses mains de son sang. La cholere & l'ennie de Iunon, s'aigrissoient contre Bacchus, elle prit resolution de tromper Iupiter, pendant qu'il reposeroit, afin de faire la guerre à son ennemy avec plus de liberté. Descendant aux enfers pour ce sujet, elle parla à Proserpine en ces termes.

Proserpine, Reyne de cesejour sombre, ie vous estime bien-heureuse de ce que vous estes esloignee de l'ambition des Dieux, ne sçauiez vous pas que Semele habite dans le Ciel, encore qu'elle ne soit qu'une Nymphé mortelle. Je crains grandement de voir son fils Bacchus gouverner le foudre apres Zagree, i'apprehende qu'il le manie de ses mains mortelles. Vous estes priuee de l'honneur que l'on rendoit à Cerés vostre mere. On a dressé vn Autel à Io, & on l'adore sous la figure d'une Vache à vostre prejudice. Ephialtes a bien garrotté Mars, que i'ay engendré immor-

tel dans vn poinçon, sans que Iupiter luy ayt donné aucun secours: mais il a fauorisé Bacchus par dessus les autres, ayant faict acoucher sa mere par son foudre, sans que le petit enfant en ayt receu de l'incommodité, & neantmoins il a delaisié Zagree, le Bacchus celeste, au peril de la mort. Mais ce qui me fasche dauantage, c'est qu'il a donné le Ciel à Semele, pour recompense de son amour, & l'Enfer à la pauvre Proserpine. Tous les autres Dieux sont mieux partagez que vous, on conserue le sejour azuré pour Apollon, & Mercure le possede: & vous auez vne miserable demeure, & où la nuit est eternelle.

Que vous sert d'auoir receu Iupiter entre vos bras, & de luy auoir donné la fleur de vostre virginité, s'il a intention de perdre vos enfans. Il est citoyen du Ciel, esclattant d'estoilles & de flambeaux, ayant octroyé la mer à son frere Neptune, & à vostre mary l'Enfer tenebreux. Je ne suis venu icy à autre dessein que pour vous supplier d'armer vos Erynnides contre Bac-

chus, de peur que iene le voye quelque iour gouverner l'Empire des Dieux. Si vous auez quelque ressentiment de ma fortune, obligez la Deesse Iunon, femme de Iupiter, & honorez Cerés vostre mere, & aussi Themis, afin que les Indiens puissent respirer, sous la rigueur de sa tyrannie, entreprenant la querelle que i'ay avec luy, & de ce que Iupiter a donné le nectar à son fils, & à Mars le cruel sang de la guerre. Faites en sorte que les Atheniens ne le reuerent point de l'honneur qu'ils ont rendu à Eleusine & à Zagree, frustrans Cerés de ses droicts.

Ce discours mit Proserpine en confusion, & la flechit par les larmes qu'elle sembloit respandre, ayant frotté ses yeux & son visage d'eau. Ceste Deesse infernalle luy promit d'accomplir son desir, en variant en son discours. Elle luy donna Megere pour traualler à l'execution de ses passions.

Iunon emmena ceste Furie avec elle d'une si grande vistesse, qu'au qua-

triefme pas elle arriua au fleuve de Gange, où elle monstra à Megere le grand nombre des Indiens qui auoient esté tuez, luy racontant la peine & le travail que ces peuples auoient à se defendre de l'vsurpation & tyrannie de Bacchus. Comme ceste Furie d'Enfer eut apperceu la cruelle deffaite, elle eut plus de passion que Iunon & de ressentiment: Et encore qu'elle semblast tesmoigner à son visage vn grand regret, neantmoins elle se plaisoit à ces objects funestes, & riant à la Sardonicque, dit ces paroles fatales.

Est-ce ainsi que les Roys du Ciel subjuguent vn ieune Prince, qui se content dans les limites de son Empire? Est-ce ainsi que les bastards de Iupiter deffont ces peuples innocens? A-t'il engendré vn fils avec Semele pour perdre les Indiens, qui ne font tort à personne? Mais ie veux bien que Iupiter, qui commet ces injustice, sçache qu'elle force a Megere, quand elle s'employe pour vn sujet si raisonnable. Il ne faict point la guerre aux Tyrrheniens, qui pillent en la mer les vaisseaux

estranteres. Il n'a point puny les Dryopiens impies, qui ne viuent que de proye & de meurtre, & il poursuit les pauvres Indiens, qui viuent selon les loix de la pieté & de la raison. Helas quelle injustice, vn homme mortel a bruslé Hydaspe, qui estoit immortel.

Megere entreprit la querelle de Iunon, & changea sa forme serpentine, prenant celle d'un Hibou, & demeura au mont Caucase, comme la Deesse luy auoit dit, iusques à tant qu'elle eut donné ordre de procurer le sommeil à Iupiter, pour auoir le loisir d'exécuter sa vengeance. Cependant Iunon passa le fleuve de Chremete, où Atlas est employé à soutenir le Ciel, & appella Iris la Nymphe que Zephyre malheureux en amour auoit tant carressée, & luy donnant la charge de chercher le Sommeil, luy dit.

Iris, messagere des Dieux, mere d'Amour, allez en diligence en la tenebreuse maison du Soleil, pour le chercher. Si vous luy rencontrez dittes-luy, s'il vous plaist, qu'il occupe Iupiter par la douceur de son charme vn iour seulement,

& qu'il ne le refuse point, iusques à ce que i'aye donné secours aux Indiens, & pour accomplir ce dessein sans estre recogneuë. Je vous conseille de changer de forme, prenant celle de la Nuid mere du Sommeil. Empruntez le nom & la ressemblance de Cyame. Quant à moy, quand i'ay quelque dessein que ie ne puis executer sans la fallace de ces desguisemens. Je me change tantost en Themis, en Venus, ou en Diane. Promettez-luy de ma part la faueur qu'il espere de Pasithee, aussi qu'il ne manque pas de me seruir en ceste occasion, s'il desire posseder les bonnes graces de ceste Nymphe: ie sçay bien qu'il s'y emploiera avec passion. Je n'ay pas le loisir de vous dire ce que les hommes entreprennent sous l'esperance de l'amour.

Ceste Deesse obeyt à ses commandemens, & s'enuola, passant par Paphos, & par la terre de Cypre, & arriua au fleuve d'Adonis, cherchant le Sommeil: Elle le trouua en la montagne d'Orchomene, où il estoit demeuré en la maison de sa chere Pasithee. Iris prit la ressemblance de Cyame, & s'approcha du Sommeil,

& luy dit, le trompant de ces discours.

Mon fils, iusques à quand Iupiter me mesprisera-t'il? n'est-ce pas assez que le Soleil me pousse, & que l'Aurore me talonne de si prest. Iupiter n'est pas contrainct de me faire cet affront. Il a encore engendré vn bastard, afin qu'il fist la guerre au Sommeil. Faut-t'il qu'un homme fasse ceste injure à moy & à mon fils? Car Bacchus allume des flambeaux la nuit en ses Sacrifices, & par ce moyen il me destruit, & se dispense de l'obeyssance qu'il te doit. O Sommeil, qui as la reputation de dompter toutes les creatures, & de t'assubjetir les Dieux. N'exerce plus ton pouuoir sur ceux qui sont plus enclins à veiller: car la lumiere de ses flambeaux a surpassé celle des Estoilles, & en a obscurcy l'esclat, & les rayons de la Lune dont ie me fers. I'honore l'Aurore, encore qu'elle rie de ce que ie fais estat de la splendeur fallacieuse de ceste lumiere qui esclaire dans le sombre de la nuit, & de ce que i'vse de la clarté qui imite celle de Phœbus, mais mon fils, ie desire que tu entreprennes par

vengeance les sacrifices des Satyres , & les veilles importunes de Bacchus , & que tu donnes le sommeil à Iupiter. Ne refuse pas ceste faueur à ta mere, ne defnie pas ceste courtoisie à Iunon, afin qu'elle puisse pendant le repos, assister les Indiens, que Bacchus subjugué par sa tyrannie. O Sommeil qui dompte tous les animaux de la terre, regarde en la ville de Thebes, & tu verras Iupiter qui se desgage de tes liens, & qui secouë le joug, veillant toute la nuit, endure la peine que merite Iupiter, pour auoir trompé Amphytrion en son absence, & abuse Alcmene sa femme, cependant qu'il se vengeoit de la perfidie des Telebe qui auoient tué son beau-frere, estât trois nuits dans la couche d'Alcmene sans dormir. Mais de peur que ie ne le rencontre en mesme estat à la quatriesme, ie te prie, mon fils, assoupis ses yeux. Tu as ressouenance des amours de Mnemosyne, qui le retint neuf nuits en ses embrassemens amoureux, dont elle engendra de luy les neuf Muses. Il n'y a pas grande difficulté à le vaincre, par ce moyen le petit Cu-

pidon qui est de ton aage, la reduit
sous le joug de ses loix avec ses fleches,
ayant compassion de la misere des In-
diens, & des Negres, dont la couleur te
doibt esmouuoir sur la consideration
qu'ils l'ont commune avec ta mere, toy
qui portes des aisles noires, conuenables
à la nuit. Secoure ceux qui ont le visage
peint de ceste couleur, & si tu ne de-
bligeras point la terre, qui est du temps
de mon pere, & qui a produit tous les
Dieux qui sont dans le ciel. Ne crains
point Iupiter, puisque Iunon te favori-
se, n'apprehende point les disgraces de
Semele, son mary la bruslee avec son
foudre, & s'il ne pourra se defendre de
son trisulque, ny de son tonnerre, quand
tu l'auras charmé, il demeurera immo-
bile en sa couche tant que tu voudras.
I'ay entendu que tu ayme Pasithee, fa-
vorise donc Iunon à ce subject : car elle
a pouuoir sur les volonteze de celle que
tu poursuis, & sur les vœux amoureux.
Que si tu eslis ton sejour chez Tethys,
secoure Deriades fils d'Hydaspe, & luy
donne vn fidele conseil, l'Ocean est son
ayeul.

Le sommeil s'espouuenta à ce discours,

& l'escoutant comme sa mere. Il iura qu'il feroit dormir Iupiter par l'espace de trois iours , encores qu'Iris ne l'eut supplié que d'un iour seulemēt. Le sommeil demeura quelque temps tout pensif , ne scachant le moyen de prendre l'occasion pour executer son desseing. Cependant Iris s'en vola , retournant pour rapporter les nouvelles à Iunon, qui minuttoit les moyens de tromper Iupiter par quelque ruze , elle prit resolution de chercher Venus pour luy demander sa ceinture , elle la trouua seule au mont Liban , les chariots s'estoient donné la liberté de la campagne , en la saison du Printemps. Se pourmenant en leurs jardins , l'une cueilloit les fleurs, l'autre faisoit des bouquets de baume, & de passeuclours. Comme Venus eut apperceu Iunon si passe & si desfaiete , elle luy dit en ces termes.

Iunon femme de Iupiter qui est la cause de vostre tristesse. Pourquoi auez-vous la face si descoleree. Iupiter s'est il encor metamorphosé en pluye d'or pour l'amour de Danaë , ou en Taureau en faueur d'Europe , y a-il encore quelque Nymphé qui luy ressem-

ble, s'est-il changé en cheual, imitant le hannissement de ces animaux, ou en Satyre, a-il vne autre Semele, a-il dardé son foudre en témoignage de sō amour, recherche-t'il encore les faueurs de celle qui est changee en vache, sous la forme d'un Taureau, estes-vous en peine de luy donner vn autre Argus pour l'espier, racontez-moy donc le subject de vostre fascherie, & ie vous secoureray en tout ce que ie pourray.

Iunon luy respondit en ceste sorte, la trompant par ses ruzes, & par ses artifices.

Venus Deesse de Cypre, laissons le ciel aux mortels, Iupiter a donné ce séjour à Semele, & si ie croy qu'il fauorisera Bacchus. Cependant où habitera Iunon, en qu'elle contree me retirera-ye, j'ay peur de veoir Semele la Reine du ciel: ie crains d'estre releguee en la maison triste d'Yapete, & que mon mary ne me chasse aussi bien que Saturne. J'apprehende grandement qu'il ne fasse planter la vigne au ciel, frustrant les Dieux de leur doux nectar: mais plustost que cela iamais n'arriue, c'est la raison, & la nature des choses,

que l'eauë & la terre porte des rameaux,
& non pas le ciel, afin que ie ne l'appelle
herbu, mais estoillé, & que ie ne boiue
point d'autre liqueur apres le nectar. I'ay
peur de voir Minerue enyuree de vin, &
prompte à faire des querelles à Mars, &
à Venus, pour mettre tous les Dieux en
dissension, & les contraindre à celebrer
les Orgies. N'est-ce pas assez de honte
aux Dieux, de ce qu'Hebe verse le nectar
Iupiter de ses mains mortelles. Quant à
moy ie me resous de quitter le ciel, & de
fuir les reproches que l'on pourroit me
faire, ie l'abandonneray à Ganymede, à
Bacchus, & à Semele, que le ciel demeure
à Persee, & à Bacchus, ie m'en iray en
Argos, où en la belle ville de Mycene,
Marston mary viendra avec sa Mere, &
toy cependant viens à Sparte, afin que
ceste ville recoiue Venus, armee, & assi-
stee de Mars. Je sçay bien d'où me vien-
nent tant de malheurs, c'est Megere qui
se vange de moy, de ce que i'ay trauersé
les Titans en la guerre de Iupiter, & de
Saturne son pere. Ne seroit-ce pas vne
hôte, de souffrir que Bacchus fut au mi-
lieu du ciel aupres de Venus, maniant
l'Ægide apres Iupiter, & apres Minerue.

Deesse secoure-moy en ceste occasion,
que ie puisse le tenir dans les entraues
d'vn iour, afin que pēdant son repos i'as-
siste les Indiens. Tu ne sçauois honne-
stement leur refuser ceste courtoisie,
ayant receu autrefois Venus, Erythree,
Bacchus les veut reduire à son obeissan-
ce, & Iupiter le fauorise de son foudre
aux perils qui sont d'importance. Don-
ne-moy donc ta ceinture amoureuse qui
charme les esprits, ma condition n'em-
pesche point que ie la porte : car ie presi-
de aux mariages, contribuant à l'A-
mour tout ce qui est necessaire pour la
jouissance des Amans.

1

Iunon ayant impetré la ceinture de Venus, se presente à Iupiter, & le rend amoureux. Megere furie d'enfer pendant ses embrassements, & son sommeil trouble l'esprit de Bacchus. Deriades sçachant son malheur, se jette sur son armee, & deffaiët les Satyres, & les Bacchantes.

LIVRE TRENTÉ-DEUXIÈME.

Iunon n'eust pas si tost acheué son discours, qu'elle persuada à Venus, & en témoignage elle luy donna sa ceinture, & luy dit ces paroles.

Iunon, reçoit de ma main ce present qui te secourera en tes affaires, tu charmeras par ses attraiëts, le Soleil, Iupiter, & tous les Dieux, avec ceste puissance d'esmouuoir les flots de l'Ocean inconstant.

Venus luy ayant faict ce present, s'en alla au mont Liban. Cependant Iunon monta au ciel, & à l'instant elle commença à se parer pour donner de l'A-

mour à Iupiter , par les allechemens de
sa beauté , & de l'artifice de la ceinture
que Venus luy auoit prestee. Elle vestit
vnerobe, dont l'éclat d'or paroissoit cō-
me vn Soleil, frisant ses cheueux , & les
accommodant par ondes avec l'aiguil-
le, & les parsema de poudrès de senteurs,
l'odeur forte embauma le ciel , & la
terre, & se laua la face d'eauë musquee,
parant sa teste d'vne couronne, enrichie
de brillants , & d'autres pierreries qui
estoint les compagnons de Cupidon,
d'où il faisoit esclatter vne grande lu-
miere aux amoureux qu'il auoit blessé,
elle auoit vne chesne où la Selenité estoit
du nom de la Lune, qui excite les hōmes
à l'amour, & pareillement l'aimant qui
attire le fer , avec vne autre pierre qui
a beaucoup de pouuoir sur les affe-
ctions, à cause que l'on dit qu'elle se con-
créé dans les eauës , estant par ce moyen
alliee de Venus, qui est produitte de l'é-
cume de la mer , & n'estant pas cōtente
de ces parures , elle se fit vn bouquet
d'Hyacinthe, que Phœbus aime encore
& aussi de rose & de passe-velours , les
fleurs que Venus caresse particuliere-
ment en ressouuenance du bel Adonis.

Ces fleurs ne plaisoient pas moins à Iunon & en desiroit les faueurs, encores qu'elles ne fussent pas legitimes : mais comme elle consideroit les amours incestueuses qu'elle auoit pratiquee avec Iupiter. Elle vouloit luy en proposer l'image & la peinture : mais apres que Iunon se fut ainsi accommodee, elle mit la ceinture qui recelloit secrettemēt les charmes violens de l'amour, se mirāt en sa glace. Elle passa dans le ciel aussi viste qu'un oyseau, ou comme la pensee paroissant deuāt Iupiter en cet estat triomphant de beauté, & de bonne grace. Il ne l'eust pas si tost regardee, qu'il fut atteint des puissants attraiets de l'amour, & de l'effort que faisoit la ceinture de Venus. Ses yeux esclaves de ceste douce tyrannie, estoient occupez à cet object. Il l'interrogea sur le subiect du voyage qu'elle auoit faict en Orient, & luy dit.

Belle Iunon, pourquoy auez-vous esté aux Indes ? qu'elle occasion vous y a cōduict ? pourquoy venez-vous icy, n'est-ce point pour faire la guerre à Bacchus, & pour executer vostre passion contre luy qui vous pousse à secourir les superbes Indiens.

Iunon

Iunon qui cachoit ses desseings, & ses artifices luy respondit en riant.

Iupiter fils de Saturne cen'est pas là le subject de mon voyage, ie ne viēs pas des Indes pour cōbattre Bacchus, & assister ces peuples, ie ne me mesle point des affaires estrangeres: mais il y a bien vn autre occasion plus importante qui m'a contrainct d'y aller. C'est que Cupidon qui est passionné de l'Amour de Rhodope ne s'occuppe plus aux multiplicatiōs, ny aux generations, & le mōde en reçoit vn notable interest: car il se depeuple, & ne se repare point par les mariages. Ie viens pour luy persuader qu'il quitte le sejour de Thetis, & de la mer, abādōnant Rhodope, & qu'il s'employe aux productions naturelles. Vous sçauiez que le nō de jugale quel'on m'a donné, me sollicite d'y trauailler pour le bien vniuersel.

Comme elle eust tissu ce discours artificieux de ceste façon. Iupiter que l'Amour pressoit, luy respondit.

Belle Iunō, laissez la guerre des Indiēs, & que mō Bacchus les subiugue. Ne parlons plus de dissension, mais de l'amour, & des embrassemens: il faut que ie confesse que ien'ay jamais resenty vn si vio-

lent effort d'aucune beauté des Deesses que maintenant ie reçois de vostre object, Taygete, Atlantide mere de Lacedemon ne m'a point possédé avec tant passio, n'y l'agreable Niobe fille de Phoronee. Io qui a engendré Epaphe ne m'a point tyrannisé de mesme, ny Venus qui a des aduantages, & des allechemens secrets de l'amour, ne m'a point esmeu, comme ie le suis à present, ce n'est pas sans raison que l'on dit que vous presidez aux conjunctions amoureuses: car vous m'avez lié la volonté, & avez affermy mon affection.

Ayant acheué ce discours, il ramassa les nuages, & en fit vne couche couuerte d'ombres, avec les diuersitez des couleurs qu'Iris luy donna. Iupiter & Iunon estoient dans les delices des embrassements. La terre s'ouurit & fit croistre toutes sortes de fleurs en leur faueur, parsemant leur couche d'œillets & de roses.

Le narcisse se conjoignant au passeulours, luy monstra par signes que Iupiter estoit esmeu d'une passion extraordinaire. Les dieux ne peurent decouurir ces amourettes, ny les Nymphes, ni le Soleil encore qu'il penetre par tout, ny la Lune

ne avec son flambeau, car les nuës cou-
uroient leur couche. Iupiter flechit ses
yeux au sommeil de l'amour, & fut long
temps retenu dās ces delices. Cependāt
Erinnis faisoit la guerre à Bacchus au
contentemēt de Iunon, elle le tourmen-
ta avec ses viperes, & ses serps, luy trou-
blant l'esprit avec leur venin, la rage le
saisit à l'object de ceste furie d'enfer. Dia-
ne qui aperceut ce malheur le voulut ga-
rantir de ce mal, mais Iunon le menassa,
dardāt vn flābeau, & la fit desister de son
proiect. Comme Bacchus estoit en cet
estat vn Satyre qui le suiuoit, commanda
quel'on garrota ses Lyons, & ses chiens,
& les Pantheres, de peur qu'ils ne le de-
uorassent. Megere l'inferralle ne l'aban-
donna point, elle parut deuāt luy en di-
uerſes formes avec son feu & ses serpens,
quelquefois elle disparoiſſoit, & venoit
luy souffler à l'oreille quelque mouue-
ment estrange, suprimant le son de son
foüet. Bacchus agité de fureur couroit
par les montagnes, arrachant ses cornes
cōme vn taureau enragé, mugissant d'v-
ne façon espouventable, ayant oublie la
douceur de ses chāsons, faisant resonner
à l'Echo les voix de plusieurs animaux.

poursuiuant dans les montagnes les biches & les lyons, n'osoient pas se presenter, les ours espouuantez se' cachoient dās les grottes, craignans sa furie, il tua des dragons qui le lechoient, estant estonné d'un bruit inopiné qui l'esmeut, & heurtant les rochers de sa corne, il les terrassoit, les lyons qui le suiuoient doucemēt & desracinoit les chesnes, troublant le repos des Driades & des Nymphes, qui font leur sejour dās les eauës. Les Bassarides couroient par les campagnes, apprehendans sa rencontre. Les Satyres se cachoient dans la mer, ne voulant point s'approcher de luy, car il les menassoit d'une façon terrible, iettant de l'escume par la bouche en témoignage de sa rage. Cependant Deriades qui fut aduertty de l'infortune de Bacchus ne perdit point tēps, il se iette sur les Bacchantes, & tout ainsi que quand la mer est agitée de tempeste, & que les voiles & les cordages sōt rompus par la violēce des vens, les Pilotes s'abandonnent au gré des flots, & de Neptune. Ainsi l'armee de Bacchus se laisse aller à la passion de leurs ennemis: car en ce point il n'y auoit point de guerre égale, ny de cōbat, car Mars qui estoit

de retour de son voyage de Lemnos, se porte furieusement contre les Satyres, se plaissant au sang & au carnage plus que jamais : il parut sous la representation de Modee vaillant Capitaine avec vn visage Martial & espouuẽtable, & les cheueux espars à la soldatesque : il anima les Indiens au cõbat, dõnant quelque charge à Phœbus & à Demus en la place de Deriades. Les deux armees estãs iointes, les Indiens inuestirent les Bassarides, dõt la plus grande partie fut tuee, & l'autre s'enfuit. O Muse d'Homere, dis-moy combien il y en eut qui furẽt tuez : combien de mis au fil de l'espee. Premieremẽt Ebiule, Thiame, Ormene, Ophele, Criafe, Argasides, Telebes, Lioue, Anthee, Thrones, Arete, Eumele, Molene, Comaree estoient de ceux qui furent tuez. L'vn estoit estendu sur la terre, vn autre dans l'eauẽ, combattãt avec les flots, vn autre fuyoit dans les mõtagnes, vn autre dans la forest, Echelas fut tué par Morrhee d'vn coup de pierre, tenant encore en ses mains, vn flambeau qui le consommoit le reduisant en cendre, Morrhee glorieux de ceste victoire, luy fit ces reproches,

Echelastuas dissimulé la vertu de ton extraction, tu n'es pas issu de Pigmalion cōme tu te vantes, à qui Venus a octroyé le benefice d'un bel aage. Mars le mary de Venus qui a gratifié ton pere ne t'a pas deliuré, ceste Deesse ne t'a pas fauorisé d'une longue vie, te garantissant de la mort en ton adolescence. Je me trompe, tu es yssu de Venus, & Mars t'a dompté, estant semblable au bel Adonis qui est mort en sa ieunesse.

Comme Morrhee eust acheué de parler, il se ietta dans l'infanterie où il fit vne grande execution, tuant Biblothe, Detthe & Erigoble & Sebe, mettant en déroute les regimens des Thebains, & Acteon, il deffit Eubote citoyen de la ville que Cadmus bastit. Vn grand nombre des soldats de Bacchus fuyant les armes de Deriades, se precipitoit dans les périls, s'abandonnant à vne mort volontaire, on les voyoit tōber en terre, & entre autres Ormife, Himalion, Phrase, Thargele, laon, Coelon, Cyes, le champ de bataille fut tout remply des morts, & lauë de sang en si grande abondance que l'on eut iugé qu'elle eust esté arrosée de pluye. Les Bacchātes estoient espouuan-

rées, & les Satyres n'estoient pas plus as-
seurez, l'un fuyoit dans les montagnes,
l'autre dans les bois, l'autre dans les ca-
uernes des lions & des ours; l'autre sur la
pointe d'un rocher, inaccessible aux en-
nemis. Vne des Bacchantes n'osa pas se
retirer dās la bauge d'un sanglier, ny dās
le seiour des lions, mais dans le fort d'un
cerf, à cause que Bacchus n'auoit plus le
courage des animaux, cōme les Panthe-
res, mais cōme celuy d'une biche, les Sa-
tyres couroient viste comme le vent avec
leurs pieds de chevres, & entre autres Si-
lene cherchoit une mōtagne pour se sau-
uer, il tōba plusieurs fois à terre laissant
sō thyrsē & sēs pāpres aux Indiēs, n'ayāt
pas le loisir de les emporter, à peine peut
il euitē l'espee de Morrhee, Erechthee
ne fuit pas comme les autres, mais il se
retira au petit pas, pour ne degenerer
point de la vertu de sa Minerue. Aristee
fut blessē à l'espaule gauche, & Melissee
en l'estomach. Les Cyclopes suiuirēt les
Satyres, Pan se cacha dans la forest de
peur que sa Nymphe Echo ne le vit fuir
honteusement dans les mōtagnes, & luy
en donna des reproches. Tous les Ca-
pitaines n'eurent pas plus de courage

que les soldats, il n'y eust qu'Æaque qui soustint le combat en l'absence de Bacchus qui l'eust bien secouru en ces occasions, les Naiades furent contraintes de se retirer en leur seiour, les vns se meslerent aüec les Nymphes d'Hydaspe, les autres auec celles d'Inde & de Gange, où elles se lauerent des ordures du sang, & de la poudre destréepee, qui les auoient gastez, ou elles furent bien receuës. Les Hydriades se cachèrent dans les veines secrettes des chesnes. Les Bassarides iugeans que la cause de leur mal-heur venoit de l'infortune de Bacchus le deplorent, faisans couler de leurs yeux vne fontaine de larmes en tesmoignage de leur regret.

Pasithee raconte à Venus l'infortune arrivée à Bacchus. Ceste Deesse enuoye chercher son fils Cupidon, & le supplie de rendre Morrhée amoureux de Chalcomede, la plus belle des Bacchantes. Ceste Nymphe apprehende la rencontre de son Amant: Mais Thetis luy apparut, ayant pris la ressemblance d'une de ses compagnes, & luy conseille de faire bon visage à Morhée.

LIVRE TRENTE-TROISIÈME.

BACCHVS agité de sa fureur, couroit par les montagnes, semblable à vn Taureau que la rage tourmente. Pasithee entra dans les iardins de Venus, où elle cueillit les fleurs que le Printemps auoit esclos, & que le Soleil auoit peint de diuerses couleurs, pour faire vne couronne à sa Cypris. Mais apres qu'elle eut cō-

tenté ses desirs, elle se donna la curiosité de voir ce qui se passoit au voisinage, & aduifa la terre toute couuverte de sang & de corps morts, avec le triste object de Bacchus, qui portoit en ses yeux les marques de la folie. Ce grand malheur la fit pleurer, se deschirant la face de regret. Elle aduifa la froide contenance des Satyres, qui apprehendoient les combats, & Codone & Gigarto estendues sur la terre, prenant compassion de la pauvre Calcomede, qui s'efforçoit de se garantir de la poursuite de Morrhee. Pasithee auoit de l'enuie sur la Nymphe Rhodopide, craignant qu'elle ne surpassast la Venus en beauté. Ceste Charite monta au Ciel, dissimulant le regret qu'elle auoit de l'infortune de Bacchus, neantmoins son visage qui estoit passé & descoloré, tesmoignoit assez la pointe de ses ressentimens. Venus l'ayant apperceuë en cet estat, recogneut sa tristesse, & luy dit en la consolant.

Belle Nymphe, qu'elle affliction vous a changé le visage? Qui a terny la fleur esclatante de vostre Printemps? Je n'y recognois plus la beauté qui accompagnoit vostre front, vos yeux ne rendent

plus des soufres agreables. Descouurez-moy vos passions: N'est-ce point mō fils Cupidon qui vous a bleffee de ses traicts? N'avez-vous point de l'amour pour quelque Berger, cōme la Lune pour son Endymion? L'Amour vous a-t'il toutes deux vaincuës, aussi bien que l'Aurore? Ie me doute de la cause qui vous passionne, c'est le Sommeil qui vous poursuit amoureusement, ie ne vous forceray point à l'aymer, si vous ne l'avez pas agreable.

Pasithee luy respondit en pleurant.

Venus, mere de Cupidon, croyez-moy que ce n'est point l'amour d'un Berger, ny du Sōmeil qui me tourmēte. Ie ne suis point sēblable à l'Aurore, ny à la Lune en ce sujet: mais l'affliction insupportable de Bacchus me met en peine. Si vous auez de la bonne volonteé pour luy, secourez-le, & le deliurez des assauts de Megere.

Pasithee continuant son discours, luy raconta tous les malheurs qui estoient prouenus de cet accident. Que Morrhee auoit deffait les Bassarides & les Satyres, Que Codona & Gigato auoiēt esté malheureusement tuees, & que Chalcomede auoit couru grande risque. Venus ayant entēdu ces tristes nouuelles, elle appella

Aglaje sa seruant, & luy donna charge de chercher son fils Cupidon par toute la terre. Aglaje se porta avec diligence par les diuerses regions du monde, pour executer sa commission. Elle le trouua au mont Olympe, qui se resioüissoit avec Hymenee fils d'Vranie, à vn jeu de prix fort plaisant. Cupidon posa vn carquan d'or, & vn vase d'argent, où la figure d'Hebe estoit grauee. Hymenee mit vne sphere, où tous les Cieux estoient representez avec leur mouuement. Ganymede fut le Iuge de ce different, portant en ses mains vne couronne, pour celuy qui remporteroit la victoire. Le jeu estoit à qui jetteroit mieux vne liqueur d'vn vaisseau en vn autre, & avec plus de dexterité, sans la resandre. Hymenee prit vn vase qui estoit remply de nectar, & le jette dans vn grand bassin, & frappa la teste d'vne statue qui estoit grauee dedans. Mais Cupidon plus adroit, ayant supplié Venus sa mere de luy estre fauorable en cet exercice, leua le vase, quel'on auoit remply, poussant la liqueur d'vn mouuement si reiglé, qu'elle toucha le but. Le bassin resonna, comme s'il eust voulu chanter sa victoi-

re. Ganymede donna la couronne à Cupidon, & il eut deux prix, le carquan d'or & la sphere, dont il en fut grandement resioüy. Apres cet exercice, Cupidon passa la main sur le front d'Hymence, ensemocquant de luy. Cependant la Nymphe que Venus auoit enuoyee les regardoit avec beaucoup de contentement, & le tirant à l'escart, luy fit ce discours plein d'artifice.

Cupidon pere de l'Amour, hastez-vous de venir en Paphos, pour secourir vostre mere que l'on veut violer. Toutes les Charites l'ont abandonnee, & Suade l'a delaissee. Elle m'a enuoyee pour vous solliciter de l'assister de vostre carquois & de vos fleches.

Cupidon esmeu de ces nouuelles, luy demanda toute l'histoire. Aussi est-ce la coustume & l'impatience des jeunes homes, de vouloir entendre la fin d'un discours que l'on leur a commencé. La passion le posseda de telle sorte, qu'il n'eut le loisir de l'escouter. La cholere luy fit dire ces paroles en l'interrompant.

Qui est celuy qui poursuit ma mere? afin que ie luy fasse ressentir la pointe de mes traicts. Si on luy fait tort, ie m'ar-

meray cōtre les ennemis, & mesme contre Iupiter. S'il l'entreprend, ie le contraindray de prendre encore la forme d'un Aigle, & d'un Taureau, pour satisfaire à la passion que ie luy donneray. Si c'est Pallas ou Vulcan, i'allumeray le flambeau de Cecrops, & feray la guerre à tous deux. Si c'est Diane, ie tireray l'espee d'Orion, qui est au Ciel, & la pourfuiuray, luy dōnant Mercure pour compagnon, sans que i'aye crainte que Sualuy preste secours. Si c'est Phœbus, ie laisseray mon carquois & mon arc, & ie le fouetteray de branches de laurier, l'ayant premierement lié avec des fueilles d'hyacinthe. Quant à Mars, ie ne l'apprehende point, ie ne permettray iamais que l'on le garrotte avec la ceinture de Venus. Le Soleil & la Lune ne peuvent luy nuire, & s'ils auoient quelque mauvais dessein, ie les tirerois du Ciel, pour les contraindre de luy rendre seruice en Paphos. Ie luy meneray Phaëton avec sa Clymene, & la Lune avec son Endymion, afin qu'ils reçoient ses commandemens, & que tous les Dieux sçachent que ie suis capable de les reduire sous mon obeyssance.

Cupidon, apres auoir fait ces menaces, quitta le mont Olympe, & deuança Aglaje à traict d'aisles, iusques à tant qu'il fust arriué en la maison de Venus. Comme sa mere l'apperceut, elle fut au deuant, & l'embrassa fort amoureusement, luy baisant la bouche & les yeux, & mania son arc & son carquois, luy disant ces paroles comme en cholere.

Mon fils, vous auez oublié la vengeance que Venus desire prēdre du Soleil. Pasiphaé n'est plus portee à l'amour desnaturée de son taureau, & le Soleil se rit de moy, secourant Deriades yssu de sa fille Astris, au prejudice de Bacchus, & de ses Satyre. Ce qui m'afflige plus, c'est que Mars se mesle auec Bellone, qui preside en la guerre, mettāt en oubly ses anciennes amours, & sa Venus qu'il a tant carefsee. Il s'est armé en la faueur de Iunon, & du Roy des Indes: mais qu'il se porte de ce costé là tāt qu'il voudra, pourueu que vous fauorifiez le party de Bacchus: Il a vne picque, mais vous auez vn arc, que Iupiter apprehende, Mars & Mereure, & mesme Apollon, encore qu'il soit tant expert à descócher ses fleches. Si vous voulez obliger Venus, combattez pour

Bacchus , & pour les Bassarides. Allez-vous en aux Indes, vous y rencontrerez Chalcomede, dont la beauté est si grande, qu'à peine la pourriez-vous discerner avec celle de Venus. Elle est ordinairement en la compagnie des Bacchantes. Faites en sorte que Morrheel l'inflexible deuienne amoureux d'elle, & ie vous donneray vne couronne ouurage excellent de Vulcan, qui esclatte comme les rayons du Soleil. Gratifiez donc Venus & Bacchus de ceste courtoisie.

Cupidon, qui estoit entre les bras de sa mere, ne peut luy refuser ceste faueur. Il se leua, prenant son carquois, s'en-uola en l'air, riant de ce qu'il auoit bruslé de sa flame le cœur du Soleil, qui conduit son chariot, surpassant la clarté de son flambeau. Il arriua en Orient, où il rencontra la belle Chalcomede, & luy descocha vn traict, & passant dans l'armee des Indiens, où estoit Morrhee, il luy perça le cœur d'un traict amoureux. Apres ceste execution, il reprit le chemin du Ciel. Cependant le pauvre Morrhee sentit en ses veines vne emotion violente d'amour, n'ayant plus de pensee que pour elle, ny de vie que pour l'aban-

l'abandonner à son seruice. Il la suiuiroit en tous les lieux où elle alloit: Son espee & sa picque n'auoient plus la cruauté de Mars, ayant tousiours les yeux fichez sur ce bel object. Ceste Nymphe qui feignoit de l'aymer, luy promit des faueurs particulieres, dont il en conceut de bonnes esperances. N'estoit-t'il pas bien aueuglé de croire qu'une si grande beauté deust flechir à vn homme si difforme qu'il estoit? Chalcomede l'entretenoit en riant de discours amoureux, luy disant ces paroles equiuocques.

Daphné se garantit vn iour de la poursuite de Phœbus à la course, elle se sauua au fleuve d'Oronte, & la Terre qui eut compassion de sa virginité la receut en son sein.

Morrhee interpreta ce discours à son aduantage, considerant qu'Apollon auoit esté frustré des embrassemens de la Nymphe, l'accusant de ce que la course n'auoit pas esté assez prompte, & blasma la Terre de ce qu'elle l'auoit retirée, craignant que la Chalcomedene luy eschappast comme Daphné, avec le mesme regret. Mais apres que la nuit fut venue, elle se retira dans la forest

pour chercher Bacchus, & n'y porta point les cymbales, ny ses instrumens de resiouissance, desirant celebrer les Orgies fort modestement, à cause de la maladie de Bacchus. Morrhee qui ne pouoit oublier celle qui l'auoit blessé de sa beauté, regardoit tousiours cet object agreable, reprochant au Soleil qu'il precipitoit sa course par la jalousie, pour le priuer de son cōtētement. La nuit luy fut importune, l'image de celle qu'il auoit dans l'ame, luy fit exprimer ceste passion.

O mon arc, & mes fleches, sçachez que ie meurs, vn dard plus puissant m'a vaincu. O mon carquois, soyez aduerty que ie suis perdu, la ceinture d'une fille a esté plus forte que la courroye de mon bouclier. Je ne feray plus la guerre aux Bassarides: I'abandonneray Hydaspe, & mon pays. Je dresseray vn Autel à Venus & à Bacchus, iettant ma picque & ma cuirasse, & prendray le Thyrsē & les pāpres. Le flābeau de Cupidon a esteint celui de Mars. Je suis bruslé d'un feu plus cuisant. A la mienne volonté que ie fusse vn Satyre, afin que i'eusse le contentement de danser avec les Bacchantes.

Que ie serois ayse de m'enlacer avec
Chalcomede d'un lien amoureux. Que
maintenant Bacchus reduise Morrhee
sous son ioug, & que la Moeonie me soit le
pays des Indes. Ie veux estre habitant de
Tinole, & de Caucase. Ie desire changer
le nom d'Indien, en celuy de Lidien.
I'assubjettis mon corps esclau de l'A-
mour aux commandemens de Bacchus.
Ie veux que le fleuve de Pactole me por-
te sur ses eaux. A quel propos de reuerer
celuy d'Hydaspe, ie souhaite le sejour
de Chalcomede: car Venus & Bacchus
m'ont vaincu. Ie veux confesser inge-
nuement qu'ils m'ont tous deux captiue,
afin que l'on dise que Morrhee a este sub-
jugue par l'Amour, & Oronte par le
Thyrse de Bacchus.

Morrhee faisoit ces plaintes, & le res-
souuenir luy estoit d'autant plus cuisant,
qu'il n'y pouuoit trouuer aucun remede.
Cependant la nuit couuroit la terre de
nuages, & les estoilles esclattoient au
Ciel, & toute la Nature se reposoit
dans le silence. On ne voyoit plus aller
par la ville les citoyens, les femmes
qui filent à la lumiere de la lampe,
l'auoient desja estainte. Les serpens

contournez en leur queue dormoient, & les Elephans appuyez contre vn mur, reposoient tous droicts. Mais le pauvre Morrhee demeure seul sans sommeil, les inquietudes ne luy permirent pas de flechir à la douceur de ses charmes: Et ayant quitté la couche de Cherobie sa femme, il s'en alla en la campagne pour passer sa melancholie. Le Ciel qui estoit serain, luy seruit d'entretien, il y aduifa le signe du Taureau, cet objet le fit ressouvenir des amours d'Europe. Il y veid Calisto, considerant que Iupiter auoit jouï d'elle, sous le fallacieux desguisement de Diane. Il veid auprès du Taureau, Myrtille Cocher d'Oenomaus, qui fit renuerfer son chariot en faueur de Pelops, pour la belle Hyppodamie. Il desiroit la praticque d'un pareil artifice, afin qu'il peust jouïr de sa chere Chalcomede. Comme il s'entretenoit de ces sujets muets & sourds, il fit ce discours.

Ie sçay que Iupiter s'est metamorphosé autrefois en Satyre, pour jouïr d'Antiope sous la tromperie de ceste forme, quant à moy, ie desirerois d'en emprunter la ressemblance, afin que ie puisse me mesler parmy les Satyres sans estre co-

gneu, & alors ie me procurerois facilement la jouïssance de Chalcomede. Je me doute bien pourquoy Venus se montre si cruelle aux Indiens, elle traaverse ceux qui appartiennent au Soleil, n'ayāt pas encore oublié le mauuais office qu'il luy rēdit en la publicatiō de ses amours, & des liens de Vulcan. Ne vous trompez pas, ô Venus, Phœbus ne m'a point engendré, ie ne suis point fils de Pasiphaé, ny frere d'Arcadne. Et vous rochers, si vous estes susceptibles de raison & de passion, exprimez ceste voix pour moy.

I'ayme passionnément Chalcomede, & elle me rebutte: Mourez donc mon carquois, mourez mon arc & mes fleches. Mars ne m'a pas guaranty des dards de Venus, & le petit Cupidon a dompté celuy que Bacchus l'inuincible n'a peu vaincre.

Morrhee malheureux en amour faisoit ces plaintes dans le sombre de la nuit, & le sommeil ne peut l'assoupir. Cependāt Chalcomede, qui fut aduertie de l'excez de son affection, commença à craindre sa rencontre, & que la chaleur de l'amour ne luy persuadast de commettre vn rapt sur la personne. Elle se pourme-

noit de nuit sur le riuage de la mer, & fit entendre ces discours aux eaux sourdes, & aux rochers insensibles.

O Melis, que ic t'estime heureuse, tu n'as point suby le joug de ceux qui te poursuivoient, la mer innocente a receu ton corps, & a conserué ta virginité, ta mort a esté fauorable. Venus fille de la Mer auoit suggeré des desseins violens à ton Amant. Et toy, ô Mer, garde toy encore que tu sois mere de Venus. Tu es morte vierge dans les flots: mais qu'elle reçoie maintenant la malheureuse Chalcomede en ses ondes. Je n'ay point encore flechy à la passion de Morrhee, ie fuiray ses embrassemens, comme Brittomartis, qui se precipita dans la mer, fuyant les poursuittes de Minos. Je sçay que Neptune ne t'a point espouuantee, comme la belle Asterie, qu'il poursuuit iusques dans le profond de ses eaux. Reçois-moy donc en tes flots, reçois Chalcomede apres la belle Melide. Reçois-moy comme Brittomartis, qui donne des refus à son Amant, afin que i'etitte la violence de Morrhee, & de ta Venus.

La douleur & la crainte la presserēt de

telle sorte, qu'elle se fust precipitee dans la mer, si Thetis ne l'eut consolee, ayant prins la ressemblance d'une Bacchante, & si elle ne luy eut donné ce conseil.

Chalcomede, aye bon courage, ne crains point la poursuite de Morrhee: Ie te puis asseurer que ta virginité te sera conservée. Ie suis Thetis, & en la mesme peine de me defendre des efforts amoureux. Iupiter mon pere m'a poursuivie, & m'a voulu ravir, ce qu'il eust fait, si Promethee ne l'eust empesché, prognostiquant qu'il engendreroit un fils qui seroit meilleur, craignant que le fils de Thetis ne fist la guerre à son pere, comme Iupiter à Saturne. Considere quel mal peut apporter ta mort: car si tu auois executé ta passion, Morrhee faccageroit toute l'armee des Bacchantes, pour se vanger. Mais ie suis d'avis que tu le trôpe par quelque artifice, pour deliurer les Bassarides. Monstre-luy un bon visage, luy accordant ce qu'il desire. S'il te tire en sa couche, tu ne manqueras pas de secours. Venus te donnera un serpent qui conservera ta virginité, & Bacchus en récompense le logera au Ciel, auprès de sa couronne, & reluira comme le Dragon celeste. tu diras alors que Thetis

auoit bonne raison, quand tu le verras
esclatter comme la Lune. Aye donc as-
seurance que ton honneur ne sera point
engagé, & ie te le iure par ta beauté, &
par Bacchus & son Thyrsé.

Après que Thetis luy eut donné ces
conseils, vn nuage espais cacha ceste
Nymphé, de peur que les gardes & les
sentinelles ne l'apperceussent, ou que
quelque passant ne l'a rauist, ou qu'un
Satyre ne la sollicitast de son deshon-
neur.

Morrhee eēt passionné de l'Amour de Chalcomede, & Deriades deffait les Satyres, & prend vn grand nombre de Bacchantes Captiues, qu'il fit conduire dans la ville, où on les fit mourir par diuers moyens.

LIVRE TRENTE-QUATRIESME.



Chalcomede se retira dans la forest, & Thetis ne la retint pas plus lōg temps sur le riuage, elle entre dans la mer le seiour de Neree. Cependant Morree qui estoit agité de l'amour, fit ce discours plein d'irresolution.

Mon esprit est errant vagabond en plusieurs & diuerses pensees, ie ne sçauois arrester vn conseil ferme & stable en moy-mesme: ie propose des desseings & ne sçauois en executer vn seulement. Tueray-ie ma chere Chalcomede, mais que feray-ie, ie crains qu'elle ne me fit mourir par apres de regret & d'affectiō, ie la veux laisser viure sans l'offēser: mais

quelle apparence de la solliciter ouvertement, ie crains la cholere de Deriades, & la ialousie de Cheirobie non ! Iamais ie ne pollueray mes mains du sang de Chalcomede, comment pourrois- ie vivre ne la voyant plus, ie suis grãdement tourmenté, quand ie suis vne heure sans la voir.

Morrhee propoisoit ces conseils incertains dans le trouble de ses fantaisies, mais comme Hysacque son seruiteur aperceut qu'il delaissoit la couche de Cheirobie, & se doutant qu'il estoit espris de l'amour de quelque Bacchante. Il luy fit ce discours pour le sonder.

Inuincible Morrhee, ie m'estonne de ce que vous courez çà & là dans les tenebres de la nuit, delaisant la couche de vostre femme, n'est-ce point Deriades qui vous a menassé, ou si la ialousie de Cheirobie ne vous persecute point, & qu'elle pense que vous aymiez quelque Bacchante. Vous sçauiez que les femmes ne manquent pas de soupçons, n'est-ce point Cupidon qui vous poursuit, n'aymez-vous point quelque Bafaride, commel'on dit, il y a trois Charites, les seruantes de Phœbus & de Bac-

chus, dont il y en a vne qui reluit entre les autres, cōme la Lune entre les estoilles, c'est la belle Chalcomede qui surpasse Diane & Minerue en perfection.

Morrhee malheureux en amour, luy respondit en ces termes.

Il est vray que Bacchus fuyant les armes de Lycurgue, s'est sauué dās la mer, il a armé les Nereides, & a amené vne Venus en la guerre, luy ayant donné vne cuirasse au lieu d'vne robe, & vne espee au lieu d'vne ceinture, & luy a changé son nom, & l'a appellé Chalcomede. Et maintenant ie combats Bacchus, & ceste Venus. Que me sert-il de me defendre de mes armes, si Venus a vaincu Iupiter, si elle a dompté Mars, qui preside en la guerre, si elle brusle de son feu le Soleil. Que feray-ie plus que le foudre? Vous qui n'estes point passionnez, donnez-moy quelque bon conseil, blesseray-ie Cupidon! mais s'il a des aisles, où le pourray-ie attraper, si ie l'attaque de ma picque, il se defendra avec son flambeau, que si ie tire mon espee, n'a-il pas son arc qui a blessé mon ame, i'ay souventes-fois esté navré en la guerre.

mais les Chirurgiens ont trouué des remèdes aux playes. Ohysaque ne me cache point ce que tu sçais de souverain pour ceste maladie, & ie gariray la playe de mon cœur, ie me porte contre les ennemis avec beaucoup de courage : mais quand ie voids Chalcomede, la pointe de mes armes rebrousse. Helas ! ie ne crains point Bacchus l'inuincible : mais vne femme, la beauté de son visage me darda des rayons esclattans, comme des jaelots, & ien'ay plus ny la force, ny le courage de me defendre, quand ie voids vne Nercide, il me semble que Thetis, & que Galatee combattent Bacchus.

Morrhee s'en alla coucher avec Cherobie, sans faire aucun bruit, de peur de l'esueiller, ayant veu son sein découuert, il destourna ses yeux de cet object defectueux, à cause de sa noirceur, desirant que sa Chalcomede eust esté en sa place & que l'Aurore se fut leuee, il reposa sur ces mescontentemens, & Hyssaque dormit sur son bouclier : Mais la fallacieuse image du sommeil trompa le pauvre Morrhee, & luy dit ces paroles.

Morrhee, reçois la belle Chalcomede entre tes bras, elle ne desire que tes em-

brassemens, reçois-la en ta couche apres la guerre & la victoire. Tu as eu du plaisir à me contempler de iour, ne la m'esprise point de nuict, il y a du contentement à receuoir la jouissance d'une Nymphe, qui l'offre de bonne volonté, mesme en songes. I'ay tant de fois désiré de t'embrasser, regarde l'Aurore qui est proche de toy, & qui se leue.

Ce phantôme disparut aussi tost, Morrhée s'esueilla, & à l'instant il veid l'Aurore, croyant auoir iouy de Chalcomede, & dit, nourrissant son esprit de ceste vaine creance.

Belle Aurore, tu nous apporte deux lumieres, celle du iour, & celle de Chalcomede, tu cōsole l'affliction d'un amoureux. Et toy belle Nymphe, plus agreable que l'Aurore, tu nous apparois, le Printemps n'a iamais porté de si belles roses, ton visage est semblable aux fleurs des jardins, & si le Soleil ne les peut faner, tes lys se maintiennent dans les rigueurs de l'Hyuer, le passeu elours decore tes cheueux, & si les vens ne les seichēt point, ton nom qui signifie le fer, est le symbole de la force de ton esprit, & ce n'est pas sans raison que l'on t'appelle

ainsi, Mars t'a engendré dans la couche de Venus, tes compagnes, t'appellent Chalcomede : mais ie te donne le nom de Chrysomide, pource que tu as la beauté de la Venus d'or. Je croy que tu es de Sparte, & que Venus ayant vne iuppe de fer t'y a engendree.

Morrhee se repaissoit de la vanité de ses songes, mais apres que l'Aurore eust chassé les tenebres de la nuit, Mars assemble les armées aux champs de bataille, les Indiens ne manquerent pas de se rencontrer : mais les Bacchantes eurent de la peine à s'y resoudre, à cause de l'absence de Bacchus. Elles n'auoient plus le courage & la hardiesse accoustumee, ne paroissans plus avec leur fureur, & leur fougue ordinaire. Leurs flambeaux ne reluisoient plus, les Satyres estoient du tout effeminez ; & les Silenes combattoient froidement, ne peignans plus leur front de vermiellon, pour donner l'espouuante aux ennemis par les obiects de ceste couleur, qui ressemble au sang, ils n'auoient plus les démarches aduantageuses, se monstrés doux & humains, à cause de la grande apprehension qui les troubloit. Deriades se porta au com-

bat avec vn courage, & vne generosité extraordinaire. Morrhee le seconda, & deffit vn regiment entier des Bassarides, sans respecter l'amour, & le merite de Chalcomede. Il est bien vray qu'elle ne se rencontra pas en la meslee, pour adoucir sa fureur & moderer la cholere de son feu : mais la belle Nymphe Anaxo, Thetis il auoit donné aduis à Morrhee, qu'il conseruaist les Charites, & qu'il les discernast des autres. Il prit vnze Bassarides captiues, il les fit lier & garrotter les mains derriere le dos, & en enuoya vne partie à Deriades pour le seruir, & l'autre partie à Cheirobie comme vn present nuptial : car desia il auoit donné grande quantité de proyes, & de butin de la guerre, qu'il prit au Mont Taurus, lors que Deriades luy donna sa fille en mariage : Car ce Prince genereux & vaillât, qui respectoit la Vertu, & le merite, ne voulut point marier ses filles à des Seigneurs riches en or, & en pierreries, n'y aussi en heritage : mais à ceux qui se pouuoient aduantager de la force de leur corps, & de leur esprit, comme Morrhee & Oronthes, dont l'vn d'iceux espousa Cheirobie, &

l'autre Protonor, Morrhee n'estoit pas semblable à vn homme commun, mais à vn grand & robuste geant, estant heritier de la vertu de son pere Typhon, monstrant son courage au combat qu'il sustint en la montagne des Arymes, & de celuy contre Actemon qui espousa Arete, subiuguant toute l'Assyrie en despit du mariage de Morrhee. Il la reprint sur luy, & asservit Colix & Taurus sous l'obeissance de Deriades, d'où vient que l'on appelle encore en la terre des Cilices, Morrhee, l'Hercules Sandien, c'est ce qu'il fit en ces premiers exploits: mais en ces derniers il print les Thiades, & les presenta à Deriades, luy disant ces paroles.

Grand Roy', ie vous amene vn riche butin, ce sont les Bacchâtes que ie conduicts captiues, en attendant que ie prene Bacchus.

Genereux Morrhee, luy respōdit Deriades, il n'est pas besoing que vous me faciez ces presens pour le mariage de Chorobie. Vous m'avez assez donné, quant vous avez reduit les villes de Colix à mon obeissance, & maintenant vous me surchargez de vos courtoisies, neantmoins

moins si vous prenez plaisir à m'obliger, remplissez la maison de Chei robes, de captiues. Quant à moy, ie m'efforceray de prēdre Bacchus, sans que i'aye besoin de vostre secours. Gardez-vous seulement des traicts de Cupidon, & des efforts de l'amour, de peur que vous ne soyez passionné par ce subiect, comme c'est la nature des Indiens, ne regardez point les Bacchantes, craignant la jalousie de ma fille. Mais apres que i'auray subiugué les ennemis, ie m'en iray en Meonie, & ie butineray toutes les richesses des Lydiēs, & de Pactole, ie viendray en Phrygie où sont les vignes, où est Rhree la nourrice de Bacchus, ie ruineray tout le païs qui est circonuoisin d'Allybe, & les mines d'argēt, apres que ie les auray faict fouir, ie destruiray la ville de Thebes, bruslant la maison de Semele, & la couche qui porte encore des vestiges du foudre.

Deriades receut ces presens, les donnant à Phlogie, & à Agrée, ces soldats les menerent par la ville en triomphe pour monstrier à Chei robes les despoüilles de la victoire, apres qu'ils en eurent faict parades, ils en attacherēt vne à l'entree du

Palais, & en bruslerent vne autre, iettant vne autre dans vn puits, vne autre dans vne cisterne pleine d'eauë, d'où elle fit ces regrets.

I'ay autrefois ouy dire que la terre & l'eauë sont les dieux des Indiens, & ie croy que cela ne se dit point sans raison: car ils me font tous deux la guerre d'un commun consentement. Je suis au milieu d'eux, & de la mort, i'ay de l'eauë par dessus la teste, & les genouils embourbez, ie veux mourir constamment, l'eau m'a poursuyui, & si i'en'ay point apprehendé ses bouillons. A la mienne volonté que ie fusse changée en eauë, afin que ie coulasse doucement sur la terre.

Ceste captive s'abandonna ainsi à la mort. Cependant Morthee qui estoit passionné de l'amour de Chalcomede, poursuit les Menalides & les chasse dans la ville, tout ainsi qu'un berger pousse son troupeau de brebis dans le bercail, quand il reuiet des chāps, neantmoins il auoit vn particulier desseing de prendre sa Nymphé, afin qu'elle lui fut le iour seruante, & la nuit sa concubine, afin qu'elle fit les ouurages de Minerue ouuertement, & les exercices de Venus en

secret, ne s'espargnant pas en la défaicte des Satyres. Deriades le secondoit fort valeureusement. Chalcomede se presenta deuant les tours de la ville, d'une façon amoureuse, comme si elle eust esté esprise de son amour, paroissant en son esclat, son sein halletoit aux souspirs qu'elle rendoit. Morrhee n'oublia pas ces yeux en ce subiect, il la contemploit s'imaginant que ses mammelles plus blanches que le lys, estoient cachez sous sa colerette:

Chalcomede print vne pierre, & luy ietta, frappant l'image de Cheroibie, qu'il portoit en son bouclier, & estant enuieux de ce qu'il auoit receu ce coup, il luy dit en riant:

Genereuse Chalcomede, belle statue de Venus, & de Pallas armee, l'Aurore Bacchique, belle Lune qui ne s'eclipse point, vous auez touché l'image de Cheirobie. A la mienne volonté que vous l'eussiez tuee:

Il poursuiuoit sa Nymphie plustost de discours, & de paroles menassantes, que d'effects d'hostilité, branflant sa picque: il monstroit vn visage plein de cholere, & de grande fureur; mais il auoit la

volonté courtoise & amoureuse, il luy darda vn jaelot, mais ce fut sans effect, car il destourna la main d'un autre costé, Chalcomede s'enfuit, & ses cheueux qui seruoient de iouets aux vents, flot-
toient sur ses espaules, Morrhee la sui-
uoit pas à pas, considerāt, tantost les ve-
stiges de ses pieds, tantost sa chevelure
que le vent partroubloit.

Belle Chalchomede, luy dit-il, demeu-
re avec ton amoureux guerrier, la beau-
té te sauue de mes mains, & non pas la
course: Les dards & les jaelots ne blef-
sent point comme les traicts d'amour. Je
ne te suis point ennemi, ton merite a fait
reboucher mes pointes, tu n'as pas be-
soin de picques ny de bouclier, ton front
en peut seruir d'un, tes regards sont les
armes offēsiues, & ton visage les defen-
sives, ie n'ay point de faute si ie suis vaincu
de toy: car la force de Mars s'aneantist
par celle Venus. Reçois-moy en la com-
pagnie des Satyres: car les Indiens serōt
toufiours victorieux tant que ie tiendray
leur party. Si tu desires de moy des offi-
ces d'humilité, ie me submets à seruir
Bacchus, si tu veux que ie te sacrifie ma
vie, prends-là par la teste, & par le vêtre,

ie ne me soucie point de mourir , pour-
ueu que ce soit de ta main , à la charge
que tu deploreras ma mort. Ie m'asseure
que les larmes de Chalcomede auroient
le pouuoir de me r'appeller des enfers.
Belle Nymphe , que crains-tu ? est-ce à
cause que i'esleue ma picque , quand ie
voids tes cheueux floter sur tes espaules,
i'ay laissé mon heaume , i'ay endossé la
nappe d'un cerf, ayant quitté la cuirasse.

Après que Chalcomede eust ouy ce
discours , elle passa & se mesla avec les
autres Bacchantes, se retirant de la veüe
de Morrhee. Les Bassarides soustinrent
le combat, tant que Morrhee l'abādon-
na. Cepēdant Deriades chassoit les Bac-
chantes dans les portes de la ville, où el-
les furēt enfermées, l'une du costé d'O-
rient, l'autre de l'Occidēt , où on leur fit
changer de façon de vie , elles perdirent
l'vsage & la pratique des Orgies , & on
les asservit aux ouurages de Minerue , à
filer, & à tistre de la toile, & aux exercices
du mesnage.

Morrhee faict l'amour à Chalconede, & la poursuit, elle qui auoit receu le conseil de Thetis. Luy promet la courtoisie, à la condition de se lauer dans le baing. Comme il pense iouyr d'elle, un serpent paroist qui l'empescha. Iupiter se resucille, & se fache des practiques de Iunon, luy commandant de donner la mammelle a Bacchus pour le guerir.

LIVRE TRENTE-CINQVIESME.

DEriades combattoit vaillamment dans l'armee de Bacchus, renuersant les regimens des Satyres, tantost avec sa picque, tantost avec son espee, & tuoit les Bassarides qui estoient dans la ville, toutes les ruës estoient ensanglantees de ce carnage. Les vieillards qui defendoient les tours, regardoient ces tristes & deplorables obiects, & la mort cruelle des Bacchantes. Vne nourrice plus pitoyable deploroit leur malheur, desirant plustost de les veoir raurir sous le

joug de Venus, que sous la rigueur de Mars. Mais le Roy des Indes leur auoit defendu de pardonner aux ennemis, par la consideration de l'amour, n'y de se captiuer soy-mesme de leurs beautez, craignant que l'affection ne diminu les droicts des vaincœurs, & encore que le mespris leur fut commandé. Neantmoins vn d'entr'eux ne peut se desgager de la seruitude que Cupidon luy donna. Il despoüilla vne Bacchante toute nue, & la blessa, mais il receut en son cœur vne playe plus dangereuse. Ceste Nymphe le tua en mourant, & la beauté de son corps luy decocha, comme vn Cupidon des traicts amoureux & mortels, sans doute il l'eut baisée toute morte qu'elle estoit, comme Achilles sa Penthesilee, s'il n'eust apprehendé la chole-
re de Deriades. Il cōtemploit son corps poly cōme vn crystal, & manioit ses cuisses, blanches comme vn lys, & son sein pōmellé, qui ressembloit à vne belle pōme, l'excez de sa passion luy donna le desir de la iouissance, mais ce fut en vain, tout ce qu'il peut faire, ce fut de décharger son amour par ces paroles.

Belle Nymphé, tu as blessé, estant
blessée, celuy qui t'a tuee des fleches
mortelles de l'amour, tu as dōpté, estant
morte, celuy qui est en vie, tes yeux com-
me des dards frappent ma poictrine, ma
picque a esté vaincuë par ta beauté, aussi
elle darde des rayons, dont les pointes
sont plus acerees, que celles des dards,
ton sein te sert d'arc avec beaucoup d'é-
fort, puisque tes mammelles les Archers
del'Amour, assenent mieux que les fle-
ches communes. Je suis pressé mainte-
nant d'une passion incroyable, ie recher-
che le mariage d'une Nymphé morte.
Quelle cruauté, vne fureur cōceuë d'un
obiet inanime me persecute, moy qui
suis en vie: mais afin qu'il y ait de la pro-
portion entre l'amant & l'aymé, que tes
levres s'ouurent, & que ta bouche soit
animee s'il y a moyen, & que i'entende
ta parole.

Cruel, laisse mourir en repos la Nym-
phe que tu as tuee, & que tu as butinee,
laisse celle que ton espee a blessée, & ne
me touche point, pourquoy carresse-tu
le ventre que tu as blessé, gueris plustost
la playe que tu m'as faicte.

Que mon courage me soit fatal (ce dit-il) que mon espee soit à iamais malheureuse, elle a laissé les Satyres & les Silenes, pour vaincre vne femme: mais ie te veux secourir, ie m'en iray en la forest, & i'appelleray le bon Chiron, qui est tres-expert à panser des playes. Ie veux prendre pour remede le Centaure. Ie m'assure qu'il appaisera la douleur, afin que ie te deliure de la mort. Si ie vois qu'elle n'y fasse rien, i'estancheray le sang par des paroles magicques, & par quelques caracteres dediez aux Estoilles, ou aux Planetes, afin que tu puisses encore celebrer les Orgies avec Bacchus. A la mienne volonte que ie sceusse où est la fontaine de Iouuence, & que ton corps y fust plongé dedans, pour adoucir ton mal. Et toy, Glaucque, qui as eul' immortalité, apres auoir quitté le sejour de la mer, montre moy l'herbe qui te l'a donnée, enseigne-moy la fleur que tu as goustee, & qui t'a rendu immortel.

Ce soldat amoureux passa, supprimât en sō esprit l'amour de sa Nymphe morte. Il rencōtra en son chemin Protonoé, qui regrettoit encore la mort d'Orontee

son mary. Cependant Cheirobie prit le bouclier de Morrhee, & se jetta sur les Bassarides, estant semblable en cela à Atalante, qui combattit vaillamment le Sanglier, dont elle en eut la teste, par la faueur de Meleagre, qui luy donna, ce qui fascha Toxe frere d'Alphee. Orsiboe combattit vaillamment, imitant la generosité de Dejanire la martiale, qui s'arma au mont Parnasse, pour les Dryopes, où elle fit des stratagemes d'Amazone, Le bruiet fut grand dans la ville de la fuite des Bacchantes: L'une se cachoit craignant la rencontre des ennemis: l'autre montoit en des lieux hauts, se defendant à coups de pierres. Mais comme ce tumulte se passoit, Chalcomede parut auprès des murailles, considerant Morrhee atteint d'amour & de fureur. Incontinent qu'il l'eut apperceuë, elle s'enfuit, & le vent releuoit ses vestemens, ce qui luy donna dauantage d'amour. Chalcomede qui veid Morrhee qui la suiuoit, luy dit ces paroles pleines d'artifice & de tromperie.

Morrhee genereux Capitaine, si vous poursuiuez mes embrassemens, posez vos armes & vostre cuirasse de fer. Quand Mars

vient en la couche de Venus, il prend
vne belle camisole, afin qu'Apollon, Cu-
pidon & Venus, nous conjoignent tous
deux. Morrhee flechira aux violences de
son amour, & Chalcomede aux mignar-
dises de Venus. Ie ne puis me resoudre à
recevoir vn Amant en ma couche qui
est plein de sang & de poudre. Ie suis
d'aduis que vous-vous baignez, afin
que vous soyez semblable à Phœbus
apres qu'il s'est laué dans l'Ocean. Quit-
tez donc vostre bouclier & vostre es-
pee, de peur que vous ne me blessiez.
Laissez vostre heaume, & que ie ne voye
point l'image d'un visage de fer. Quel
plaisir peut-on auoir de jouir d'une
beauté cachee. Ie ne verray plus le Pays
de Meonie, & ie n'y seray iamais mariee,
si ce n'est que vous me permettiez d'es-
pouser Bacchus, apres que vous aurez
pris les contentemens que vous desirez
de moy. Ie seray Indienne & vostre mai-
stresse, n'estant pas faschee qu'un In-
dien de vostre qualité & de vostre merite
me possede, & qu'il me subjuge en la
guerre: car Cupidon nous a vaincu tous
deux. Vne seule passion en a captiué
deux, Morrhee & Chalcomede. L'on

ne se peut imaginer combien i'ay travaillé à dissimuler l'amour que i'auois; car il n'est pas seant à vne fille honneste de monstrier son affection.

Il n'est pas hors de propos, belle Nym-
phe, (respondit-il) que Morrhee armé de
toutes pieces jouisse de vous, afin que
i'embrasse vostre nom de Chalcomede,
qui signifie le fer, avec mes armes qui en
sont, faisant vn rapport de ces natures si
conuenables; Mais puisque vous ne le
desirez pas, ie donneray cela à vostre me-
rite. Ie poseray mon espee & mon bou-
clier, & me laueray estant semblable à
Mars, quand il jouit autrefois de sa Ve-
nus. Ie renonce maintenant à l'amour de
Cheirobie, & vous caresseray doresnauant
en vous preferant à toute autre. Ie ne fe-
ray plus la guerre aux Bassarides, si vous
ne me le commandez, au cōtraire ie leur
seray fauorable, en ruinant les Indiens.
Ie m'armeray du thyrses de Bacchus, quit-
tant ma picque & mes dards, & ie pren-
dray le pampre & le lierre, combattant
avec Bacchus.

Morrhee que se persuadoit que Chal-
comede auoit de l'amour pour luy, des-
lia son casque, & quitta ses armes, la cui-

rasse & son bouclier. Venus ayant veu ceste action, la monstra à Mars, luy reprochant de ce que l'amour d'une simple fille auoit vaincu vn si grand Capitaine.

Mars genereux, (luy dit-elle) tu n'es plus guerrier, Morrhee ne veut plus aller au combat, il a posé sa cuirasse & son espee pour l'amour d'une Nymphé, ayant abandonné ses dards. Et toy, laisse la picque, & va te baigner : car Venus est plus puissante que Mars, & n'a pas besoin de bouclier, ny d'espee. Ma beauté est mon arc, & mes yeux sont mes dards. Mon sein faict plus d'execution que tes jaucelots : car Morrhee, tout vaillant qu'il est, a flechy à la vaillance de l'Amour. Ie ne te conseille pas d'aller en Sparte, où les citoyens belliqueux adorent vne Image de fer de Venus armée, de peur qu'elle ne t'offence de tes propres armes. Les traicts de la guerre ne rendent pas les effets comme ceux de l'amour. Considere donc tes guerriers, qui sont esclaves sous le joug de Cupidon, obeis désormais à Venus l'invincible : car tu es vaincu, puisque Morrhee a quitté ses armes, pour prendre la nappe d'un cerf,

que Chalcomede porte.

Cependant Morrhee s'en alla au riuage de la mer, où il se laua: mais pourtant il n'esteignit pas le feu qui le brusloit. Ayant supplié Venus de luy estre favorable, comme il sçauoit qu'elle estoit yssue de ce séjour. Il sortit de l'eau aussi noir qu'il estoit entré, & ne changea point de couleur, encore qu'il fut assez net & assez poly. Il voulut paroistre en cet estat deuant Chalcomede: mais elle destourna ses yeux. Aussi il n'est pas seant à vne fille de regarder vn homme tout nud: mais apres qu'il se fut retiré en vn lieu secret, & propre à la jouissance, il s'approcha de Chalcomede, & luy fit des caresses amoureuses. Mais comme il estoit prest de la corrompre, il sortit vn serpent de son sein, qui se glissa sur son ventre, & se contourna en sa queue, conseruant sa virginité, sifflant d'une façon espouuantable, sa queue luy seruoit de picque, & son venim de dards. Morrhee s'espouuante de ce Dragon: mais ependant qu'il estoit en ceste poursuite trompeuse, les Bassarides furent deliurez: Car Mercure ayant pris la ressemblance de Bacchus, rallia ses gens. Les

Bassarides le suiurent, & deliura les Menalides, qui estoient enfermees dans la ville, & les retira, ayant endormy les gardes & les sentinelles des portes. Les Indiens furent aveuglez, comme s'il eust esté nuict, & neantmoins les Menalides jouissoient de la lumiere. Mercure leur ouurit les portes, & fortirent sans empeschement. Apres qu'il eut chassé les tenebres, Deriades qui auoit pris des resolutions cruelles pour les executer contre les Bassarides, qu'il croyoit tenir, les chercha par la ville, & ne les trouua point. Et tout ainsi qu'un homme qui a songé qu'il possède de grands thresors, & qu'il en a les mains plaines, se contente de la vanité de ceste folle creance: mais quand l'Aurore a faict iour à son abus, & que l'image du songe s'est disparu, il se fasche de la trôperie de ces refueries. Ainsi lors que Deriades croyoit auoir enfermé les Menalides, & les posseder pendant les tenebres, il se repaissoit de la vengeance qu'il vouloit prendre sur elles: Mais quand la lumiere eut esclaircy ceste folle creance, & qu'il ne les

veid plus, il commença à se fâcher contre Iupiter, le Soleil, & Bacchus.

Cependant que Deriades estoit en la poursuite, Iupiter se refueilla de sō sommeil, & cogneut les artifices de Iunon, & reprit aigrement les Satyres de ce qu'ils auoient fuy, & ayant aduisé les Indiens qui combattoient à leur desaduantage, & le pauvre Bacchus atteint de rage, d'ōt l'escume en donnoit des marques, il accusa la meschanceté de Iunon, & sans doute il eust enfermé le Sommeil dans les Enfers avec Iapete, si la Nuiet, qui dompte tout, n'eust supplié Iupiter d'oublier les ressentimens. Neantmoins estāt irrité des malheurs de son fils, parla à Iunon de ceste façon.

Iunon, n'est-tu point contente des traueses que tu as donnees à Semele & à son fils? Tu la poursuis encore qu'elle soit morte. Le foudre qu'il l'a bruslee ne deuoit-il pas apaiser ta cholere? Iusques à quand feras-tu la guerre à Bacchus? Ne crains-tu point la peine des enclumes, quand ie te les attache aux pieds, te jetant du haut du Ciel en terre. mars te veid autrefois liée & garrottee, & si il ne secourut point sa mere, ny mesme
Vulcan:

Vulcan : car il ne peut soustenir la violence de la moindre estincelle de mon foudre. Mais ie te garrotteray encore, & Mars pareillement. Je le rendray semblable à Tantale & à Ixion, iusques à tant que mon fils ayt subjugué les Indiens. Mais si tu veux obliger Iupiter, & appaiser sa cholere, descends en terre, & donne la mammelle à Bacchus, & le guaris de sa rage. En recompense de ceste courtoisie, ie feray voir au Ciel la voye de lact, au nom de celuy que tu auras respandu, afin que l'on reueire doresnauant la liqueur qui a remedié à vn si grand mal : Et ne t'ingere plus de poursuiure les enfans de Iupiter.

Iupiter commanda à Iunon de faire ce bon office là celuy qu'elle trauerroit. Elle se mit en deuoir de luy donner la mammelle, & alla au deuant de luy, & le guarit, luy oignant le corps de lact, & admira la force, & la grandeur de Bacchus, non sans enuie. En prenant la mesure des yeux, elle dit en elle-mesme.

Si vne femme mortelle a engendré vn tel fils, si Mars eust esté aussi grand, &

Mercure aussi puissant, si Phœbus eust esté aussi beau, ie croy qu'Hebes eust desiré les auoir pour mary, si Iupiter ne l'eust desia donnee à l'invincible Hercules.

Après que Bacchus fut remis en son bon sens, Iunon monta au Ciel, craignant de voir les gens de Bacchus subjuguier les Indiens, sans armes & avec des feuilles & des rameaux. Cependant Bacchus rallia ses soldats, & leur fit ceste harangue militaire, pour les encourager davantage.

Sus compagnons, combattez vaillamment, Iupiter est pour nous, & veut secourir son fils. Tous les Dieux immortels ne nous sont plus contraires, & Iunon n'est plus faschee. Qui sera si hardy que de resister aux foudres de Iupiter? Les ennemis auront-t'ils le courage de tenir pied ferme contre ces armes de feu? Ie paroistray esgal à mon pere, & s'il a autrefois vaincu les Titans, ie subjuguera les Indiens. Asseurez-vous que vous verrez aujourd'huy Deriades demander composition, conduisant les Indiens captifs en triomphe, estans reduits sous mon obeïssance. Vous les verrez boi-

redu vin au lieu d'eau : Le superbe Roy
de ce pays sera lié & garrotté de lierre, &
deschiré de tous costez, ayāt les mesmes
entraues que les Nymphes Nyfiades eu-
rent apres auoir beu de mon vin, lors que
l'Arabie fut reduitte, & que Licurgue fut
vaincu. Vous butinerez les richesses des
ennemis apres la victoire, & cōduirez les
captifs en Moeonie, les dōnant à ma me-
re Rhee pour la seruir. Vous-vous venge-
rez de la mort des Capitaines que nous
auons perdus. Pensez-vous que ie ne sois
pas grandement fasché de voir encores
Deriades & Opheltes, qui nous repro-
chent le malheur des nostres? Helas!
la pauvre Codone n'ira plus au combat,
& la miserable Alemachie ne fera plus
la guerre à nos ennemis. Quoy? le bra-
ue Æbiale a esté tué, & ie retiens en-
cor mon Thyrsé oisif. I'ay honte de la
mort d'Aristor, & qu'il n'entende que
l'on ne l'ait point vengée en sa faueur. Ie
ne passeray point au retour des Indes par
la ville de Crete, de peur que le bon viel-
lard Agelas ne deplore en ma presence
l'infortune de son fils. I'ay honte de
paroistre deuant Minos : car Asterie
est griefuement blessé dont i'auray

vn soin particulier, à cause qu'il tire son extraction d'Europe. Mais apres qu'il sera venu en conualefcence, ie l'ameneray à son pere sain & faue, de peur que Cadmus ne fçache qu'il auroit esté en peine en l'abfcence de Bacchus. Sus donc combattez vaillamment, & ie vous feconderay, ruinant celuy qui est la cause de tant de meurtres.

Bacchus estant reuenu en conualeſcence,
 anime les Satyres à la guerre. Les
 Dieux se liguent pour les deux partis,
 & combattent les vns contre les au-
 tres. Iunon blesse Diane. Mercure
 accorde tous les Dieux par ses raisõs.
 Deriades attaque Bacchus, & il se
 metamorphose en plusieurs formes,
 & faict croistre un ceps de vigne
 dans le chariot de son ennemy. On
 prepare l'armee nauale, & la tref-
 ue est faite pour trois mois.

LIVRE TRENTESIXIESME.



OMME il eut fait ceste ba-
 rangue militaire, il don-
 na courage à ses soldats.
 Cependant Deriades fit
 armer ses gens, & les
 Dieux immortels se meslerent des deux
 partis, les vns du costé de Bacchus, les
 autres pour deriades : Mais Iupiter

estoit neutre, & tenoit la balance de la guerre. Neptune prouocquoit le Soleil & Minerue: Mars & Vulcan esmouuoient Hydaspe, & Diane incitoit Iunon. Les Dieux s'entrefirent la guerre: Mars combattoit Minerue, branlant sa pique d'une façon si furieuse, qu'il enfonça le bouclier de Pallas, & offensa son Ægide, & la teste de Meduse qui y estoit grauee: mais elle se defendit, luy poufsât vn coup de sa pique si rudement, qu'il tomba par terre. Elle le releua le mettant entre les mains de sa mere Iunon. Apres ce combat Diane attaqua Iunon, & banda son arc, luy descochant vn grand nombre de fleches: mais elles ne firent point d'execution: car Iunon estoit entouree d'un gros nuage qui la couuroit, & les traicts y demeurèrent fichez en si grande abondance, que l'on pensoit voir l'image des gruës qui volent en l'air: Mais ceste Deesse luy darda vn jaelot, & la frappa fort rudement, & ne desistant point du combat, elle luy offensa le haut de la poitrine, & luy rompit son arc.

Belle Diane (luy dit-elle en se souriant) meslez-vous d'abattre les bestes fauves,

en la forest, & ne cōbattez point celles
qui sont plus que vous, prenez vos exer-
cices dās les mōtagnes & sur les rochers,
& n'entreprenez point de guerre, laissez
les bottes de Mars, & prenez les fouliers
de chasse. Employez vos retz & vos pa-
neaux: car les chiens sont vos soldats qui
chassent, & non pas les jauelots ferrez.
Vous ne maniez point les dards pour
tuer les lyons, les lievres fuyars sont les
objets de vostre chasse, & les causes de
vos sueurs. Prenez donc le soin de vos
cerfs & de vostre chariot. A quel propos
soustenez-vous le party de Iupiter? Quel
rapport auez-vous avec celuy qui ne
gouverne que des Pātheres & des lyons.
Si vous voulez prenez vostre arc, aussi
bien Cupidon s'en fert. O Nymphes qui
fuis les embrassemens amoureux, vous
deuriez auoir la ceinture pour secourir
les accouchemens, aussi bien que Venus
& Cupidon. Mais puisque vous auez du
pouuoir, venez en la couche des femmes
qui sont prestes d'accoucher, & les
frappez des dards qui puissent ser-
uir à leur deliurance. Quittez la pei-
ne des combats, & prenez celle qui
peut ayder les mariages, dispensez-vous

du vœu de virginité: Car Iupiter, pour-
suit les Nymphes qui n'ont point esté
mariees, iusques à tant que les forests où
hantent les Arcadiens, cessent de crier
que vous faites tort à vostre beauté, de
la priuer du mariage, ayant préparé les
nopces à la belle Calisto, & les tom-
beaux deplorent encore le malheur de
ceste Nymphé, qui fut abusée par Iu-
piter, sous le desguisement, & sous la
ressemblance de Diane. Quittez donc
vostre carquois inutile, & cessez de com-
battre avec Iunon. Il vous est plus seant
de contester avec Venus, sur le pou-
voir que vous avez aux acouche-
mens.

Iunon apres ce rude combat, laissa là
Diane: mais Phœbus son frere la secou-
rut, & la fit conduire dans vn petit boc-
cage. En ce mesme temps Neptune at-
taqua Apollon, il banda son arc, & es-
leua son flambeau, opposant son feu à
l'eau, & ses fleches à son trident. Ne-
ptune se defendit avec ses flots, & le
combat de ces deux Elemens faisoit vn
grand bruiet en l'air, semblable à vn
tonnerre. Titon, qui est my-homme,
& my-poisson, faisoit resonner vne

chamade avec ses coquilles. Nereides estoient en alarme, Neree mugissoit d'une façon horrible, Pluton estoit espouventé, craignant que Neptune frappant la terre de son trident, ne l'inonda d'eauë, & que les lieux soubsterrains n'en fussent incommodés. Les Dieux furent en telle dissension, que Mercure fut contraint de leur dire, pour euter le desordre & la confusion.

Phœbus, & toy Neptune, quitte ton flambeau & ton arc, & ton Trident, de peur que les Titans ne fissent de la guerre des Dieux, & qu'après leurs combats, l'on ne voye des partialitez dans le ciel, craignant que Jupiter pour se venger ne brulle la terre, & qu'il ne l'inonde, pour esteindre le feu, & que l'on voye la mer aussi haute que l'air, & que l'eauë ne monte iusques au Soleil, cede à ton oncle Neptune, & le reconnois, à cause qu'il contient en son Empire l'isle de Delos, où ta mere t'a enfanté. Ressouviens-toy de l'obligation que tu as au palmier, & à l'oliuier. Qui sera icy le iuge Cecropien? qui est celuy qui bastira vne ville comme Cadmus, en dépit du Iunon? Tu fais la guerre à Phœbus? quoy, en as-tu vne

autre que celle que tu as pratiqué contre ceste Deesse, & toy pere de Deriades, garde-toy du feu de Vulcan, apres auoir receu de l'incommodité des flambeaux de Bacchus, de peur qu'il ne te brusle par son foudre.

Mercuré appaisa la dissension des Dieux par ces considerations. Cependant Deriades courroucé de ce que les Bacchantes s'estoient deliurees de ses mains, & de ce que Bacchus estoit en son premier estat, reprit aigrement ses Capitaines de leur impudence, & leur tint ce discours plein de menasses & de fougue.

Ie traineray aujourd'huy Bacchus par la barbe, ou les Satyres destruiront les Indiens. Vous autres combattez les Silenes, & Deriades soustiendra les assauts de Bacchus, bruslez ses pampres, ses fueilles, son lierre & ses tentes, prenez les Menalides captiues, & les amenez à Deriades, reduisez ses Thyrses en cendre, renuersant les Satyres & les Silenes, comme vne moisson de bled, couronnez mes palais de testes cornues, que le Soleil ne se couche point que ie ne conduise Bacchus garroté à la ville, & plein

de playes mortelles, bruslez la cheuelure des Bacchantes, avec mon flambeau & combattez vaillamment chantans la victoire & les stratagemes de Deriades, afin que dorefnauant nos ennemis craignent d'entreprendre des guerres malapropos contre les Indiens Deriades, regarda ses Capitaines l'un apres l'autre, & leurs donna courage: il esleut des gens pour conduire son infanterie: mais Bacchus incita ses animaux au combat, les dragons iettoient en l'air vn poison mortel siffians d'une façon horrible, & sautoient sur les corps des Indiens, dont les vns leur lioient les pieds avec leur queue, les autres leurs entouroient le col. Vn dragon ietta à vn soldat de Deriades, vn venin qui l'empoisonna, & tomba mort à terre sans aucun mouuemēt. Les Pantheres seruerent sur les Elephans, & les tuerent, vn grand nombre des Indiens fut renuersé, la terre fut toute couuerte de sang, il y eut vne si grãde quantité de morts & d'ombres que Pluton fut contraint d'elargir les portes & les lieux de son Palais, les riuages des fleues d'enfer resonnoient à cause du grand bruit, l'un estoit tombé de dessus son cheual,

bleffé à la gorge, vn autre à la mammelle, vn autre à l'estomach, vn autre au nōbril, vn autre à la teste, vn autre au dos, vn autre auoit vn coup de picque dans le foye, vn autre estoit tombé de dessus vn Elephant renuersé par terre. Vn soldat ietta du sable dans les yeux d'vn cheual, & à l'instant il se cabra, iettant son homme par terre, foulant aux pieds tout ce qu'il récōtroit, il le pourfuiuit & le tua d'vn coup d'espee. Vn autre cheual espouuanté du fouët d'vn carrossier, secoïa son Cheualier, & passa dessus. Cependant Colletis qui auoit beaucoup d'auantage à la guerre, à cause de sa grandeur, estant semblable à Alcione pourfuiuoit les Bacchantes, & se promettoit de les auoir pour concubines apres la victoire: mais il fut bien trompé. Comme Otus, qui rechercha follement les embrassemēs de la chaste Diane, & Ephialtes qui fit l'amour à Minerue. Colletis auoit de pareils desseings, & les pouuoir executer, ayant la reputation d'estre grand Capitaine, & de pouuoir subiuguer Mars apres les enfans d'Iphimede, neantmoins Charopee conductrice d'vne compagnie de femmes, le tua d'vn

coup de pierre, vn Indien ayant veu ceste merueilleuse deffaicte dit ces paroles en cholere.

Mars, laisse ton arc & ton bouclier, & ta picque : car tu es vaincu, laisse le mōt Caucaſe, Bacchus à des Amazones, qui ſubiuguent les Indiēs, encore qu'elles n'ayent point de bouclier. Je viens de veoir vne choſe merueilleuſe, ces Amazones n'ont ny eſpee, ny cuiraffe, & ſi elles ſont victorieuſes, & ne ſe ſeruent que de rameaux & de fueilles, n'ayant point beſoing d'eſpee. Helas ! qu'elle honte à Deriades, de ce que de ſimples femmes, fauſſent les cuiraffes de fer, avec des armes ſi legeres.

Cet Indien admira le coup que Charope auoit faict à vn ſi grand geant. Mais Deriades ayant entendu la mort prodigieuſe d'Otus, ſe ietta dans les regimens des Baſſarides, & pourſuiuit Charope : mais elle ſ'enfuit ſe retirāt, ſoubs la cornette de Bacchus, comme il veid qu'elle eſtoit trop eſloignee, il attaqua Orithalle citoyen de la terre Abantide, Meliſſee Prince du pays, eſtant faſché de la mort de ſon ſubiect ſe ietta deſſus Cyllare le Roy des Carmoniēs, & le tua d'un coup

qu'il luy donna sur la teste, au grand regret de Deriades: car il l'aymoit particulièrement, & autant que son gendre Morrhee, à cause qu'il auoit long temps conuersé, & mangé avec Orsoboia la femme de Deriades, les surpassant tous deux en force & en courage, Halimedes combattoit Peniches & Maron, Phlogie & Nelee, Iupiter se portoit indifferant, tenant la balāce, Bacchus estoit aux prises avec Deriades: mais il y auoit de l'auantage: car il se transformoit en diuerses figures, tantost il se changeoit en feu, combattant en cette forme, tantost en eauë, tantost en Lyon rugissant d'une façon horrible, son corps estoit quelquefois metamorphosé en arbre, & en pin, sa teste en fueilles, son ventre en un tronc, ses bras en rameaux, ses habits en escorce, & ses pieds en racines, & se changeoit en Panthere, sautant sur le dos des elephans. De sorte qu'ils renuersoient les chariots, & carrossiers, Deriades dépité de tant de changemens, & de la cheute de ses animaux, ne perdit point temps, il luy donna vn coup de picque & le blessa: mais à l'instant il changea son corps en feu, & sauta sur luy la flam-

me commençoit à nourrir sa cuirasse, & à eschauffer son heaume, quelquefois de lyon, il apparoissoit en la forme d'un ours, & déchiroit le ventre de Deriades, il se defendoit, voulant le saisir, mais il luy eschappoit des mains. Comme il eut pris la figure d'un lyon, il luy donna un coup de picque dans le front, & luy fit un discours plein de menasses.

Bacchus, pourquoy crains-tu? que te peut seruir ton artifice? tu chāge de forme, pource que tu apprehende Deriades, un lyon ne m'espouuāte pas, ie puis tuer un ours avec mes fleches, & couper un arbre avec mon espee, ie deschireray le ventre du lyon, dōt tu auras pris la forme: mais ie veux consulter les Sages Brachmanes, l'on dit qu'ils ont l'invention d'arrēster ces metamorphoses, par des paroles, & que souuent ils tirent la Lune du ciel par magie, arrestans le cours du Soleil.

Deriades admira grandement la diuersité des metamorphoses de Bacchus, neantmoins il se confioit tant en sa magie, & en ses sortileges, qu'il pensa le pouuoir vaincre, mais il fut bien trompé: car Bacchus fit croistre vne

vigne sur son chariot, & les rameaux luy garrotterent les pieds & les mains. Le poisson Remora n'arreste point si bien les vaisseaux, que les chariots & les Elephans estoient arrestez, encores que les carrossiers les pressassent à grands coups de fouets. De sorte que le Roy des Indes fut vaincu par vn pāpre, encore que l'espee & la picque ne l'eussent peu subiuguer, les entraues, & les liens le pressoient à la gorge, de telle sorte, qu'à grād peine il peut respirer sous la rigueur de ceste captiuité, non sans faire des plaintes en resspandant des larmes. Mais Bacchus print compassion de sa misere, & le deliura, luy laissant la couronne de liere & deslia les Elephans : mais apres qu'il fut en liberté, ne se ressouuenant point de la courtoisie qu'il auoit receuë. Il poussuiuit Bacchus avec des menasses, ne cessant point de le combattre avec dessein, ou de le prendre captif, ou de le tuer. Mais apres que l'Aurore fut leuee, les armées se ioignirēt avec plus d'effort & de violence, les Rhadamanes, Dictreins rendirent des seruices signalez à Bacchus, luy promettās de faire des vaisseaux pour la marine. Les vns abatoient des

des arbres, les autres les scioient, & chacun se mettoit à son deuoir. Bacchus se delibere de recommencer la guerre, se ressouuenant de la prediſtion de sa mere Rhee, qui l'auoit assure d'une plaine victoire, lorsqu'il combatroit les Indiens la mer, & que le loup marin conduiroit son chariot. Deriades estant aduerty des desseings de Bacchus, cōuoqua l'assemblée de ses peuples, & Morrhee leur fit ceste harangue.


Mes amis, vous sçauiez ce que i'ay fait pour le seruice de Deriades, quand ie reduits l'Assyrie & la terre de Cilix, sous son obeïssance. Vous n'ignorez point les stratagemes que i'ay executé contre Bacchus, & les Satyres. Quand ie pris les Bassarides captiues, les amenans à Deriades, dont les vnes ont esté pendues aux portes du Palais, les autres brulees, les autres enterree toutes viues: mais i'ay vn aduis à vous donner. I'ay entēdu que les Radamanes fabriquent des vaisseaux pour faire vne armee nauale. Quand à moy, ie n'apprehende point l'effort de leurs armees en la mer, encor' qu'ils renuersent leurs ennemis avec leurs feilles comme si c'estoient des picques ou des,

espees. Neptune ne leur sera pas si favorable. Aussi comment est-ce que Pan s'escrimera, de ses cornes, & de ses ongles contre les Indiens, vn Silene ne pourra faire submerger vn vaisseau avec la ferule, ny se mesler dās la presse avec ses cornes, à cause des esloignemens. Il tombera tout blessé dās la mer, & aussi les Bacchantes. Je suis bien asseuré d'arracher leurs nauires, & de les mettre à fond. Je ne veux point employer mon couragé & ma force sur les Satyres, mais sur les plus braues Capitaines, & mesme sur Bacchus que ie veux conduire en mon triomphe pour seruir Deriades.

Morrhee donna à ses gens bōne assurance de la victoire, le peuple loüa grandement son dessein. Cependant Bacchus receut vn heraut d'armes, qui luy declara la guerre que les Indiēs deuoient faire par mer, il s'y prepara, & par mesme moyen ils firent les trefues pour trois mois d'vn commun accord, pour auoir le loisir & le temps d'enterrer les corps.

Les Indiens enterrent les morts, pendant la trefue. Bacchus fit dresser un superbe tombeau à Ophelte instituent plusieurs jeux de prix en l'honneur de sa memoire.

LIVRE TRENTÉ-SEPTIÈME.

 Es Indiens enterroient les morts pendant les trefues, rendans ces derniers devoirs en faueur des ames immortelles qui se reünissent à leur premier principe. Cependant l'armée de Bacchus estoit en repos, iouyssant du benefice de la trefue. Bacchus commanda que l'on abatist vne grande quantité de bois, pour bruler le corps d'Ophelte qui auoit esté tué en la guerre, Phaune qui receut ce commandement, s'en alla en la forest, où il fit couper des chesnes & des Ormes, & des Pins, les Nymphes Hamadryades furent contraintes de se retirer dās les fontaines, & aux autres lieux avec les Najades. On voyoit

par les routes , & par les sentiers grand nombre d'hômes qui estoient employez en cet exercice. Les Silenes & les Satyres estoient chargez de bois, descendans des montagnes. Apres qu'ils eurent ramassé la quâtité qui estoit necessaire Bacchus ordonna le lieu où il vouloit que l'on fist le tombeau , tous ses gens se razerent la barbe & les cheueux , en signe de dueil, déplorant la mort d'Opheltés par ces ceremonies, & Bacchus mesme monstra qu'il en auoit vn grand ressentiment, luy offrant sa cheuelure. Ils firent le bucher de cent pieds en quarré , où ils estendirent son corps, Asterie Dictéen tira son espee, & decapita douze Indiens, qu'il sacrifia pour honorer la sepulture , les disposant en ordre. Il ne fut pas content de ceste ceremonie. Il fit tuer des bœufs, & des agneaux, assemblant les corps deuant le bucher, il prit des cheuaux morts, & en tira la gresse dont il se seruit aux sacrifices. Faune citoyen de la terre, Thyrsenide apporta des cailloux d'un rocher pour en tirer du feu, comme sa mere luy auoit autrefois enseigné , lors que les foudres qui tomberent del'air , donnerent des tesmoignages de la victoire. Il

donna l'inuention de tirer le feu pour brusler le bois qui estoit au buscher, froissant deux cailloux, & les estincelles faillirent à l'instant, le feu ne prit pas si tost: mais Bacchus, regardant le Soleil, appella le vent d'Orient, afin qu'il soufflast dedans, il ne manqua pas de flechir à ses prieres, il alluma le feu par son souffle, laissant le sejour de sa mere l'Aurore & continua ceste faueur toute la nuit. Asterie de Dictée apporta vn pot de vin, & le respendit sur le buscher en la memoire d'Opheltes, fils d'Arestor. Mais apres que l'Aurore eust chassé les tenebres, ils esteignirent le feu avec du vin, & le vent se retira en la maison du Soleil. Asterie recueillit les os, & les cendres, & les mit dedans vne boëtte pour les conseruer comme des reliques, & les Corybantes les enterrerent dans vn sepulchre magnifique apres qu'ils furent retournez en Ida avec toute les ceremonies necessaires pour honorer vn homme de merite avec vn epitaphe qu'ils grauerent dessus le tombeau en ces mots.

Icy gist Opheltes Gonossien le genereux Capitaine, & le vainqueur des Indiens.

Bacchus ne se contenta pas de luy rendre tous ces deuoirs, il ordonna des ieux de prix à la course des chariots, en vn lieu qui'auoit six pieds en diametre en demy cercle semblable au Croissant de la Lune, il y auoit des colōnes des deux costez, ou Vulcain auoit dressé des statues de son ouurage. Les prix estoient diuers, & selon les degrez de la victoire, il mit des vases, des Trepieds, des boucliers, des bœufs, des metaux des Indes, & de l'or du Pactole,

Il posa pour le prix des Cheualiers, vn arc, vn carquois, vn bouclier, vne belle Nymphé qu'il prit sur le riuage de Thermodon, comme elle lauoit quelques vestemens, promettant au second vne cauale qui couroit aussi legerement que le vent, & si elle estoit preste d'auoir vn poulain. Au troisieme il luy promit vne bonne couirasse qui estoit faicte à l'espreue du coustelas. Au quatrieme vn bouclier que Vulcan auoit faict pour chef-d'œuure. Au cinquieme deux talens d'or du fleuve Pactole, & apres auoir prosé tous ces prix, il leur fit ce discours & les incita à ces jeux.

Mesamis, a qui Mars a enseigné de se porter genereusement dans les combats que Neptune a instruit en la course des chariots. Je ne pense me trôper en vous inuitant à ces exercices : car ie sçay que vous estes adroicts, & que vous supporterez patiemment les labeurs, nos gens sont addonnez à la pratique de toutes sortes de vertus. Sinos Lydiens tirent leur extraction de Timole sans doute ils produiront quelque belle action en la course, & digne de la victoire de Pelope, ils sont de Pisee, où l'on nourrit grande quantité de cheuaux dans les prairies, ils cognoissent fort bien la legereté des chariots d'Oenomas citoyen d'Elide, estans curieux du rameau d'Oliue, que l'on donne aux jeux Olympiques. Mais vous pouuez bien vous asseurer que vous ne rencontrerez pas icy les cruelles conditions de la course d'Oenomas, & la violence perfide de ses mariages. C'est icy vn ieu de prix proposé au merite, & à la vertu, libre & sans aucune contrainte, s'ils sont d'Aonie ou de Phocide, ils ont autresfois assisté aux combats d'Apollon Pythien, s'ilstirent

leur naissance de Marthon la terre des Oliuiers, ils sçauent quelle liqueur l'on donne aux vaincœurs, s'ils sont d'Achaie, Ils n'ignorent pas la coustume de Pallene, où les hommes combattent des Lyones, s'ils sont de Corynthe, ils peuuent sçauoir ce que c'est des ieux Istmiens de Palemon.

Après ceste proposition, les Capitaines s'assemblerent. Erechthee se presenta avec Xanthus & Podarge que Boree engendra d'Harpiade Sithonie, & lors qu'il raut la Nymphé Orithye, luy donnant ces deux enfans pour recompense de son amour, & pour gage de son affection. Le second qui se presenta, ce fut Acteon le troisieme Scelmis fils de Neptune, qui autrefois auoit conduit le chariot marin de son pere. Le quatrieme, Phanue qui ressembloit au Soleil. Le cinquiesme, Achates qui se monstra bon escuier, lors qu'il seiournoit au lieu où Alpheé mal-heureux en amour poursuivit sa Nymphé Arethuse. Aristee voyant son fils Acteon prest de s'engager en ces exercices, le retira de la presse, & luy fit ces reproches.

Mon fils Actreon, yssu d'Aristee le genereux, fais paroistre les effets de la force que tu as tiree de l'extraction de Phœbus: Ie croy que tu y auras del'aduantage; car nos cheuaux d'Arcadie sont les plus legers à la course. Mais ie ne pense pas que tout cela soit vtil. Car ce ne sera pas la force, ny la legereté qui l'emporteront, mais seulement l'adresse & la dexterité. Il y a beaucoup d'artifice en cecy. Escoute donc ton pere sur ce sujet, en retenant les ruses qu'un Cocher doit sçauoir. Ie t'enseigneray toutes les astuces que i'ay remarquees par mes longues experiences. Il faut premièrement que tu me portes le respect, & que tu honore ton pere, la gloire & l'honneur quel'on peut receuoir en ces exercices ne sont pas moindre que ceux de la guerre. Ne manque donc pas à me respecter apres la victoire que tu auras remportee aux tournois, prest d'en auoir vne autre, afin que ie t'appelle le fils obeissant apres tes triumphes.

Prends donc courage, & execute quelque chose, qui soit digne de Bacchus, ton parent, & de Phœbus, & de Cyrene, en surpassant mesme les stratage-

mes d'Aristee, mōstre que tu es expert à la course. Il y en a de mal-adroicts, qui dōnent la carriere à leurs cheuaux, au milieu de la course, & leur chariot va deçà & delà sans reigle, & les cheuaux n'obeissent plus au frein, & les portent hors les bornes, se froissant aux colonnes posees, dont il faut euitier le chocq, en quoy cōsiste toute l'industrie: mais ceux qui entendent les ruzes, cōduisent leur charoit à l'œil, & le tournent à vne espace legitime, pour passer dextrement. Considere donc bien, & prēds la routte, tournāt tes cheuaux à main gauche vers le but, avec vne certaine mesure, que tu voyes l'essieu de tes rouës, comme si la seconde deuoit toucher les colonnes. Garde-toy biē de froisser cōtre la pierre, offensant tes cheuaux & ton chariot: gouuerne-les avec vne mediocrité, sans les pousser plus d'un costé que d'autre: le jugement du Cocher doit estre le conducteur.

Aristee fit ces remonstrances à son fils. Tous les Contendans prindrent par sort les billets dans vn heaume. Faune fut le premier, Achates le second, le frere de Damanee le troisieme, Acteon le quatriesme, & Ere-

Erechthee fut le dernier. Ils monterent tous dans leurs chariots par ordre. Aequus fut esleu le Juge pour discerner toutes les particularitez de la course. Ils se mirent en deuoir de courir & s'appresterent à ces jeux. L'un lascha la bride à ses cheuaux: l'autre le suiuoit pour l'atteindre: l'autre s'embarassoit dans les chariots qu'il rencontroit, & l'autre les entraînoit de violence. Vn autre courut si fort qu'il fut tombé s'il n'eut retiré ses cheuaux. Scelmis entre les autres conduisoit son chariot avec tant de vistesse que le Pegase aisé n'alloit point si legerement. Les peuples spectateurs estoient sur vne colline rangez comme sur vn Amphitheatre, dont les vns estés poussez d'affection monstroient par signes la route qu'ils deuoient tenir. Les autres apprehendoient que ceux qu'ils affectionnoient ne se perdissent au heurt. Les chariots couroient si vistes que l'on pensoit qu'ils volassent, le bruit estoit grand de l'agitation que des voix des contendās. Scelmis courut le premier & Erechthee le suiuoit, & il sembloit que son chariot fut dessus l'autre: car ses cheuaux pressoient Scelmis de si prest, qu'Erechthee pouuoit toucher ceux de

Scelmis, neantmoins il tira la bride à luy. Scelmis voyant que l'autre se destournoit de la route, luy dit ces paroles par brauade.

Erechthee, cesse d'entreprendre ce combat, ne sçais-tu pas bien que Pelops conduisant le chariot de mon pere a vaincu Oenomas à la course des cheuaux. Tu esperes de remporter la victoire à cause de Minerue: mais son oliuier n'y fera rien, ie porte vne courōne de pampre, & qui n'est pas d'oliuier.

Erechthee se fascha de ce discours: Il aduifa à la conduite de son chariot, & supplia Minerue en ces termes.

Deesse de Crecopie, qui est instruite en ces exercices, & qui as autrefois vaincu Neptune, oblige moy donc, & fais que ton subject surmonte Scelmis fils de Neptune:

Erechthee fouietta ses cheuaux, & passa deuant, & dit à Scelmis ces paroles en riant.

Scelmis, ie t'ay vaincu, Erechthee est plus adroit que toy, en ce que Podarge a vaincu ton Balius, de la race de Zephyre. Que si tu te glorifie de la cognois-

sance & de l'inuention de Pelops, honorant le chariot de ton pere Neptune. C'est Myrtille, plustost que Pelops qui a remporté la victoire sur Oenomaus, par l'artifice des roües foibles qu'il mit au chariot. Que si tu prends aduantage de l'extraction que tu tires de Neptune, que tu nommes Escuyer de la mer, Pallas l'a vaincu, encore qu'elle ne soit qu'une fille.

Erechthee passa de bien loin Scelmis, Phaune le suiuit, & Acteon par apres, se ressouuenant encor des aduis que son pere Aristee luy auoit donnez, Achates se trouua le dernier. Cependant Actreon meditoit les moyens qu'il deuoit tenir pour remporter la victoire. Pour cet effect il hasta ses cheuaux, heurtant le chariot de Faune qui estoit deuant luy. L'effort fut si violent que son carrosse renuersa par terre, & les cheuaux tombèrent l'un sur le ventre, l'autre sur la teste, l'autre sur le dos. Il n'en demeura qu'un seul, qui se tint ferme, s'appuyant sur les autres. Phaune tomba sur les rouës, & le blessa au front: mais il se releua aussi tost, & remonta, non sans rougir, fouettant ses cheuaux. Comme il estoit en ce

travail honteux; Acteon luy dit par
mocquerie.

Braue Cocher, cesse de conduire tes
cheuaux: car ie m'en vois aduertir Bac-
chus que Faune ayant laissé passer deuât
luy les Contendans, traine son misera-
ble chariot apres les autres, abandon-
ne ton fouët, puisque tes cheuaux sont
blessez.

Acteon hasta la course de son chariot.
Faune fut grandement fasché d'enten-
dre ce discours. Il releua ses cheuaux, &
remonta à l'instant, suiuant les autres de
bien prest, & eut le dessein de les passer.
Ayant veu vne petite route assez estroit-
te & profonde, que les torrens d'Hyuer
auoient cauee, il toucha ses cheuaux à
toute bride. Achates qui apprehendoit
l'effort du chocq, se retira à costiere, &
luy fit place, le picquant de ces pa-
roles.

Faune, qui te fait si temeraire? Tu por-
tes encore en tes habits les tristes mar-
ques de ta cheutte, ton chariot est enco-
re tout poudreux, tu n'as pas encore se-
coüé la poussiere de tes cheuaux. Netoye
tes vestemens, & ne precipite point ta
course, de peur que ie ne te voye encore

par terre. Prends garde que le braue Acteon ne te renuerse. Pourquoy te hastes-tu, pour receuoir des reproches, & pour faire honte à ton pere Neptune, & au Soleil ton ayeul? Garde-toy d'estre la risée des Satyres & des Silenes. Où sont maintenant tes charmes, ta Magie, & la vertu des herbes & des paroles? Tous ces artifices t'ont abandonné au besoin, quand tu as commencé à contester avec les autres. Ne crains-tu point que l'on rapporte à ta mere tes stratagemes, & la cheute de ton chariot.

Achates luy fit ces reproches. Cependant Faune s'aduança avec violence, & rompit la cheuille qui tient les rouës d'as l'essieu, & le chariot se reuersa, ressemblant à celuy d'Oenomas, quand la cire qui tenoit les rouës de son chariot fondit aux rayons du Soleil, iettant par terre celuy qui le gouuernoit. Comme Faune eut passé Achates, il pressa ses cheuaux, talonnât Acteon. Le peuple qui estoit assemblé pour voir ces jeux, faisoit vn grand bruiet sur l'incertitude des victoires. Vn soustenoit le party de son amy, & l'autre fauorisoit celuy qu'il affectionnoit. Le jeune gratifioit le jeune. Vn di-

soit en faueur d'Achates, que Fauné n'auoit rien faict de loüable. L'autre soustenoit qu'Erethée deuoit ceder à Scelmis, l'autre qu'Erethée auoit surmonté tous les autres. La dissension ne finit point: car il precipita la course de son chariot avec tant de violence, qu'il mit ses cheuaux à nage. La fueur tombait en terre, & la poudre voloit en l'air. Il descendit à terre, & essuya son visage. Amphidame son seruiteur detella ses cheuaux. Erethée prit le carquois, l'arc, & le bouclier, les premiers prix du jeu: Scelmis receut les seconds, & Acteon les troisieme, Faune les quatrieme.

Après que ces jeux furent finis, Bacchus inuita les Contendants à l'exercice des gands de fer, posant vn Taureau, & vn bouclier pour prix.

Si quelques vns veulent (ce dit-il) entreprendre ce combat, ie donneray à celuy qui sera le vaincœur, le Taureau, & à l'autre le bouclier.

Aussi-tost Melissee s'approcha, desirant de monstrier ce qu'il scauoit, & dict à la compagnie, en tenant le Taureau.

Qui

Qui vienne qui voudra pour auoir le bouclier, quant à moy ie ne quitteray point le Taureau.

Melisse imposa le silence à tous. Eurymedon se presenta avec beaucoup d'assurance; aussi Mercure luy auoit donné de l'aduantage & de la force. Son frere Alcon l'arma de tout ce qui estoit necessaire, luy mettant la ceinture, & vn plastron au front: car il craignoit l'effort de son corriual, & qu'il ne l'offençast en ceste partie, où aux costez de la teste. Comme ils se furent ioints tous deux, Melisse frappa Eurymedon dans l'estomach, avec vne grande violence. Il voulut se reuenger de ce coup, luy en deslanchant vn sur la teste: mais ce fut sans effect. Ils se colletterent ensemble, se donnant des coups de gantelets d'une façon horrible. Eurymedon fut grandement blessé aux yeux & au front, & tomba mort. Son frere Alcon le retira du combat. Melisse prit le bouclier & les autres prix. Apres que Bacchus eut fait pratiquer ces exercices, il proposa la luitte aux assistans, poposant pour le prix vn grand trepied d'or à celuy qui seroit

le vaincœur, & vn bassin à l'autre, & les y inuita.

Sus donc, mes amis, (ce dit-il aux assistans) exercez-vous en ces jeux. Aristee se presenta, & pareillement Æacque. Ils s'accommoderent pour cet exercice se despouillât. Ils se joignirēt tous deux, s'efforçans de se renuerfer par terre. Aristee ne manqua pas de saisir son ennemy en la partie qu'il croyoit le pouuoir abatre. Mais Æacque luy enlassa le pied gauche, & le mit par terre. Les assistans furent grandement estonnez de voir la cheutte du fils de Phœbus, Æacque mōstra la force & le courage que son pere Telamon luy auoir laissé en partage. Cōme ils estoient tous deux en cet estat, Aristee ne quitta point sa prise: Mais les assistans qui voyoiēt l'aduātage que l'autre auoit sur luy, craignoient qu'il ne l'estouffast. car les loix de la luitte n'estoiēt pas encore establies, qui permettoiēt au vaincu de frapper en la main, & de renoncer au prix qui estoit dedié pour le vaincœur. Æacque triompha d'Aristee en ceste sorte, & prit le trepied d'or, & l'autre le bassin.

Bacchus ne fut pas content de ces

exercices, il voulut encore que l'on s'exerçast à la course, posant pour le prix du vaincœur vne couppe d'argent, & vne captiue, au second vn cheual de Theffalie, & au dernier vne espee avec le baudrier. Il y inuita ceux qui y auoiēt de l'adresse.

Ces prix (ce dit-il) sont pour ceux qui courront plus legerement.

Aussi-tost Dictée se presenta, & Erethee apres luy, & Priase citoyen de Cybele ville d'Ionie. Apres qu'ils eurent designé les buts & les limites. Dictée courut, & au mesme temps Erethee partit. Ils furent aussi auācez l'un que l'autre, & le iugement de la course estoit incertain: Mais Erethee s'auança avec vne telle legereté, qu'il le passa, & fit ceste priere à Boree.

Boree, donne secours à Erethee ton beau-pere, si tu as enuie d'obliger ma fille Orythie, que tu as autrefois tant aymee. Donne-moy la legereté de ton vent, afin que ie passe celuy qui me deuançe.

Boree exauça sa priere, & le fit courir cōme le vent. Ocythone deuança Erethee, d'aussi loin qu'il passoit Priase. mais il arriua vn accident à Ocythone: car estant près du but il tomba à terre sur

du fumier, qui auoit seruy au sacrifice des bœufs. Ce qui fut cause qu'Erecthee demeura le vainqueur, prenant la coupe d'argent, Ocythous eut le cheual, & Priase l'espee & le baudrier. Les Satyres se prindrent à rire de le voir tout gaste au visage.

Bacchus proposa vn autre exercice pour jouer au palet, & mit en depost deux picques, la nappe d'un Cerf, un vase d'or, & une couronne, & y inuita les assistans.

Le jeu est ouuert (ce dit-il) pour tous ceux qui voudront se presenter.

A l'instant Melisse parut le premier, à intention de s'exercer. Et apres luy Halymedes, Eurymedon, & Acmon. Melisse jetta le palet, mais les Silenes se mocquerent de luy, & du petit coup qu'il fit. Eurymedon fit son coup, Acmon & Halimedes apres. Les assistans prindrent les mesures de tous les palets. Halmides remporta les deux picques, Acmon la couronne, Eurymedon le vase d'or, & Melisse la nappe du Cerf.

Bacchus ne fut pas content encore, il proposa l'exercice & le jeu de l'arc. Et pour cet effect Euryale ficha en terre un

grand mast, & y attacha vne colombe.
Bacchus y inuita la compagnie.

Celuy qui abattra le pigeon (ce dit-il)
aura vn mulet: & celuy qui frappera seu-
lement les aisles ou le mats, il prendra la
coupe qui luy est promise, comme il
plaist à Phœbus & à Bacchus.

Hymenée se presenta avec son arc:
mais Asteris tira le premier, & frappa la
corde qui tenoit la colombe, & la rom-
pit: à l'instant Hymenée banda son arc,
& toucha cet oyseau volant en l'air, &
l'abattit par la faueur d'Apollon, qui
conduisit le coup pour obliger Bac-
chus. Toute la compagnie fut grande-
ment estonnée de ceste adresse in-
croyable. Bacchus resioüy de ceste dex-
terité, luy donna le mulet, & à Asteris
la coupe. Apres ces exercices plaisans &
agreables, il voulut encore proposer les
jeux sanglans des Gladiateurs, pour re-
presenter au naïf l'image de la guerre, &
mit en depost deux belles paires de bot-
tes pour celuy qui remporteroit la vi-
ctoire, & quelques pierreries des Indes.
A condition que les contendans ne s'en-
treturoient pas. Il n'eut pas si tost dict,
qu'Asteris print ses armes, & Æaque se


presenta avec son bouclier. Et tout ainsi qu'un lyon se jette sur un taureau, ainsi ces deux vaillans Capitaines se chargeoient de violence. Asterie heritier de la vertu & de la force de son pere, blessa Æacque au bras droid: Mais il se voulut reuenger de ce coup, luy enfonçant son dard dans la gorge: mais Bacchus le retint, & leur dit en les separant.

Cessez vos combats sanglans, quittez vos armes, & soyez bons amis, i'en'ay point eu dessein de vous voir entre-tuer.

Ces Gladiateurs cesserent, & Æacque prit les deux paires de bottes, & Asteris les pierreries des Indes.

*Le temps des trefues expiré, on void d'
grands prodiges au Ciel. Le Soleil
s'esclypse, & tomba du feu du
Ciel. L'armee de Bacchus s'espou-
uante : Mais Idmon l'Astrologue
predit la victoire aux Satyres. Mer-
cure est enuoyé à Bacchus par Iupi-
ter, pour luy donner assurance de
la conqueste des Indes. Bacchus luy
demande l'Histoire de Phaëthon, &
Mercure luy raconte au long.*

LIVRE TRENTÉ-HVICTIESME.



*PRES que les jeux furent finis,
le Soleil se coucha, & les Saty-
res, & les Silenes se retirerent
dans les grottes, & dans les montagnes,
pour se reposer pendant la nuit, iusqu'à
tant que l'Aurore quitta la couche de
son vieil jaloux Tithon : mais comme le
iour fut apparu les deux armées se mi-
rent en deffense : car le temps des tref-
ues estoit expiré. Il y auoit desia six*

ans que Bacchus faisoit la guerre aux Indiens: mais apres que les heures immortelles eurent fait naistre le septiesme, il apparut vn signe au Ciel, qui predict ce qui deuoit arriuer aux ennemis de Bacchus: le Soleil s'eclipsa en plein midy & couurit la terre d'vn nuage espois. Les Rochers furent obscurcis de tenebres & tomba du Ciel avec vne grosse pluye qui inonda la terre, & à l'instant le Soleil seicha ces deluges. Il parut vn Aigle en l'air qui portoit vn serpent. Hydaspe s'estonna grandement de ce prodige: Toute l'armee estoit en silence & en crainte sans sçauoir la cause: mais Idmon qui cognoissoit tous les secrets de l'astrologie les ayans apprins de la Muse Vranie ne s'espouuāta point, car la cause de l'eclipse Solaire ne luy estoit pas incogneuë, non plus que la cheutte du feu qui venoit du foudre esclatté du choc & de la rupture des nuees. Cet Astrologue instruit en ces meteores, exposa aux Satyres & aux soldats ce qu'il en pensoit, & leur dit que l'on pouuoit conjecturer avec asseurance la victoire qu'ils deuoient r'apporter en bref sur leurs ennemis. Erechthee plus

curieux que les autres l'interrogea sur ces presages, & si la guerre seroit favorable à Bacchus, mais il ne desiroit pas tant sçauoir ce subject comme de cognoistre les causes de l'eclipse Solaire, & des mouuemens des Cieux & des planetes. Ceste curiosité n'estoit pas extraordinaire en sa personne car tous les Citoyens d'Affrique auoient recherché de tout temps la cognoissance secrette des choses que les hommes pouuoient ignorer. Idmon le voulut contenter.

Erechthee (luy dit-il) vous desirez sçauoir ce que les Dieux cognoissent par-dessus les hommes. Neantmoins ie ne veux pas vous frustrer de la science qu'Apollon m'a donnée? N'apprehendez-point le toudre, ny le feu qui n'esclate que des nuages, n'y l'eclipse Solaire, on en peut facilement trouuer les causes naturelles. Je vous predicts la victoire de Bacchus: car tout ainsi que l'Aigle a deschiré le serpent le laissant tomber dans le fleuve entre les mains d'Hydaspe, ainsi Deriades aura du pire aux combats.

Idmon fust escouté en ses predictions

& toute l'armee fit paroistre la joye qu'elle auoit de ces bons presages. Au mesme tēps Mercure fut enuoyé du ciel pour consoler Bacchus, & pour luy faire entēdre la cause de ce qui s'estoit passé.

Bacchus, luy dit-il, n'apprehēde point les signes qui t'ont apparū, ny les tenebres de l'Eclypse, Iupiter te faict sçauoir que tu remporteras la victoire sur les Indiens, ie compare le feu avec Bacchus, & les tenebres de la nuit avec les ennemis: tout ainsi que l'obscurité vient de l'absence du Soleil, & que sa lumiere chasse les tenebres, ainsi l'infortune que Megeter a procuré se rapporte à l'eclypse, mais tu seras vn Soleil qui dissipera ces nuages. Il faut que tu sçaches la cause de ces merueilles que le siecle n'a point de long temps faict voir aux hommes. Phaëton est tombé du ciel demy bruslé, & le fleuve Celto l'a receu par compassion, & ses sœurs les Heliades deplorent au riuage d'Eridan son malheur sous la forme des arbres. Bacchus se resioüit de ces bonnes nouuelles, esperant de subiuguer les Indiens. Il l'interrogea sur l'accident de Phaëton, commētil tōba avec son chariot, cōme ses sœur furēt metamorpho-

en arbres, dōt les larmes coulēt encores pour marques de ressentiment, Mercure qui desiroit satisfaire à sa curiosité luy respondit.

Si tu veux sçauoir l'histoire de Phaëtō, ie te la deduiray au long. L'Ocean qui entoure la terre espousa Tethis, & eut d'elle la Nymphē Clymene, dōt la beauté fut si recommentable que le Soleil en deuint amoureux, son feu ceda à celuy de l'amour. Le flambeau de Cupidon fut plus puissant que le sien, cōme le Soleil venoit se lauer dans l'Ocean apres son cours, il rencontra ceste belle Nymphē qui se baignoit dans le fleuue, Clymene estoit reluisāte, cōme l'Aurore qui commence à poindre, la figure de son corps s'imprimoit dans les eauës, & la chemise ne couuroit pas son sein, ses mammelles rendoient vn esclat qui donnoit de l'amour. Son pere l'Ocean la maria à Phœbus, & les heures immortelles chanterēt les nopces de Clymene & du Soleil, & les Nymphes dāserent de resioüissance, elle receut son Phœbus dās la couche humide de son seiour. Toutes les Estoilles fauoriserent aussileur alliance, la Planete de Venus chanta vn Epithalame,

La Lune ne fut pas ingratte, car elle donna sa lumiere. Les Hesperides tesmoignerent leur joye & l'Ocean monstra qu'il honoroit ce mariage. Climene enfanta Phaëton, & à l'instant les filles de l'Ocean se lauerent dans les eaux. Les Estoilles l'environnerent de leur clarté, & la Lune le carressa, son pere luy donna son nom à cause du rapport qu'il auoit avec luy. L'Ocean son ayeul iouïoit quelquefois avec son petit fils, & l'esleuant en l'air, il le receuoit doucement entre ses bras, & puis il l'enleuoit mais il tornoit en l'air, tombant dās l'eau éloigné de luy: ce qui luy donna vn mauuais presage de sa mort. Le bon vieillard deploroit ses aduantures n'osant pas les dire à Clymene de peur qu'elle ne s'affligeast d'un si grand malheur qui deuoit arriuer, lors que le petit Phaëton fut venu en adolescence. Il passoit le temps en Thrinacrie avec sa sœur Lampetis qui gardoit les bœufs de son pere. Il print enuie de conduire vn chariot comme celuy de son pere. Il en forma vn de bois en ouale, faisant les brides d'osiers, & atella quatre agneaux: Il assēbla des fleurs jaunes en façō d'un

Soleil, & d'estoilles Orientales, & en par les ruës, il le conduisit en rond, cōme si c'eust esté à l'entour de la terre. Mais apres qu'il fut plus aduancé en aage, il s'approcha du chariot de son pere, & se plailoit à toucher & manier son feu, & ses resnes. En fin il fut passionné au desir de conduire ce chariot, se deliberant vn iour de luy en faire la requeste. Pour cet effect il se ietta à ses pieds, en respandant abondance de larmes, & le coniuira de luy permettre la conduite de ses cheuaux: mais il luy refusa avec des remonstrances, & luy dit pour le destourner d'vn si pernicieux desseing.

Mon fils, demande moy quelque autre chose, cherches à excuter vne entreprise plus facile. Que te peut faire la conduite de mes cheuaux, quitte ceste fantaisie, ie veux bien que tu sçaches que ie suis bien empesché à conduire mon chariot. Iamais Mars, encore qu'il soit puissant n'a peu soustenir les rayons & l'esclat de mō equipage, il est capable d'entonner vne chamade avec la trompette, mais non pas de toucher au feu. Vulcan ne darde point les foudres de son pere, & n'est point appelé assēbleur de nuees,

comme Iupiter, mais il est employé à la forge & à l'enclume, aussi Ganymede n'a point de cheual, mais vn cygne, Mercur n'a que son Caducee, & Minerue son Aigide. Tu diras que Iupiter a donné à Zagree les estincelles de son foudre, mais aussi il a esté en peril de mort, mon fils crains qu'un pareil accident ne t'arriue.

Phœbus ne peut le dissuader, Phaëton respandit des larmes en abondance, & toucha le chariot de son pere. En fin il eut compassion de son fils, & Clymene luy desira encore plus d'ambition: mais luy scachant l'arrest ineuitable du destin luy en accorda la conduite contre son gré, & baisant son fils plusieurs fois, luy dit.

Il y a douze signes au Zodiaque, & autant de maisons par où le Soleil doit passer, il y a aussi sept planettes qui font leur cours diuersemēt, & en leur Sphere particuliere, Saturne est en la septième, Iupiter en la sixième, Mars en la cinquième, & moy en la quatrième, ie passe par le pole, & par les colures, ie fais les quatre saisons iusques à tāt que j'aye parfait mē cours, & que j'aye passé par les dou-

ze signes du ciel, distinguez en autant de mois, les estoiles attachees au firmamēt prennent la lumiere de moy, & suiuent mon cours, & la Lune paroist tantost en son plein, tantost en son decours, ie me pourmene par toutes les maisons, & ie produis les saisons iusques à tāt que i'aye parfaict l'annee. Mais garde-toy bien de conduire mes cheuaux plus bas qu'il ne faut, car la terre seroit obscurcie, & perdrait la lumiere ordinaire que ie luy donne, aussi ne passe point la circonference de mon cercle, de peur que t'esleuant plus haut tu ne te perdes dās les espaces vuides, chemine doucement de maison en maison, quand tu seras au Scorpion, ne passe point au signe du Belier, ny de là au Taureau que tu n'ayes accompli les trente iours qui font le mois. Mon fils entends les aduis que ie te veux donner, le ciel où ie suis est le centre de tout le monde, quand ie passe au signe du belier ie fais l'Æquinoctial du Printemps, & aux balances celui de l'Automne, en ceste saison les arbres rēdent leurs fruits, les païsans font la vendāge, quand ie suis en l'Escreuice, ie fais l'Esté, conduisans les bleds à parfaicte maturité.

Après luy auoir dōné ces aduis, il donna à son fils vne couronne de feu, & luy en ceignit la teste, luy mettant dans les mains les brides de ses cheuaux; apres l'auoir faict monter en son chariot: mais ce ne fut pas sans regret, car il sçauoit fort bien le mal-heur qui luy deuoit arriuer. Olymene la mere le voyant en cet estat triomphant se resioüit, mais son ambition luy desroboit la cognoissance de ce qu'il pouuoit arriuer. Il monta au matin comme le Soleil, apres qu'il retourne des eauës de l'Ocean. Il apperceut de ce lieu les Astres, les estoilles par dessus luy, & les sept Zones & les colonnes, & en bas l'Ocean, son flux & son reflux, les fleues qui coulent dans son sein, considerant que la terre n'estoit qu'un petit centre d'un grand cercle: mais ses cheuaux qui recogneurent que ce n'estoit pas le Soleil qui les conduisoit par les voyes ordinaires, sortirent de la routte du Zodiaque, & s'esgarerent dans le ciel. Les heures immortelles s'aperceurent de l'inegalité de la course, l'Aurore s'espouuanta, & l'Estoile du matin qui n'eut pas moins de crainte, luy dit.

Mon

Mon bon amy, où vas-tu, pourquoy presses-tu tes cheuaux, espargne les par desseing, garde-toy d'approcher des Estoilles, de peur qu'Orion ne t'offense, & que Bootes ne te face vn affront, que le Lyon ne te deuce, ou que le taureau ne te frappe de sa corne. Ne crains-tu point le Sagitaire qui est prest de te décocher vne fleche mortelle, que l'on ne voye vn desordre au ciel, & la Lune se lauer en plein Midy, & le Soleil reluire de nuict.

Phaëthon pousse ses cheuaux avec plus d'agitatioⁿ vers l'Oriēt & l'Occidēt, & par toutes les quatre parties du monde. Il se fit vn grand desordre au ciel, & l'harmonie fut troublee, Athlas trauail-la en ces changemens, estant surchargé d'vn poids extraordinaire. Les signes, & les planettes perdirent leurs cours, le Dragon estoit à l'opposite du Taureau, & le Lyon suiuoit le chien, talonnant la Vierge, & la Vierge faisoit compagnie à Bootes, s'approchant du Pole. La canicule couroit dessus l'Ourse, & les Poissons voisins du verseur d'eauë fautoient au ciel, & le Dauphin compagnon du Capricorne capreoloit. Orion qui est

tardif en son cours, il craignoit le Scorpion, de peur qu'il ne l'offensast de sa queue. La Lune se leuoit en plein Midy, & sa clarté n'estoit point offusquee ny empeschee de celle du Soleil. Les Pleiades estoient errantes, & vagabondes, & le firmament sembloit murmurer, les Planettes n'estoient pas en vne moindre confusion, Venus irritoit Iupiter, & Mars Saturne. Le Taureau mugissoit, Orion tira son espee, & Bootes son baston, le Pegase hannissoit, desirant renuerser par terre ce nouveau conducteur, comme son Bellhrophon. Ce desordre fut si grand, que l'on ne voyoit plus les Ourtes du costé de Septentrion, mais en la partie Meridionale.

Iupiter ne peut supporter ce trouble, il foudroya Phaeton, le renuersant & le precipaïtt dans le fleuve d'Eridan, & commanda au Soleil de reprendre la conduite de son chariot, & les heures commencerent à marcher par ordre: il commença à tomber vne grosse pluye de l'air, qui l'aua & nettoya la terre des cendres de son embrasement, & qui esteignit le feu, le Soleil fit son cours, &

les campagnes portèrent les fleurs, & les fruits, Jupiter eut compassion du pauvre Phaeton, il l'enleva au ciel sous la ressemblance d'un carrossier; comme s'il desiroit encore de conduire le chariot de son pere, il n'eut pas seul ceste consolation: car le fleuve qui avoit esté bruslé fut logé au mesme sejour, & les sœurs de Phaeton attenuées de larmes & de pleurs qu'elles avoient respandues à cet accident, furent metamorphosées en arbres, distillans encore l'ambre, en témoignage de leur regret.

*Les deux armées Nauales se ioignent.
Bacchus deffaict vn grand nombre
d'Indiens. Eurymedon met le feu
aux vaisseaux de Deriades, & luy
estant espouuenté, il fut contraint de
se retirer en la ville.*

LIVRE TRENTÉ-NEUVIÈSME.

A PRES que Mercure eut ra-
conté ceste belle histoire de
Phaëton à Bacchus, il monta
au ciel, luy laissant, & la ioye,
& l'admiration, Bacchus s'estonnoit
grandemēt de ce que Iupiter auoit per-
mis vn si grād desordre entre les Astres,
& comment son chariot estoit tombé.
Au mesme temps les Rhadamanes arri-
uerent, donnant aduis que les vaisseaux
estoiēt fabriquez, en attendant le com-
mandement que l'on leur feroit de les
fretter. Lycus fūt esleu Admiral, & le
conducteur de la flotte. Cependant

Deriades qui se pourmenoit sur les tours de la ville, apperceut au port vn grand nombre de Nauires que les Arabes auoient faiçts, il iura en colere qu'il les saccageroit pour ce subiect, & leur feroit vne cruelle guerre. Les Indiës ayãs entendu le desseing que Bacchus auoit pris de les poursuiure en vne armee Naualle, furent estonnez & perdirent courage iusques à ce que Deriades dissimulant le mal qui le talonnoit, cōmandalen riant que l'on tirast les vaisseaux de toutes les Isles circonuoisines, & les matelots experts à la marine. Ce qui fut faiçt en grande diligence, mais apres que la flotte parut sur le riuage. Deriades pour donner de l'asseurance à ses gens leur fit ceste harangue d'vne voix superbe & arrogante.

Mes amis, vous sçauiez que le genereux Hydaspe vous a nourry à la guerre & aux combats, preparez-vous encore à defendre vostre Roy & vostre liberte, il faut se seruir de ruzes, apportez du feu afin que ie bruste leurs vaisseaux, & que ie les subiugue tous par eauë, & par feu, & si ie sçauois que Bacchus fut vn Dieu, ie m'efforcerois à le reduire en cendre,

ce n'est pas vn bon tesmoignage de dire qu'il a changé le fleuve en vin par art magique, & par les artifices de la Thesalie. Comme i'apperceu ce chāgement si estrange, ie ne m'en estonnay point, en sçachant la cause, que si (commel'on pourroit penser) ceste couleur fut venue d'une autre riuere, mon pere ne meriteroit pas le nom de Martial, dont la rougeur de son eauë represente le sãg, le courage & la cruaute de la guerre: mais si i'eusse sceu alors que ceste eauë eust esté metamorphosée en vin, i'eusse remply le fleuve de terre, & destruit l'odeur & la framboise de sa liqueur, le passant à pied sec, commel'on dit que Neprune fit tarir la riuere des Argiens: mais Bacchus n'est point Dieu commel'on croit. Il a desguisé le lieu de son extraction, où est le trisulque de son pere, où sont les marques de sa genealogie, Iupiter ne combat point Mars avec des pampres & des fueilles, & le bruit de son tonnerre n'a point de rapport avec le son des Cymbales, n'y son sceptre avec vn Thyrse, n'y la pluye qui est sa cuirasse avec la nappe d'un cerf, ny le ciel estoillé avec les diuerses couleurs,

que l'on remarque aux peaux des Pantheres. Mais si vous dittes qu'il a receu la vigne, & les raisins de Iupiter, & qu'il les a donnez aux Lydiens, & à Bacchus. Iupiter a donné le Nectar à Ganymede, & s'il surpasse le vin en douceur, Bacchus celebre en terre ses banquets avec les Satyres : mais Ganymedes avec les Dieux immortels, que s'il estoit Dieu comme il se vante, il seroit à la table de Iupiter, & ie ne pense pas qu'il soit yssu de luy, encore que l'on dise qu'il gratifia Zagree de son foudre, & Bacchus de la vigne.

Deriades se prepara au combat, tous les soldats s'assemblerent, armez de picques, de cuirasses, & de boucliers, à dessein de soustenir le combat Naual. Cependant Bacchus fit ceste harangue militaire à ses gens de guerre pour les animer au combat.

Compagnons qui estes yssus de Mars, & de la genereuse Minerue, aqui les guerres & les stratagemes sont passeremps, & exercices, preparez-vous à receuoir vne armee Nauale, & tuez les Indiens, de peur qu'ils ne mettēt le feu à nos vaisseaux, combattez donc vaillamment les

esperances de nos ennemis serōt vaines, que si Deriades ne peut resister à nos efforts, i'en'auray pas besoing d'assistance ny mesme de Iupiter : mais si la necessité de mes affaires le requeroit. Je demanderois secours à Neptune mon oncle, & à tous ceux qui luy appartiennent. Je croy que Glaucque m'y rendroit du service, à cause qu'il est voisin de Thebes, & de la terre d'Æonie, Melicerte mō cousin submergera la flotte de Deriades, en recognoissance de la nourriture que i'ay receu d'Ino sa mere, avec le petit Palemon. Vn Prophete m'a predict autrefois la victoire.

Je suis l'amy de Prothee (me dit-il) & Thetis armera les filles de Neree. Ino se rencontrera aux combats avec les Bassarides. Je susciteray Æole, le Dieu des Vēns pour le service de Bacchus, & Borthee s'escrimera de ses tourbillons, luy qui a autrefois rauy la Nymphe de Marathon, le Zephyre encore qu'il soit foible de l'estomach & d'haleine, fera tout ce qu'il pourra pour obliger son Iris, la Messagere de Iupiter.

Mais, ô Æole ne te mets point en peine

de me defendre, demeure en tes prisons,
& n'esmeut point tes vents pour renuer-
fer leurs vaisseaux dans la mer: car mon
Thyrse est assez puissant pour les
vaincre, sans emprunter vn secours
estranger.

Après qu'il eut fait ceste harangue, les
Capitaines monstrent à leur conte-
nances qu'ils abandonneroient leurs
vies à toutes sortes de perils & d'occa-
sions. L'on sonna la trompette, & les re-
gimens s'assemblerent. Le son retentis-
soit aux riuages, comme si ce fust esté vn
Echo. Après que les deux armées se fu-
rent jointes, le chocq se donna assez as-
prement. Bacchus inuestit la flotte des
Indiens, comme les pescheurs font aux
poissons avec leurs filets. *Æacque* ge-
neroux Capitaine fit ceste priere à Iu-
piter.

Iupiter, si autrefois vous nous auez
obligez, quand vous auez lauë la terre
des cendres de son embrasement, par la
pluye, ne nous desniez point ceste fa-
ueur, afin que l'on voye que Iupiter gra-
tifie son fils, non seulement en la terre,
mais aussi en la mer. Faites aussi qu'*Æac-*
que terrasse les Indiens avec autant de

courage, qu'il desire la faueur du Ciel, pour les fruicts de la terre, obligeant Ceres & Bacchus. Iem'armeray cependant contre Deriades. Enuoyez-moy vn Aigle qui conduise nostre armee, & qu'un oyseau fatal paroisse à nos ennemis, ou que le mesme porte avec soy diuers presages. Que ie seray ayse de voir cet Aigle deschirant le serpent, qui sera le symbole de leur perte. Si vous voulez nous surcharcher de vos courtoisies, faites paroistre la victoire par vostre tonnerre, ou par les esclairs qui parurent en la couche de Semele, & bruslez les vaisseaux de tous les Indiens, en vous ressouvenant des amours de la belle Ægine, & honorez l'Aigle qui a seruy à vostre jouissance.

Erecthee se tourna vers le Septentrion, & fit ceste requeste à Boree.

Boree mon gendre, prends les armes en faueur de ta Nymphes, & de son pere, donne la victoire aux Satyres, & oblige Erecthee & Bacchus. Fais esleuer tes bourrasques, & tes tourbillons cōtre Deriades, & le cōbats. Tu y as assez d'aduantage: car tu sejourne en Trace, où Mars te fait des leçons de la guerre, Submerge

la flotte des ennemis par les tēpestes, en faueur de Iupiter, de Pallas, & de Bacchus, en terre souuenans de Cecropie, les Nymphes tirent à l'aiguille tes aduātures amoureuses, honorant Illisse, où tu jouis de la Nympe d'Atticque, apres l'auoir rauie dans l'impetuosité de tes vents. Ie ne doute point que le vent d'Orient n'oblige les Indiens : mais encore qu'il le voulu, ie ne l'apprhende point : car il est esclau de Boree, aussi bien que les autres. Ie sçay que Corymbase Roy d'Æthiopie, ne retournera plus au Midy : mais qu'il sçache que ce vent le controollera de prest. Quant à Zephyre, il n'est pas à craindre ; car sa foiblesse est trop grande. Sus donc, gratifie ton beau-pere, Neptune & Minerue ne manqueront pas de tenir le party de Bacchus, l'un pour les Citoyens de sa ville, l'autre pour les enfans de Iupiter son frere. Vulcan y employera son feu, en faueur des enfans d'Erethee, bruslant les nauires de Deriades. Mais sur tout donne nous la victoire par vn naufrage general de leurs vaisseaux, afin qu'Erethee conduise les ennemis captifs en Cecropie, & alors la

ville d'Athenes chantera les loüanges de Borce, & les merites d'Orythie.

Ce grand Capitaine se delibera de ne s'espargner point en ceste guerre nauale. La flotte estoit gouvernee par Phœbus, & Mars en estoit le principal Pilote. Dimes leua les encres, & mit la voile au vent. Euryale se preparoit aux combats, assisté du courage d'Halymedes. Les Cyclopes & les Satyres ne furent pas moins genereux. Les Indiens inuestirent leurs vaisseaux, & le chocq fut si sanglant que l'eau de la mer commençoit à rougir de la quantité du sang qui estoit respandu. Il en fut tué vn grand nombre d'une part & d'autre: Les soldats tomboient morts dans les flots, estans chargez de leurs cuirasses & de leurs armes, & l'eau leur seruoit de tombeau, & le ventre de la Baleine de biere & de sepulture. Les heaumes & les boucliers nageoient sur la superficie de la mer. Les veaux marins regorgeoient le sang, & l'escume blanche flotloit aux riuages distinguee de la couleur rouge: Melicerte estoit tout ensanglanté, & Leucothee auoit couronné sa teste de fleurs, se resioüis-

sant de la victoire que Bacchus deuoit remporter sur les Indiens. Thetis jetta l'œil de faueur sur luy, donnant courage à Doris & à Panopee. La belle Galatee y parut, & conspira la perte des ennemis, desirant voir son Cyclope victorieux. La passion & l'esperance luy donnoient de la crainte, n'ayant point d'autre ambition que voir Polypheme, combattre avec Bacchus contre Deriades, ayant supplié Venus de fauoriser le fils de Neptune de ceste courtoisie. Les filles de Neree estoient à l'entour de Neptune: & luy appuyé sur son Trident, consideroit ce qui se passoit en ceste guerre nauale. Comme il apperceut que d'autres Cyclopes estoient employez en ces occasions, jaloux de l'honneur & de la gloire de son fils Polypheme, tint ce discours picquant à Bacchus.

Bacchus, vous auez tant de Cyclopes en vostre armee, & neantmoins il y a sept ans que vous combattez sans remporter la victoire, vous nourrissant de vaines esperances. Vous ne vous aduisez pas que vos Capitaines ont besoin de l'indomptable Polypheme. Je m'asseure que si mon fils eust paru aux alarmes & aux as-

sauts qu'il eut subjugué luy seul toutes les Indes. Il a rendu des services à Jupiter en la deffaitte des Geans, lors qu'Ægëon faisoit la guerre aux Dieux avec ses cet mains. Il le fit abismer aux enfers, & pareillement Briaree.

Thoose la mere de Polyphemen'eut pas moins de dueil & de ressentiment pour ce sujet. Neree s'estonna grandement de voir tant de vaisseaux, & Neptune admira le nōbre des corps morts qui flottoient, & l'effort que les regimēs de Bacchus firent sur les Indiens. L'un estoit blessé au ventre, l'autre auoit vn coup de picque dans la teste: plusieursomboient dans la mer. On couppoit les cordages des masts & des voiles, & les dards voloient en si grande abondance, qu'ils faisoient ombre en l'air. Quelques vns se precipitoient du mast dans l'eau: les autres s'exposoiēt à la mercy des orages sur vne table. Phlogis descocha vne fleche: mais il ne frappa point Bacchus. Vn autre ne fut pas plus heureux en son coup, il blessa vn Thon. Corymbase s'escrimoit de sa picque, s'efforçant de percer les vaisseaux des Satyres: mais ses efforts estoient inutiles. Deriades voulut

dardervn jaelot à Bacchus, mais le coup ne porta point, & assena vn Dauphin qu'il rendit demy mort. Halymedes prit vn rocher & le lança aux ennemis, mettant à fond vn vaisseau. Les soldats s'acrochoient reciproquement pour se joindre. La flotte fut diuisee en quatre parties, l'une du costé d'Oriēt, l'autre de l'Occidēt, les deux autres au Septentrion & au Midy. Morrhee plein de courage & de generosité, soustenoit la violence du cōbat, passant promptemēt de nauire en nauire : mais Bacchus le blessa avec son Thyrse. Ceste playe le contraignit de se retirer en la ville, où vn Brachmane excellent Medecin le guarit par des paroles magicques. Cependant les soldats de Bacchus tailloiet tout en pieces. Le bruit estoit grand, les vns dardoient des jaelots, les autres cōbattoient avec des pāpres, tirans à la rame. Tous ceux qui tomboiet dans la mer du costé des Indiens y estoient enseuelis : mais les gens de Bacchus se sauoient à nage, & surmōtoient les flots. Le combat ne fut pas esgal, Iupiter donna la victoire à Bacchus, & Neptune le fauorisa. Melicerte ne fit pas moins d'execution. Les Vents

s'armerent contre les ennemis, en faveur des Bacchantes, les Zephyrs souffloient, le vent du Midy s'esleuoit cōtre celui d'Orient, les vns pour Deriades, les autres pour Bacchus. Boree plus pluilsāt que tous, troubloit la mer de bourasques & de tempestes. Neree chanta la victoire, & Thetis faisoit resonner aux riuages vn Echo, combattant pour les Satyres. Eurymedon Cabeire se seruit d'un artifice, qui donna vn grand aduantage, mettant le feu dans vn vaisseau. La flamme courut dans la flotte, & brusla tout. Les Nereides furent contraintes de se retirer au fond de l'eau. Les Indiens abandonnerent l'armee & le combat, & se sauuerent en terre. Apollon se prit à rire, voyant que Mars auoit esté vaincu par Vulcan, apres auoir esproutié la rigueur de ses liens. Deriades ne peut esteindre le feu, & fut contraint de sortir de son vaisseau, & de se retirer en la ville, fuyant les assauts des deux Elemens contraires.

Minerue ayant pris la ressemblance de Morrhee, persuade à Deriades de rallier ses soldats, & de combattre Bacchus. Deriades trompé par cet artifice se resoult de dōner la bataille, où il est tué par Bacchus. Cherobie accuse Morrhee son mary de trahison. Les Indes sont donnees en butin aux Satyres. Bacchus retourne des Indes victorieux, & demande au Soleil les antiquitez de la ville de Tyr.

LIVRE QVARANTIESME.

DERIADES ne peut euitter le malheur qui luy arriua en la perte de ses vaisseaux. Minerue l'aperceut près du riuage, comme il se retireroit, & ayant pris la ressemblance de Morrhee, luy persuada de rallier ses gens, le trompant par ce discours.

Deriades, où fuyez-vous? à qui auez-

vous laissé la conduite de vostre flotte? comment est-ce que i'auray l'assurance de paroistre deuant nos subjects, & vous deuant Orsoboé, quand elle sçaura que vous aurez abandonné vostre armée? Ne craignez-vous point que vostre fille Chirobie ne vous en fasse des reproches, elle qui a tant de courage, & qui a combattu vaillamment avec son mary? Permettez à Morrhee ceste faueur, qu'il puisse reparer vostre faute. Si vous voulez ie subjugueraï nos ennemis, & mesme Bacchus. Quant à moy ie ne sçaurois vous appeller mon beau-pere, voyant vostre fuitte, ie ferois tort à mon honneur. Donnez vn autre mary à Chirobie, car i'abandonneray la ville, & m'en iray en la terre des Medes, ou en Scythie, de peur que vostre gēdre ne participe à vostre ignominie. Vous direz que ma femme est genereuse, & que ie ne suis pas assuré d'en auoir vne de son merite. Il y a des Amazones au mōt Caucase, qui ont plus de courage & d'adresse à la guerre, i'en espouseray quelque vne qui me sera agreable, sans luy assigner aucū doüaire. Ie ne sçaurois receuoir en ma couche la fille d'vn pere qui est si lasche.

Comme ceste Deesse luy eut parlé de
cette façon, elle luy persuada de repren-
dre les armes. Deriades se proposa de
ioindre Bacchus, étant trompé par les
ruses de Minerue, qui auoit pris la res-
semblance de Morrhee.

Morrhee, (luy respondit-il) cesse de
me faire des reproches, pourquoy me
reprends-tu si aigrement? Bacchus que
ie combats n'est pas vn homme com-
mun. Il se metamorphose en mille for-
mes. Ie ne sçay à qui ie fais la guerre:
Quand ie pense le frapper d'un dard, ou
auec mon espee, il deuient lyon: quand
ie le veux tuer, i'apperois vn serpent:
quand ie luy veux descocher vne fleche,
ie voids vne flamme ardante: Quand
ie me suis resolu de tuer le sanglier,
qui m'apparoist, ie frappe vn taureau.
Tellement que ie ne combats pas vne
beste: mais vn grand nombre de toutes
sortes. Quelquefois il s'esleue en arbre,
& ie luy prepare des dards: mais à l'in-
stant il se change en eau coulante.
Tous ces changemens m'ont donné
vn iuste sujet de crainte. Ces artifi-
ces de Magie m'ont refroidy le coura-
ge, & me font fuir ses allarmes,

Neantmoins ie me suis proposé de le
soustenir, iusques à tant que i'aye vaincu
ses sortilèges.

Deriades parut au champ de bataille,
& se presenta à Bacchus, ne se ressouue-
nant point de la victoire qu'il auoit rem-
porté sur luy, lors qu'il le garrotta dans
son chariot. Il ne l'eut pas si tost joint, &
qu'il eut le dessein par trois fois de le
percer : mais les coups ne portoient
point. Et quand il veid au quatriesme
que Bacchus estoit inuulnerable, il ap-
pella son gendre Morrhee, qu'il croyoit
estre auprès de luy, neantmoins c'estoit
Minerue qui en auoit pris la figure. Ce-
ste Deesse se remit en sa forme ordina-
re, & s'esloigna de Deriades, fauorisant
Bacchus de son assistance. Deriades s'es-
pouua grandement, recognoissant la
tromperie du Phantosme, qui auoit des
rapports avec Morrhee. Bacchus pour-
suiuit son ennemy à la course: mais quand
Deriades fut au riuage du fleuve Hy-
daspe, il ne peut reculer plus loin. Il
creut que son pere le secoureroit. Ce-
pendant Bacchus qui le suiuoit de prest
l'accula, & le tua d'un coup de son
Thyrse. Le pauvre Deriades tomba

mort dans l'eau, entre les bras d'Hydaspe.

Après la guerre & la victoire des Indes, les Dieux remonterent au Ciel, Les Bacchantes louèrent le stratagème de Bacchus. Les Satyres accoururent promptement, & frapperent de rage & de fureur le corps de Deriades. Orsoboé sa femme, ayant entendu ces tristes nouvelles s'abandonna aux larmes, & aux regrets. Elle se deschira la face, & couppa ses beaux cheveux, portant la cendre sur sa teste, en tesmoignage de regret, & rompit ses vestemens.

Chirobie n'eut pas moins de regret & de ressentiment de la mort de son pere. Protonoé tesmoigna qu'elle supportoit l'accident de son pere, & de son mary Oronte avec beaucoup d'impatience, faisant ces plaintes qu'elle arrosa de larmes.

Oronte, tu es mort en la fleur de ton aage, tu m'as laissée veuve, sans avoir encore experimenté les douleurs que les meres endurent en la deliurance de leurs enfans. Je ne t'ay point veu retourner de la guerre après la victoire. Tu as

esté vaincu par toy-mesme, & de ton espee propre. Tu as donné ton nom au fleuve où tu es enseuely. Il est mort entre les ennemis & les estrangers. Comment appelleray-je mon mary ? Je le deplore comme estant mort sans enfans, de ses propres armes, & dans le fleuve. Je deplore Deriades & Oronte, ils ont tous deux esté enseuelis dans l'eau. Les flots ont englouty Deriades, & aussi Oronte. Ma mere Orsoboé scauoit bien le malheur qui deuoit arriuer en ces mariages. Elle donna Oronte à Protonoé, & Morrhee à Chirobie, dont Bacchus apprehende le courage & la generosité. Mais elle est beaucoup plus heureuse que moy: car elle possède encore son mary, & le Thyrsé ne l'a point dompté, ny le fleuve ne l'a point englouty. Mais moy i'ay deux afflictions bien cuisantes, celle de mon mary, & l'autre de mon pere. Ma Nourrice cesse de consoler ta fille, donne-moy le moyen de ressusciter celuy que i'ay tant aimé, & ie ne me ressouuiendray point de l'infortune de mon pere. Enseigne-moy quelqu'un qui me puisse faire oublier les vifs ressentimens que i'ay de sa fortune. Qui

est celuy qui me portera au Temple de Daphné? qui me conduira au fleuve Hydaspe, afin que ie baise les flots qui le recellent, afin que ie voye Oronte dans ses vagues. A la mienne volonté que mes larmes fussent changees en fontaines, & que ie coulasse au lieu où Oronte prend son flux. Je serois semblable à Cometho, qui fut tant aymée du fleuve Cydenus, & qui se plaisoit tant en ses embrassemens. Si ie pouuois auoir l'accomplissement de mes desirs, ie ne voudrois pas me descharger dans la mer, abandonnant Oronte, comme Periboë qui fuyoit Neptune. Mais s'il ne m'est pas permis de mourir en la presence de Daphné, ie desire que mon pere Hydaspe m'enseuelisse, de peur que ie voye celebrer les festes de Bacchus en Phrygie, & que ie ne sois contrainte de joüer des cymbales aux Orgies & aux Bacchanales, ou que ie ne sois la miserable captiue d'un Satyre, ou que l'on dise que la femme du superbe Deriades Roy des Indes, a esté prise en la guerre, & qu'elle sert Bacchus.

Toutes les fēmes qui auoiēt interest en

la perte commune de leurs enfans, ou de leurs maris, resplendirent abondance de larmes. Cheirobie n'eut pas moins de dueil que les autres, ne deplorant pastant la mort de son pere, qu'elle se fascha de l'amour de son mary, ayant entendu qu'il auoit poursuiuy la belle Chalcomede avec passion, & qu'il auoit esté trompé d'elle.

Morrhee (ce dit elle de jalousie) est cause de la mort de Deriades, ayant espargné les Satyres par dessein. Il n'a pas employé son courage cōme il pouuoit, & n'a pas voulu venger la mort d'Oronte, & de mon pere. Il n'a point offensé Chalcomede, l'ayant conseruee par amour, & fauorisé encore les Bassarides. Dites-moy, ô Parques, qui a perdu les Indes? Qui a tant affligé les deux filles de Deriades? Oronte en mourant en la guerre a laissé Protonoé yefue, avec beaucoup de regrets, & Morrhee a desobligé Chirobie. Mō regret doit estre plus grand que celuy de ma sœur. Protonoé a eu vn mary qui a defendu sa patrie, & Chirobie en a eu vn qui l'a ruinee, portāt les armes pour l'Amour, & non pour la liberté. Mō mariage a esté malheureux,

& cause de mon infortune, car Morrhee a contribué à la perte de la ville, estant le seul subiect de ce que ie suis sans pere, & moy qui suis fille du Roy des Indes, peut-estre ie seray appelée la miserable seruante de Chalcomede. O Morrhee, trompeur que tu es, tu possede encore aujourdhuy la terre des Indes, mais demain tu seras en Lydie, esclauue de Bacchus, pour l'amour de la belle Chalcomede. Ioüis donc à plaisir de ses embrassemens, tu ne crains point les disgraces & les reproches de Deriades, il y aura encore vn Dragon qui te poursuura en conseruant sa virginité.

Cherobie fit ces plaintes, & Protonoe sa sœur renouella les regrets, leur mere Orsiboe s'escria en ceste façon.

L'esperance & le soustien de nostre pays sont perdus, ie ne verray plus Deriades mon mary, ny Oronte mon gendre, Deriades est mort, & la ville des Indes a esté pillée, les murailles ont esté abbattues, à la mienne volonté que Bacchus m'eut tuee, me iettant dans le fleuve Hydaspe avec Oronthe & Deriades, que son eauë m'engloutisse, i'embrasseray mon mary dans les flots, & ie ne ver-

ray point Protonoë esclau de Baecheus, n'y Cheirobie affligee d'une infortune plus grande, estans assubiectie aux rigueurs tyranniques d'un Satyre. Ie veux mourir, afin que ie n'aye point d'autre mary apres Deriades, ie desire estre compagne des Nereides, & de leur seiour. Neptune receut Leucothee, viue qu'elle estoit, il ne me refusera pas ceste courtoisie, & au lieu de la belle & de la blanche Ino, i'en feray vne autre vn peu brunnette.

Ces femmes faisoient ces plaintes dans les tours, mais les Satyres se resioüissoient tenans ces propos.

Nous auons remporté vn grand honneur, nous auons subiugué les Indes, ayant vaincu Deriades. Bacchus qui entendoit ces discours, y prenoit le contentement que reçoient les vainqueurs. Cependãt il commanda que l'on enterrast les morts, & que l'on dressast vn tōbeau, & vn buscher de cēt pieds de longueur, Mygdon y fit resonner son flageollet, & Berécynthe ses instrumens, Steno & Euriale déplorerent l'accident arriué à leur sœur Meduse, lors que Persee luy couppa la

reste: mais apres les funerailles, les Bas-
farides se mirent à danser, imitant le
chant des Corybantes, la cauallerie tes-
moignoit aussi la ioye qu'elle auoit de
tant de victoires remportees, apres que
ces solemnitez furent passees, Bacchus
dōna à ses Soldats le pillage des Indes, &
ayant souueñce que les sept ans estoient
expirez, & qu'il deuoit rerourner en
son pays victorieux. Comme il faisoit
les apprests de son retour, les gens tra-
uailloient au butin, les vns prenoient
grande quantite de jaspe, les autres des
hyacinthes, les autres fouilloient l'or
dans les minieres, les autres tiroient les
esmeraudes de la roche, les autres buti-
noient des Elephans, & des Lyons de la
grotte d'Emode. Les Satyres condui-
soient en leurs vaisseaux grand nom-
bre de Pantheres.

Quelques vns d'eux portoient des
perles de la mer rouge à leurs Nym-
phes, plusieurs menotent en Phrygie
des captiues pour les assubiectir à leurs
seruices, les Bacchantes chantoient
les louanges, les triumphes & les vi-
ctoires de Bacchus. Apres tout cecy,

le butin fut diuisé ainsi qu'il trouua à propos selon la qualité, & selon les merites des combattans. Bacchus licentia toutes les compagnies des confederez, & des amis qui l'auoient secouru en ceste guerre, les Regimens sortirent de ce pays avec des dépouilles de diuers prix, les vns emportoient des oyseaux de diuerses especes, les autres des pierreries, chantans à haute voix les stratagemes de celuy qui auoit vaincu Deriades, chacun se retira en son pays, le seul Asterius qui n'estoit pas du pays des Massagers, & du fleuve de Phasis, quitta Gnosis, la ville de Crete pour habiter en la Scythie en haine de Minos son pere, & de Pasiphae.

Bacchus apres ses victoires & ses triomphes, passa par le mont Caucase, & monta iusques à l'Arabie, où il porta la vigne, instituant les Orgies, & les Bacchanales, de là il passa en Assyrie, desirant veoir la ville de Tyr, la patrie de Cadmus, il print vn grand contentement à considerer les excellens ouurages de ces peuples, & la viue couleur du pourpre, qui fut trouuee par le moyen d'un chien qui mangea ce poisson sur le

riuage, dont il en eut la gueule teinte en elcarlatte, desconurant la belle teinture qu'il recelloit secrettement sous son escaille pour la donner aux vestemens des grands Roys de la terre, il entra dans la ville, & admira sa structure, & ses superbes Palais. Neptune l'auoit bastie en la figure d'un croissant dās la mer semblable à vne Nymphe qui nage, on y pouuoit remarquer la teste, le sein, les pieds, & les mains, les ports en faisoient plusieurs membres. Neptune l'entouroit comme s'il en eut esté amoureux, & qu'il l'eust voulu embrasser. La beauté de ce lieu donnoit de l'estonnement à Bacchus, non seulement à cause de la richesse de la ville, mais aussi en consideration de ce que les bergers pouuoient auoir vne grande familiarité avec les Pilotes entonnans des chansons agreables sur leur flageolet, au riuage de la mer, les Bergers n'auoient pas moins de communication avec les pescheurs, l'isle qui estoit ceinte d'eauë contenoit des vaisseaux & des pastis tout ensemble. On voyoit d'un costé vn port des Nautonniers des voiles des cordages, on enten-

doit le bruit des flots & des vents, & de l'autre des bergers, des troupeaux, des prez, des bocages, des charruës, & l'on entendoit le son agreable des chansons rustiques, & le tremouffemét des fueilles quand les Zephires les caressent de leurshaleines. Comme Bacchus eut aperceu toutes ces commoditez, il y prit vn singulier contentement.

Ay-ie iamais veu (te dit-il) vne plus belle & plus riche isle dans la mer. Ie ne pense pas qu'il y en ait vne qui la puisse esgaler. Les arbres sont voisins du riuage, & font vne ombre aux vaisseaux qui sont au port, les Hamadriades qui sont dans les bois, peuvent communiquer avec les Nereides. Le vêt de Midy favorable aux fruiets & aux fleurs, rafraichit les pais, & promettans aux Pilotes vne nauigation asseuree. Ceres peut parler à Neptune, luy faisant des signes d'amour avec sa faux, & l'autre luy peut respondre avec son trident.

O ville heureuse ! l'image de la terre, & la figure du ciel, ce n'est pas sans raison que plusieurs ont desiré de te posséder.

Bacchus passa par la ville, considerant

la beauté des ruës, il veit le Palais d'Agenor son bisayeul, & les cabinets de Cadmus, & les chambres secrettes d'Europe, qui futraue, & seressouuenant de Iupiter, & de sa Metamorphose, il admira les fontaines, & particulièrement les ruisseaux de la Najade Abarbaree, recognoissant la belle Caleroe, & son eauë amoureuse d'Acmaëon. Mais apresqu'ils eut pris le contentement de ce paisage agreable, il inuocqua le Soleil, & luy fit ceste priere.

Soleil, le Roy des Astres, & le Pere du monde, qui chassa les tenebres de la nuit, illuminant nostre Hemisphere, & le Pole, & qui produict les siecles. La ieunesse & la vieillesse, donnant la clarté, & la lumiere à la Lune, tu fais le Printemps, l'Esté, l'Automne, & l'Hyuer, la nuit cede à tes rayons, quand tu te leue sur nostre Orizon, & les couleurs des plantes, & des fleurs sont distinguees, & apres que tu es sorty des baings de l'Ocean, tu fais tomber vne rosée qui humecte la terre au matin, & qui la rend plus fertile. On

t'appelle Belus au fleuve d'Euphrate, & le Jupiter Ammon en la Lybie, & l'Apis du Nil, le Saturne des Arabes, & Jupiter des Assyriens, le Phoenix dont la vie dure mille ans, se renouvelle sur un buisier fait de bois odoriferans à tes rayons qui allument le feu & se redonne la vie apres la mort, en tirant les principes de la corruption, soit que tu sois le Serapis des Egyptiens, ou le Phaëton à diuers noms ou Mythes, ou le Soleil des Babiloniens, & l'Apollon de Delphé en la Grece, soit que tu sois Pæon le Medecin, où le Ciel mesme estoillé, exauce mes prieres, & entends ma voix d'une aureille courtoise.

Comme Bacchus luy eut fait ce discours : ce Dieu luy apparut avec ses rayons & avec son esclat, & le prenant par la main, il le fit manger à sa table. Il n'estoit point hors de propos que celui qui auoit gousté du lait de Iunon, beust de l'Ambrosie.

Astrochiton (luy dit Bacchus) dis moy qui a entouré ceste Isle d'eaux, quel Dieu est-ce qui a basti ceste Ville, & qui a esleué ses Palais, qui a fondé ces Rochers dans la mer, d'où ceste
grande

Machine a prins son origine, qui a balancé ceste terre en l'air dans le centre des eaux.

Bacchus (luy respondit-il) escoutte-moy. Ie te desduiray toutes les particularitez secrettes de l'antiquité de Tyr, les peuples habitēt en cel lieu dès si long temps, que l'on peut dire qu'ils sont aussi anciens que le Monde. Ils tirent leur extraction de la terre, quant à ceux qui ont basti la Ville & comment cela arriva. Ie te le diray. tout au long, lors que le Soleil se laue dans les bains de l'Océan se couchant sur nostre Hemisphère, & que le nuict donne repos aux mortels, comme i'auois desseing de faire bastir vne belle ville, ie leurs apparu en songes, & leur dis apres que ie leur eu osté la terre ferme.

Fils de la terre, resueillez-vous. Faites-moy vn vaisseau pour cingler dans la mer, abbatez les Pins de la forest, & les taillez en aix, afin que vous puissiez en fabriquer vn nauire, dressez-les poutres & les foliues pour fondement, & y conioignez plusieurs pieces, rapportees avec des Cheuilles, dressez vn mats au milieu & y accommodez vn voile attaché à des

cordages , & prenant le vent propre, vous laissant conduire au lieu où vous verrez deux Rochers que la nature a fait, & vn Aigle perché sur ses branches, avec vn feu qui sort de terre, nourrissant cet arbre sans le destruire, & pareillemēt vn serpent prodigieux qui rampe sur ses fueilles , neantmoins il n'y a point de guerre entre eux , le dragon n'infecte point l'Aigle de son venim, ny l'Aigle ne perce point l'autre de ses crochets: le feu ne brusle point l'oliuier , ny l'oiseau, le serpēt ne luy porte point de dommage, prenez l'Aigle & le sacrifiez à Neptune, presentās le sang à Iupiter & aux Dieux, les rochers seront fermes , & vous bastirez dessus vne ville.

C'est ce que ie leurs fis entendre, mais quand ils furent resueillez , ils se delibererent d'obeir aux commandemens que ie leurs auois fais, ils furent troublēz de ce songe , & apperceurent dans la mer des poissons qui se conduisoient avec leur queue, ils s'imaginerent que le vaisseau dedié à la nauigation deuoit auoir vn gouuernail, & la mesme figure. Apres qu'ils l'eurent fabriqué, ils s'abandonnerent au gré des vens , le chargeant de

grosses pierres, afin qu'il eut plus de poids, & de solidité, (à l'imitation des gruës, qui portent des cailloux dans leur becs, de peur que la trop grande violence du vent ne les maistrise) iusques à tant qu'ils furent arriuez au lieu qui leur estoit designé; ils monterent sur les rochers, cherchans l'Aigle qui leur auoit esté remarqué, ils le prindrent, & le sacrifierent à Iupiter, & à Neptune, le sang qui en coula affermit les rochers, & ils bastirent dessus la ville de Tyro.

Voilà Bacchus ce que vous pouuez apprendre de moy, touchant son origine, & de ceux qui s'employèrent à l'establisement de ceste belle cité. Quant aux fontaines, ie vous diray ce que i'en puis sçauoir; les Nymphes de ce pays estoient grandement chastes: mais Cupidon qui se plaist à reduire toutes les beautés sous sa puissance leurs fit ce discours.

Belle Abarbaree, encor que vous soiez curieuse de conseruer vostre virginité, receuez ce traict amoureux que toute la nature ne peut refuser, ie descocheray vne fleche à Callirhoe, & la rendray amoureuse. Mais vous direz que

vous estes Najade, & que vous tirez vostre extraction des eauës, que vostre mere estoit vne fontaine, mais Clymene estoit Najade aussi bien que vous, & fille de l'Ocean, & neantmoins elle a flechi à l'amour du Soleil. L'Ocean qui est le pere de la mer a recherché les embrassements de Tethys. Resolvez-vous donc à suiure sa condition, & d'obeir aux passions de l'amour comme elle. Galatee encore qu'elle tire son origine de la mer à aymé Acis qui depuis fut changé en fontaine, & a caressé son Polypheme sur les riuages de l'Ocean, prenant plaisir à l'harmonie de son flageollet, toutes les Nymphes qui ont donné le nom aux metamorphoses des sources & des riuieres, ont esprouué mes loix. Vous scauez avec combien d'affection Alpheé poursuivit Arethuse, combien aussi elle ayma avec passion. Pourquoi employez-vous vostre ieunesse aux exercices de la chasse, & aux passetemps de Diane, ceste Deesse n'est pas yssüe de la mer comme Venus.


Cupidon tint cet autre discours à Calirho. Drosere, ne cachez point vostre merite à ceux qui le peuuēt adorer, vous deuez subir le joug de l'amour, conside-

rant que Venus mesme y a esté assuetie
encore qu'elle soit la mere des affectiōs.
Receuez donc en vostre cœur les poin-
tes amoureuses, & ie vous appelleray, la
Reine de la mer, & la sœur de Venus.

Cupidon bāda son arc, & tira trois fle-
ches à ces Nymphes, & les rendit amou-
reuses des Bergers. Le Soleil entretint
Bacchus de ces propos, le contentant de
ces antiquitez, il luy donna vne camisole
estouillee, & Bacchus luy fit present d'une
couppe d'or, le laissant en la ville de Tyr,
& entra dans l'Assirie.

*Bacchus apres la reduction des Indes,
passe en Assyrie. Venus arriue au pa-
lais d'Harmonie, & luy demãde par
curiosité, si Iupiter à pris resolution
de donner les loix à la ville de Beroe,
Elle luy monstre les tables d'Ophion.
Venus supplie Cupidon de rendre
Bacchus & Neptune amoureux de
Beroe sa fille.*

LIVRE QVARANTE-VNIESME.



OMME Bacchus fut entré dans
l'Assyrie, il passa sur le môt Li-
ban, portant ses vignes, & ses
pampres, & en remplit tout le
pays circonuoisin. Il veit le palais de Ve-
nus, & les jardins d'Adonis, où les chari-
tes prenoient leurs passetemps, & le bo-
cage de lierre, entouré de Cipres, & de
vignes. Mais, ô Muses, Amymones du Li-
ban, chantez vn hymne en la loüange de
la ville de Beroe, & rapportez ce qu'elle

de recommandable, son origine, & les guerres de Iupiter & de Bacchus.

La ville de Beroe est vn lieu si agreable, quel'on la peut appeller, le port des Amours, elle est situee dans la mer comme vne isle, & neantmoins le païsage y est fort accompli, les habitans ont la commodité de se pourmener dans vn petit bois de Cypres, quand les Zephyres caressent les arbres au plus chaud de l'Esté, les bergers font resonner leurs amours aux forests: mais ces delices sont encore accompagnez d'vtilité: car Ceres eslargit ses moissons d'une main liberale, & l'on y veoit les laboureurs employez à la charruë. La pointe de la ville aduance dans la mer, & Neptune l'arrose de ses fleuves, comme s'il vouloit embrasser & baiser vne Nymphé, luy presentant grande abondance de poisson pour seruir sa table. Du costé du Septentrion, l'on ne void qu'une confusion d'eauës, & vers le Midy, vne campagne sabloneuse, du costé du Sidon il y a plusieurs Iardins remplis de fleurs & de fruiçts, & les aduenuës sont grandemēt agreables, à cause de la quantité des arbres qui portēt ombre aux passans, quāt

le Soleil darde ses rayons à plomb aux iours de la canicule , du costé d'Occident il y à vn promontoire, où l'on void vn beau païsage de bois, de jardin , & de prez, la les bergers communiquent avec les pescheurs & les laboureurs avec les Pilotes, les habitans de ce lieu sont aussi anciens que l'Aurore & que le monde, & ils n'ont point esté engendrez de pere, ny de mere, mais de la Nature qui les à produicts de la combination des Elements, non semblable Cecrops qui auoit la partie inferieure de Dragon , & la superieure d'homme , n'y à Erechthee qui a esté produit de la terre, & de la semence de Vulcan , mais aux Dieux immortels. Ils peuplerent depuis la ville de Berroé, que Saturne auoit bastie, lors que Rhee luy donna vne pierre à manger, pour sauuer Iupiter , voyant qu'il auoit deuoré ses autres enfans.

Saturne ne peut descouurir cet artifice , & la mangea, sentant son estomach chargé , il beut vn fleuve tout entier, comme si c'eust esté vn pot qui eust esté plein d'ambrosie. En ce temps-là Iupiter estoit fort petit, & les foudres n'auoiēt point encor éclaté du ciel, & les

tonnerres n'auoient point encore espouuanté les Titans, en la guerre qu'il eut depuis contre eux. Mais cette ville est plus ancienne, & alors Tharsus n'estoit pas, ny Thebes, ny Sardis, où le fleuve Pactole fait rouler ses sablons dorez, ny la ville d'Achaïe, ny l'Arcadie, encore qu'elle soit deuant la Lune. Le Soleil mesme qui donne la lumiere à cet Astre, luy est posterieur. Elle fit apparoiſtre le Soleil, dont les rayons dissipèrent les nuages du Chaos, & receut Venus chez elle: Car lors qu'elle fut engendree de la mer, par la seule operation de la Nature, sans secours d'homme. Elle parut en cette naissance, & la couurit d'un voile, & à l'instant ceste Deesse ne s'arresta pas en Paphos, ny en Bibline, ny en l'Isle de Colidos, passant legerement le pays de Cytheree, & nageant à son ayle elle couppa les flots de sa poitrine, & vint aborder à Beroë. Elle a donc receu Venus la premiere, & ne fut pas si tost au riuage, que les herbes & les fleurs commencerent à croistre sous ses pieds. Les roses, les lys, & le passe-velours rendirent vne suauë odeur, qui embaumoit l'air. Elle enfanta Cupidon l'harmonie

du monde, & le principe d'amour. Ce jeune enfant sortit de son ventre avant le temps, la chaleur & la force precipiterent le terme. Il ne fut pas si tost nay qu'il vola entre les bras de sa mere, cherchant sa mammelle, mais il fut si difficile à contenter, que toutes les femmes qui se presentoient ne peurent le rassasier de lait: Mais Beroé l'esleua, & le nourrit. Elle qui est le sejour de Mercure, la terre de la Police, & des Loix, la maison de resiouissance, la demeure de Venus, les passetemps de Bacchus, le contentement de Diane, le port des Nereïdes, le Palais de Iupiter & de Mars, le jardin des Charites, & leur Orchomene, & la perle de toute l'Assyrie, la compagne de l'Ocean, & de Thetis: car l'on peut dire qu'ils l'ont tous deux bastie, lors qu'ils engendrerent ceste Nymphé, que l'on appelloit Amymone. Mais l'on dit que Venus enfanta Beroé en Assyrie des embrassemens d'Adonis, & que Mercure ayant sceu que les neuf mois de terme ordinaire des femmes grosses estoit expiré, luy apporta vn Liure Latin, & & que Themis la fit coucher dessus, où

elle se deliura comme les Lacedemonienes fouloient accoucher dessus vn bouclier. Apres ceste heureuse deliurance, Mercure prit le soin de l'esleuer & de l'anourrir. Et l'Ocean preuoyant que la villerempliroit tout le monde de bonnesloix & de polices, respandit ses eaux par toute la terre, & se renouuella, comme le serpent se depouille de sa vieille peau desirant de rajeunir, en tesmoignage de l'esperance qu'il auoit conceüe. Les Saisons se resioüirent de la naissance de ceste Nymphé. Toute la Nature monstra qu'elle auoit de l'interest à la conseruer pour le bien commun des hommes. Les animaux mesmes firent paroistre quelques marques secretes de leur joye par leur apriuoisement. Le lyon s'adoucit, & ne deschira point le taureau, au contraire il luy leschoit la teste: le cheual hannissoit d'une telle façon, courant legeremēt qu'il sēbloit vouloir tesmoigner son contentemēt: les pantheres sautoient sur les lievres, sans leur faire mal: le loup ne faisoit point la guerre aux troupeaux de brebis: les Chasseurs abandonnoient la poursuite des Cerfs, & se mirent à danser avec les Chiens,

& les Sangliers. Les ourses s'appriuoiserent avec les vaches, & les bœufs avec les lyones. Les dragons flattoient les elephans, les arbres & les chesnes exprimerent des voix humaines, comme s'ilseussent esté animez. Venus voyant cet applaudissement vniuersel de toute la Nature, se prit à rire: mais elle ne peut regarder les sangliers de bon œil, comme si elle eust preueu le malheur qui luy deuoit arriuer de leur part, en la mort de son Adonis par la jalousie de Mars.

La belle Nymphe Beroë qui a pris le nom de la ville, ne fut pas si tost née, que la Deesse Astree la nourrit de son lait, & luy donna du miel à manger. Si elle vouloit boire elle luy presentoit de l'eau d'Ilisse, ou de la fontaine qui coule de la montagne Pieride. Les Charites abandonnerent l'Orchomene pour la seruir, & la parer de bouquets de fleurs, & de couronnes. Sa beauté esgala celle de Venus. Thetis considerant son merite & ses perfections, luy porta enuie, & se cacha craignant la mesdisance de Cassiopee. Iupiter ne l'eut pas si tost veüe, qu'il en deuint amoureux, voulant se

metamorphoser en Taureau, & la passer à nage: mais la ressouvenance qu'il eut des amours d'Europe, luy empescha ce dessein: joint aussi qu'il craignoit d'avoir la peine de l'enleuer au Ciel, faisant concurrence à son Estoille. Toutes ces considerations luy amortirent sa passion. Il laissa Beroe à son frere Neptune. Telle estoit ceste Nymphé, le parangon de beauté, & le chef-d'œuvre de Nature: la grace emmiellée qu'elle avoit en son discours, surpassoit les delices & les mignardises de l'éloquence d'Apolon, & flechissoit les plus sages à l'amour par ses charmes, & par les attraites de sa douceur. Ses yeux riant qui descochoiēt des fleches amoureuses, estoient plus agreables que ceux des Carites, & obscurcissoient leurs rayons, comme la Lune paroist entre les Estoilles, quand elle est en son plein. Son merite fut sans enuie: car il l'a dompta par ses vertus, & par sa parfaite beauté. Venus qui voulut l'obliger, & bastir vne ville, & luy donner son nom, courut par toute la terre pour en prēdre vn modelle, & ayant veu Mycene & Thebes au voisinage du Nil, elle designa le lieu avec dessein d'y

establi les loix de Solon, & regardant la belle Ville d'Athene: elle enuia la possession à sa sœur Minerue, elle passa légèrement dans l'air, & vint au Palais de d'Harmonie, où les quatre portes sont tournées à l'opposite des vents: Astynomee donna aduis à ceste Nymphede la visite de Venus, à l'instant elle se delibera d'aller au deuant. Harmonie traçoit à l'aiguille vn excellent ouurage, où elle represẽtoit le Ciel avec ses estoilles, & la terre entourrée d'eauës, & les fleuues, & les fontaines qui couloient dans l'Ocean. Comme elle s'employoit à ces artifices, sa seruante l'aduertit que Venus estoit arriuee, & qu'elle estoit à la porte. Harmonie quita son aiguille, & la vint saluer avec toutes sortes de courtoisie, la fit seoir dans vn Throsne magnifique, & Venus luy dit d'vn visage triste & graue.

Harmonie la mere de la generation, & le soustien de la nature, & l'esperance du monde, les Parques ne trauaillent que sur les ouurages que vous leur produisez tous les iours, ditte-moy, vous qui estes la nourrice des Dieux immortels, & aussi ancienne que le

monde, a qu'elle ville on donnera les loix & la police. I'ay fait le mariage de Jupiter & de Iunon sa sœur, comme il desiroit, aussi en recompense, il me promit qu'en peu de temps il donneroit ses loix à vne ville qu'il fauoriferoit, pour m'obliger. Je desire sçauoir de vous s'il les garde pour Cypre, ou pour Paphos, Corynthe, ou Sparte, d'où est Lycurgue? N'a-t'il point de bonne volonté pour la belle Beroë? Cependant exercez la Iustice, & faictes viure les hommes en accord & en paix, puisque vous estes Harmonie. La Deesse Astree qui fauorise les Legislateurs, & les Iurisconsultes, m'a enuoyé par deuers vous, & qui plus est Mercure le protecteur de l'equité, me persuade que c'est la moindre chose que ie puisse faire pour les hommes que ie fais naistre, que de les conseruer, par loix & par ordonnances.

Venus, mere d'Amour (luy respondit Harmonie en la consolant) ayez bonne esperance, i'ay sept tables où tous les destins sont escrits, qui portent les noms des sept Planettes: La premiere est de la Lune: la secōde de Mercure, où sont

toutes les loix, la troisieme est de vostre nom, la quatrieme du Soleil, la cinquiesme de Mars, la sixiesme de Jupiter, & la septiesme de Saturne. Ophion y a escrit toutes les destinees, & les antiquitez du monde: Mais puisque vous me demandez à quelle ville on donnera les loix, ie vous diray que ie les garde pour la plus ancienne, soit quel'Arcadie prenne cet aduantage, ou la ville de l'Aurore, ou Sardis, ou Tharsus, quel'on estime estre des plus ancienne. Mais quant à moy ie n'en puis rien dire. Les tables nous releueront de ce doute.

La curiosité luy fit regarder ce qu'Ophion auoit escrit des antiquitez de Beroe. Elle trouua en la table de Saturne que ceste ville estoit aussi ancienne que le monde, ayant pris son nom d'une Nymphé que les Romains bannis de leur pays appelloient Berite. Elle aprit ces Oracles: Mais apres qu'elle eut consideré ces merueilles, elle regarda la seconde, où elle apperceut les aduantures des Dieux. Pan (ce dit-elle) donnera l'inuention de la fluste, Mercure de la lyre, & Hyachnys d'autres instrumens, Orphee

Orphee flechira les Rochers insensibles
par sa harpe, & Linus fils d'Apollon
comme le destin le porte, enrichira la
musique d'accords & d'Harmonie, &
Arcrie donnera la cognoissance de l'A-
strologie & des mouuemens des Cieux,
& des Planettes. Endymion obseruera
les changemens & le cours de la Lune,
Cadmus donnera l'inuention des let-
tres, & Solon establira ses loix, & Ce-
crops institura les mariages à Athenes,
Venus perdra beaucoup de Ville par
ses pratiques amoureuses.

C'est ce que le destin auoit ordonné
quand Auguste gouvernera tout le mō-
de. Iupiter donnera l'Empire à Rome,
& les loix à Beroë quand Cleopatre ap-
paisera la guerre nauale. Berite la nour-
rice de la paix, & de la conuersation hu-
maine gouvernera la terre vniuerselle.

Après que Venus eut receu ces ora-
cles: elle s'en retourna en sa maison & y
rencontra Cupidon, & l'embrassa de
la ioye qu'elle auoit de ces bonnes nou-
uelles, baisant son arc & sa trouffe, &
luy fit ce discours artificieux: comme
si elle eut esté faschee.

Cupidon ma seule esperance, & la

marquer ses pas avec ses pieds, & à contempler la beauté de son visage, & la grace de son allure, & particulièrement pour ce qu'elle n'estoit point fardee, n'ayant point emprunté son mérite & sa perfection des efforts de l'art: mais de la Nature, qui luy auoit si liberallement departy tout ce qui luy estoit nécessaire à vne si parfaite beauté. L'esclat & le lustre de sa face ne donnoient point de fausses couleurs par la reflection d'un miroir, sous l'apparence d'une trompeuse image. Elle portoit ses cheveux à la nonchalance, mesprisant la parure & l'ornement. Aussi vne beauté naïfue & negligee: est plus agreable que celle que la vanité cultiue, & que les mignardises reparent. Vne cheueleure à la rustique, flottante sur les espauls, & partroublée par les doux Zephirs, est plus belle que celle qui est arrestee par les cordons de diuerses couleurs. La chaleur de la saison, & les ardeurs de la Canicule auoient donné la soif à Beroë, elle s'approcha d'une fontaine, & se baissa pour boire, puisant l'eau avec ses mains, iusques à tant qu'elle se fust rassasiee. Bacchus qui la suiuiot, en fit de mesme, & en

Cupidon rend Bacchus & Neptune amoureux de Beroë. Elle ne veut point flechir à leurs persuasions. Venus importunee de ces deux Amans, leur propose un combat, promettant sa fille au vaincœur.

LIVRE XXXXII.



CUPIDON estant persuadé par ce discours, s'enuola en l'air, avec dessein d'accomplir les vœux de Venus, portant son arc & son carquois, passant aussi legerement qu'un feu, ou un Ardent engendré des exhalaisons de la terre, ou comme un esclair prodigieux qui paroist aux nauigations & aux armées. Le battement de ses ailes fit un grand bruiet, & arriua en Assyrie, & mit deux fleches à son arc. Il vint au mont Liban, & rencontra Maron le

Sf

Cocher de Bacchus, qui le conduisoit. Ayant apperceu Neptune & Bacchus, au mesme temps il leur descocha ses fleches amoureuses. Bacchus fut espris de passion, & porta des presens à Beroë de sa vigne, & de ses pampres. Neptune qui n'eut pas moins d'amour, se delibera de luy faire des dons dignes de son merite. Mais Bacchus eut plus de passion, apres qu'il eut bāqueté avec ses Satyres, (aussi est-ce l'ordinaire que le vin & la bonne chere esmeuvent la jeunesse) l'Amour ne luy donna point de repos, l'object agreable qui le captiuoit le possedoit entierement, & ne luy permettoit pas de se deliurer de ceste douce seruitude. Cupidon, apres auoir obey aux commandemens de Venus, remonta au Ciel aussi legerement qu'un oyseau, & dit.

Si Bacchus est victorieux des Indiens, il ne le sera pas de Beroë: Je le brusleray d'un feu qui est plus difficile a esteindre que celui de Vulcan. Il a ietté les yeux sur ceste Nymphé, & en est deuenu amoureux, n'est-il pas vray que les yeux sont les messagers de l'amour?

Cependant il couroit çà & là vagabond par la forest: la suiuant pas à pas

ne pouuant se rassasier de la regarder, & tant plus il la consideroit: tant plus il la vouloit veoir, il pria le Soleil, se ressouuenant de sa Clymene, qu'il retardast sa course en faueur de sa Nymphé, & qu'il arrestast son chariot & ses cheuaux. Il l'a suit tousiours, & tourne à l'entour d'elle, comme par ignorance. Mais Neptune qui n'estoit pas moins passionné, partit du mont Liban, dissimulant son affection, & chercha celle qui l'auoit blessé. Ses pensees amoureuses, & ses desseings estoient aussi inconstans que les vens, & les flots de la mer. Bacchus demeura seul dans la forest avec elle.

O Nymphes Oreades, dittes-moy qu'est-ce que Bacchus a desiré de voir de plus agreable que son corps en ceste solitude bocagere? Il l'entretint de son pere Adonis, comme ayant avec luy vn estroit lien d'amitié, à cause du rapport de condition qui les attachoit tous deux aux exercices de la chasse. Il luy mit la main au sein, & toucha ses mammelles, la baisant plusieurs fois à la desrobee, & la conduisoit dans l'espais du bois, comme si l'ombre & les tenebres luy eussent donné plus de liberté, prenant plaisir à

consolation de Venus, Iupiter veut-il
destruire mes enfans? I'ay enfanté Har-
monie apres les neuf mois, & si elle a re-
ceu de grandes disgraces. Latone a en-
gendré Diane avec beaucoup de dou-
leurs & d'angoisses, qui maintenant se-
coure les accouchemens des femmes, &
aussi Phœbus. Je ne veux pas vous racon-
ter comment i'ay tiré mon extraction de
la Mer & du Ciel: mais i'ay voulu execu-
ter quelque chose qui fust digne de moy,
& obliger ma mere la Mer, & ioindre le
Ciel avec la Terre. Et à ce dessein desco-
chez vne fleche amoureuse à Neptune &
à Bacchus, afin qu'ils soient passionnez
de l'amour de vostre sœur Beroë. Et en
recompense, ie vous donneray le luth
d'or, dont Phœbus obligea la belle Har-
monie dans la couche nuptiale. Je vous
le mettray entre les mains, comme vn
bon augure de la ville quel'on doit ba-
stir, afin que vous soyez joueur d'instru-
mens, aussi bien qu'Archer, prest à def-
fier Apollon.

trouua la liqueur meilleure que l'ambrosie. Ceste Nymphé le voyant attenué d'amour, luy dit:

C'est en vain, Bacchus, que tu bois ceste eau froide, elle ne peut pas esteindre le feu d'Amour, ny estancher la soif, ny mesme tout l'Ocean. Demande à Iupiter, la mer qu'il passa avec Europe, ne refroidit point les affections qu'il auoit pour celle qu'il conduisoit, au contraire sa passion s'augmenta. Alphee nous tesmoigne assez que ce feu est inextinguible par ce moyen: car il n'a pas sceu esteindre son feu par les flots qu'il faict couler, & oublier son Aretheuse.

Beroé puisa de l'eau à la nonchalance: mais Bacchus fut troublé de deux passions, de crainte, & de jalousie, croyant que Neptune possedoit son cœur. Il luy dit ces paroles pour se descharger de son doute.

Belle Nymphé, receuez mon nectar, & laissez l'eau aux Nayades, fuyez les ruisseaux de ceste fontaine, de peur que Neptune ne vous desrobe vostre virginité: car il a des artifices puissans. Ne sçauéz-vous pas ce qu'il pratique cōtre Tyro. Gardez-vous donc de ses ruses, & qu'il

ne vous ravisse, comme il fit autrefois sous la forme du fleuve Enippe. Je voudrois estre changé en fontaine, afin que ie puisse comme Neptune embrasser ma Tyro.

Bacchus se metamorphosa en vn jeune homme, semblable à vn Chasseur, avec vne contenance chaste & modeste. Tantost il regardoit la poincte inaccessible d'un rocher, tantost il consideroit les forests, tantost il arrestoit ses yeux sur vn pin, ou sur vn ormeau: mais il desroboit vne œillade en secret, de peur qu'elle ne se detournast dans quelque buisson, n'auoit-t'il pas vne belle occasion de contenter son esprit de cet object. Il s'approcha de Beroë, & luy voulut parler, mais la crainte l'empescha.

Bacchus, (luy dit-elle) où est ton Thyrs meurtrier? où sont tes cornes & tes dragons? C'est grand merueille, Bacchus apprehende vne Nymphé, luy que les Geans craignent. L'Amour a vaincu celui qui les a deffaits, il a subjugué les Indiens, & se rend esclaué d'une simple fille, se laissant gagner par elle, encor qu'elle n'ait point d'armes, luy qui a dompté les Lyons les plus farouche: il ne

s'est pas espouuanté de leurs rugissemēs,
& fremit à la voix d'une Nymphē, mais
ie veux te descouurir toutes les ruzes, &
les desguisemens de l'amour, les fem-
mes ont plus de passion que les hommes,
mais elles dissimulent mieux leurs affe-
ctions par des froideurs chastes, la hôte
qu'elles ont d'aimer leur faict cacher
leurs ressentimens: mais aussi ce feu cou-
uert & secret les brusle d'avantage que
celuy qui s'éuapore par le recit de son
martyre. Les Amans qui recherchent la
gloire, & le plaisir dans leurs souffrances
se deschargent de leurs passions, quand
ils les versent dans le sein d'un amy. Mais
Bacchus, ta modestie hôteuse m'est sus-
pecte, approche donc de Beroe. Il sem-
ble que tu craignes son object, & que tu
regarde ta Nymphē avec vne admiratiō
dissimulee, louë sa beauté qui surpasse
celle de Iunon, & paroïs en ta forme sans
desguisement, reproche aux Charites les
hommages & les tributs qu'elles doiuent
me rendre, & dis en ma faueur que Mi-
nerue & Diane me cedent l'honneur &
le prix, & que Venus m'est redeuable:
car Beroe qui se plaist à ces loüanges, au-
ra de la bonne volonté pour tes seruices,

receuant tes plaintes amoureuses. Les Nymphes ne desirent pas tant les richesses & les presens, que l'homme d'estre estimees belles. Flatte donc le merite, & les perfectiōs de celle que tu dois aimer, que tes yeux l'admirent? mais il semble que tu apprehēdes ses regards: dis-moy que te peut faire vne Nymphe sans armes, elle ne darde point de fleches, ses yeux sont les archers que tu dois craindre dauantage, & sa beauté est vn dard, ne luy apporte point des choses pretieuses pour luy presenter, ny des perles Orientales, ny des pierreries selon la coustume des Amans, leur merite est la vraye recompense des courtoisies. Il me semble que tu as assez d'aduantage pour estre aymé. Les Nymphes aymēt le beau & non pas l'or & l'argent, ie ne veux point rapporter d'autre tesmoignage que d'Endymion, la Lune la caresse sans receuoir de luy aucuns presens, qui est ce qu'Adonis a donné à Venus pour ses faueurs. Orion n'a point obligé l'Aurore que d'amour, n'y Cephale aussi. Le seul Vulcain scachant que sa deformité ne pourroit estre aymable qu'à prix d'or pour reparer ses fautes, presenta des

donc à Minerue , & ne la peut flechir, estant contraint de se retirer avec vn refus, mais si tu veux m'obliger, fais sonner les instrumens de Rhea en signe d'amour , & chante les aduãtures de d'Aphné & d'Echo , & comment elles fuirent les caresses , & les embrassemens des Dieux qui les poursuiuoient, entonne la force & la violence que Pan vouloit exercer sur l'Oreade qui fut changée en pin , representant son mal-heur, & sa mort , peut-estre il deplorera l'infortune de ceste pauvre Nymphé , accompagne ses tristesses & ses regrets des accens funestes, & d'une harmonie triste & melancholique.

Comme Beroe luy eut parlé de ceste façon, tout à l'instant Bacchus se troubla, & son esprit confus luy fournissoit beaucoup de legeres pensees qu'il ne pouuoit exprimer , ayant la langue attachee par la forte imagination qui le dominoit. Neantmoins à la fin il se deschargea de ce trouble & de ces fantaisies , la trompant par ce discours plein d'artifice , & luy persuada qu'il croyoit fermement qu'elle fut la belle Diane.

Belle Diane où est vostre arc, qui vous
a desrobé vostre carquois, où auez vous
laissé vostre houpelande, où sont vos
brodequins, vos rets & vos panneaux, &
vostre meutte de chiës, ie croy que vous
ne voulez pas chasser, à cause que Venus
visite aujour d'huy son Adonis.

Bacchus feignit de l'honorer pour ce-
ste Deesse, mais Beroë rioit en son cœur
de ceste croyance. s'esleuant par vanité,
pource qu'elle estoit estimée aussi belle
que Diane, encore qu'elle ne fût qu'une
simple fille & mortelle, ne recognoissant
pas la tromperie, & le mensonge de Bac-
chus. Mais il se fascha de ce qu'il ne peut
la flechir, & se delibera de luy faire en-
tendre la passion qu'il auoit pour elle.

Car il ne sert de rien d'aymer si on l'i-
gnore, à ce subiect il demeura le iour, &
la nuict dās la forest avec elle, & ne pou-
uoit se lasser, oubliant le repos, le som-
meil, & les delices des bāquets. L'amour
n'apporte point la satieté. Homere qui
a escrit le contraire s'est trōpé. Cepen-
dant il estoit attenué d'amour, portant
en son cœur vne playe amoureuse, &
tout ainsi qu'un bœuf furieux court par
les prairies, agité de rage, estriuant con-

tre les bergers & les bergeres. Ainsi Bacchus est affolé d'amour, & est vaincu encore qu'il ayt remporté beaucoup de victoires contre de puissans ennemis. Il voulut trouver vn remede à sa passion, & à ce dessein, il se communique à Pan luy demandant conseil en sa maladie: mais Pan se prit à rire, neantmoins il eut compassion de son mal-heur, & le consola, & comme il n'auoit pas esté plus heureux en ses poursuittes, il luy donna quelques aduis.

Bacchus (luy dit-il) i'ay pitié de vostre martyre, ie n'ay pas eu meilleure fortune que vous, ie croy que Cupidon a vidé tout son carquois contre nous. Qu'il y a de contentement en amour, quand les Nymphes ont de la passion, considerez le bon-heur d'Endymion; quand la Lune amoureuse le poursuit. Venus suit son Adonis par les montagnes, & n'a pas moins d'affection que son amant. Voiez les traux & les peines de Iupiter. Il n'a pas esté plus fauory que nous, sans ses artifices & sans ses metamorphoses, Cupidon luy eut esté ingrat: Vous sçauiez les disgraces que i'ay receu d'Echo, & le contentement que vous dōne vostre Nympe.

Pan le laissa là avec ces consolations, Bacchus ayant veu le païsage agreable où estoit Beroe, se changea en la forme d'un païsan.

Je suis vn payfan du mont Liban (luy dit-il) si vous voulez ie laboureray vos terres, & les arroseray, ie sçay trauailler selon le temps, & cognois ce qu'il faut faire aux quatre saïsons, ie laboure en Automne quand le Soleil est au Scorpion, ie seme lors que les Plejades sont en leur couchant, & les bleds se leuent à la premiere rosee qui tombe, lors que le Printemps sera venu, ie vous conuiray de venir en la campagne pour voir les lys & les roses de vostre iardin qui seront fleuries, ie viendray en la ville, vous dire, la vigne est en fleur, & les bleds commencent à meurir, la vendange est voisine, ie sacrifieray à Venus vostre mere, les premiers fruiçts, en frustrant Ceres. Voyez comme la fleur du Hyacinthe surcroist le Myrte, & cōme le Narcisse faict ombre au passeu elours. Retenez-moy d'oc p̄ pour vostre laboureur, & me prenez pour vostre jardinier, ie cultiueray particuliere-ment la terre où seront les plantes fauorisees de Venus, ie sçay prouigner les vi-

gnes, & enter les sauuageons sur de bons pommiers, & planter les palmes masles aupres des femelles, ie feray venir les roses sous les ormeaux, & si ie ne vous demander rien, i'ay moyen de vous seruir sans recompense.

Ces offres de seruice luy furent ingrates, car elle ne respondit rien, il fut contrainct de se seruir d'une autre ruse, il luy prit les panneaux de sa main propre, & luy dit les admirant.

Quel Dieu a faict cecy ? Je croy quant à moy que c'est Vulcan qui les a fabriquez sur l'enclume de Lemnos, estant jaloux d'Adonis, à dessein de luy tendre ces reths.

Bacchus la vouloit tromper par ces flatteries, le sommeil le faist dans ces inquietudes, il se reposa sur vne grosse touffe de passeuelours, & eut des songes amoureux, croyant la posseder en sa couche: mais cela n'est pas estrange, les actions du iour, & les desirs impriment les images de leur nature dans l'esprit de ceux qui dorment. Vn berger ne songe qu'à ses troupeaux, vn chasseur void tousiours les equipages

de sa chasse, & les cerfs qui s'eschappent en quelques halliers, les laboureurs mènent la charruë & picquent leurs dœufs. Ceux qui sont occupez à fayer les bleds aux grandes chaleurs de l'Esté, pensent tousiours en dormāt d'estre aupres d'une fontaine, pour estancher leur soif. De mesme Bacchus n'a point d'autres songes que ceux de l'amour & des embrasemens: mais quand il fut resueillé, il recogneut son abus, & la vanité de sa jouissance, desirant encore la tromperie d'un gratieux sommeil, & se coucha sur les mesmes plantes, mais elles se fanerent aussi tost, & les accusa d'ingratitude. La ressouvenance de ses songes agreables luy faict supplier Venus, qu'elle luy face veoir l'image des embrasemens amoureux, il se reposa, & dormit sur un Myrthe, & ne se peut rien imaginer qui le contentast. Il songea seulement qu'il estoit à la chasse avec Adonis, le fils de Myrrhe, & le pere de Beroë.

Bacchus passionné la poursuivit de plus pres, mais elle se cacha de son voile, lors il fut plus esmeu que deuāt: car les beautez cachees sont plus desirables, & tant plus les Nymphes se retirent de la veüe,
& de

& de la familiarité des amans, tant plus elles sont aimees avec passiō. Il s'approcha d'elle & reprit sa premiere forme, lui découvrāt le lieu de son extraction, & luy raconta les victoires qu'il auoit remportées sur les Indiens, & les faueurs qu'il auoit faictes aux hōmes en leur donnant le vin. Ce qu'il fit avec vne hardiesse, qui sembloit tesinoigner que sa premiere crainte estoit de dissimulation, & de courtoisie.

Beroe (luy dit-il) i'ay abandonné le ciel pour vostre amour, vos grottes me sont plus agreables, que le sejour des Dieux. Je les prefere à la cour des immortels. Je ne desire pas tant le sceptre de Iupiter, quel'honneur de vostre alliance. Vostre nectar est plus doux que celuy que Ganymede verse aux bāquets des Dieux. I'ay entendu que Venus est vostre mere : comment donc fuyez les embrassemens amoureux? vous demenez vostre extraction par vos froideurs. C'en'est pas Minerue ou Diane la chaste qui vous a engēdree, mais Venus la nourrice de l'amour. Pourquoy dōc estriuez-vous contre ses persuasions, vous direz que Minerue n'a point flechy aux pas-

sions des amans, mais aussi elle est produitte parvn moyen extraordinaire sans liaison amoureuse, il n'est pas raisonnable que celle soit mere qui n'en a point eu en sa naissance, ne degenez point de la courtoisie de vos parens: car s'il est vray q'u Adonis soit vostre pere, ne refusez point l'obeissance que vous devez à ses commandemens, gardez-vous d'encourir les disgraces de Cupidon, il est cruel à celles qui le mesprisent. Vous sçauiez que Syringue pour auoir rejetté les offres de Pan, a esté changée en cāne, & si elle chāte cōtre sa volōté les amours de ce Dieu, encore qu'elle fuyes sa poursuite. Daphné fille de Ladon a esté metamorphosée en laurier, pour auoir desobligé Apollon, & si ses fueilles seruent à le couronner, ces exemples vous doiuent faire leçon de douceur & de sagesse. Receuez les vœux de Bacchus qui se presente à vous en qualité de mary, & de seruiteur, ie porteray les reths & les panneaux d'Adonis. Ie dresseray vne couche semblable à celle de Venus ma sœur: Neptune s'est efforcé de vous obliger par ses presens: mais que peut-il vous donner qui soit digne de

vous ; l'eauë salee de la mer , l'odeur
puante des peaux des veaux marins , ne
les receuez pas , ie vous donneray quel-
ques Bassarides pour vous servir , ma vi-
gne & mes pampres , si vous vous plaisez
à manier le dard d'Adonis prenez mon
Thyrse , & laissez la pointe du trident de
Neptune. Belle Nymphe fuyez les tem-
pestes de la mer & les ravissemens de ce
Dieu que Neptune jouisse d'une autre
Amymone que de vous , apres qu'il en
eut pris son plaisir , elle fut changee en
poisson par la disgrace de Ceres , en des-
pit de Glaucque qui l'auoit mesprisee ,
& Neptune la conuertit & transforma
en pierre.

Il a poursuiuy Astree , & apres auoir
abusé d'elle , il la metamorphosa en vne
isle.

Quelle recompense a-il faict à la
belle Amymone apres qu'il en eut la
jouissance ? Il ne vous peut donner
pour toute recompense que de l'eauë ,
& de la mousse : mais moy ie vous
présenteray toutes les richesses d'Aly-
be. Celle qui est plus blanche que
l'argent fin , mesprisa ce metal. Ie
vous donneray ce qui croist dans le

Aeue d'Eridan : mais vostre beauté sur-
passe les presens des Heliades : car Be-
roe esclatte plus que l'ambre. Vos yeux
rendent des rayons plus vifs que les dia-
mans, ie vous feray vn bouquet de roses,
car vostre visage à des rapports avec ces
fleurs.

Beroe bouscha ses deux oreilles, de
peur d'entendre ces persuasions amou-
reuses, n'ayāt pas pour agreable la pour-
suitte qu'il faisoit d'elle. Ces refus es-
meurent Bacchus d'une telle facon qu'il
desespera de pouuoir rien obtenir, quād
les Nymphes fuient les rencontres des
amans, elles augmentent leur passion.
Comme il estoit en ceste confusion Ne-
ptune apperceut Beroe sur le riuage qui
se retiroit dans la forest, il contemple sa
beauté & sa grace, son sein pommellé
qui se mouuoit aux souspirs amoureux,
cet object agreable le rait, il supplia
Venus de luy estre fauorable en ceste
occasion.

Beroe (dit-il) se peut vanter qu'elle est
la plus belle de toute la Grece, ie ne fais
point d'estat de celles qui sont dans Pa-
phos, & dans Lesbos. Les Nymphes de
Cypre, & de Naxos luy sont redeuables,

elle s'est attribué toute la gloire d'Orchomene, l'on peut dire qu'elle est la quatrième des trois graces. Laissez donc la terre belle Nymphé, Venus vostre mer n'a point tiré son origine de ce seiour, mais de la mer, ie vous donneray mon Empyre qui est plus grand. Venez donc afin que vous faciez cōcurrēce à Iunon, & que vous commandiez par tout, puis qu'elle a le ciel pour partage. Vous aurez la mer, ce ne sera pas vne folle Bacchāte qui vo⁹.seruira, ny vn Satire cornu, ny vn Silene yure, mais ce sera Protee & Glaucus, & mesme Melicerte, si vous voulez, l'Ocean, & tous les fleuves seront prests à vous rendre seruice: Si vous desirez auoir des Nymphes, les Nereides vous feront compagnie, Ino mesme la nourrice de Bacchus y paroistra encor qu'elle ne le vueille pas en faueur de son fils.

Neptune ne peut la flechir au contraire elle témoigna ses refus par ses larmes, Neptune la laissa, desesperé de sa poursuite.

Adonis fils de Myrrhe (dit-il en soupirāt) tu dois te glorifier de deux choses, d'auoir engēdré vne si belle creature, & d'estre le mary bien-aimé de Venus.

Neptune passionné d'amour, offrit des presens à Venus, & à Adonis, avec promesse de recongnoistre Beroe de dons pretieux, & Bacchus ne luy en presenta pas moins en la suppliant de l'obliger : mais ce fut en vain, ceste Deesse estoit importunee par ces amans, & craignit de les irriter par ses refus, comme elle veid qu'ils estoient tous deux poussez d'une affection egale, elle leur proposa vn combat à dessein de donner sa fille à celuy qui remporterait la victoire.

Je voudrois (leur dit-elle) auoir deux filles, l'une pour Bacchus & l'autre pour Neptune : mais puisque ie n'ay pas eu ce bien, & que les loix de l'honneur & de la police, ne permettent pas qu'une Nymphe, soit à deux. Je me suis delibéré d'en gratifier le vainqueur du combat, au moins on n'aura pas la iouissance de Beroe, sans merite, apprestez-vous donc à subir les loix de ceste proposition, & celuy qui remportera le prix d'honneur aura ma fille, mais à la condition que vous vous obligerez par serment solemnel de ne vous point faire la guerre, irritez de jalousie & de regret. Je n'entends pas que

Neptune inonda la terre en la frappant de son trident, & que Bacchus demolisse & ruine la ville à cause d'elle, mais pour euitier à ces desordres, faiçtes vne promesse reciproque de vous deporter de ces ressentimens apres le iugement que l'on aura faiçt.

Neptune & Bacchus louïerent sa resolution, & iurerent par le Styx, par la terre, & par l'air, de suiure les ordonnances du combat. Comme ils furent d'accord, tous les Dieux descendirēt du ciel sur le mont Liban, pour veoir ce deffiamoureux.

Bacchus & Neptune combattent pour la belle Beroe d'un commun consentement. Psamathe supplie Jupiter de donner ceste Nymphé à Neptune, ce qu'il luy octroye, Cupidon console Bacchus, & luy promet les faueurs d'Ariadné.

LIVRE XLIII:

NEPTEUNE & Bacchus ayant cōsenty d'un commun accord de remettre la conquête de Beroe à l'euenement du combat proposé, s'appresterent à ce duel, neantmoins ceste Nymphé auoit de la bonne volonté pour Bacchus, & l'eut preferé à son corriual, apprehendant de tomber entre les mains du Dieu de la mer. Elle fut semblable à Dejanire, qui receut Hercule en ses bonnes graces, au preiudice d'Acheloüs. Cependant l'air ressonnoit en façon de trompette, & Neptune s'arma de son trident, & Bacchus de son Thyrse, vne vigne qui creut sur sō chariot, luy couurit la teste en forme

de couronne. Vn Elephant beut toute l'eau d'une fontaine, & seicha la veine, en sorte que les Nayades furent contraintes de se retirer en vn autre lieu. Neptune se mit en estat, & les Nereïdes luy promirent del'assister, & tous les Dieux Marins luy jurèrent toute fidelité. La Mer commença à esleuer ses flots, & le mont du Lyban s'estonna à ce grand bruiet. Les Thyades tuerent vn bœuf en la faueur du combat: Les vnes tiroient les entrailles du ventre, les autres les regardoient pour en tirer des presages heureux. Pendant ces ceremonies Bacchus dresseoit son armée, qu'il composa de cinq regimens: Le premier fut commandé par Oeneus, fils d'Ereuthalion & de Phyllis: Le second par Helicaon: Le troisieme par Oenopion, & le quatrieme par Staphyle, tous deux yssus d'Oenomas: & le cinquiesme par Melanthien Prince des Indiens, fils d'Oenone. Elle le couronna de pampres, & l'arrosa de vin, avec dessein de le seconder au combat.

Bassarides, (ce dit Bacchus les animant au combat) combattez vaillamment pour mon service. Cependant ie

feray raisonner ma trompette, & mes cymbales. Je desire que Maron fasse vn affront à Glaucque. Liez les cheueux des Nereides avec des lierres, & leur donnez des peaux de Pantheres, au lieu de celles de veaux marins. Que l'Ocean soit reduit sous nostre joug, & que Melicerte s'arme contre les Silenes, s'il a du courage. Enseignez à Phorces à sejourner sur la montagne de Tmole, au mespris de la Mer. Que les Satyres contreignent Neree avec sa ferule de venir en terre ferme, afin qu'il pratique le mesnage rustique. Couronnez Palemon de pampres, & qu'il abandonne l'Ocean, afin qu'il serue Rhee en la conduite de son chariot, & au gouvernement de ses lyons. Je ne luy desiray point les devoirs & l'affection que ie suis tenu de rendre à la consanguinité, encore qu'il ait esté citoyen de la mer. J'auray vn grand contentement de voir toutes ces Deïtes couuertes de la nappe d'un cerf. Preparez donc des cymbales à ces Nymphes, & que les Hydriades se messent avec les Bacchantes sans ceremonie: Et si Thetis resiste à vostre pouuoir, comme estant yssüe de la Mer, remarquez

son sejour, par dessein. Que Doris celebre les Orgies, & assiste aux Bacchanales, & que Panopee ne se fasse plus de bouquets de mousse, mais plustost de fleurs & de lierre. Idothee honorerà nos sacrifices de sa presence, & mesme Galatee. Il n'est pas hors de propos qu'elle rende service à Bacchus, & qu'Amymone le fauorise de son amour. Mais laissez les Nereïdes, ie ne desire point auoir de Nayades pour seruantes, de peur que Beroë ne conçoïue de la jalousie. Que Pan frappe Neptune de sa corne, & qu'il deschire le ventre de Triton. Que Glaucque serue Bacchus en ses Orgies, en faisant resonner les cymbales de Rhee, non seulement en la faueur de Beroë, mais aussi de la patrie & de la ville, deffendant à Neptune de l'esbranler avec son Trident, & s'il vouloit l'entreprendre ie m'y opposerois. Bacchus a des presages heureux de sa victoire. Outre cela Cecrops qui a restably la ville d'Athenes, traueilleroit apres Minerue, à la conseruation de Berythe. Iamais ie ne l'abandonneray: Ie rendray son port

tres-facile, couppant les rochers qui sont
voisins du riuage, & applanissant la rade,
Sus donc Mimallons, combattez vail-
lamment, & que vos peaux soient tein-
tes du sang de nouveaux Geans. Vous
voyez que tout l'Orient est reduit, &
que tous les Indiens obeyssent à Bac-
chus. Hydaspes a esté contraint de le re-
cognoistre: Mais apres les combats, ie
veux faire vne courtoisie à Neptune,
s'il veut la receuoir, qu'il chante l'Hy-
mencee de mes Amours, pourueu que
Beroë l'air pour agreable.

Bacchus, (luy respondit Neptune) ie
suis armé de mon Trident, n'as-tu point
de honte de contester avec moy, apres
auoir fuy Lycorgue? Mais ie ne m'en
estonne point, tu as esté produit par le
feu, & en ceste qualité tu me resistes.
Mais, ô Tritons, aydez-moy, & liez les
Bacchantes, & les faittes nager dans la
mer. Que les Satyres soient engloutis
dans les eaux avec leurs instrumens, &
que leurs cloches flottent au gré des
vents: Qu'une Bassaride dresse ma cou-
che dans le séjour humide de mon Em-
pire: Quant aux Satyres, ie n'en ay point
de besoin, ny de Menades, les Nereïdes

font beaucoup plus à desirer: Mais au contraire que les Mimallones se perdent dans les flots, & qu'ils boient de l'eau salee pour du vin delicieux. Et toy, Thetis, parois icy en estat triomphant, & regarde les presens que Bacchus nous fait. Il a conserué les *Æthiopiens*, & les peuples des Indes pour les *Nereïdes*. Amenez à Doris les enfans de *Cassiopee* la mesdisante, & les faittes esclaves, pour auoir offensé les *Nereïdes* par sa vanité, & que son *Estoille* soit transposée au *Pole Antarctique*. Mais toy, ô *Bacchus*, quitte ton *Thyrse*, & prends des armes plus aduantageuses, & d'autres cuirasses que tes peaux de *Pantheres*. Si la flame t'a produit, combats avec le feu, puis qu'il t'a seruy de nourriture, ou avec le foudre de ton pere. Ce ne sera point icy la guerre de *Deriades*, ny de *Lycurgue*, mais du Dieu de la Mer. Le Ciel mesme a autrefois apprehendé mon *Trident*, *Phaëton* en a esprouué les rigueurs en la guerre de *Corinthe*. Je fis esleuer les eaux de la mer iusques aux estoilles, les ardeurs de la *Canicule* sentirent le rafraichissement des ondes, & le *Dauphin* terrestre rencontra celui de la mer.

Neptune frappa la terre de son Trident, & à l'instant les flots s'esmeurent, & toutes les Deitez de l'Ocean s'armèrent pour Neptune. Bacchus ne fut pas moins assisté, ses lyons attelés à son chariot rugissoient, menassant les ennemis de celuy qui les gouvernoit. Triton qui a double nature, celle d'homme en la partie d'enhaut, & de poisson en bas, faisoit resonner son courage. Glaucque poursuivoit les Satyres, & Pan nageoit avec ses pieds de chevres, chantant la victoire sur son flageolet. Il luy sembloit entendre les voix entrecoupees de l'Echo, tesmoignant à sa contenance qu'il l'a recherchoit comme dans les montagnes, ou dans les forests. Vn Cyclope arracha vn rocher tout entier, & le lança aux Hydrides : mais comme le coup manqua, il frappa les Nereïdes, & heurta le séjour de Palemon. Protee abandonna le fleuve d'Isthmos, & s'arma d'une peau de veau marin, tous les Indiens s'approcherent de luy, pour le saisir au corps, mais ils furent trompez, car il se metamorphosa en arbre, & ses fueillages commencerent à s'esmouvoir aux halei-

nes des vents, & par apres en serpent, iet-
tant vn venim grandement nuisible. Il
ne se contēta pas seulement de ces chan-
gemens. Il se conuertit en lyon, & puis
en eau, trompant les Indiens par la di-
uersité de ces formes estrangeres & ex-
traordinaires: Estant en cela semblable
à Periclymene, qu'Hercules tua par le
conseil de Minerue, apres qu'il se fut
changé en vne mouche à miel. Neree
se porta avec beaucoup de courage
en ce combat. Les Nereïdes n'eurent
pas moins de generosité pour le seruice
de Neptune. Ino soustint le party du
Dieu de la Mer, encore que la consan-
guinité luy defendit. Panopee estoit des-
sus vn lyon de la mer, & Galatee prit la
masse de Polypheme, & tout ainsi que
ceux qui courent au but avec leurs cha-
riots sans se heurter, selon les loix de la
course, cōduisent leurs cheuaux à l'œil,
& tournent leurs chariots à vne espace
legitime, pour passer sans chocquer: ain-
si les Nereïdes qui sont portees sur les
poissons, vont par escadrons, euitans le
heurt des rochers. Toutes les Mers fu-
rent esmeuës, & tesmoignerent par l'a-
gitation de leurs flots qu'elles auoient

intéressent en la cause de Neptune. La Mer d'Icare, de Bosphore, d'Ægee, & Ionique, firent paroître leurs ressentimens, par l'émotion des bourasques & des tempestes. La Mer Adriatique resonnoit, s'élevant jusques au Ciel, & Nérée faisoit retentir vne chamade. Melicerte combattoit les Menades avec vn grand courage. Cependant les Bassarides s'apprestoient à la guerre, les vnes s'armerent de pampres & de lierre: les autres jouient de leurs cymbales. Les Mirmallons estoient montées sur des lions, monstrans des couronnes faites de serpens, avec vne fureur qui jettoit de l'écume, semblable à celle de la mer. Les Satyres estoient sur des Pantheres, avec leurs armes de lierre. Silene poursuivit Palemon, & frappa Ino de son Thyrses. Les Bassarides n'apprehendoient point la poincte du trident, & Nérée combattoit Pan: Mais aussi les Bacchantes attaquèrent Pallene. Neantmoins il ne peut le vaincre. Maron heurta rudement Glaucque, & les veaux marins s'entre-faisoient la guerre, les Satyres couroient dessus leurs Taureaux, Bacchus commanda aux Bassarides de sonner l'allarme

me avec les cymbales de Mygdon, & estant conduit sur vn ours furieux, il poursuivoit les poissons, & les monstres de la mer. Vn Silene sauta dans l'Ocean, comme s'il eust voulu tuer Neptune, combattant avec ses flots d'une façon furieuse, touchant les eaux insensibles avec son Thyrsé. La Nymphe Psamathe voyant les combats de Neptune & de Bacchus eut beaucoup de regret & de ressentiment.

Iupiter, (ce dit-elle) si vous voulez obliger Thetis recognoissant Neptune, qui attacha *Ægee* à vn rocher, pour auoir osé faire la guerre aux Dieux: Empeschez que Bacchus ne remporte la victoire, de peur que iene voye Neree esclaué apres la mort de Phorce, & que Thetis ne soit contrainte d'obeyr à Bacchus, & qu'elle soit conduite comme vne pauvre captiue en la terre des Lydiens, de peur qu'elle ne voye le tombeau d'*Achilles* en la terre de Phrygie, & prenez compassion de la miserable *Leucothoe*, dont le mary fut si cruel que de tuer ses propres enfans.

Iupiter exauça sa priere, & donna Beroë à Neptune, appaisant leurs combats par son foudre qu'il fit esclatter. Bacchus fut contraint d'abandonner la poursuite de celle qu'il auoit tant aymee, non sans vn grand ressentiment: car il auoit tant d'affection pour elle, qu'il ne peut l'oublier. Il se retira du combat avec tristesse, apres auoir entendu l'Epitalame, qui fut chantee en faueur de Neptune & de Beroë. Neree fit resonner ses chansons aux riuages, & Phorcis ne tesmoigna pas moins de ioye de ce mariage. Melicerte dansa avec les Nereïdes, & Galatee entonna sur son flageolet, l'Hymenée que Polypheme luy auoit autrefois appris. Neptune jouït de sa Nymphé, & la conduisit au pays d'où elle estoit. Neree d'Arabie luy donna pour estreine vn carquan de grand prix, ouurage tres-excellent de Vulcan, & ce que ce Dieu auoit faict pour les Nereïdes. L'Euphrate de Perse luy fit present d'vne toile d'Arachne, elabouree en perfection. Le Rhein luy donna grande abondance d'or, & le Pactole

la richesse de ses sablons, non pas avec libéralité; craignant d'offenser Bacchus Roy des Lydiens, & sa mere Rhee. L'Eridan luy descouvrit ses thresors, & Gen-dis luy eslargit ses biens avec prodigalité.

Mais comme Neptune estoit en la jouissance de ses amours, Cupidon consola Bacchus, & luy dit:

Bacchus, pourquoy te faches-tu de la perte de Beroë? Il n'estoit pas à propos que ceste belle Nymphe fust donnée à celuy qui commande en la terre, mais plustost qu'elle doit appartenir au Dieu de la Mer, à cause que Beroë tire son extraction de Venus la Maritime. Il m'a semblé que ceste alliance seroit plus conuenable: Mais tu ne perdras rien pour attendre; car ie t'ay reserué la belle Ariadné, fille de Minos. Oublie donc celle que tu as recherchée avec tant de passion, quitte le séjour du Liban, & viens en Phrygie, où les Nymphes t'attendent avec impatience, Pallene t'y inuite, & cependant ie couvriray ta couche de fleurs.

Cupidon consola Bacchus del'esperance qu'il luy donna d'Ariadné, & aussi-tost ce Dieu disparut, & s'enuola en l'air aussi legerement qu'un oiseau; & arriua au mont Olympe. Au mesme temps Bacchus, suivant les aduis qu'il auoit receus, partit des'Indes, & vint en la Lydie, où le Pactole faict rouler ses sablons dorez, & entra en la Meonie, portant à sa mere Rhee le butin de ses conquestes, & passa par toutes les villes de l'Europe, apres auoir subjugué vne grande partie de l'Asie.

*Bacchus apres la reduction des Indes
veut faire son entree en la ville de
Thebes, Penthee le fils d' Agaue luy
ferme les portes. Bacchus sup-
plie la Lune de punir ceste rebel-
lion. Les Eumenides troublent l'es-
prit d' Agaue.*

LIVRE XXXXIIII.

BACCUS apres ses victoires
& ses triomphes, partit des
Indes, & arriua en Aonie.
Les Nymphes tesmoigne-
rent la joye qu'elles eurent de le voir.
Les Bergers entonnerent des chansons
rustiques: Les fontaines resonnantes
bouillonnoient faisans paroistre leur
resiouissance: Le fleuve d'Asope sa-
uta, & Dirce precipita son cours. Les
Hamadriades chantoient sur les ches-
nes, honorant la vertu de ce vain-
cœur. Les Nayades n'eurent pas moins
de contentement: mais tous ces ap-

plaudiffemens ne furent pas accomplis: car Penthee qui commandoit en la ville de Thebes, ne voulut pas le receuoir. Il fit fermer les portes, luy refusant l'entree: neantmoins elles s'ouurirent d'elles-mesmes, comme recognoissant le pouuoir de ce Dieu. Les habitans se barricaderent: mais ceste resistance ne leur seruit de rien, l'armee de Bacchus entra, nonobstant leurs efforss, & fit vn grand bruiet. Les Lyons & les Panthes coururent par la ville, donnant vn grand effroy aux habitans. Le Palais de Penthee tomba par vn tremblement de terre, & l'Autel où Cadmus souloit faire ses sacrifices fut renuersé. La statue de Minerue & celle de Mars, fuerent sang & eau. Ce prodige estonna les habitans, & Agaue en prit vn mauuais presage, se ressouuenant des premiers songes, qui luy vinrent par la porte de Corne, lors que son fils vsurpa le Royaume de son pere. Elle n'en eut pas de meilleurs en ceste occasion, neantmoins elle ne peut iamais s'imaginer le malheur qui deuoit arriuer à Penthee: car elle auoit tousiours creu qu'il rendroit les deuoirs à Bacchus, quittant son sce-

ptre pour prendre le thyrsé, & les vestemens de femme. La pauvre Agaue songea qu'elle voyoit son fils dessus vn grand arbre, & qu'il estoit entouré de lions, d'ours, & de Pantheres, & que ces animaux l'auoient faict tomber, & qu'ils deuoreroient toutes les parties de son corps, sinon la teste qu'elle monstra à Cadmus, luy tenant ce discours.

Je suis vostre fille, ie suis la miserable mere de Penthee. Agaue a tué ceste beste, prenez ceste teste, pour tesmoignage de ma force. Ino ma sœur n'a iamais abattu vn tel animal, ny mesme Autonoé. Fichez donc ce present aux portes de vostre superbe Palais.

Agaue eut ce songe espouuantable, & ne fut pas si tost esueillée, qu'elle le communicque à Thirresias, qui luy donna aduis de sacrifier vn Taureau à Iupiter, sur le mont Citheron: & aux Nymphes Hamadriades vne brebis dans leurs boccages sacrez. Thirresias recogneut fort bien l'infortune qui deuoit arriuer à Penthee, & predict qu'Agaue coupperait la teste à

son fils. Mais pourtant il ne voulut pas reueler ce malheur, de peur de le troubler. Agaue ne manqua pas d'accomplir ses vœux & ses sacrifices, en faveur de Iupiter & des Nymphes des bois. Cadmus son pere l'assista en ceste deuotion. Ils tuerent tous deux vn Taureau, le sang ruisseloit de tous les costez. Comme ils estoient occupez en la preparation de leur offrande, vn serpent parut en couronne sur la teste de Cadmus, & luy vint doucement leicher la barbe sans l'offenser: Vn autre glissa sur la belle Harmonie, ce qui arriua à cause qu'autrefois ils auoient tous deux esté changez en serpens. Agaue auoit autrefois veu cet accident en songe, la ressouuenance l'espouuantoit dauantage, la crainte la fit retourner au Palais.

Cependant il courut vn bruiet par la ville que Bacchus auoit commandé à tous les citoyens de celebrer les Orgies, & les Bacchanales. Il n'y eut personne qui ne se mist en deuoir. Les ruës estoient parsemees de fleurs & de bouquets, & le cabinet de Semele

estoit parfumé d'odeurs suaves, le seul
Penthee enuieux de l'honneur de Bac-
chus, dit ces paroles avec vanité & inso-
lence.

Vous autres mes subiets, amenez-moy
ce Bacchus vagabond, & effeminé, qu'il
serue le Roy Penthee en sa table & que
l'on m'apporte vn autre breuuage que
son vin, du lait ou quelque douce li-
queur. Cependant ie feray des affronts à
Autonoë ma tante. Ie veux que l'on iet-
te leurs cloches & leurs Cymbales aux
vens, de peur que l'on entende leur
bruiet & leur tintamare, trainez les Bas-
sarides dans le fleuve d'Ismene, les ren-
dans esclaves des Nayades, & que Cy-
theron se iouë des Bachantes. Couppons
les cheueux à Bacchus, donnez-moy du
feu afin que ie le brusle, s'il tire son ex-
traction de cet element cōme il dit, ie le
poursuiuray par les flāmes. Iupiter à cō-
sommé Semele : mais Ie perdray son fils.
Il esprouuera à son grand preiudice que
mon feu n'est pas moindre que celui du
foudre, que s'il defend avec son Tyrse,
Ie luy feray congnoistre que la pointe
de ma picque est bien aceree, & si ie ne

l'offenseray point en vn membre, d'vne playe de facile guarison. Ie ne luy fracasseray point ces cornes : mais ie luy porteray vn coup dans la cuisse à cause qu'il à faict croire aux peuples, qu'il estoit issu & engendré de Iupiter, & que le Ciel luy estoit reserué : mais afin qu'il ne soit pas en la peine de s'en vanter. Ie l'enuoyeray aux enfers, où ie le feray noyer dans le fleuve d'Ismene : quant à moy ie ne sçauois receuoir celuy en la qualité d'un Dieu immortel, qu'il n'est simplement qu'un homme, & s'il ne se peut dire parent de nostre maison : car ie veux bien qu'il sçache que Cadmus n'est point mon Pere, & qu'Agave ne m'a point engendré c'est le Soleil, & c'est la Lune qui m'ont donné l'estre, & par ce moyen ie puis tirer mon extraction de Iupiter, & me promettre le ciel, Ce sejour sera ma ville, & Thebe me sacrifiera, Minerue sera ma femme, ou Hebel l'immortelle, Iunon m'a nourry, & m'a donné la mammelle, & si ie puis m'aduantager de l'amour de Diane : car Latone m'a engendré, encore que ceste Deesse ayt fuy les embrassemens de son frere Apollon. Si la flamme du foudre

n'a pas du tout consommé Semele, son fils sera cause que son Palais sera réduit en cendre.

Comme le Roy eut fait ce discours insolent, tous ses subiects s'armerent, se donnant le rendez-vous dans la forest des Pins, & rechercherent Bacchus & les Satyres: mais comme il fut irrité de ces resistances, il fit ces plaintes à la Lune.

Diane sœur du Soleil, qui gouverne toute la nature, si vous estes l'Hecate comme on vous surnomme, & si vous vous plaisez à nos flambeaux de poix, escoutez-moy. Si les exercices de la chasse vous sont agreables, venez dans les forests, & vous passerez le temps avec Bacchus, secourez vostre frere. On ne veut pas me permettre l'entree de la ville de Thebes, encore que i'y aye droit, à cause de Cadmus, & de ma mere Semele. Vn homme mortel s'est tant oublié, que de faire la guerre à vn Dieu, fauorisez donc, Deesse de la nuit, celuy qui ne celebre ses festes qu'à la clarté de vostre flambeau. Si vous avez commandement & puissance aux enfers comme Proserpine, que vos furies punissent, & chastient la

mesdisance de Penthee, que Tesiphone
& que Megere le gouuernent n'aye pas
assez souffert de peines, assez essuyé de
perils par la hayne de Iunon, sans rece-
voir ces affronts dans mes triumphes,
apres les victoires remportees sur les In-
diés, n'est-ce pas yne disgrace que ceste
Deesse ma fustité pour troubler la iouys-
sance de ma felicité, abîsmez cet hom-
me impie, & vous mon pere Iupiter,
qui voyez ces insolences, & qui partici-
pez à ces iniures, punissez l'audace de
Penthee, hōnorant le pauvre Zagree, &
vengez l'outrage commis contre la me-
moire de Semele.

Bacchus (luy respondit la Lune) qui
plante la vigne, & qui me faict com-
pagnie dans le silence de la nuit, con-
serue bien tes raisins. Je prendray le
soing des Orgies, & des Bachanales,
celebre tes festes en patience, & ne te
soucie point de l'insolence de ceux qui
sont legers d'esprit. Je m'armeray con-
tre tes ennemis pour ton seruiçe, tu sçais
que i'ay le pouuoir d'enuoyer la folie
semblable à celle que les fumees du vin
donnent. Je ne m'employe pas seule-
mēt à distinguer les mois par mon cours

mais i'affolle ceux qui m'offencent. Je ne laisseray point la melchanceté de Penthee impunie, Lycurgue qui a heurté tes loix est poursuiuy des Menades, il est aueugle & vagabond, & en telle extremité qu'il a besoing d'un homme qui le conduise. Les Indiens qui ont résisté à ton pouuoir, ont esté subiuguez, & Hydaspe a enseuely en ses flots son fils Deriades, les Pirates Thyrreniens ont esprouué la rigueur de ta puissance quand leur mats fut changé en vn cep de vigne chargé de fueilles & de fruiets, les cordages ayans esté metamorphosez en serpens espouventables, & eux en Dauphins, sautans lors que la mer est tranquille. Orontes n'a pas eu meilleure fortune, vn fleuve luy a seruy de tombeau apres sa mort, & s'il craint encor ton courage dans les eauës.

La Lune fit ceste respõse en faueur de Bacchus, Proserpine se delibera d'enuoyer ses furies d'enfer pour secourir le fils de Iupiter, vne Eumenide vint au Palais de Pēthee, où elle fit veoir son foüet de serpent, arrosant la maison d'Agave de l'eauë de Styx, pour presage du malheur qui luy deuoit arriuer. Bacchus fit

apporter l'espee fatale dont la miserable Progne tua son fils Itys le presentant à manger a son mary Teree; pour se vanger du rapt qu'il auoit commis sur sa sœur Philomele; les Erynnides cachèrent ce coustelas dans les montagnes au pied d'un Sapin, donc Penthee deuoit mourir, arrosans cet arbre du sang de Meduse. Cependant Bacchus s'en alla au Palais de Cadmus & parla a Autonoe la femme d'Aristee.

Autonoe (luy dit-il) ie t'estime plus heureuse que Semele. Les Deesses recherchent ton fils en mariage. Le Ciel porte enuie à ta gloire. La Lune a aimé Endymion, mais Diane carresse particulierement Acteon, il n'est pas mort, Comme la fable en a faict courir le bruit, & n'a pas esté changé en cerf. Diane ne l'a pas tant desobligé, & ses chiens luy ont esté plus fidelles: mais ce sont les bergers qui ont rapporté ces mensonges, enuieux du bien, & du contentement de celuy qui a espousé Diane, encore qu'elle ayt faict veu de virginité.


Les Nymphes des bois ont fait paroistre leur jalousie en ce subiect, aussi les femmes sont facilement esmeuës de cest passion : mais afin que vos yeux vous releuent, & vous esclaircissent de ce doubte. Venez voir Acteon à la chasse avec Bacchus, vous y rencontrerez Diane qui l'accompagne, vous aurez du contentement à considerer ses paneaux, & ses reths, ses flesches & son carquois. O Autonoe tu es plus heureuse que Semele : car tu feras la messagere de l'alliance de ceste Deesse, dont elle veut honorer ton fils Acteon. Ino a eu ce bon-heur que d'engendrer Melicerte qui est a present vn Dieu de la mer : mais le contentement & la felicité de ta ioye la surpasse, car ton fils a merité les faueurs, & les courtoisies de celle qu'Otus n'a peu acquerir par sa vertu. Orion n'a point eu ces aduantages : mais ton fils est à present en la montagne qui courtise & carresse Diane en esperance de l'auoir pour sa future & loyale espouse.

Haste-toy donc de venir, & que

ta chevelure ne te retarde, laisse-là flotter à la volonté & au gré des vents, & qu'elle leur serue de jouet. Il n'est point hors de propos que la sœur d'Apollon oblige son petit neveu plustost qu'un estrange. Et apres que ceste Deesse aura engendré un beau fils, elle le montrera à Agaue, ayant toutes les mesmes humeurs & les inclinations à la chasse que sa mere, n'estant point hors de raison que celle qui se plaist à ces exercices ayt un fils qui s'adonne & prent plaisir à tous ses passe-temps, ressemblant à Acteon & à Cyrene son ayeule.

Thyrresias conseille Penthee d'obeyr à Bacchus, & de le recevoir en la ville de Thebes, luy persuadant par l'exemple des Thyrreniens qui furent changez en Dauphins. Penthee enuoye ses seruiteurs pour saisir Bacchus. Il se metamorphose, prenant la ressemblance d'un de ses subjects.

LIVRE XLV.

 Omme Bacchus luy eut faict le recit de ces nouuelles, Autonoe sortit du Palais, se resjouissant de veoir Acteon aux bonnes graces de Diane, & se delibera d'aller en diligence en la montagne, sa sœur Agaue luy fit compagnie, & luy tint ce discours extrauagant, ayant esté frappee de la furie des Eumenides.

Je veux faire la guerre à la vanité de Penthee, & vaincre son audace. Cadmus a laissé sa vertu & son courage à sa fille Agaue, elle est aussi genereuse qu'une

Amazone. Je ne veux point d'armes pour le subiuguer, vne armee ne pourroit meresister, i'ay vn Thyrses, ie n'ay point de besoing de picques, ny de lames, vn Pampre fera assez d'execution, ie n'ay point de cuirasse, & si ie dompterray celuy qui en a vne, la nappes d'un cerf m'accommodera avec les cymbales, ie reuere quant à moy la grandeur de Bacchus, estant ennemie de la tyrannie de Penthee, donnez-moy donc les instrumens des Orgies. O Thiades que tardez-vous, ie m'en iray dans les montagnes où sont les Menades, où les Bacchantes chassent avec le Dieu des Bacchanales, ô Bacchus ! i'ay de la jalousie de Cyrene, à cause qu'elle à l'aduantage à la chasse des Lyons, & qu'elle a eu l'honneur d'estre grandement aymee & chérie d'Apollon : mais excuse moy, si i'ay pris la hardiesse de contester avec vne deité, luy enuiant sa grandeur. Je desire d'aller aux montagnes & crier Euie en dansant. Ses sacrifices & ses solemnitez me sont agreables, & les passetemps des Bassarides. Je reuere & respecte maintenant son pouuoir, & le

lieu de son extraction, & l'esclat des foudres qui l'ont produict. Je feray compagnie à Diane, portant ses reths, & ses paneaux.

Agave partit de Thebes, & s'en alla chercher Bacchus au lieu destiné aux sacrifices, tous les chemins & les routes estoient remplies de danses, & de compagnies. Le mont Cytheron resonnoit au grand bruit, & la mer faisoit bruire ses eauës. L'on entendoit les arbres fremir, & les rochers s'esmouuoir. Vne Bacchante commença à jouer des cymbales, & anima toutes les Bassarides, vne autre delaisa les ouurages de Minerue, montrant à sa contenance & à ses cheueux qui seruoient de passe-temps, & de jouïets aux vents, que la fureur la possedoit. Cependant Tyresias fit vn sacrifice pour destourner l'infortune qui deuoit arriuer à Penthee: mais ses prieres furent inutiles, car le destin estoit irreuocable, il supplia Iupiter de remettre l'assemblée en vn autre lieu, mais il ne peut l'impetrer, Cadmus, se trouua en la ceremonie, & Tyresias le suiuoit d'un pas lent, scachant le mal qui arriueroit, il chanta les louanges de Bacchus,

& luy fit des eloges, Penthee dont l'insolence estoit si grande qu'il ne pouuoit supporter vn tel honneur rendu à son ennemy, dit ces paroles à Cadmus, & à Thiresias.

Cadmus, qui t'a ainsi affollé? à quel Dieu chante-tu ces louanges? quitte ces pampres & celierre, & aussi la ferule, & prends les armes de Minerue, & toy Thiresias, iette tes couronnes aux vents, & vse du laurier d'Apollon, plustost que du Thyrsse. I'ay honte de veoir faire à vn homme de ton aage des actions si ridicules, ie respecte grandement ceste barbe chenuë, & crois que si ta grande vieillesse ne m'estoit recommandable, ie te ferois ressentir les efforts de macholere. Je sçais que ton esprit prophetique a des lumieres particulieres de cognoissance, mais aussi il n'en faut pas abuser. Je suis aduerty que tu portes enuie à la grandeur de Penthee, fauorisant Bacchus, tu diras qu'il a donné l'inuention de planter la vigne, quel aduantage est-ce aux hommes, le vin prouoque la concupiscence, & nous pousse aux querelles. Il se vante d'estre vssu de Iupiter, mais il n'en porte point la mi-

ne , ny l'apparence. Les nappes des cerfs ne s'ont pas les vestemens de ces dieux ny de celuy qui se couure de nuees. Mars combat les hommes avec vne picque, & non pas avec des fueilles , & Appollon ne porte point de cornes.

Vn fleuve n'a point espousé Semele, & il n'y a point de Nymphes d'honneur qui ait engendré vn enfant tout cornu.

Pourquoy offense - tu Bacchus (luy respondit Thyrrésias) luy qui est fils de Jupiter ? Ne sçais-tu pas bien qu'il la porté en sa cuisse , à cause qu'il n'estoit pas encore parvenu à la perfection , sa mere ayant esté bruslée par le foudre. Je veux bien que tu sçaches qu'il n'y a que luy qui faict concurrence à la grandeur de Ceres, son fruct estant aussi necessaire que celuy de ceste Deesse. Mais prèds garde que ton impieté ne ressent les effects de sa cholere. Je te raconteray vn exemple de punition. Les Thyrriennes estoient autresfois des Pilotes , qui ne s'employoient à autre chose , sinon qu'à piller les vaisseaux qui estoient sur la mer , & à tuer les Nautonniers. S'il passoit vn marchand de Phœnicie, remportant des pourpres de Sidon , il estoit

assuré d'estre pris par ces pirates, mais Bacchus les trompa: car il se metamorphosa en vn ieune garçon, & couvrit ses vestemens de pierreries, avec vne couronne d'or, enrichie de perles & d'escarboucles, & parut en cet estat sur le riuage, comme s'il eust desiré passer, ces Thyreniens ne manquerēt pas à le prendre, le despoüillerent de toutes ses richesses, & luy lierent les mains, à l'instant il reprit sa forme diuine, & parut aussi haut que le ciel avec vne voix qui resonnoit dans les rochers, les cordages sifflerent ayans la forme des serpents, & le mats fut changé en vn cep de vigne & au milieu vn lierre qui l'entouroit, les raisins pendoient, & les fueilles faisoient vne ombrage agreable, & sortoit de la proue vne fontaine de vin, les Lyons, & les Pantheres rugissoient, & les taureaux mugissoient, les Thyreniens furent bien estonnez, la crainte leur fit perdre le iugement, ils apperceurent la mer aplanië & couuerte de fleurs & d'arbres, le lis & la rose y fleurirent comme dans vn pré, & l'escume print la couleur d'vn pavor decoupé, ces objects extraordi-

naïres leurs firent esbloüir la veüe , & creurent qu'ils estoient veritablement dans les parterres de Flore , il parut à leurs yeux des montagnes diaprees de fleurs , & vn grand nombre de bergers qui faisoient resonner leurs amours aux forests.

Ces Pirates penserent voir la terre, encores qu'ils fussent en pleine mer, tant l'aueuglement de leur rage les possedoit , ils sautoient du vaisseau dans l'eauë , & furent metamorphosez en Dauphins cet exemple te doit retenir sous le joug de ton deuoir & de la modestie, craignant les ressentimens de ce Dieu si puissant : mais tu diras que tu as l'esprit & le corps solides, fermes & immuables, exempts de receuoir aucun effort de l'imagination, & que tu as quelque aduantage des Geans qui furent produicts des dens que Cadmus sema, mais Bacchus a deffaict Alpus fils de la terre , qui combattoit les Dieux avec des rochers, sa cruauté fut si grande envers les passans , que si quelqu'un estoit esgaré à trauers champs , cherchant la route à cheval , ce Geant deuoreroit

tout n'en laissant aucun vestige, souuent
tesfois il se plaisoit à manger les brebis
qui se reposoient à l'ombre à cause de la
trop grande chaleur du iour. Les ber-
gers l'apprehendoient tellement, qu'ils
estoyent contraincts de se retirer dans
l'espace des bois, sans auoir la liberté de
jouer de leur musette, frustrant l'Echo,
& le creux des rochers des redites amou-
reuses, de peur d'estre descouuerts, les
habitans de ce lieu estoient si esclaves,
qu'ils ne pouuoient prendre le temps,
ny la commodité d'abattre quelque
gros arbres de la forest, pour bastir vn
vaisseau, car les Nymphes Deriades ja-
louuses de leur sejour luy en donnoient
adujs.

Ceste tyrannie dura iusques à tant que
Bacchus passa par là, Alpus parut aussi
haut que le ciel, portant sur ses espaules
vn rocher tout entier, il l'attaqua, ne se
seruant point d'autres dards que d'ar-
bres, il desracina vn oliuier, & en fit vne
espee, mais Bacchus pour punir s^{on} info-
lence, le frappa de son Thyrsse, & le tua,
ce geant tomba d^{ans} la mer, & la remplit
de son corps.

Prends garde de ressentir ses disgraces

comme les Thyrreniens, & comme Alpus.

Ces remontrances ne peurent persuader Penthee. Il se delibera d'accompagner Cadmus, pour aller au mont Cytheron: non pas pour reuerer les sacrifices, mais pour troubler la feste par son insolence. Il marcha d'un pas superbe avec des armes, tenant ce discours à ses seruiteurs.

Allez, & m'amenez ce vagabond, qui se fait adorer comme vn Dieu, afin qu'estant puny de son audace, il desiste de tromper les Nymphes avec sa liqueur, & empeschez que ma mere Agaue ne se mesle dans ces Orgies.

Il n'eut pas si tost commandé, que ses seruiteurs coururent dans les montagnes pour le chercher. Ils le rencontrerent, & voulurent le lier, mais ce fut en vain: car il prit en mesme temps la ressemblance d'un seruiteur de Penthee, & vint à son Palais, & luy dit, le trompant par ce discours.

Sire, cet homme a qui vous auez tant voulu de mal, a rendu vostre mere Agaue insensée, & il menace vostre sceptre & vostre couronne, ie vous conseil-

le d'y prendre garde, & d'empescher l'vsurpation qu'il pretend faire, & l'effort de ses cornes.

Penthee courroucé de ces propos, luy respondit.

Sus, compagnons, liez-moy cet homme, il a des desseins tyranniques & injustes sur mon diademe. Il est venu tout exprez pour surprendre le Palais de Cadmus. Quelle honte seroit-ce à moy d'auoir celuy pour compagnon de mon Royaume, qui n'a pas seulement la forme d'un homme, mais d'un monstre, engendré par Semelle, & semblable à celuy de Pasiphaé.


Penthee esmeu de cholere, saisit un Taureau, & le fit lier, croyant que ce fust Bacchus. Ses seruiteurs enfermerent les Bassarides dans vne prison obscure, & garrotterent les Silenes, & leur mirent les fers aux pieds: Mais incontinent que les Menades eurent commencé les dances & les Orgies, leurs liens tomberent, & celles qui estoient captiues furent deliurees, & les portes s'ouurirent d'elles-mesmes. Les gardes que l'on leur auoit données s'enfuirent, craignant les effets de leur fureur. Apres leur deliurance el-

les s'en allerent en la montagne, où les vnes se mirent à sacrifier des Taureaux, les autres des brebis, & les autres des chevres. Vne Bacchante prit vn enfant de trois ans entre ses bras, & puis le posa sur ses espaules: Il se tint ferme sans tomber à terre, luy demandant la mammelle comme si elle eust esté sa mère. Il luy manioit le sein, bien qu'il semblaist estre sans liqueur, à cause qu'elle estoit encore vierge: néantmoins elle luy donna le teton, & par miracle il en sortit du lait qui rassasia l'enfant. On voyoit des Bascariques qui prenoient plaisir à nourrir les petits d'une Lyonne, vne entre les autres frappa vne montagne avec son thyrses, & en sourdit du vin: Vne autre fit sallir d'un rocher grande abondance de lait, qui troubla les fontaines & les ruisseaux: Vne autre jetta vn serpent sur vn chesne, & il entoura le gros de l'arbre en façon de ceinture, & à l'instant il fut changé en lierre, portant encore les marques de ce Dragon. Vn Satyre dansoit, portant sur ses espaules vn Tygre, sans qu'il l'offençast. Vn Silene faisoit piroüetter en l'air vn Sanglier, & n'apprehendoit point ses defenses:

vn autre sautoit sur le dos d'vn chameau, vn autre sur vn taureau. Les citoyens de Thebes veirent toutes ces merueilles de Bacchus, non sans vn grād estonnement. La ville mesme ne fut pas exempte de la fureur Bacchicque, toutes les ruës resonnerent comme des Echos, & les fondemens des Palais croulerent d'vne facon bien estrange. Et encore que ces choses insensibles recogneussent la grandeur de Bacchus, il ne laissa pas pourtāt d'executer sa passion sur Penthee. Il lança des estincelles de feu en la maison de son ennemy, qui reduisoit tout en cendre: Mais comme il sentit les effects de ceste flame, il commanda à ses seruiteurs qu'ils apportassent de l'eau pour esteindre le feu. Ils puiserent dans la fontaine grande quantité d'eau pour esteindre le feu, mais il s'augmentoit davantage. Leur labeur fut inutile, & ne peut empescher les effects.

Bacchus persuade à Penthee de venir au mont Cytheron. La Lune luy trouble l'esprit. Agaue qui estoit insensee tuë son fils Penthee, pensant que ce fut vn Lyon. Auto-noë sa sœur la console en ceste affliction.

LIVRE XLVI.



PRES que Penthee fut aduertty que les Bassarides estoient deliurees par des moyens extraordinaires, & que Bacchus les auoit receuës au mont Cytheron, pour y celebrer les Orgies, il se mit en cholere, & l'ayant veu en liberté avec son lierre, & ses pampres, il luy tint ce discours extrauagant.

Tu as enuoyé Tyrrefias pour m'estonner par ses predictions: mais toutes ces vanitez n'ont peu esbranfler la force de mon esprit, c'est à d'autres qu'il faut faire ces contes. Dis plustost que Rhee

a desnié la mammelle à Iupiter, & qu'elle l'a donnée à Bacchus. Demande à la grotte qui est en la montagne Dictée de Crete. Iupiter m'a nourry, & ie n'ay point esté allaitté par Rhee: Vne Corybante m'a engendré, & la chevre Amalthee m'a faict boire de son lait. Iupiter a bruslé ta mere, à cause qu'elle se van-toit d'auoir eu l'honneur de son amour. Mais prends garde qu'il ne te reduise en cendre, en punissant la mesme vanité qui te persuade follement que tu es son fils. Quant à moy, ie puis me vanter de mon extraction, mon origine n'est point des Indiens Barbares: Ismene m'a engendré, & non pas Hydaspe. Je ne suis point allié avec Deriades, & encore moins avec Lycurgue. Mais ie desire que toy & tes Satyres delaisiez le fleuve de Dirce: & si tu as encore enuie de faire la guerre au fils d'Oronte, ie ne l'empescheray pas. Je ne scaurois croire que Iupiter soit ton pere, l'accident arriué à Semele m'en defend la creance, il n'a iamais esté si cruel à celles qu'il a ayme. Il n'a pas desobligé la belle Danaé après la jouissance, la pluye d'or fut le gage de son amour. Europe la sœur de

mon pere Cadmus n'a point ressentý
ses disgraces, il la passa à nage sans peril,
& ne la perdit point dans la mer. Je
sçay de bonne part qu'il brusla le fils de
Semele, aussi bien que la mere. Mais
supposé que tu ayes esté garantý de la
rigueur de là flamme, tu es coupable
des amours illegitimes de ta mere. Tu
desires que ie croye que tu en tire ton
extraction, ie le veux pour te faire plai-
sir: Mais monstre moy que Iupiter ayt
produit Mars, ou Phœbus, de sa cuisse,
& si veritablement tu en dois recevoir
l'honneur. Monte au Ciel, & laisse la
paisible possession de Thebes à Penthee.
Tu deburois plustost dire, pour don-
ner plus de couleur à tes impostures,
que tu es sorty de son cerueau, il y au-
roit plus d'apparence: car Minerue en
a esté produitte. A la mienne volonteé
que tu fusses de cestelignee, au moins
j'aurois l'honneur de vaincre le fils d'un
Dieu si puissant.

Je louë le pays des Gaules (luy respon-
dit Bacchus en colere) encore qu'il soit
mal policé, car il a le fleuve du Rhin
qui a la proprieté de juger de l'estat

& de la condition des enfans, & dece
qu'il ſçait diſtinguer les legitimes des
baſtards. Mais ie n'ay pas beſoin de ſouf-
frir cet examen, les foudres peuuent
rendre vn plus fidele teſmoignage que
les fleuves. O Penthee, ne cherche
point de meilleur garant de ma gran-
deur. La belle Galatee doit croire aux
eaux, & toy au feu. Quant à la poſſeſſion
de Thebes, & de ton Palais, ie veux bien
que tu ſçaches que i'en meſpriſe le ſe-
jour, le Ciel eſt ma demeure naturelle. Si
on te demandoit qui emporte le prix, a
qui le donnerois-tu, au Ciel, ou à la vil-
le de Thebes? Ie ne pretends pas te chaſ-
ſer de ta maiſon: mais reçois ſeulement
les preſens de la vigne que i'offre aux
hommes de bonne volonté, & ne fais
point la guerre à Bacchus. Si l'aueugle-
ment te poſſede combats les Bacchan-
tes, & ſi les Parques t'ont deſtiné à per-
dition, il n'eſt point hors de raiſon que
Penthee ayt vne ſemblable fortune que
les Géans que Iupiter a deſſaits, & que
ſon fils en faſſe le meſme ſur ſon ennemy.
Demande à Tirreſias qui a engendré
Bacchus. Si tu veux aſſiſter aux Orgies,
& à mes Sacrifices, quitte ton ſceptre
&

& prendre les vestemens d'une femme, de peur que les Menades ne soient plus adroites à la chasse que toy. Si tu bande ton arc, Cadmus aura du contentement de te voir à cet exercice avec ta mere Agaue. Viens avec moy, ou avec Diane, afin que ie te donne le nom du genereux Acteon. Iette ton diademe & tes armes ordinaires: car elles te seront inutiles: Les Bassarides sont capables de vaincre les plus braues Capitaines. Que si des femmes desarmees te mestrisent, qu'elle honte fera-ce qu'un homme soit reduit sous leur joug. Elles ne craignent point les picques, ny les javelots. Viens donc au mont Cytheron, & tu verras la solemnité qui s'y fera.

Bacchus luy persuada de venir au mont Cytheron. La Lune commença à broüiller l'esprit de Pêthee d'images & de pensees extrauagâtes, luy ostant le dessein & l'enuie de resister à Bacchus. Son imagination fut tellement frappee qu'il vint au Palais avec un furieux desir de paroistre aux Bacchanales en habit de fême, pour cet effect il prit les vestemens d'Agauz & les brodequins, quittât son sceptre pour

le thyrse. Il se presenta en ceste posture deuant les Bacchantes, & dansa d'une façon extraordinaire, jouant des cymbales avec tant de naïfueté, que l'on eust pensé voir vne Bassaride. La fureur le posseda tant, que le Soleil luy parut double, & Thebes luy sembla auoir augmenté son pourpris, avec ceste folle opinion qu'il auoit de pouuoir transporter vne porte de la ville en vn autre lieu. Tout le peuple s'assembla à l'entour de luy pour le considerer: mais apres auoir couru par toute la ville en cet estat, il en sortit, & passa le fleuve Dirce, & comme il fut arriué au lieu où les sacrifices se deuoient faire. Bacchus se resioüit de voir son ennemy assubjetty à vne obeyssance religieuse, & particulièrement quand il apperceut Penthee monté dans vn grand arbre, où il fit mille capreoles. Cependant les Nymphes s'apprestoient pour honorer la feste de leurs presences. Et Agaue qui n'auoit pas moins de deuotion, dit ces paroles à sa sœur.

Autonoé, hastons-nous pour arriuer au lieu où se faict l'assemblée. Il me semble que i'entends le bruiet & l'har-

monie des instrumens, i'ay de la passion d'y estre, afin que i'honore Bacchus d'Eloges & d'Hymnes. Je suis bien ayse de voir de près celuy qui portera le prix. Vous tardez trop, & il semble que vous ayez quelque chose qui vous empesche. Ino nous passe de bien loin; elle n'est plus citoyenne de la Mer, & Melicerte n'a point esté paresseux, il va en diligence. Je desire de m'acheminer au plustost, de peur que Penthee, qui a l'esprit bouillant, n'offense Bacchus. Et vous Ismenides, qui avez le soin & la peine de pratiquer les mysteres; venez-y, & preparons les offrandes, afin que l'on remarque le zele & la bonne volonté d'Agaué.

Agaué arriué au mont Cytheron avec Autonoé, elle apperceut Penthee sur l'arbre, comme si ce fust esté vn Lyon combattant avec Bacchus. Elle le monstra à ses compagnes, les conjurant de tuer cet animal. Ces femmes qui estoient possedees de fureur & de rage, luy presterent leur secours, à dessein de dompter ce Lyon. Agaué abattit le sapin où estoit son fils, & il tomba avec le tronc, & ne fut pas si tost

à terre qu'il se recongneut, ayant recou-
uré son jugement & sa raison: & se
voyant proche de la mort fit ces
plaintes.

O Nymphes Hamadriades defendez
moy à ce coup, de peur qu'Agave ne tue
son fils. Et vous, ma mere, mais trop
cruelle, cessez de faire paroistre les ef-
fects de vostre fureur. D'où vient que
vous pensez que ie sois vn lyon? Ay-je
le corps velu? auez-vous entendu vn ru-
gissement? Ne cognoissez-vous plus ce-
luy que vous auez nourry? Qui vous a
osté l'esprit, & qui a charmé vos yeux?
Adieu Cytheron, adieu montagnes de
Thebes, adieu ma mere Agaue, voyez
mon visage & mes cheueux, & ma barbe
qui commence à poindre. Ie ne suis pas
vn Lyon, vous ne pouuez vous tromper
apres ces aduis. Espargnez vostre fils,
cruelle, & obligez les mammelles qui
l'ont allaitté. Vous voyez le miserable
Penthee que vous auez tant caressé. O
ma voix plaintiue, arreste-toy, Agaue est
sourde. Si vous voulez me tuer pour obli-
ger Bacchus, au moins ne permettez pas
que les autres fēmes mettent la main sur
moy, ie veux mourir de la vostre.

Agæue n'entendit point ces plaintes, ny les autres Bassarides, mais au contraire, elles le saisirent, l'une par vn pied, l'autre par le corps: l'une luy couppa la main droite, & Autonoe la gauche. Agæue luy trancha la teste de l'espee qu'elle trouua dans les racines du sapin, & vint la monstrier à Cadmus, toute joyeuse du Lyon qu'elle croyoit auoir tué.

Cadmus, (luy dit-elle) ie vous estime bien-heureux de ce que Diane a loüé vostre fille Agæue, pour auoir abatu vn Lyon indomptable, encore que ceste Deesse ayt des prerogatiues en cet exercice, elle n'est pas pourtant sans jalousie. Les Dryades ont admiré ceste action, & Mars s'est estonné comment vne femme a peu produire vn effect d'un tel courage. Je suis d'aduis que vous appelliez Penthee, afin qu'il voye d'un œil enuieux les labeurs de celles que Bacchus fauorise. Et vous, mes seruiteurs, allez poser ceste teste sur le portail de Cadmus. Ino n'a iamais tué vne pareille beste: & vous, ma sœur Autonoe, regardez ce que i'ay faict, iamais vous n'avez acquis vn tel honneur, ny

mesme Cyrenela chasseresse mere d'Aristee, toutes ces victoires me cèdent l'honneur.

Agæue tint ce discours à Cadmus, esleuant la teste du miserable Penthee: Mais luy qui auoit le sens rassis, s'abandonna aux larmes, & luy respondit d'une voix triste & languissante.

Pauvre Agæue, qu'elle beste as-tu tuée qui a la raison humaine? Quel animal as-tu abattu, que tu as engendré avec Echion ton mary? Regarde de près le Lyon que tu as massacré: considere le Lyon que ta mere Harmonie a tant chery. Tu demande ton fils, afin qu'il admire les labeurs & la proye de ta chasse: comment feray-je venir Penthee que tu tiens entre tes mains? Regarde ceste teste, & tu recognoistras ton fils, que tu as tué malheureusement. Sont-ce là, ô Bacchus, les recompenses que tu fais à Cadmus? Iupiter nous a obligez autrefois d'une autre façon: Ino a l'Empire de la mer, & Semele a esté bruslée. Autonoé deplore son fils Acteon metamorphosé en cerf: mais ce malheur est plus grand; car Agæue:

ensanglanté ses mains propres à la mort de son fils. Polydore n'a pas eu meilleure fortune. Je suis si misérable que ie suruis à ces infortunes, en mourant, ma vie ne sera plus désormais que languissante. Où me retireray-je pour auoir consolation? qui sera mon refuge apres l'accident arriué à Penthee, & apres la mort de Polydore? O Cytheron, ie suis perdu, vous auez permis la mort de mes enfans. Vous auez veu le destin de Penthee, la metamorphose d'Acteon, & les pleurs d'Atonoé.

Cadmus n'eut pas si tost finy ses plaintes, que le bon vieillard Cytheron accompagna ses larmes: Les arbres deplorent son affliction, & les Dryades n'eurent pas moins de ressentiment. Agaue recouura sa raison & son bon sens, & alors ses yeux qui ne pouuoient se persuader que ce fust Penthee, demurerent fichez sur ce triste object, avec vne confusion d'esprit qui tesmoigna que son ame se noyoit dans les regrets. Sa douleur fut si grande qu'elle tomba à terre, baisant le front de son fils, elle s'arracha les cheueux & meurtrit son sein.

O cruel Bacchus (dit-elle en soupirant) rends-moy encore insensée, j'ay vne raison pleine de ressentiment, qui est pire que la rage & la folie. Donne-moy encore cet aueuglement, afin que ie prenne mon fils pour vn Lyon. Ie pensois tuer vne beste, & maintenant ie vois que c'est mon fils. Autonoe est beaucoup plus heureuse que moy, elle a deploré la perte de son fils Acteon, mais elle ne l'auoit pas tué. Ino n'a pas souillé ses mains du sang de Learché, ny de Melicerte. Ha : miserable que ie suis, Iupiter a engendré Bacchus, afin qu'il fust la cause de ce malheur : Il l'a produit de sa cuisse, afin qu'il destruisist toute la lignee de Cadmus. Lors qu'Apollon sera commandé de chanter sur son luth quelque airs nouveaux à la table des Dieux immortels, il entonnera le cruel destin d'Agave & d'Autonoe. O mon cher fils, quel remede y a-t'il à ta mort ? quelle consolation à mon affliction ? I'en'ay point eu ce bien que de te veoir aux bonnes graces des Nymphes : & ie n'ay pas ouï la voix agreable de l'Hymenee. A la mienne volonté qu'une autre que moy

e'eust couppé la teste, au moins i'en'au-
rois pas le regret que i'ay, & le reproche
quel'on peut me dōner, n'accuse point
Agaue, elle estoit en fureur, blasme plu-
stost Bacchus, Agaue est innocente, mes
mains sont encore pleines de ton sang,
& ma robe en est teinte, donnez-moy vn
vase, & que ie presente le sang au lieu de
vin, ie te veux dresser vn superbe tōbeau
avec cet epitahe.

Icy gist (ô passans) le corps du pauvre
Penthee, Agaue m'a donné la vie & me
l'a ostee.

Antonoe sa sœur, considerant l'excez
de sa douleur la consola.

Ie regrette grandement, (ce luy dit-
elle) la perte que vous auez faicte, & aussi
ie loüe vostre affection, vous baïsez les
yeux & la face de Penthee, mais encore
estes-vous plus heureuse que moy enco-
re que vous ayez tué vostre fils, car quād
Acteon fut changé en cerf, i'ay deploré
vn cerf, & non pas Acteon i'ay donné la
sepulture à la teste d'vne beste, & nō pas
à celle de mon fils, n'est-ce pas vne espe-
ce de consolation de voir Penthee tout
entier sans changement, vous n'avez
point veu en luy la metamorphose, n'y

son corps velu, n'y son bois, mais il ne m'apparut à moy qu'une ombre où la faulx image de celuy que i'aymoist tant, ie n'estois pas mere d'un enfant, mais d'un cerf sourd & muet. Et vous Diane chāgez-moy comme mon fils, en tueur d'Apollon & d'Aristee, afin qu'Autonoe soit deuoré par ses chiens, aussi bien qu'Acteon. Et vous Cytheron, vous verrez ce mal-heur cà ommunla mere, & au fils.

Adieu montagne cruelle, adieu ferules & herbes venimeuses qui troublez l'esprit. Et vous Phœbus esclairez à Diane & à Bacchus, & si vous sçauiez perdre les hommes par vos rayons, frappez Agaue, & Autonoe de vos dards de feu, vengez l'affront que Pasiphae a receu de Venus, afin que vous vous resioüissiez du mal que l'on fera à Venus la mere d'Harmonie.

Agaue entendit ces belles consolations, & si elle ne laissa pas de continuer ses plaintes : elle donna la sepulture à son fils, & les citoyens luy dresserent vn tombeau remarquable. Comme ces femmes estoient plongees en ces plaintes & en ces regrets, Bacchus eut

compassion de leur misere, & leur donna du vin à boire, affin que l'oubly enseuelit tous leurs regrets, appaisant ces douleurs d'Autonoë & d'Agave, il leur declara les bonnes aduantures que les destinees auoient arresté pour leur contentement, & conseille à Cadmus, & à la belle Harmonie d'aller en Illyrie leur promettans qu'ils seroient tous deux changez en Serpens. Cependant Bacchus arriua en la Ville d'Athenes.

Bacchus faict son entree en la ville d'Athenes, où il fit present de son vin à Icarie, & aux paysans, Icarie est tué par eux s'estans enyurez, & son ombre apparoit à sa fille Erigone. Bacchus jouyt d'Ariadne en l'isle de Naxos, & arriue en la ville d'Argos, les citoyens luy ferment les portes, & il rendit les Argiues insensees. Persee & Bacchus combattent ensemble.

LIVRE XLVII.



Le bruit courut par la ville d'Athenes que Bacchus arriuait, les citoyens luy firent vne entree digne de luy, & preparerēt des banquets par les ruës, tapisans les maisons de pampres. & de fueillards, les femmes firent des couronnes de rose, & les filles des bouquets de lierre, le fleuve Ilisie rebroussa sa course vers la ville

pour luy rendre hommage, & les riuages Cephisides retentirent à ces ioyes, & à ces applaudissemens. Vn cep de vigne plein de raisins parut dans le champ de Marathon, & les jardins, se resioüirent voyans vn grand nombre de fleurs escluses, les rochers mesme ne furent pas sterils, ils donnerent des lis qui sortirent de leur sein. La Musique accompagna ce triomphe, les Bacchantes redoublerent leurs accords en faueur de Bacchus. Les oyseaux l'honoroient de leur chant, le rossignol se ressouuenant du mal-heur arriué à Philomele, & à Itys, le fils de Progne n'oublia pas à chanter son ramage, & l'hyrondelle qui vole aussi legerement que le vent, fit resonner sous le toict des maisons les ressentimens de Progne, sans auoir de la passion contre Teree. Il n'y eut personne en la ville qui ne monstra sa joye. Bacchus estant arriué, il descendit en la maison d'Icarie, où il fut receu avec beaucoup d'honneur, le bon bourgeois le traicta le mieux qu'il peut, sa fille Erigone apporta du laict de chevre: mais Bacchus recognoissant sa courtoisie, luy donna quelques vaisseaux pleins de vin, & luy dit.

Bon vieillard reçois ce present que les Citoyens d'Athenes n'ont pas encore veu. Je t'estime heureux de ce que les Atheniens chanteront tes loüanges. Je suis jaloux de l'honneur que Cerés fit à vn autre homme que toy, luy donnant le froment. Triptoleme à trouué les Es-pics, & toy tu donneras l'inuention de planter la vigne. Icarie peut contester avec Ganymede qui verse l'Ambrosie aux Dieux immortels, plus heureux que Triptoleme: car le pain n'assoupit point les douleurs & les afflictions: mais le vin donne l'oubly; & enseuelit les fascher-ies.

Bacchus tint ce discours à son hostes & luy presēta vne couppe pleine de vin, & il la beut & redoubla encore, ressentant l'effect de cette liqueur, sa fille luy en versa encore iusques a tant qu'il se sentit esprins, & alors il sortit de table, & dansa chantant des Eloges à Bacchus. Il luy enseigna à planter la vigne & à la prouigner, & à faire les façons conuenables pour son entretien, & aussi Icarie obligea tous les autres payfans de sa cognoissance. Erigone sa fille le voyant en cet estat, & d'vne humeur

si gaillarde, luy fit ce discours.

Dittes-moy ie vous prie, mon pere, où auez-vous trouué ce nectar, ce n'est pas là l'eauë du fleuve Ciphise: les Najades ne vous ont point donné ceste douce liqueur: les fontaines ne font point couler de leurs sources vne eaue si aimable. L'eauë d'Ilysse n'est pas rouge. Ce n'est pas icy la boisson que l'on faict avec le miel, elle apporte la satieté trop promptement, au cōtraire de celle-cy qui ne rassasie iamais. Ce n'est point l'oliuier qui la donne, ny les chevres. Si les heures immortelles ont trouué l'inuention de composer ceste liqueur des fleurs de roses & de passeuelours, ie l'appellerois volontiers l'ambrosie de Venus & d'Adonis.

Ie recognois à ceste heure les effects, ie suis deliuree de mes tristesses. N'est-ce point Hebe qui vous a donné ce nectar? ou si Minerue vous en a voulu gratifier? Qui a desrobé ceste délectable douceur à la table des Dieux? D'où est-ce donc que Ganimedes puise ceste ambrosie: vous estes beaucoup plus heureux & chery que Celee, ie croy veritablement que vous auez autrefois retiré, &

receu chez vous quelque deité fauorâ-
qui vous a obligé de ceste courtoisie, el-
le vous a faict ce present comme Ceres
donna autrefois ses espics à Triptoleme.

Icarie fut tellemēt atteint de la fureur
bacchique, qu'il se meit à chanter des
Airs de païsage, ses voisins qui furent ad-
uertis le vinrent veoir, & s'enyurerent
auec luy. Ils commencerent à roüiller
les yeux, & leurs veines s'enflerent, la
teste leur tourna, le pauvre Icarie qui en
auoit pris plus que les autres tōba à ter-
re, & ses compagnons l'assaillirent estās
espris de vin. L'un auec vne besche, l'au-
tre auec vne faux, l'autre auec vne pier-
re, l'autre auec vn baston, ils l'offense-
rent de ces armes de telle sorte, qu'à pei-
ne, il peut respirer, & faice ces plaintes.

Bacchus nous a faict present de son vin,
il a contenté tous nos compagnōs: mais
il faict mourir Icarie, n'est-ce pas vne li-
queur douce & mortelle à Erigone, en
tant qu'elle luy donne l'affliction de ma
mort.

Il n'eust pas si tost acheué qu'il expira
en l'absence de sa fille, ses compagnons
s'endormirent sur son corps, & apres
qu'ils se furent esueillez du sommeil. Ils
deplorarent

deplorerent sa mort , & l'enterrerent dans l'espais de la forest, l'ombre d'Icarie apparut à Erigone sous la ressemblance d'un homme qui portoit encore les playes & les vestiges de l'assassin, sa chemise toute ensanglantée , & le corps tout deschiré, sa fille eut horreur de le voir, & s'abandonna aux larmes & aux regrets, son pere luy fit ce discours pitoyable.

Ma fille releve vous , & cherchez ceux qui m'ont cruellement assassiné dans leur yuressé. Je suis vostre pere que les payfans ont tué, ie vous estime bienheureuse de ce que vous n'avez pas entendu, ny veu les coups qu'ils m'ont donné, ny le sang ruisselet de mes playes. Un Dieu favorable vous a desrobé ce triste object, de peur que l'affliction ne vous apporte le desespoir. l'ay appelé les bergers à mon secours, & ils n'ont pas entendu ma voix, ny mes plaintes. La seule Echo les a fait retentir aux rochers par ses redites. Vous ne me verrez plus dans les forests, à la conduite de mes troupeaux, & les jardins vous seront sterils. Deplorez la fortune de vostre pere, sans prendre alliance en aucune maison du

du voisinage afin que ie recognoisse les effects de vos ressentimens , vous conservant en vne perpetuelle virginité.

Ce Phantome disparut aussi-tost , & l'image du songé passé, Erigone s'esueill-la & respandit grande abondance de larmes , & couppant ses cheueux en témoignage de dueil , & voyant encore les troupeaux de son pere aux champs, s'escria de ceste sorte.

Rochers dites-moy, où est le miserable corps d'Icarie , & vous taureaux, si vous estes capables de discours , & de raison enseignez-moy ceux qui l'ont tué ? qui a esté la cause de sa mort ? N'a-il pas monstré à planter la vigne ? N'est-il point demeuré chez quelque pastre à boire , dites le moy : si vous le sçavez , & me releuez de ce doute. J'auray patience qu'il soit venu s'il est encore viuant. Je prendray vn singulier plaisir à arroser nostre iardin avec luy , mais si la rigueur du destin me la rauy : ie me resoult d'accompagner sa mort : car ie ne desire pas suruiure à son mal-heur.

Elle n'eut pas si tost acheué qu'elle courut promptemēt dans la forest pour chercher le corps de son pere, s'enquer-

rant à tous ceux qu'elle rencontroit, du lieu où il auoit esté tué, mais les bergers ny les pastres ne peurent luy enseigner, ne luy en donner aucune cognoissance. Elle s'esgara dans des halliers, il suruint vn payfan qui prit grād peine à la remettre dans la route, & à luy monstrier la fosse où estoit le pauvre Icaris, elle arroza la terre de ses larmes, & ne peut exprimer la violence de sa douleur que par vn silence, l'effort en fut si grand qu'elle se desespera & se pendit à vn arbre, s'abandonnant à vne mort volōtaire, n'ayāt point d'autre compagnon de son regret, qu'vn petit chien qui la suiuit, mōstrant par signes qu'il participoit au regret, il ne la quitta point, & demeura tousiours aupres de l'arbre, abbayant apres, comme s'il eut voulu monstrier à tous ceux qui passoient par aupres de ce lieu, que la pauvre Erigone estoit en ce lieu là. C'est instinct charitable de ceste petite beste ne fut pas sans quelque bon effect : car les bergers luy rendirent les honneurs, & les derniers deuoirs, en luy dressant vn tombeau.

Cet animal luy fut si fidele, qu'il ne la

voulut point quitter, il mourut volontairement auprès d'elle. Mais Jupiter eut pitié de l'infortune d'Erigone, il l'enleva au ciel, & la mit auprès du Lyô, luy donnant des espics: car la pauvre fille se ressouvenant de l'accident arriué à son pere, à cause des raisins, ne voulut point veoir ny porter les vestiges de ce fruit. Icarie fut logé auprès de l'ourse, & print le nom de Bootes, & le chien y eut place: c'est ce que la fable Grecque a inventé, meslant la verité avec le mensonge.

Après que Bacchus eut sejourné quelque temps en ce pays, il vint en l'isle de Naxos, où Cupidon luy fit ressentir ses fleches amoureuses, & Venus qui desiroit le favoriser, luy donna la rencontre de la belle Ariadne, cōme elle luy auoit esté long temps auparauant promise, l'infidele Thesee l'auoit delaissee sur le riuage. Bacchus la trouua assouppie de sommeil & de regret, cet obiect le rauit & luy donna vne viue atteinte des flammes d'amour, il s'approcha d'elle le plus doucement qu'il peut, & dit à ses Bassarides.

Cessez de jouer de vos cymbales, ne

faictes point de bruit , laissez reposer la belle Venus , mais elle n'a pas sa ceinture , ce n'est donc pas elle , ie croy que c'est Pasithee qui jouit amoureusement du sommeil. Mais apres que l'Aurore aura chassé les tenebres, esueillez là, qui est celuy de Naxos , qui caresse la plus parfaicte des Carites ? N'est ce point la Lune qui dort : mais comment se peut-il faire qu'elle soit icy sans Endymion , ce n'est pas là Thetis : car ceste beauté de roses & de lys en donnent la difference, mais c'est plustost Diane qui se repose apres les fueurs & les traux de la chasse, car le labeur donne tousiours le sommeil : Mais qui a jamais veu Diane en cetequipage, lors qu'elle passe le temps à ses exercices.

Arrestez vous Bacchantes , & vous mon carrossier , laissez Minerue dans les charmes du repos : mais à qui à-elle baillé en asseurance la garde de sa picque & de son Ægyde.

Bacchus tint ce discours , mais Ariadne s'esueillit , & ne recogneut point la troupe de ceux qui suiuoient Bacchus, elle se fascha contre le sommeil de ce qu'il l'auoit trop retenuë , elle couroit

sur le riuage apres son Thesee, & fit des reproches à Venus des mescontentemens, & des disgraces qu'elle auoit ressentie de son ingrat, suppliant Boree de renuoyer le vaisseau à Naxos: mais elle ne peut rien impetrer de luy: Æole ne luy fut pas plus fauorable, les vens furent du tout contraires à ses vœux, Bacchus print compassion de son mal-heur, & admira sa grande beauté, pësant voir la Venus de Naxos en grande tristesse neantmoins elle auoit plus de grace en ceste contenance triste & melancholique.

Le doux sommeil me possedoit (dit-elle en soupirant, je desirerois encore estre charmee de ses attraiçts iusques à tant que Thesee vint me prendre sur ceste riuë. Que i'ay eu de contentement dans les vanitez de mes songes, il me sembloit que ie voyois Athenes, & la salle où Thesee deuoit recognoistre les courtoisies que ie luy ay faictes, avec les couronnes de fleurs que l'on presente à Venus sur l'autel des amours, en esperance d'un heureux mariage, mais helas! l'inconstant m'a delaissee, & n'a pas eue le courage de cueillir la fleur que ie luy

auois voüee. Le ciel m'a enuié ce cōtē-
 tement, & la jalouſie de l'Aurore m'a dé-
 robé ce plaifir. I'en'ay pas trouué eſtānt
 eſueillée celui que i'aymois tant, encore
 les ſonges agreables ſe ſont eſuanouis,
 jaloux de mon bien. I'ay veu en dormāt
 des images qui me contentoient: mais le
 perfide Theſee s'en eſt fuy. cōme ſ'il eut
 eſté faſché des careſſes de Morphee. Le
 ſōmeil m'a eſté auſſi ingrat que luy, Dit-
 tes-- moy rochers? qui a rauī le vaillant
 citoyen d'Athenes? ſi Boreel'a pouſſé en
 la maiſon d'Orithye, ie me reſout d'y al-
 ler, mais ceſte Nymphe ne me ſera pas fa-
 uorable, car elle eſt de Marathō, d'oū eſt
 mon deſloyal: ſi le Zephire l'a enleué, ne
 me le celez pas Nymphes, declarez à Iris
 ſa mere l'injure qu'il a faicte à la miſera-
 ble & infortunee Ariadne: ſi c'eſt le vent
 d'Occident, ie parleray à l'Aurore, & luy
 feray des reproches.

Morphee, repais mon affliction de la
 vanité des phantoſmes que tu m'a faict
 paroistre, afin que ie voye en dormant
 la fauſſe representation de l'image d'un
 gratieux hymenee. Si la tempeſte, ô The-
 ſee! t'a porté à Athenes de Naxos. Ie
 feray mes complaints à Æole, ſi le

Patron a faict voile sans ton consente-
ment, il a desobligé Thesee, & Ariadne
tout ensemble, que ce pilote ne voye ia-
mais le calme de la mer, mais que les vës
le maistrisent à leur gré, que iamais Me-
licerte le fauorise, qu'il ayt en sa nauiga-
tion le Su au lieu de l'Est, & le Nort pour
l'Ouest.

Ce Nautonnier a esté discourtois,
mais ie porte seule la peine, car i'ay per-
du celuy que i'ay tant aymé, à la mienne
volonté que iamais ie ne l'eusse veu, il
m'a esté aussi ingrat, cōme il a paru estre
fauorable à Venus. Ceste Deesse me dō-
na l'inuention de luy donner le filet pour
le deliurer du labyrinthe. Mais ie desire-
rois que le Minotaure l'eut encore, ie ne
ferois pas maintenant en peine. Que di-
tes-vous Ariadne, plus cruelle que ce
monstre? ne demandez-point sa mort,
(inhumaine que vous estes) Thesee a pas-
sé les mers, & est uenu à Athenes pour
me faire l'amour, s'il m'a laissée, ie sçay
bien pourquoy il est demeuré à Marathō
engagé dans l'amour de quelque Nym-
phe qu'il veut caresser en passant, ie l'at-
tends en ceste isle, Naxos me donnera la
couche nuptiale. Helas! i'ay abandonné

mon pere & ma mere pour le fuiure, & ie ne vois plus ny Minos, ny Thesee. I'ay quitté mon pays pour luy, & si ie ne suis pas au beau sejour d'Athenes. Ha miserable Ariadné, tu n'as que les riuages insensibles, les eaux sourdes, les rochers muets pour recompense de tes affectiōs. Qui sera mon refuge? Quel Dieu sera si fauorable que de porter à Marathon ceste Nymphe, qui a esté trompée par les charmes de Venus, & de cet Athenien. A la mienne volonté que i'eusse maintenant vn autre filet pour me conduire, afin que ie peusse passer la mer Ægee, & aborder à Marathon. Là ie te donnerois mille baisers, encore que tu n'aymes pas la pauvre Ariadné; Je t'embrasserois estroittemēt, encore que tu m'ayes fausé ta foy. Et si tu ne voulois pas me recevoir pour maistresse, au moins ie serois ta seruante, ou en la qualité d'vne Nymphe que l'Amour a rendu esclau. Je m'employerois à tistre de la toile, & à porter l'eau pour l'vsage de la maison: ces seruices me seroient des faueurs, pourueu que ie visse le braue Thesee. Il ne faut pas trouuer estrange si l'aueuglement amoureux me rabaisé à ces deuoirs si

vils. Pasiphaé ma mere, a bien seruy les
Pastres pour voir vn Taureau, & a bien
daigné s'entretenir de son mugissement
a mespris de l'harmonie des luths: Et si
i'aurois de l'aduantage par dessus elle;
cari ne serois pas dans les estables avec
les bœufs, mais en la Cour d'un grand
Capitaine, dissimulant la jalousie que ie
pourrois auoir de tes amours estrâgeres.
O Pilote plus cruel que la tempeste, plus
inconstant que les vents, approche ton
vaisseau de Naxos. Pourquoi fais-tu pa-
roistre les effects de ta discourtoisie? Tu
es de Marathon, où est le port de bien-
veillance & d'amour. Si tu as dessein d'y
aborder, prends la miserable Ariadné,
afin qu'elle ayt le contentement de voir
la belle ville de Cecrops. Si la rigueur de
ton refus me delaisse icy, pour le moins
raconte au perfide Thesee les ressen-
tiemens que i'ay de son infidelité. Je me
doute bien pourquoi il n'a pas accōply
sa promesse, il a juré la foy à Minerue, qui
a fait vœu de virginité: Mais quelle sym-
pathie peut estre entre elle & Venus?

Bacchus prit vn singulier plaisir à en-
tendre ses plaintes, recognoissant qu'el-
le estoit la fille du Roy Minos, & que

Thesee l'auoit abandonnee. Cupidon frappa le cœur de ceste Nymphé d'un trait amoureux, afin qu'elle fut fauorable à son frere Bacchus, mais apres auoir recognu le subject de son dueil: Il tint ce discours à Ariadné.

Belle Nymphé, pourquoy regrettez-vous le perfide Thesee? Son infidelité ne vous oblige pas à vous ressouuenir deluy. Ne vous faschez point vous aurez Bacchus pour mary, vous ne perdrez rien au change, vn Dieu immortel vaut bien vn simple homme. Si la ieunesse & la disposition vous plaisent, croyez qu'il ne sera pas si superbe que de faire des comparaisons avec moy. Mais vous direz qu'il a dompté le Minotaure: Vous sçauéz fort bien que sa proüesse n'a pas la meilleure part de ceste victoire, l'artifice de vostre fil s'en peut donner l'honneur: Il n'eust point resisté sans vostre secours, & ne se fust iamais garanty des destours du Dedale. Quant à l'extraction, vous ne direz pas que la ville d'Athenes soit plus noble que le Ciel, & que Minos vostre pere soit comparable avec Iupiter. Ce n'est pas sans raison que vostre bon-heur vous a arrestee en l'Isle de Naxos, Cupidon vous reserue l'alliance

d'un Dieu, au mespris de Thesee. Que aduantage desirez-vous auoir maintenant que de posseder le Ciel, & d'auoir Iupiter pour pere. Cassiopee n'aura pas des prerogatiues sur vous, à cause de sa fille Andromede: car Persee ne l'a pas du tout deliuree de seruitude, encore qu'il luy ait fait paroistre le desir qu'il auoit de sa soeur: Elle est encore attachee là-haut: Mais Bacchus vous donnera vne couronne estoillee, qui vous contentera.

Ce discours la consola, à l'instant elle perdit le ressouuenir de Thesee, receuant à grand honneur la recherche de Bacchus faisoit d'elle. Cependant Cupidon prepara la couche nuptiale, toutes les Nymphes d'Orchomene danserent de joye, & les fleurs croissoient sous leurs pieds. Les Hamadryades chanterent vn Epitalame, les Nayades resmoignerent par leurs balets le contentement qu'elles auoient de ceste alliance. Ortygie la nourrisse d'Apollon parut en ces danfes, en faueur de celuy qui appartenoit à son fils Cupidon, luy donna vne couronne pour gage de celle qu'elle deuoit esperer au Ciel. Les Nym.

phes Naxiades firent des Carrozels dans leur Isle. Bacchus jouït de la belle Ariadné dans la couche que l'Amour luy auoit preparee, & apres il sortit de Naxos, passant par toutes les villes de la Grece, & arriua à Argos: mais les habitans ne voulurent pas les receuoir, ils repousserent les Satyres avec grand effort, craignans que Iunon qui poursuuoit Bacchus, ne ruinaist leur ville: Mais il rendit les Argiues insensees. La fureur leur donna de mauuais conseils, & elles tuerent leurs enfans propres, mesme ceux qui estoient encor à la mamelle.

Inacque Roy d'Argos deuint insensé de regret qu'il eut de voir vn tel malheur arriué en sa ville. Les meres estoient si cruelles qu'elles tuoient leurs enfans, ayans perdu l'affection qu'elles leurs deuioient: Mais Asterion cognoissant la cause d'vne si grande infortune, se delibera de prendre les couronnes de Bacchus. Vn Citoyen du mesme lieu irrité de fureur & de passion, dit:

Bacchus, qui a esté deux fois nay par les disgraces de Iunon, ne doit prendre la peine de venir en la ville d'Argos,

nous auons Persee pour protecteur, & n'auons pas besoin de luy. Nous reconnoissons vn autre fils de Iupiter, qui ne luy cede en rien : Bacchus pressure les raisins en la saison, mais Persee vole tous les iours en l'air, & le bat avec ses ailerons. Il ne faut point faire de comparaison de son espee avec son lierre : car Persee est beaucoup plus genereux que luy, si l'vn a subjugué les Indiens, l'autre a tué Gorgone, & le combat n'est pas moindre : Si Bacchus a metamorphosé le vaisseau des Pyrates Thyrreniens, Persee a changé le monstre de la mer en pierre : Si Bacchus a obligé Ariadne sur le riuage, comme elle estoit delaissee de Thesee le desloyal, Persee n'a pas fait vne moindre courtoisie à Andromede, la deliurant du peril de la mort. Il se peut donner de l'aduantage de ce qu'il a rendu seruice à celle qui l'aymoit, non pas comme Bacchus, qui n'a pas eu les meilleures faueurs de celle que Thesee a caresee : Mais les seruices que Persee a rendu à Andromede, luy ont donnee en mariage, pour la recompense de ses labeurs. Iupiter n'a point reduit en cendre Danaë, apres auoir

jouy d'elle, comme la miserable Semele, mais il se changea en vne pluye d'or, qui fut le gage de son amour. Quant à moy ie ne faicts point d'estat de Bacchus, & toy Persee, ne conteste point avec luy, il ne merite pas cet honneur: Ne mesle point ton espee avec son lierre, de peur que ces armes de femmes ne diminuent ton courage. Je te conseille de rejeter en arriere ses couronnes & ses guirlandes, vn heaume t'est plus seant. Et toy, Bacchus, delaisse la ville d'Argos au braue Persee, & que Thebes te recoiue, & affolle encor ses citoyens, & tuë Penthee: Que le séjour d'Inacque te soit ennuyeux & importun: Le riche fleuve qui coule auprès de Thebes t'attend avec impatience. Quant à l'Asope, ie ne veux pas t'enseigner où il est: car il fume encore du foudre qui est tombé dedans.

Cependant Iunon qui poursuivoit Bacchus, prit la ressemblance de Melampode, & parut dans la ville à dessein d'esmouuoir les Argiues contre luy, & s'adressant à Persee, luy dict:

Genereux Persee, c'est maintenant qu'il faut faire paroistre son courage, ne permets pas que Bacchus te subjuge, n'apprehende point ses serpens. Tu sçais que tu as couppé la teste de Meduse, tu n'auras pas grande peine à reduire les Bassarides sous le ioug de ton obeyssance. Ressouviens-toy des faueurs que Iupiter a faittes à ta mere Danaé. Fais en sorte que son fils ne soit point esclave, apres avoir receutant d'aduantages d'un Dieu. Monstre par effect que tu tires ton extraction de Iupiter, & que la pluye d'or a esté la messagere des amours. Et lors que tu combattras Bacchus, presente luy la teste de Meduse, afin que ie voye vn autre Polydece Roy de l'Isle de Seriphe, changé en pierre. Tu ne seras pas seul en ce combat, Iunon te secondera, avec autant d'affection comme elle a de haine contre Bacchus. Prends donc courage, & que l'on merapporte que tu as acquis les faueurs d'Ariadné à la pointe de l'espee. Metamorphose toutes les Bassarides en rochers, & que les ruës de la ville en soient pauees. Pourquoi crains-tu Bacchus, il n'est pas yssu de Iupiter comme il se vante?

vante: Dis-moy, que te peut-t'il faire?
Comment est-ce que celuy qui marche
sur la terre d'un pas lent, attrappe-
ra Persee qui vole legerement dans
l'air.

Iunon l'esmeut de telle sorte, qu'il
entreprit de faire la guerre à Bacchus.
Tous les citoyens d'Argos prindrent
plaisir à l'armer, l'un luy donna la pic-
que de Lyncee, l'autre le bouclier des
Abantes, l'autre le carquois d'Acrise,
avec l'espee de Danaus, dont ses filles
tuerent leurs marys Ægyptiens. On luy
presenta aussi vne coignée, qu'Inacque
auoit autrefois cachee derriere l'Aigle
de Iunon. Cependant Persee s'arma de
toutes pietes, & attacha sa trouffe sur
ses espauls, accommodant ses talon-
nieres aislees, tenant en ses mains la teste
horrible de Meduse.

Au mesme temps Bacchus fit ar-
mer ses Satyres cornus, & presenta le
diamant à l'opposite de Meduse, pour
destourner les effects qu'elle produi-
soit par la reflection contraire de l'ob-
ject: Mais Persee ayant veu les Bassari-
des en estat pour combattre, leur vint
dire en riant.

Tu veux me combattre avec tes
fueilles & ton lierre, n'as-tu point d'au-
tres armes offensives ? Si tu tires ton
extraction de Jupiter, comme tu te van-
tes, fais en paroître les effets. Si leri-
che fleuve de Pactole est ton pere, Ju-
piter m'a engendré, étant metamor-
phosé en pluye d'or, & si ie puis en fai-
re voir encore des vestiges. Mais aban-
donne la ville d'Argos, puisque Junon,
qui t'est ennemie mortelle, ayant fait
brusler ta mere, commande icy abso-
lument, de peur qu'elle ne te rende en-
core vne fois insensé, toy qui affolle les
autres.

Persee pour executer la passion de
la Deesse, se mit en posture pour com-
battre, & espouuanta les Bacchantes.
Junon qui fauorisoit Persee, fit esclat-
ter vn foudre, à l'imitation de Jupi-
ter, & fit tomber quelques estincel-
les de feu sur Bacchus: Mais il ne s'e-
stonna pas beaucoup de cela, au con-
traire il luy respondit en se moc-
quant.

Tu ne scaurois me brusler avec ton
feu & ta flamme, ne sçais-tu pas bien

que le foudre de Iupiter ne pût me
reduire en cendre; comme i'estois en-
core imparfaict dans le ventre de Seme-
le. Cesse donc, Persee, de me resi-
ster. Ce n'est pas icy le combat que tu
as eu avec la Gorgone, il n'y a point icy
d'Andromede pour honorer les vi-
ctoires que tu as remportees sur le
Monstre marin. Tu as affaire avec Bac-
chus yssu du grand Iupiter, a qui Rhee
a donné la mammelle, que la flam-
me a produict au jour; & non pas de-
struict, dont les triumphes, & les
vertus sont si recommandables, que
l'Orient & l'Occident les a admi-
rees. C'est luy qui a reduict tous
les Indiens, apres auoir vaincu Oron-
te & Deriades, & qui a terrassé Al-
pus le Geant, & qui tient toute l'A-
rabie en obeyssance, & qui a changé
les Pirates Thyrrheniens en Dau-
phins. Il n'est pas que tu ne sçaches
le grand mal-heur qui est arriué en
la ville de Thebes, à la miserable Aga-
ue, & à son infortuné fils Penthee. Ar-
gos n'a pas esté sans ressentir les
effets de mon courroux: Les pauvres

meres deploreroient encore la mort de leurs enfans qu'elles ont massacrés. Mais si tu persistes toujours en ton insolence, fais ce que tu pourras, tu seras bien estonné quant tu verras tes aïllers à la miséricorde de mes brodequins. Je ne te quitteray point que je ne t'aye transpercé de mon thyrsé, & si tu n'auras aucun secours de Jupiter mon pere, ny de Minerve ma sœur, ny mesme de Junon, encore qu'elle me soit ennemie. Je te tueray, & Micene verra la mort de ce-luy qui prenoit tant d'advantage de la teste de Meduse: ou je te garrotteray avec la ferule, je te ietteray dans la mer, pour aller en l'Isle de Seryphe, & si tu te glorifie de la pluie d'or, tu auras la Venus d'or pour ta compagne.

Bacchus irrité par ces reproches, se presenta au combat, les Satyres le joignirent aussi-tost. Persee volettoit à l'entour de Bacchus pour le surprendre. Mais encore qu'il n'eust point d'aïlles, il s'esleua en l'air si haut, qu'il avoisina le Ciel, touchant au Soleil.

& à la Lune, ce qui estonna Persee, de telle sorte qu'il le quitta, attaquant les Bassarides. Il presenta l'horrible teste de Meduse à Ariadné, & la metamorphosa en pierre. Ce changement espouuanta grandement Bacchus: mais aussi la cholere le poussa avec vn tel effort, qu'il mit en desroutte toutes les Argiues, & blessa même la Deesse Iunon, qui auoit pris l'habit & la façon d'vn soldat: Et sans doute Persee eust succombé en ces furieuses allarmes, si Mercure n'eust retiré Bacchus de la chaleur du combat, luy persuadant de pardonner à son ennemy & à son frere.

Bacchus (luy dit-il) tu sçais que ie t'ay conserué, te mettant entre les mains des Nymphes qui sont filles du fleuve Lamus, lors que Iunon ta marastre te poursuiuoit pour t'exterminer. Tu sçais que ie t'ay donné en garde à Ino, oblige maintenant Mercure en recognoissant ses bien-faicts. Il est bon que tu pardonne à ton frere, & que tu appaise ton courroux. Vous estes tous deux yssus d'vn mesme pe-

re. Tu ne dois pas vouloir mal à Persee : car ce n'est pas luy qui a esmeu les Argiues, c'est Iunon qui a pris la ressemblance de Melampode, & qui est cause de la rebellion. Je te conseille d'accommoder les affaires, de peur que Iunon ne s'efforce à te perdre. Tu diras que tu as de grands ressentimens de la mort d'Ariadne : mais tu ne dois pas pour l'amour que tu luy as portee, enuier son bon-heur, elle est morte glorieusement au combat, de la main de celuy qui n'est pas mortel, mais qui est esgal aux Dieux. Il n'y a personne qui se puisse exempter de la rigueur des Parques, Electre mesme femme de Iupiter, a rendu hommage à la Nature, & aussi Europe sœur de Cadmus. Semele ta mere n'a pas eu plus d'aduantage que les autres. Si ta Nymphé a suby les loix du Destin, elle sera enleuee au Ciel, & reluira comme vne belle Estoille voisine des Plejades : Quelle faueur plus grande a-t'elle peu desirer, que d'esclatter au firmament, apres auoir vescu en Crete en grand honneur ? Quitte donc ton thyrsé, & ne permets pas

que l'image d'Andromede soit rom-
puë. Quel plaisir aurois-tu de ruyner
la ville où tes parens ont des habitudes?
Appaise vn peu ta cholere, & les Argiues
te receuront avec toutes sortes d'applau-
dissemens.

Mercuré s'enuola au Ciel, apres auoir
accordé Persee & Bacchus. Cependant
Iunon ne demeura pas long-temps en
la ville d'Argos, elle reprit sa premie-
re forme, & remonta au séjour des
Dieux immortels: Et cependant Me-
lampe, qui estoit de la race de Lyncee,
persuada aux Argiues de rendre hom-
mage à Bacchus.

Citoyens d'Argos, (leur dict-il) ou-
urez les portes à Bacchus, & vous pre-
parez à celebrer les Orgies, de peur
que sa juste cholere ne ruine la ville,
& qu'il ne perde les grands, apres auoir
faict mourir les petits. Sacrifiez-luy
en deuotion, & honorez Iupiter &
Persee.

Ce discours les flechit à l'obeïs-
sance, & aussi-tost les habitans se pre-
senterent en habits decens & conuena-
bles aux Bacchanales, & firent re-

sonner les cloches & les cymbales, se barboüillans de plastre & de vermeillon. Ils tuerent grande quantité d'animaux, qu'ils luy sacrifierent.

Les femmes ne monstrent pas moins de joye, chantant des Eloges à Bacchus, pour auoir receu la vie de sa clemence, & les Menades reuinrent en leur premier estat, n'estans plus agitez de la fureur qui leur causa tant de malheur.

Bacchus arriue en Thrace, Iunon faict rebeller la terre contre luy. Il de faict les Geans, & surmonte Pallene à la luitte. La Nymphe Aure offense Diane en son honneur. Elle demãde vengeance à Nemesis. Bacchus jouyt d'Aure à la fontaine qui auoit esté chãgée en vin. Diane estant appaisée nourrit le fils d'Aure. Cepẽdant Bacchus monte au ciel, assiste aux banquets des Dieux.

LIVRE XLVIII.

BACCHVS apres auoir esté receu en la ville d'Argos, se delibera de venir en Thrace, pour y establir son pouuoir, & ses sacrifices. Mais Iunon qui se plaisoit à le trauerser, fit rebeller la terre, la mere cõmune de tous les hõmes, la ressouuenance qu'elle auoit del'accident arriué aux femmes d'Argos, l'irrite d'auantage, &

luy persuade de représenter à la Terre la tyrannie de Bacchus, & l'insolence commise en la défaite des Indiens ses enfans comme elle eut esté aduertie de leur mort, le regret & la cholere la saisirent, non sans effect: car elle promet de se venger, & parla de la sorte à ses enfans.

Si vous auez du courage, & du ressentiment du mal-heur de ceux qui vous appartiennent, résolvez-vous à combattre Bacchus, luy qui a esté si osé que d'attenter à la vie de ceux qui me sont si chers & si recommandables. Punissez ce tyran, afin que ie ne voye point vn bastard partager l'Empire du ciel avec Iupiter, prenez-le, & le liez comme vn captif & prisonnier de bonne guerre, & qu'il serve d'homme de Chambre, lors que Porphyryon espousera Hebe, quand Minerve sera mariee à Encelade, & Diane à Alcyone.

Amenez moy Bacchus, & que ie me venge de Iupiter en sa personne, & que quelqu'un puisse dire que la Terre poussée d'un iuste ressentiment, s'est armée contre ceux qui estoient issus de Iupiter, & que les anciens Géans ont combattu Zagree, & que les derniers ont fait de

grands affronts au second Bacchus.

Ce discours les anima de telle sorte, qu'il se preparent à luy liurer vn furieux combat. L'vn enleua le coupeau d'une montagne, & l'autre vn rocher, Peloree qui estoit l'vn des plus puissans de tous les Geans, se seruit du mōt Peleon, comme si ce n'eust esté qu'un jaelot, Cheron encore qu'il ne fut que demy-homme en la partie superieure, n'eut pas moins de courage que ses autres compagnons.

Bacchus voyant les assauts de ces ennemis, se ietta dessus Alcyone, non avec une espee ou une picque, mais avec ses pampres & son lierre, & le subiugua, non seulement luy, mais aussi un grand nombre, la deffaicte fut cruelle, & si sanglante, que le sang respendu fit couler un ruisseau qui troubla & rougit tout les torrés & toutes les fontaines, leur donnant sa couleur. Bacchus ne se contenta pas des armes qu'il porte ordinairement, il les combattit encor avec le feu, dont l'effect fut si violent, qu'il brusta & consumma une grande quantité de serpens qui siffoient, iettans leur venin. La flamme les brusloit, & les

reduisoit en cendres, comme si c'eust esté le foudre de Jupiter. Cependant Alcyonee armee des rochers de Thrace, resistoit à Bacchus: car la chaleur du combat l'auoit esmeu, luy ayant augmenté le courage, & luy lancea la montagne d'Hemus, mais la cuirasse qu'il auoit faicte de la nappe d'un cerf, fit reboucher le coup. Le ieune Typhon qui ressembloit à celuy que Jupiter auoit autrefois combattu, parut avec le coupeau de la montagne Emathie, mais sa force fut sans effect: car Bacchus le renuersa avec son Thyrses, & non seulement luy mais aussi tous les autres Geans.

Après qu'il eut remporté ceste glorieuse victoire, il se delibera d'aller en Phrygië, & encore que ce fut son pays, où il deuoit goustes les douceurs de la paix, & receuoir les fructs de ses peines & de ses labeurs.

Neantmoins la fortune luy suscita un furieux & sanglant combat avec Sithon le pere de Pallene, qui auoit autrefois tué par sa trahison, plusieurs amoureux qui luy auoient faict l'honneur de rechercher sa fille par un loyal, & legitime mariage, leurs accordans son alliance, à

la charge & condition de luitter avec elle en vn lieu où elle auoit de l'aduantage. Bacchus estant aduerty de la perfidie de cet homme, se presenta à luy, & apres auoir faict les honneurs, & les complimens honnestes, il luy demanda Pallene en mariage, ce qu'il luy octroya, en le conuiant de luitter avec elle. Sithon le cōduit au lieu où Pallene estoit en estat soustenir le combat. Cupidon voulut se rencontrer en ceste occasion en faueur de Bacchus, luy promettant la victoire, & la jouissance de ceste Nymphe. Pallene se despoüilla toute nuë, posant ses habits & ses vestemens, & couurit son sein d'une fraizette, le liant d'un cordon incarnat, son corps estoit en son naturel & sans desguisement, on y pouuoit voir & remarquer toutes les perfections que la nature luy auoit departies. Elle se couurit le ventre d'un voile blanc, par vne honte virginale, & se frotta d'huyle (cōme c'estoit la coustume de ceux qui vouloient auoir aduantage à la luitte) afin que Bacchus eut moins de prise, & que ceste liqueur luy fit glisser les mains. Pallene animee de courage & de generosité, se presenta au combat.

Bacchus qui estoit ravi de cet object, se ietta dessus elle, non pour la vaincre: car il estoit desia vaincu d'amour; mais pour l'embrasser se servant de la liberté que la luitte luy donnoit. En ces douces liaisons il eut le loisir de manier ce qu'il desiroit, il est bien vray qu'il ne s'efforçoit pas tant à la renuerser par terre, qu'à la baiser par cholere, & avec l'apparence d'un effort violent, & jaloux de l'honneur de la victoire. Pallene voulut enlever Bacchus: mais elle ne peut, estant contraincte de ceder aux poids, comme il eut apperceu le defect de ses forces, il l'enleue & la couche par terre, & ses cheveux qui flottoient sur ses espaules furent gastez de la poudre, Pallene se releva aussi tost, & le colletta avec plus de violence, Bacchus sembloit s'efforcer pour la ietter par terre encore vne fois: mais estant vaincu par les doux attraitz de l'amour, il se laissa aller par complaisance, à l'effort qu'elle luy fit, goustant en ceste posture les douceurs des baisers amoureux, encore que le combat en diminua la grace & les delices. Mais comme la luitte aigrissoit & enflammoit

leurs courages , 'aussi leurs caresses ressembloient à celles que les amoureux rauissent à la desrobee. Il estoit dessous Pallene la tenant embrassee , & s'il ne vouloit pas se descharger d'elle, au contraire il la ferroit plus estroittement, luy enlaçant les pieds, afin de iouyr plus long temps du subject qu'il possedoit entre ses bras.

Pallene se desgagea de ses mains , & se releua, mais Bacchus la saisit derechef, & la terrassa , luy monsttant ce que la force d'un Dieu peut quand il n'est point preoccuppé d'amour. Sithon son pere ayant apperceu ceste action retira sa fille du combat, donnant l'honneur de la victoire à Bacchus, non de bonne volonté, mais par crainte , apprehendant les iustes ressentimens du vaincœur, qui ay-moit la iustice. Cupidon le couronna de laurier & de lierre, pour honorer la victoire qu'il auoit remportee. Ce combat auoit quelque rapport conuenable avec celuy d'Attalante & d'Hyppomane qui la surpassa à la course en iettant vne pomme d'or.

Après que Bacchus eut vaincu Pallene

à la luitte, il tua Sithon le pere de ceste Nymphé; vengeance la mort de ceux qu'il auoit faict mourir innocemment en ces exercices; & donna son Thyrsé tout ensanglanté à Pallene; comme si c'eust esté vn present digne de la beauté qu'il recherchoit.

Le mariage de Bacchus & de ceste Nymphé fut célébré avec toutes sortes de resiouissance. Les Silènes tesmoignerent le contentement qu'ils en auoient; les Satyres s'estans enyurez de la liqueur bacchicque, luy chanterent vn Epitalame. Les Nereides danserent, crians *Hymenee*, Neree mesme qui l'auoit autrefois receu en son séjour (lors que Lycurgue le poursuiuit iusques dans la mer) se resiouit avec Galatee en la faueur de ceste alliance. Les Hamadryades & toutes les Nymphes estoient en grande joye: mais la seule Pallene portoit en son visage les ressentimens qu'elle auoit de la mort de son pere. Bacchus ayāt aperceu à sa froide contenance la douleur qu'elle couuoit en son esprit, luy dit en la consolant.

Belle nymphé, ne regrettez plus la mort de vostre pere, belle Nymphé ne regrettez

regrettez plus les faueurs & les courtoisies que vous m'auez octroyees. Pouuez-vous vous vanter d'auoir vn pere, puis-que sa cruauté différerait le bon-heur de vostre mariage. Qui est celuy au contraire qui a facilité la jouissance de vos amours : Cessez donc de plorer, car Nemesis Deesse de la Iustice & de la Raison ferit de la mort de Sithon chantant vn Epithalame & blasmant la perfidie de celuy qui abusoit de vostre jeunesse. Oenomae qui commettoit de pareilles trahisons enuers ceux quiluy faisoient l'honneur de rechercher sa fille est mort, & si Hyppodame n'a point eu de regret de son destin louant l'artifice & la ruse de Pelops : Ne vous ressouuenez donc plus de ce qui est passé & vous resioüissez de posseder Bacchus qui ne vous enseignera pas à practiquer des trahisons sous ombre de l'Amour comme Sithon qui vous eut laissé vieillir dans les exercices de la luitte en tuant vos Amans, sans que vous eussiez iamais eu le contentement de vous marier. Voyez ie vous supplie les porches de vostre Palais tous ensanglantez. Ie ne scaurois croire que vous soyez.

ysuës d'un pere si cruel. Vostre courtoisie fait paroistre que Mars vous a engendree avec Venus, car vous estes heritiere de sa force & de son courage, ayant encore les puissants attraicts de Venus. Si ce n'est ce Dieu guerrier, c'est Mercure qui est vostre pere & Suade est vostre mere qui vous a enseigné les adresses & la dexterité que l'on doit pratiquer à la luitte pour y auoir de l'auantage.

Ceste consolation appaisa sa douleur. Bacchus demeura quelque temps à la carresser mais apres qu'il eut jouy d'elle à plaisir, il l'a quitta ayans prins resolution de venir en Phrygie où sa mere Rhee l'attendoit avec impatience.

La belle Auré fille de Lelante & de Peribee qui se plaisoit en ceste contree aux exercices de la chasse sur la montagne de Dindyme n'auoit point encore gousté les douceurs de l'Amour, car elle n'auoit point d'autre deduit qu'à affronter les Lyons, & à poursuire les Cerfs dans leurs forts, & les Sangliers dans leurs bauges, mesprisant la chasse du Lieure, pource son courage qui n'estoit pas moindre que celuy de Diane rele-

uoit son esprit à des desseings plus genereux: Estant vn iour fatiguee des labeurs de cét exercice violent aux plus importunes chaleurs de l'Esté, se laissa aller insensiblement aux charmes d'un sommeil agreable, appuyee sur vn Laurier entre les fleurs le Passeue-lours & le Myrthe. Son repos ne fut point si profond qu'elle ne veid en songes les presages asseurez des Amours qu'elle deuoit praticquer avec Bacchus. Il luy sembla qu'elle voyoit Cupidon avec son Carquois qui auoit tué quelques Lievres en vn boccage & que Venus follaistroit avec Adonis le fils de Myrrhe, & qu'apres auoir abbattu vn grand nombre de bestes qu'il monstra à sa mere vne Lyonne qu'il reseruoit apres l'auoir domptee. Il luy sembla aussi qu'elle voyoit vne tres-belle Nymphe que Cupidon auoit blessée de ses traits, & qu'elle ouyt vne voix qui luy disoit.

Venus mere d'Amour, ie vous ameine la belle Auré qui est esclau de Cupidon encore qu'autresfois elle ait esté si rebelle. Et vous montagnes d'Orchome-ne, resioüissez-vous coronnés vos coup;

peaux de guirlandes & de boucquets, de ce que l'Amour a vaincu la cruauté d'une Lyonne.

Auré eut tous ces songes en dormant, & s'ils n'estoient pas vains, car par apres elle en recogneut la verité. Comme elle se fut esueillée, la cholere la saisit & se fascha contre Daphné, & Cupidon ayant en horreur le Myrthe de Venus & le Laurier.

Il n'est pas hors de propos (ce dit-elle) d'avoir ces songes amoureux auprès du Myrthe qui est consacré à Venus l'impudique: Mais vous Laurier qui recellez secrettement en vos veines la chaste Nymphe, pourquoy me troublez-vous: Et vous Daphné ay-je offensé votre arbre pour avoir reposé doucement à l'ombre de ses fueilles. J'esperois de recevoir de luy de plus chastes pensées, mais ie suis trompée, car comme vous avez changé de corps ayans prins la forme d'un Laurier vous avez aussi changé d'esprit & de volonté. Je ne scaurois dire que cet arbre soit le séjour d'une Nymphe pudique: car les songes que j'ay faicts n'appartiennent qu'à une Venus perdue d'honneur & de reputation

Neantmoins ces mauuais desseings ne peuuent reussir à l'amour, puisque vous estes incapable de seruir aux Amans apres vostre Metamorphose: mais n'est-ce point Apollon qui a planté ce Laurier & qu'il luy ait imprimé sa passion amoureuse.

La belle Auré estoit en perplexité faschée contre Cupidon & le songe.

Vn iour Diane lassée des violens exercices de la chasse aux plus importunes chaleurs de l'Esté vint se baigner à la fontaine, estât accompagnée des Nymphes, aussi que la saison le permettoit: car le Soleil entroit au signe du Lyō. Les Sœurs de l'Océan qui s'estimoient bien heureuses de luy faire compagnee se preparerent pour luy rendre seruice. L'une portoit des chemises & les autres de petites cōmoditez propres pour le baing. La belle Auré conduisoit son chariot, & la lumière, qui esclattoit viuement esclouissoit les yeux de ceux qui la regardoient: mais apres que Diane eut passé la Forest elle arriue à la fontaine. Auré arresta son Chariot & le mit à l'escart dans les prez. Diane descendit. Vpis la Nymphe luy porta son arc, & Hecær;

ge son Carquois. Les filles de l'Océan porterent ses reths & ses panneaux. Diane se despouilla toute nuë, & se laua à plaisir. Mais Auré voulut regarder de prest la Deesse qu'il ne falloit point veoir, rendant ses yeux coupables d'impudence, elle se baigna avec elle, ayant vne complaisance de sa beauté qui luy fut nuisible : Tantost elle manroit les blonds cheveux flottans sur les espaulles avec vne contenance qui tesmoignoit qu'elle les estimoit plus beaux que ceux de la Deesse ? Tantost elle regardoit son sein & en admiroit la beauté, dont elle eut tant de vanité qu'elle fit ces reproches à Diane en offensant son honneur.

Diane encore que l'on vous estime chaste. Si est-ce que vous n'avez que le nom & la reputation d'estre Vierge. Vous avez le sein flestry & mol d'une Venus corrompuë, & non pas de Minerve. Vos yeux qui brillent par fois, & qui se troublent & qui se ternissent au cours de la Lune tesmoignent que vous avez flechy aux charmes de l'Amour. Presidez-donc aux liaisons

amoureuses aussi bien que Venus, choisissant quelqu'un qui vous espouse. Si Mercure vous est agreable vous le pouvez prendre en laissant Minerue à Mars. Si vous maniez l'Arc & le Carquois de Cupidon. Ne soyez pas cruelle aux Amans, que vostre beauté, & vostre pouuoir ne leurs soient pas prejudiciables, & particulierement à la belle Nymphé Auré: car ie vous estime bien plus agreable que les Carites. Neantmoins mon merite vaut bien que l'on l'honore & que l'on l'estime. Considérez ie vous supplie la force de mon corps, la belle proportion & la grande disposition. Les Zephires ne sont pas si legers que ie suis à la course. Voyez mes bras, qu'ils sont pleins & comme ils sont nerueux. Maniez mon sein arondy & ferme qui ressemble à la belle roze qui n'a point esté encore touchée & cueillie, mais le vostre est mol & qui semble auoir du lait en grande abondance en tesmoignage que vous auez perdu vostre honneur.

Diane offēsee par ces discours ne peut

rien replicquer, la cholere & les vifs ressentimens luy fermerent la bouche. Elle print à l'instant resolution de se venger d'une telle insolence. Pour cet effect elle fut au sejour de Nemesis en la montagne de Taurus, où elle rencontra la Deesse qui punissoit les crimes & les meschancetez, attachans les coupables à sa rouë. Comme elle eut apperceu Diane elle iugea aussi-tost à sa contenance son ressentiment & sa cholere.

Diane (luy dit-elle) vos yeux resmoignent vostre dueil, & trahissent vos plus secretes pensees, qui est celuy du fils de la Terre qui vous a offensee. Y a-il encore vn Typhon sur la terre pour faire la guerre aux Dieux? N'est-ce point Titie qui se ressouvient de ses anciennes amours voulant violer vostre mere? Où est vostre arc (belle Diane) & les traicts d'Apollon : N'est-ce point vn autre Orion qui vous poursuit: mais celuy qui vous a autresfois sollicitee est mort. le vous conseille d'armer vn Scorpion contre celuy qui aura voulu offencer vostre honneur. Si c'est Otus, où Ephialtes qui soit si hardy que de rechercher vos embrassemens, tuez-le d'un trait mor-

tel. Si c'est vn autre Niobé qui se glorifie de sa lignee, conuertissez-la en pierre & en Rocher. Il n'est point hors de propos qu'il soit sur la montagne de Sipyle pour tesmoigner la punition exemplaire. Mais n'est-ce point vostre pere qui vous veut marier à Mercure, comme autre fois il a promis Minerue à Vulcan? Asseurez-vous que si vne Niobé vous a offensé comme Latone, que i'en prendray la vengeance.

Deesse de l'Vniuers, (luy respondit Diane,) ce n'est point mon pere qui m'a sollicitée de me marier, n'y l'insolente Niobé qui m'a offensé, ce n'est point Auton n'y Titye qui me recherche, n'y Orion, mais c'est Aure la fille de Lelante, qui a esté si insolente que de m'offenser en mon honneur. Je ne scaurois vous raconter les reproches, i'aurois honte de vous dire la vanité qu'elle a de son sein, ces iniures ne m'estonnent pas, ma mere Latone a receu autre fois de pareils affronts de Niobé en Phrygie, aussi a-t'elle ressenty vne peine sortable à son desmerite, car elle pleura tous les iours son malheur & sa metamorphose, & la mort de ses enfans, mais moy ie ne puis pas

me vanter de la vengeance. Auré n'est point changée en Rocher. Les larmes ne coulent pas de ses yeux de pierre, comme d'une fontaine : mais vous qui travaillez continuellement à punir les crimes, ne laissez pas ceste insolence impunie.

Diane, sœur de Phœbus (luy respondit Nemesis) Je ne convertiray point Auré en Rocher, comme Niobé de peur que son pere Lelante ne m'en fasse des reproches, mais puis qu'elle a esté si insolente que de vous offenser en vostre honneur. Je luy monstrey qu'elle n'est plus vierge. Voyez ie vous supplie, les larmes qu'elle respand en grande abondance en deplorant la perte de sa virginité.

Diane, ayant receu ces assurances monta en son chariot, & à l'instant Nemesis se delibera d'aller trouuer Auré, pour cet effect elle attela ses Aigles à son carrosse & arriua à la montagne de Sipile, ou elle apperceut la miserable Niobé qui estoit changée en Rocher. Comme elle eut rencontré ceste Nympe dans la solitude d'un bocage elle commença à luy troubler l'esprit l'es-

pouvantant par son foüet de serpens , & rendit Bacchus amoureux d'Auré depuis qu'il l'eut veut à la fontaine il en fut si passionné qu'il en perdit le repos, n'ayant en la pēsee d'autres desseins que de la servir , & de la rencontrer seule dans les bois pour l'y entretenir , mais son amour luy estoit ingratte , car la Nymphé estoit rebelle ? N'est-ce pas vne grande peine d'aymer quand celles quel'on recherchent sont cruelles.

Ne suis-je pas semblable à Pan le malheureux en amour , (ce dit Bacchus en soupirant ,) ma Nymphé me fuit cōme son Echo a fait autrefois , mais encore Pan ie t'estime plus heureux que moy : car tu as quelque cōsolation en la poursuite de ta Nymphé lors qu'elle fait retentir tes plaintes amoureuses dans le creux des rochers. A la mienne volonté qu'Auré voulut redire les tristes accens & les souspirs que ie fais , mais la cruelle n'entend point à flatter vn Amant, quel remede à ma passiō ? Quoy ! puis- ie te flechir par quelques attraits. Peut-on captiuer tes yeux & tes pēsees, mais qui sera si puissant en charme qui pourra adoucir le cœur d'une lionne & la cōtraindre

d'aymer, quia iamais fleschy les arbres insensibles, & amolly la dureté des Rochers, quel homme faudroit-il pour la corrompre car ie m'asseure que Minerue qui est la Deesse de chasteté succôberoit plustost qu'elle, & ne doute point que Diane mesme ne luy cedast en ceste vertu, à la mienne volonté que ceste Deesse pour me desgager de la seruitude où ie suis, me dit franchement.

Bacchus vous perdez vostre temps à rechercher la iouissance d'Auré. Bacchus faisoit ces plaintes estant dans vn iardin agreable & diapré de toutes sortes de fleurs, ou il prenoit la friscade aux plus importunes chaleurs du midy, fatigué du trauail de la chasse & attenué d'amour. La Nymphe Adonie qui le descouurit comme il estoit tapi dans les fleurs luy osta l'esperance de pouuoir iamais auoir les faueurs de la belle Auré.

Iamais Bacchus (luy dit-elle) ne pourra fleschir Auré à l'amour, s'il ne luy entraue les pieds & les mains en la charmant d'un sommeil qui fauorise le larcin que l'on voudra faire des baisers amoureux.

Adonie apres luy auoir donné cet ad-

uis se retira dans le creux d'un Chêne,
cependant Bacchus s'endormit & l'om-
bre d'Ariadne luy apparut luy repro-
chant son inconstance.

Bacchus, (ce luy dit le phantome)
vous avez oublié vos anciennes amours.
Vous n'avez plus de bõne volonté pour
le pauvre Ariadne. Auré vous possede
maintenant : Helas que i'ay esté mal-
heureuse ayant perdu mon Thesee que
le vent aussi cruel qu'inconstant m'a ra-
uy, & que Phedre a espousé à mon pre-
judice. Ne m'estoit-il pas fatal de me
confier à l'inconstance des Vens : mon
desloyal m'a laissée sur la riue comme
i'estois endormie , mais ie n'ay pas eu
meilleure fortune avec Bacchus. Il
m'a trompé comme les autres ? Que
n'ay-je espousé quelque homme mor-
tel, car il me semble que i'eusse eu plus
de contentement. Que ne suis-je vne
des Lemniades pour faire la guerre à
Bacchus ? N'ay-je pas subiet de r'appel-
ler trompeur aussi bien que Thesee, mais
si Ariadne te demande vn gage de ton
amour que luy donneras-tu ? Quant à
moy ie te feray present de mon fuseau afin
quel'on dise qu'Ariadne a donné le fil

à Thesee pour le garentir du Minotaure;
& son fuseau à Bacchus. Il ne faut pas
s'estonner si tu aymes le changement
en Amour. Tu es heritier de l'incon-
stance de Iupiter. Je sçay que tu as car-
ressé Pallene la fille de Sithon, & la bel-
le Coronide, dont les trois Carites sont
yssuës. Et vous Mycene racomtez aux
Nymphes l'accident qui m'est arriué;
& les disgraces que i'y ay receuës de la
teste de Meduse. Et vous riuages de Na-
xos faictes retentir mes aduantures aux
Rochers encore qu'ils soient aussi in-
flexibles que mon desloyal, mais que
me sert le ressouuenir de Cecrops &
d'Athenes plustost que de Phrygie. I'ay
subject de me plaindre de Thesee & de
Bacchus.

L'ombre s'esuanouit aussi tost com-
me vne fumee espaisse, & Bacchus s'es-
ueillla se ressouuenant d'auoir veu Ariad-
ne en songes, dont il en eut vn grand
ressentiment, mais le regret n'empes-
cha pas qu'il ne songeast à quelque ru-
se pour tromper & vaincre sa rebelle.

Vn iour la belle Auré reuenant de la
chasse aux grandes chaleurs de l'Esté
cherchoit vne fontaine pour se rafraî-

chir. Bacchus qui recogneut à sa contenance & à ses yeux le desir qu'elle auoit de boire, frappa vn rocher d'une montagne & en fit couler vn ruisseau de vin & fit croistre sur la riue toutes les fleurs que le Printemps esclos & entre autre le Narcisse qui fut metamorphosé en ceste plante de son nom apres auoir esté long-temps abusé de la reflexion de son image qu'il caressa tant qu'il en perdit la raison & la vie. L'hyacinte y espanouit ses fueilles, & les Zephyres caressioient ces fleurs de leurs douces haleines & les Oyseaux volettoient à l'entour. Cupidon auoit caché la source d'un nuage espais & cependant Auré cherche vne fontaine pour boire, mais comme elle fut proche de ce lieu, la nuee se dissipa & veit vn ruisseau qui couloit dans les prez circonuoisins entendant vne voix qui luy dit.

Belle Nymphé approche de la fontaine & bois de ceste liqueur qui accomplira la iouissance des Amours & reçois en ton sein celuy qui te possederá.

Auré qui n'auoit point de soupçon de ceste eauë courante en beut à plaisir.

Naiades (ce dit-elle) quelle merueille est-cecy, d'ou coule ceste liqueur si douce, d'où vient ce nectar precieux, il me semble que ie suis toute apesantie & qu'un profond sommeil me veut saisir.

Auré estant enyuree de ceste liqueur si douce chancelloit en allant: De sorte qu'elle fut contrainte de se reposer sur vne touffe de Myrte ou elle s'endormit. Cependant Cupidon descend du Ciel, & aduertit Bacchus de ceste occasion.

Bacchus (luy dit-il) dors-tu, la belle Auré est ensevelie dans un profond sommeil.

Cupidon monta au Ciel apres auoir escrit ces mots sur l'escorce des arbres.

Bacchus, iouïs d'Auré cependant qu'elle dort & garde qu'elle ne s'esueille.

Il ne manqua pas de s'approcher en se glissant doucement & luy osta son Arc & son Carquois, de peur qu'elle ne luy descochast quelque trait au resueil, luy liant les pieds de telle façon qu'elle ne peut fuir. Bacchus luy desroba en cette posture un baiser amoureux, & la viola. L'on peut dire que le sommeil fit pratiquer ces Amours. Aussi est-il compagnon des embrassemens que les Amans se donnent

se donnent la nuit. Les Hamadriades ayant la cognoissance de ce rapt, danserent de joye, en faueur de Bacchus: Mais la seule Echo qui s'offençoit d'une telle violence, se retira dans les montagnes par une honte virginale. Apres que Bacchus eut jouy à plaisir des embrassemens de la belle Aure, il se retira luy desliant les pieds, & mit son carquois auprès d'elle, & vint trouver les Satyres; respirant encor les douceurs de l'amour.

Cependant Aure s'esueilla, & reconnut l'effort que l'on avoit fait à sa chasteté: Elle veid ses mammelles pleines de lait, & les vestiges d'un vierge corrompuë. La fureur la saisit aussi-tost, elle court à travers champs apres les bergers innocens, qui gardoient leurs troupeaux, & les tuoit. Sa cholere fut si violente, qu'elle assassina Cithon le pastre, scachant que Nicee aussi cruelle qu'elle avoit autrefois tué Hymenee qui estoit passionné de sa beauté, elle poursuivit un qui gardoit les chevres sur l'opinion qu'elle conceut, que Pan avoit autrefois abusé d'une Nymphé dans les charmes d'un pro-

fond sommeil. Les laboureurs ne furent pas exempts de sa rage, car elle les attaqua en hayne de Ceres. Ceux qui cultiuent la vigne ressentirent les effects de sa cholere, non à cause qu'ils seruent Bacchus aux pressoirs, & à cultiuer sa vigne: car elle ne scauoit pas encore qu'il l'auoit violee, elle tua vn si grand nombre de païsans, & de bergers, que leurs cabanes furent toutes desertes & inhabitées. Aure ne se contenta pas de ceste vengeance, elle fut au Palais de Venus, où elle prit sa statuë, & la fouietta, & lia ceste Deesse, & la jetta toute nuë dans le fleuue Sangarie, rompant mesme l'image de Cupidon.

Aure sortit de la maison de Venus, & vint en vn petit bocage a desseing de passer sa fantaisie à la chasse, la douleur & le regret ne luy permirent pas de courre le cerf, elle se reposa au pied d'vn chesne, & fit ces plaintes.

Qui est celuy d'entre les Dieux qui m'a violée, si Iupiter ayant pris quelque forme estrangere (comme c'est sa coustume) m'a deshonorée dās le sommeil, sans crainte, & sans respect de Rhee qui est en ceste contree, ie feray la guerre au

ciel: Si c'est Apollon, ie ruineray Pythō:
si Mercure m'a trompee, & m'a endor-
mie avec sa verge, ie subiuguera le pays
d'Arcadie pour me venger de luy, me
faisant servir par Suade, qu'il estime tāt!
Si Bacchus a ravi mon honneur, ie m'en
iray au Palais de Cybele, à desseing de le
faire fuir, ie prendray mon arc & mon
carquois, & décocheray mes traicts con-
tre la ville de Paphos, & le pays de Phry-
gie: car ie veux faire la guerre à Bacchus
& à Venus. Mais vous, ô Diane! i'ay vn
iuste subject de me plaindre de vous, que
ne m'avez-vous tuee de vos fleches, pen-
dant que ie dormois estant encore
vierge.

Les larmes, & les sanglots luy ferme-
rent la bouche, la douleur la pressa de
telle sorte (lors qu'elle vit son ventre si
gros, & prest de'enfanter) qu'elle ne
longeoit à autre chose qu'à se tuer, &
auorter son fruit. Souventesfois elle
tiravn espee pour se la passer à trauers le
corps, elle descendit dans les grottes, &
cauernes des lyonnes pour y trouuer la
mort dās leur cruauté: mais ces animaux
se retiroient, n'osans offenser celle que
Bacchus auoit tant caressée. Son desef-

poir n'estoit pas sans quelque apparence de raison: car elle craignoit les reproches de Minerue, desirant de cognoistre celuy qui l'auoit violee, afin de luy sacrifier son enfant, en despit de ses amours, comme Procné tua Itys son fils le faisant manger à son mary Teree.

Cependant Diane qui n'auoit pas encore oublié les mauuaises paroles qu'Aure luy auoit dites autrefois, voulut se venger, & luy faire les reproches qu'elle auoit receu d'elle.

I'ay veu (ce dit-elle en se mocquant) le sommeil qui preparoit la couche nuptiale à la belle Aure. I'ay veu le ruisseau d'une fontaine qui a enyuré vne Nymphe. Je sçay le lieu & la place où on a dérobé les baisers amoureux, i'ay veu la montagne de Venus où les amans ont jouy de celle qui faisoit tant la rebelle. Dis-moy Aure, pourquoy tu marches si lentement? qui t'a appesantie? il me semble que tu as esgalé autrefois les vens en legereté? tu es mariee sans ton consentement, & si tu ne cognois pas ton mary, tu ne sçauois celer ton mariage: car ton ventre & tes mammelles en donnent vn fidele témoignage. Dis-moy

franchement qui est celuy qui ta violee?
Et vous Najades, ne cachez point dans
vose eauës le mary de la belle Aure? Ne
doute donc point que ie ne sçache ce-
luy qui t'a rauie, ie cognois fort bien ton
mary, encor que tu le vueille celer. C'est
Bacchus qui a forcé Aure, pendant
qu'elle estoit assoupie de sommeil: mais
puisque ce mal-heur t'est arriué, quitte
ton arc, & ton carquois, & prends les
cymbales, & les cloches de Bacchus: Je
te conjure, belle Nymphé, par ta virgi-
nité de me dire ce que ton espoux t'a
donné. Ne t'a-il point faict present de la
nappe d'un cerf pour couvrir ta couche,
ou des cloches. Je croy qu'il t'a donné
son Thyrsé pour dompter & vaincre les
lyons, ou des cymbales, dont les nour-
rices vsent pour appaiser les petits en-
fans.

Diane après auoir pris grand plai-
sir à l'irriter par reproches, se retira
incontinent apres dans vn bois où el-
le passa le temps à la chasse. Cepen-
dant Aure qui estoit à terme, com-
menceoit à ressentir les tranches de
l'enfantement, l'Echo faisoit reson-
ner & retentir aux rochers les douleurs

& ses gemissemens. Elle ne voulut pas appeller Diane à son secours, à cause des riottes qu'elle auoit eu avec elle, ny aussi y appeller les sœurs de Iunon, craignant qu'elles n'apportassent quelque dommage à son enfant, en hayne de Bacchus. Estant donc pressée des douleurs, elle fit ces plaintes en choler.

A la mienne volonté que ie veisse Diane & Minerue en la mesme peine que ie suis. Et vous, Menades, que ne publiez-vous que Diane est grosse, & que Minerue a le nom de Mere, encore qu'elle n'en ait point eu en sa naissance. Que ne vois-je la Nymphé Echo en ce mesme trauail, ayant succombé à la passion de Pan.

Belle Nymphé (luy respondit Diane) qui est celuy qui t'a flechie à l'amour, puis que tu estois si rebelle? D'où vient le lait que tu as aux mammelles, on ne peut pas asseurer que tu sois vierge? Je n'ay iamais veu, ny ouï dire, qu'une fille peust enfanter. Mais n'est-ce point que mon pere Iupiter a changé l'ordre de la Nature, & que les filles peuuent maintenant auoir des enfans sans le se-

cours des hommes? Il y a de l'apparēce: car tu es preste d'enfanter, encore que tu ayes conserué ta virginité. Je croy que tu n'as pas besoin de Diane à ton accouchement, aussi Semele mere de Bacchus n'a point esté secouruë, car les foudres l'ont accouchee. Aure, ne te fasche point de ce que tu enfante entre les rochers, Rheen'a pas eu meilleure condition en sa couche.

Aure, qui entendit ces reproches, se fascha, honorant Diane avec vne honte modeste. Cependant elle estoit pressée des douleurs & des tranches qui sont ordinaires aux femmes qui sont en travail d'enfant. Helas! la pauvre Nymphé ressentit alors que les douceurs de l'Amour se changent en amertumes. Elle desiroit d'estre encore vierge, faschee contre le sommeil qui l'auoit abusée. En fin elle accoucha de deux enfans. Diane ayant sceu sa deliurance, vint encore pour luy dire ces mauuaises paroles.

Belle Nymphé (luy dit-elle) à ceste heure que vous auez deux beaux enfans, donnez leur la mammelle. Ils crient, & vous demandent qui est leur pere, mon-

stez leur done celuy qui les doit nourrir & esleuer. Diane n'a iamais succombé aux charmes de l'Amour, aussi n'a-t'elle point d'enfans à allaitter. Vous n'avez point eu d'autre couche que les montagnes, ny d'autres couuertures que les peaux de Pantheres.

Diane se retira dans la forest, où elle entretint ses Nymphes des amours de Nicee. Bacchus se rencontra en cel lieu, & dit à Thelete fille de Nicee, se glorifiant des ruses & des artifices qu'il auoit praticquees pour raur les Nymphes.

Ce n'est pas seulement Nicee, qui s'est laissée tromper à la fontaine par Bacchus, nous auons encore joiuy de la belle Aure, à la faueur de nos inuentions. Nicee n'a pas beu seule de la liqueur qui enyure, Aure en a gousté à son grand prejudice: Mais vous Thelete, qui auez interest à mon contentement. Je vous supplie de prendre garde aux enfans d'Aure: car ie crains que leur mere, qui est possedee de rage & de fureur ne leur fasse quelque mauuaistour.

Cependant Aure, qui estoit atte-
nuee de trauail & de fureur, minut-

roit de mauuais desseins contre ses enfans.

L'Air & le Vent, (dit-elle toute en cholere) m'ont engrossée, aussi ie ietteray mon fruit au vent : le vent m'a espousée, & ie puis bien dire en verité que ie n'ay point veu d'homme qui m'aye embrassée.

Mourrez donc mes enfans ! ie ne vous ay pas engendrez, ie suis encore vierge, n'ayant point endurant le trauail de l'accouchement : ie voids desia que les lyons se pourmenent librement dans les forests, depuis que Aure ne leur faict plus la chasse. Resjouissez-vous Loups, les lievres sont bien meilleurs que les petits chiens d'Helicon, les Pantheres, & les Ours ne me fuiront plus, car mes dards n'ont plus la pointe aceree, & mon arc n'a plus de force.

Ceste Nymphe ayant faict ces extrauagances, prit ces deux enfans entre ses bras & les porta dans la grotte, les exposant aux Lyons, & aux Pantheres: mais ces animaux plus benigns qu'Aure, ne leur firent point de mal, au contraire, ils leur lecherent le corps,

& les Lyonnes les allaitterent. Cependant la passion possedit ceste pauvre Nymphede telle sorte, qu'elle prit vn d'eux, & le deuora. Et craignant les reproches de Diane, pour ceste action desnaturee, elle se precipita dans le fleue Sangarie, apres y auoir jetté son arc & son carquois. Iupiter eut compassion de sa fortune, & la metamorphosa en vne fontaine, qui coule de la montagne. Ses mammelles furent changees en sources, son corps & ses bras en ruisseaux, ses os en rochers, ses cheueux en fleurs, ses nerfs en jonc, & ses fleches en cannes.

Diane qui l'auoit tant poursuiue, s'appaisa, se deliberant de prendre le soin du petit Bacchus qui estoit demeure orphelin. Pour cet effect elle le mit en son chariot, & l'apporta au Temple de Minerue. Ceste Deesse le nourrit & l'eleua, comme elle auoit fait autrefois Erecthee. Les Citoyens d'Athenes se resioiuyrent grandement de la naissance du petit Bacchus, & firent plusieurs sacrifices en son honneur, chantans des Eloges & des Hymnes. Cependant Bacchus aprestant de victoires & de triom-

de Nonnus. Liu. XXVIII. 785
phes, estant lassé du sejour des mortels,
inonta au Ciel, où il recogneut les fa-
ueurs qu'il auoir receuës d'Ariadné,
passant le temps avec Iupiter, & Apol-
lon aux banquets solempnels, que les im-
mortels celebrent avec le Nectar, &
l'Ambrosie.

Fin des Dionysiaques de Nonnus.



EXTRACT DV
Privilege du Roy.



LE Roy, par ses Lettres
patentes, a permis à RO-
BERT FOÛET, mar-
chand Libraire Iuré en nostre
Vniuersité de Paris, d'impri-
mer, ou faire imprimer *Les Dio-
nysiaques, ou les voyages, les amours,
& les conquestes de Bacchus aux Indes:
traduites du Grec de Nonnus Panopo-
litain.* Avec defences à toutes
personnes, de quelque qualité
ou condition qu'ils soient, d'en
imprimer, vendre, ny distribuer
par tout son Royaume, d'au-
tres que de celles dudit Robert
FoÛet, pendant le temps de six
ans, à compter du jour qu'il
sera paracheué d'imprimer, sur
les peines portees par lesdites

M. J. J. J.

Lettres de Priuilege, données à
Paris le douziefme Auriil, mil
fix cens vingt-cinq, signees par
le Roy en son Conseil,

RENOÜART.

Acheué d'imprimer le 19.
Auriil 1625.

For the purpose of
the Commission
to the Commission
to the Commission

REMOVAL

Acting Secretary
of the Commission

Th Langin eva. 1

X

X

